

PALEMENE XIV 2006-2011

Tofa Hon TOLOFUAIVALELE FALEMEOE LEIATAUA



Itumalo Faaalaalafaga:

Aana Alofi Nu.2

Filifilia:

20 Aperila 2006

Tofia ma Fofoga Fetalai:

20 Aperila 2006

Faatauto:

20 Aperila 2006

Uluai Lauga Faa-Fofoga Fetalai:

20 Aperila 2006

Ua faafetai o lea ua talifuaitau le Taitai o le Itu Agai, le sui usufono mo Lefaga ma Faleaseela, le Afioga i le Suafa ia Le Mamea aua le saunoaga ma le tanoa a le Afioga i le Palemia, Susuga i le Alo o le Malietoa lau Susuga Tuilaepa aua lenei taeao matagofie.

Ua logoi logoa la tulaga uma aua ua faafofoga le Atunuu, e fai o le mamalu o lo o sasao nei ma le Aufaigaluega Paia a le Atua aemaise foi Samoa ua potopoto ma le faafofoga mai tua i aiga ma paaga ma le Atunuu atoa, aemaise lava le tapuaiga a le Afioga i Le Ao o le Malo. Ona faapea lea o sa matou tala, e fai foi o le saunoaga a le Afioga i le Palemia o lana faafetai mo le toe tulai mai i le tofi o le taitaiina o le Faigamalo; ua talifuaitau lau Afioga i le Taitai o le Itu Agai ae e le mafai foi ona tuuina i lalo le agaga ia te Au o Le ua i ai le faatuatuaga o le Maota aua le tofi o le Fofoga Fetalai e tausia le Nofoa o le Palemene o Samoa. O le mea lea e momoli atu ai foi i le agaga mauualalo ma le lagona o le faafetai i le Atua ua ae ma le malo lenei aso ua loa ona taupoina ma tatou lavasi i ai, a o lenei ua faataunuuna e le Atua i Lona agalelei ma Lona filemu.

E le tau fita faafogafoga le Atunuu i se lauga a Leulumoega, leaga o le lauga e teu ai mea uma, e salani ai le tofa ma le moe, o lea foi ua aumai le faatuatuaga ia te au. O le mea lea le paia e o le Maota ma Samoa ua potopoto, o la outou pule lea. E vaivai le auuana, e le lava foi le malosi o le tagata e fai o le tofi o le Fofoga Fetalai a o le Afioga i le Palemia ma le mamalu e sasao nei; tatou te faamoemoe tasi i le alofa ma le agalelei o le Atua. O le Atua e taiala, o le Atua e taimua, e muaau ma muliau; a aunoa ma le Atua e aefua o tatou faiva.

O le mea lea e molimoli atu foi le agaga faafetai; faafetai tele i la outou faatuatuaga aemaise foi le tapuaiga a le Atunuu, o lenei ua tatou oaoa i Faleseu ma tatou aeae i lenei taeao ona o lo outou taupati mai, ae ala lava i le alofa tunoa o lo tatou Matai Sili i le lagi. O le mea lea, lafo maia lo outou faatuatuaga.

E talitonu foi o lena ua tapena faafaiva o fafine toaga e le Failautusi galuega e tatau ona amata ai le tatou Paeaiaga. O

lena ua tofu le sui usufono mamalu ma tusi o Tulafono Tumau faapea foi le Faavae o le Malo o Samoa. Ua tele lenei taimi o le a tuuina atu tatou te faitau ai aemaise o uso fou ma tuafafine i outou sa, o paia ma mamalu; e manaia lava le taotooto ma faitau i Tulafono Tumau. A tatou o lava e taaalo i Tulafono Tumau ma faataoto ai outou finagalo i le tofa ma le moe, e leai se laufai e masae; e leai foi se mea o le a tulai mai o le a nunu ai le toau o ufi i totonu o le Maota a o faafogafoga Samoa.

O le mea lea, e tele lava tulaga taua o lo o faatulai atu i Tulafono Tumau e limataitaiina ai le faafoeina o a tatou galuega aemaise lava tulaga aloaia o le Nofoa ma la outou faaloalo aua o lo outou mamalu i la outou pule lea ua tulai atu ai le sui usufono mo Aana Alofi Nu.2 e tauave le tiute faa-Fofoga Fetalai. E faapea foi le lagolago mai a le Sui Fofoga Fetalai aua le tofi e pei ona tatou faataunuuna ai le tatou faatautoga i lenei taeao ma lenei aso.

Ona faapea lea o sa matou tala; ia tatou talosia ia le Agaga o le Atua e galue i la outou tofa ma le moe ma le finagalo ina ia faapena ona manuia tiute ma faiva ma le faatuatuaga o Samoa ua tuuina mai ia i tatou tatou te galulue ai.

Ma lou agaga faaloalo o lau faaaliga lea, tau lava o se poula la matou faafetai.

Tofa ALE VENA ALE

Itumalo Faaalalafaga:

Faleata Sisifo

Filifilia:

18 Me 2010

Faatauto:

28 Me 2010

Lauga Faataupou:

14 Iuni 2010

Lau Afioga i le Fofoga Fetalai ma le paia o lenei Palemene ma lenei taeao, faafetai i lau Afioga mo le avanoa ua tuuina mai i lou nei sui usufono aua lenei taeao ma le faagasologa o Tualumaga a le Palemene. Sa i ai le manatu faapea ai o le a tamua le Afioga i le Aloalii po o le Afioga foi i se tasi o sui usufono mo Safata, Afioga Hon Palusalua Faapo II. Ae ui o lea o le a taumafai atu le sui usufono mo Faleata Sisifo i lenei taeao i le Fonotaga aua foi le faaloalo a lau Afioga i le Fofoga Fetalai, aua na o Afono lava na mele ai manu.

Tapuai maia ma le manuia – lau Afioga i le Palemia, Minisita o le Kapeneta ma sui usufono mamalu o lenei Palemene, tapuai maia ma le manuia.

Ou te muai taia le Tafaitoa e pei o le Fetalai na le ava i Utumalama ma ou faapoipoi lilia faaalofo Sa o Tupu nai le malae o le Vavau aua ou paia Samoa e amata mai le Tai Samasama o le Tuimanua seia paia Fili ma Puletuu na tauilo ai Malo. Le paia aua Aiga o Tupu, Aiga o Nofo, Aiga o E'e, Aiga o Papa ma Aiga na Tafai. Le usoga a

Saunoaga Faataupou a Sui Usufono 1961-2011

Tumua ma Pule, Ituaa aua oe Faleata ma le Alataua, Aiga i le Tai ma le Vaa o Fonoti.

Tulouna Lana Afioga Mamalu O Le Ao o le Malo o le Malo Tutoatasi o Samoa, lau Afioga Tuiatua Tupua Tamasese Efi ma le Masiifo, lau Afioga i le Sui o le Fono a Sui Tofia, lau Afioga ile Tuiaana Tuimalealiifano Vaaletoa Sualauvi ma le Masiifo, tulouna lau Afioga i le Palemia o le Taitai o le Malo, lau Susuga Tuilaepa Sailele Lupesoliai Malielegaoui, Minisita o le Kapeneta, lau Afioga i le Fofoga Fetalai, Afioga i Minisita Lagolago ma sui usufono mamalu o lenei Palemene. Lau Afioga i le Faamasino Sili, su o Malo mai fafo, Faauluuluga o Matagaluega, Faalapotopotoga Tumaoti a le Malo ma le malosi o le aufaigaluega a le Malo, o Pulega ma Faauluuluga o kamupani ma pisinisi o lo o tautuaina lo tatou Malo i so o se vaega.

Tulouna le Faigamalo o tatou uso i Tutuila ma Manua, aua le afio o le Kovana Sili, le Lutena Kovana, le Peresetene o le Senate, le Fofoga Fetalai, Maota e Lua o le Faigamalo a Tutuila ma Manua. Ia o le paia lava lea aua Sua ma le Vaifanua, Fofu ma Aitulagi, o Saole, Saleaamua ma le Launiu na Saelua, le afio o le Maoputasi le Auvaa Tootoo ma Faatui, le paia i le Manuatele.

Ae le faagaloina ai le paia i Ekalesia Kerisiano uma i Samoa, le paia i Ao o le Faalupega, o Faafeagaiga Taulagi o lo o faapunapaulia i nuu ma afioaga, aua o lo o latou faanonomanu ma tatalo i le Atua aua se manuia o Samoa ma ona tagata lautele, aemaise i ona Taitai ma upufai o malo.

O ou paia na Samoa, o paia ua uma ona tafaitoa, o paia ua uma ona tafaitau, tafaitoto, o paia ua uma ona tafai malo, o paia foi ua uma ona tafai faa-Faleupolu, tulou, tulou, tulouna lava.

Ua fofoga avatuli ua fofoga avafatafata, ua faafofoga le Atua i le taulaga molia e lau Afioga i le Fofoga Fetalai i lenei taeao, aua le tapuaiga a Samoa, aemaise le alofaiva o lenei Palemene i ana Fonotaga, ma ia tumau mai pea le manuia o le Atua ia Samoa ma ona tagata. Ia liligi faaua mai le lagi manu aua Samoa ma lona lumanai, aemaise i ona Taitai ma upu fai o lenei Malo o Samoa.

Ae avea ia lenei avanoa, ou te lagona o se avanoa e aupito sili ona taua. Ou te molimoli oo atu ai mai le taele o lou agaga, le loto faagaetia ma le faafetai tele i le paia i lou Itumalo faa-faipule o Faleata Sisifo i la outou faiga filifiliga i le tatou Faiga Palota Laitiiti na sei mavae atu nei, ua avea ai au ma o outou sui usufono i le Palemene e pei ona ou tulai atu ai i lenei taeao.

E momoli atu le agaga faafetai. Ao ai ea le tagata ma le atalii o le tagata ua e manatu ane ai e ala i lau palota? Faleata Sisifo o lau pule lea ma lau faaloalo, faafetai.

Le paia aua le alo o Malietoa le Falefia o alii, le fetalai ia Ulugia ma fuaifale o le aiga o Sa Ulugia, le paia aua le afioaga i Vaitele, susu o Mataia o le Tama a le Fale, faapea

foi le afio o le Aloalii aua Galumalemana, Pula ma Toi ma Tulaga. Le paia i le Falesataalaua ma alo o le Tuitoga le afioaga i Saina, aua Lauaki ma Motuopuaa, e momoli atu le agaga faafetai. Faafetai i nuu uma lava ma pitonuu o lo o i le lio o le Itumalo Faa-Faipule o Faleata Sisifo, ou te matua faafetai tele atu i le tatou Faiga Palota na sei mavae atu nei.

Faafetai i lo tatou nuu Toamua i ona fuaifale e fia, faafetai le faaloalo, faafetai faapitoa i oulua fetalai a Igoa Matua, lau Fetalai Ulu Vaomalo Kini ma Ulu Pisimaka. Ua ou lua tapuai, seu tapuai ma le mafaufau, ae avea loouluu uso e fai ma o tatou sui i le Faiga Palota. E te lua le i faatamala, sa oulua sautia i le u, aua le tatou Faiga Palota. O le a le galo Afia isi ona vao, e manatua pea Pule ae le o Faalaeo. O oulua lava o fetu tai matagi, o tootoo au, tofa ma Faleata e puipui i le paia o Tapaau, e tausia nuu ma Ekalesia ma le Atunuu. Faafetai i lo tatou nuu Toamua, se ua e sola i le sola a le Faleata, po o fea lava sa tatou fetalalolo i ai i le Faiga Palota i le tetele o faiga faatosina, ae lele lava le toloa ae maau lava i le vai. Na o Faleata e fai ai le upu, po o fea lava le itu taua o le Tuamasaga po o Samoa e 'au ai Faleata, e tu manumalo, faafetai e te masani i le osi toilalo, e te masani i le faaea Atunuu. Ae a anamua? E tele tausaga o pulea e atunuu o le Pasefika Samoa, a lea na alaga ai le Tupu o Talaifeii, ina ua tuufaatasia e fanau a Ale ma Ulu Samoa ina ia tauina le taua, a lea na malele leotele ai le Tupu o Talaifeii; "Ua malie toa, ua malie tau, afai ou te toe sau ou te sau i le auliuli folau ae le o le auliuli tau." Toamua, ua e i totonu o le talafaasolopito o le faaea Atunuu. Ae a le Malo? E te le o faatamala, leaga o le Vaimauga ma Faleata o lea e nofo ai i luga le Malo, tatou tautua Malo ia Samoa ma lo tatou Atunuu. Faafetai tele atu e tusa ai ma le tatou Faiga Palota.

Le paia e o lo o tatou Itumalo, e leai se manuia o ia te au, e na o le Atua o lo o i ai le sosia ma le tamaoiga, e leai se isi tamaoiga i tala atu o le tamaoiga o lo o i aao o lo tatou Matai Sili i le lagi. O a mea ua outou aao i ai e tusa ai o le tatou alo atu mo le tatou Faiga Palota, e ui lava ina sa nunu le toau, tele faafitauli ua vesia ai nuu ma aiga, ae faafetai i le Atua ua Ia aumai Lona laolao, aumai Lona finagalo, ua faatoafimalie ai lo tatou Itumalo seia oo mai i lenei taimi, aua e leai so tatou manatu e toe faia se tatou Faiga Palota Laitiiti i lenei taimi o le tausaga, a o tatou aga atu i le faaiiuga o le Paeai Faa-Palemene. Ae talu ai Sili ma Vaiafai ua mai ai le vai o le Tagaloaalagi, le finagalo o lo tatou sui usufono o Le sa tulai nei i le foe, na mafua ai ona faamavae. E le'i fesili atu foi le tatou Itumalo, po o le a so outou finagalo? Le paia e o Faleata, e leai se isi e na te fuaao Faleata, leaga o le Itumalo e fai ai le upu. O lou faalupega, e faleoo ia te oe Faigamalo. O le a le uiga, e saili ia te oe le moe ma le tofa, a oo ina lualuta le tai o Faigamalo, e fesili ia te oe Faleata. Faafetai, ia o le laau lava na fafau e Hamanu e toe tautau ai lava, e le mafai

Saunoaga Faataupou a Sui Usufono 1961-2011

ona sese upu o le Tusi Paia. Ae fai mai, e le gata ina matua 'ai e manu le tino ae na matua malepe lava.

Le paia e o lo tatou Itumalo, ia tapuai maia ma le manuia. O a taimi o totoe o lenei Paeaiga, o le a ou taumafai ma le vaivai ou te tautuaina lo tatou Itumalo i so o se itu e mafai ai, aemaise le faatalatalanoaga ma le Malo i le tele o mataupu e fia moomia e lo tatou Itumalo e faaleleia ai lo tatou Itumalo, aua le lumanai o le Itumalo Faa-Faipule o Faleata Sisifo.

Lau Afioga i le Palemia ma le Kapeneta, le tatou Faigamalo o le HRPP. E tele mataupu e fia faataoto atu i tafatafa o lau Afioga ma le Faigamalo, ina ia alofa lau Afioga e silasila totoa i ai i Teuteuga o le Tulafono o Faiga Palota ina ia mafai ona lua ni sui usufono mo Faleata Sisifo. Lau Afioga i le Palemia, se faafetai malo i lou finagalo. O lea ua e saunoa manino i le tatou Fonotaga i le Aso Faraile talu ai nei, ua atagia manino mai ai le finagalo o le Malo, o le a laa le malo ina ia faia le tulaga lea ina ia mafai ai ona maioio lelei faiga filifiliga, aemaise o le oia o le tofi o lenei Itumalo o Faleata Sisifo.

Ou te faafetai tele atu i lau Afioga ma le Malo. E talosagaina lau Afioga i le Minisita mo Punaoa Falenatura ma Siosiomaga, e tasi lea mataupu o lo o moomia e lenei Itumalo e oo mai i le taimi nei. E le i mautu tulaga o fanua o lo o nofoia e lenei nuu, amata mai i le taimi o Tofilau Eti Alesana, le Afioga i le Tootoalii. Ua uma ona malele Tofialu, Toamua, i faatalatalanoaga ma le Malo, e le mafai ona toe aveesea eleele ua outou nonofo ai. Lau Afioga i le Minsita, e talosagaina ma le faaaloalo tele lou finagalo ma le Malo, ina ia alofa faamatuu mai eleele nei mo le matou Itumalo, aemaise ai le eleele lea e 14 eka lea e faalava atu i le tuaoi ma Saina lea e nofoia e le afioaga o Vaitele. E oo mai i le taimi nei lau Afioga i le Minisita, e le'i mautu. E talosagaina lau Afioga ina ia mafai ona foia ia faafitauli i toe taimi o totoe o lenei Paeaiga, aemaise ai lau Afioga eleele ia o lo o i tuamaota tonu lava o Toamua, le 43 eka poloka ma le 35 eka. Lau Afioga i le Minisita mo Punaoa Faalenatura ma Siosiomaga, e talosagaina lau Afioga, ina ia alofa e faamatuu mai eleele nei mo lenei nuu. E toatele le faitauaofai o tagata o lenei nuu, ae ua le lava eleele e galulue i ai.

O auala galue lau Afioga i le Minisita mo Galuega, Felauaiga ma Atinae Esee. E oo mai lava i le taimi nei ua leva foi ona matou taumafai, e toe lava o Toamua, Puipaa, Safune ma Leusoalii e lei faia o matou auala. Ua uma uma auala o le Tuamasaga, faasolo mai o la ua i ai le auala o le afioaga i Saina, ae toe lava o Toamua. Ua ou faamolemole atu i lenei taeao lau Afioga i le Minisita, sei alofa, sei e vaai ane i se vaegatupe, a le o lena foi, ia alofa lau Afioga e taatia nisi galuega o nisi auala, ae sei alofa sei taumafai mai le matou auala galue o lo o toatele tagata o lo o nonofo i uta – ma e moomia le faia o ia auala lau Afioga ma le faaaloalo lava.

O eleele o le Itumalo lenei i uta i Tapatapao, Le'aupuni ma Laloanea lea o lo o galulue i ai le afioaga o Vaiusu, lau Afioga i le Minisita e fia faamautuina eleele nei, o eleele nei na tuu mai e lisi mai le Malo e galulue ai le Itumalo o Faleata Sisifo. A o le mea lea ua i ai nei, ua alu atu lava le tagata ia e malosi ta le vao ma fai ai ana faatoaga, fai ai pa povi. E talosagaina lau Afioga, pe mafai ona toe silasila totoa, ina ia mafai ona faamatuu mai eleele nei maioio lelei e mafai ona faalisi, aua le tautuaina o le Itumalo o Faleata Sisifo.

Lau Afioga ma le faaaloalo lava, o nuu e i ai Falelauniu tai ma Nuu, o lo o matua manomia lava le suavai. Ua taoto auala ma ua i ai moli aemaise lava o Falelauniu tai. Na ou taamilo ai i le vaitaimi o le Faiga Palota laititi o lo o matua manomia lava e lou Itumalo le suavai aemaise lava o nai tamaiti aoga i Falelauniu uta, o lo o tau autovaa mai tai. Ou te manatu lau Afioga i le Palemia ma le Kapeneta aemaise o le Faiga malo a le HRPP, e matua alaga tataua lava ona i ai se aoga tulagalua i Falelauniu uta e aotauina ai alo ma fanau o lenei Itumalo.

O le ogatotonu o lenei Itumalo o Faleata Sisifo aemaise o Vaitele, ua matua tele le faafitauli o lo o i ai i le le mafai ona foia aua ua autovaa mai ai le paia ma le mamalu o le Atunuu ma latou nofoia. E talosagaina ai lau Afioga i le Palemia, ua matua alaga tataua ona i ai se Ofisa o Leoleo i totonu o le talafatai o le Itumalo o Faleata Sisifo. O nisi taimi e fiu e tau valaau mai le taavale a Leoleo, ae faigata. O le tele o taimi e fesoasoani le pule mamalu a alii ma faipule i le foia o faafitauli. E fiala lava le agaga aua le faatoafimalieina o ni vevesi e tulai mai i totonu o le Itumalo.

Lau Afioga i le Fofoga Fetalai e ala atu i lau Afioga i le Palemia, e tele lava nisi mataupu e fia tuu atu i ou tafatafa, ina ia alofagia e lau Afioga ma le Faigamalo ia lenei Itumalo aua sona manuia i le lumanai.

Greetings to all of you non Samoan speaking voters in our Territorial Constituency of Faleata West, to all the palagi voters, all races especially the Chinese. Through Parliament today I extend to you all my heartfelt, gratitude and appreciation, for your confident and trust, not only for your votes but for your moral support during our recent by-election. You are hard working, honest and you've contributed more than enough to this Government and the economy of this country.

I thank you very much for supporting me in our by-election. My capacity and role as your representative in Parliament today is to serve you and today you have my word. I will help you in anyway I can to serve you humbly, with dignity, honesty and I will mostly love you all.

This Parliamentary term will end in the next six months and I will also be a candidate for the upcoming General Elections, and I again ask for your votes so that I can serve you a full term from 2011-2016. Only a one vote majority

is indeed needed to be re-elected as your representative and your member for Parliament for the upcoming General Elections.

Le paia e o lo tatou Itumalo, o le agaga fiafia ma le faafetai lena e tusa ai o le tatou faiga filifiliga.

Faafetai foi i lou nuu, lau tofa le paia aua Ale ma Ulu ma o la aiga, ma le gafa a Toe ma Satunumafono, Fetalaiga a Vaaulu na Falelima i ai Aiga, Falevalu ia te oe Pou o le Fale o Malietoa. E faafetai tele atu, o lea foi ua i ai lo outou finagalo o le a toe avea foi Au ma o tatou sui faatu i le Faiga Palota tele a le Atunuu o lo o lumanai nei. Ou te momoli atu ai le faafetai tele i lo tatou nuu, i la outou tofa paia ma le tofa faatupu aemaise ia oulua Fetalaiga i le va Matua o Ulu ma Ulu ma lo oulua Aiga.

Ia saga faamanuia mai le Atua i le tapuaiga a Samoa, le paia o le tapuaiga a lo tatou Itumalo. Ia soifua manuia lau Afioga ile Fofoga Fetalai, le Afioga i le Palemene ma Minisita o le Kapeneta ma sui usufono mamalu o lenei Palemene.

Ia manuia tele Taulumaga o lenei Fono, ma ua lagolagoina foi e le sui usufono mo Faleata Sisifo faataatiaga uma o Tupe Faaopoopo ma le Tala o le Tupe i lenei taeao. Soifua.

Afioga ANAULI POFITU FESILI



Itumalo Faaalalafaga:

Vaimauga Sisifo

Filifilia:

13 Aperila 2006

Faatauto:

20 Aperila 2006

Lauga Faataupou:

14 Iuni 2006

Lau Afioga i le Fofoga Fetalai ma le mamalu o le Palemene, e lagona lava le faamaalili i lenei taeao; e le maalili ona o le malulu o le Maota nei, ae e maalili ona o le fefe ma le popole. O aga lava ia a sui usufono fou, ae ui i lea tapuai maia o le a fai atu se sao o le ta Itumalo o Vaimauga Sisifo.

Lau Afioga i le Fofoga Fetalai ma le mamalu o le Palemene, ua uma ona siitia e lau Afioga le faafetai i le itula ua fano aua lo tatou vatapuia ma le Atua; o le Atua o Malo ma le Atunuu, o le Atua foi o Itumalo, nuu ma aiga. Ia tau ia ina ia togi pa tau i le ave i le faaopoopoga i la tatou viiga ma le faafetai, o lenei ua mafai ai ona tatou fuatia i ulupapaga i lenei itula i lona alofa. E le gata i lea o la latou olega ina ia fesoasoani mai le mana o le Agaga Paia ina ia foai mai le atamai ma le faautauta ina ia utu ma tofolau i o outou finagalo ma o tatou loto, tatou te faia ai ma le alofa moni ma le faamaoni a tatou filifiliga ma faaiuga mo se manuia o Samoa a taeao.

Lau Afioga i le Fofoga Fetalai, e momoli atu le faamalo ma le faafetai i le Auaifaluga paia a le Atua, sa outou tui le mulipapaga ma faanonomanu i le Atua mo se manuia mo Samoa i le itu faaleagaga faapea foi le itu faaletino – faafetai le tapuai ma le punouai i le tatalo.

E momoli atu foi le faamalo ma le faafetai i Lana Afioga Mamalu O le Ao o le Malo lau Afioga i le Tapaau Faasisina lau Susuga i le Malietoa, faapea foi le mamalu mauuluga i Sui Usufono o le Fono a Sui Tofia, lau Afioga i le Faamasino Sili ma le Vasega o Faamasinoga, sui o Malo mai fafo o lo o fai paaga ma fesoasoani mai i lo tatou Atunuu. O le paia o Aiga ma a latou Tama, Tama foi ma o latou Aiga, le mamalu tele i le Usoga a Tumua ma Pule, Ituau ma Alataua, Aiga i le Tai ma le Vaa o Fonoti, faapea Faleupolu o Tofiga. E momoli atu foi le faamalo i o tatou uso i Sasae; i le afio i le Alii Kovana ma le Sui Kovana, le Fofoga Fetalai faapea Maota e Lua. O le paia lava lea ia Sua ma le Vaifanua, Fofa ma Aitulagi, Saole ma Saleaamua ma le Launiu na Saelua, Tama a le Manuatele faapea Faatui o le Motu ma Auvaa o Tootoo.

Faafetai le tapuai i lou Itumalo o Vaimauga Sisifo; le paia lava lea i le afio o Alo o Sina faapea le fuaifale o Salevalasi, afio le Matua ia Leupolu ma Usoalii ma Aiga faapea le fetalaiga ia Atoafuaipolu ma Alo o le Malietoa; alaalatai lo ta toalua Samau Feagaimaalii le Faletolu faapea le Vainalepa ma upu ia te oulua Tuisamau.

I le paia mauuluga foi i le afio o Tofaeono, Asi ma Patu, le mamalu ia te Oulua na Tai ma le Nofo a Ituaga ia Fuata, le afio o Usoalii ma Sa Ataga. Afioga Tapunuu lau Afioga Soialo, eetai le matua ia Feetau ma le mamalu tele o le Auaifaluga paia a le Atua i Fatafitaluga e fia i totonu o le ta Itumalo o lo o outou nonoina manu aua se manuia mo Samoa. O le itupa i faletua ma tasi ma saoa faapea aumaga ma le malosi o le ta Itumalo, faamalo fai o le faiva. E ui ina faatu i Fagalilo le Tapaau o le Alataua, pe tua ma ni a lo outou finagalo faaalii i le talosaga e fia avea lou nei tagata ma se tasi e auauna ma fofoga tau momoli i lo ta Itumalo i upufai a si o tatou Atunuu, ae sa tuu atu pea i le musmusuga a le Atua. O lenei ua e to pule, faafetai tele lava. Sa lilo ia Asomua o le a sii lona fale i luga o le mauga ae o lenei ua malie o, malo fai o le faiva o le faaloalo. O lau tatalo e pei ona ou tauto ai i le Palemene, ia fesoasoani mai le Atua ia te au i le faatinoina o tiute ua tuuina mai e le Palemene ma ni galeuga ia ou faatinoina.

E avatu foi le faamalo i ou uso a sui tauva sa faia i ai le filifiliga a lo tatou Itumalo. O le mea moni, ia tatou fealofani.

Lau Afioga i le Fofoga Fetalai, e tele ni itu taua o lo o maitauina e lou sui usufono mo lenei Itumalo e alagataua ona fofogaina aua se finagalo o lenei Palemene. E le taumateina o lenei Itumalo o Vaimauga Sisifo e aupito sili lona faitauaofai i Itumalo uma o le Atunuu. E tusa ma le 25,809 e tusa ai ma le tusigaigoa i le 2001, pe tusa lea ma

Saunoaga Faataupou a Sui Usufono 1961-2011

le 16% o le faitauaofai o le tatou Atunuu. A faatusatusa i isi tusigaigoa, o le 1991 ma le 1981, pe lalata i le 1000 tagata e faaopoopoina i lenei Itumalo i le va o le tai 10 tausaga. E tusa ma le 51 nuu ma alalafaga o lo o aofia i totonu o lenei Itumalo.

Lau Afioga i le Fofoga Fetalai, mo le faamalosia o le mau a lenei Itumalo, i le tusigaigoa a le motu i Salafai i le 1991, e 45,048 tagata; i le tusigaigoa i le 2001 e 41,826 le faitauaofai, ma ua mautinoa mai ai i le pau o le faitauaofai o lenei mamalu o le Atunuu ua agai mai i Upolu nei ma alaala i lenei Itumalo ma nuu tau lalata i le taulaga ona o galuega, aoaoga faapea ma fanua e umia saoloto. Pe a faatusatusa fuainumera lau Afioga i le Fofoga Fetalai, e mafai ona faapea atu e ova atu ma le afa o le faitauaofai o Salafai i le 2001 le faitauaofai o lenei Itumalo po o le 25,809 i le 41,826, ma o lea fuainumera o lo o faatupulaia pea e oo mai i le aso.

E faapea foi i tagata palota; i le palota 2001, e 5,574 sa resitalaina i lenei Itumalo. Mai i le palota e pei ona mavae atu nei e 4,526 pe tusa ma le 3,000 e na liliu i le palota agai i isi Itumalo ona o sootaga faamatai. A faatusatusa foi i isi Itumalo e tai lua sui usufono, e tai faaluaaina E e palota i isi Itumalo ona maua lea o le tele o le aupalota i Vaimauga Sisifo. O le tatalo la i lau Afioga i le Fofoga Fetalai, afa'i e faaoga le faitauaofai o lou Itumalo po o le aupalota, ua alagatatau ma talafeagai le faaopoopoina o nisi sui usufono se lua mo lenei Itumalo.

Lau Afioga i le Fofoga Fetalai, o sui usufono o le motu i Salafai, e 21. E tatalo atu, e le mo le afa o sui usufono o Salafai e faatusatusa i fuainumera ae mo ni sui usufono faaopoopo se lua ona fa ai lea o sui usufono o lenei Itumalo o Vaimauga Sisifo.

Lau Afioga i le Fofoga Fetalai ma le mamalu o le Palemene, o se sao taua o lenei Itumalo ma le nuu o Tanugamanono, o le faleletise. Ua sili atu nei ma le 30 tausaga e pei ona maua mai ai le 80% o le malosi faaletise i le Atunuu. I le taimi nei, ona o le faatupulaia o le faaogaina o le eletise e le Atunuu, ua avea lea ma faafitauli ogaoga i le nuu o Tanugamanono ma isi pitonuu tau lalata ane ona o le malosi o le leo o afi eletise aemaise ai taimi o tau afiafi seia oo lava i le valuapo. Ua tele foi se afaina i le kasa o le suauu mai afi ma le galulu o fale tau lalata ane ua aafia ai le soifua i gasegase o taliga ma le ulu. E tatalo atu lenei Itumalo mo se faamanuiaga i aiga o lenei nuu o lo o aafia mo ni tau i aafiaga, e pei ona faaalai.

Lau Afioga i le Fofoga Fetalai, o le manatu o lenei Itumalo, pe le i alagatatau nei ona siitia le afi eletise i se isi nofoaga e foia ai aafiaga ogaoga e pei ona tulai mai i le nuu o lenei Itumalo? Mo le agai i luma, o le tele o atinae o lo o faaopoopoina foi lena o le manaomia o le eletise e le tatou Atunuu.

Lau Afioga i le Fofoga Fetalai, e momoli atu le faafetai tele a lenei Itumalo i le Afioga i le Minisita mo Galuega, Felauaiga ma Atinae Eeseese e pei ona mavae atu nei

faapea foi le Minisita o lo o i ai nei ona o auala o lenei Itumalo e pei ona sa ou talosaga atu ai e aofia ai auala e fia galueina ma faataina, e pei o le auala i le aoga a Manumalo i Leone, auala i le nuu o Ueligitone i Magiagi e ala atu i Tanugamanono, le ala mo Papauta-uta, le auala mo Vaoala, le auala mo Magiagi-uta, le auala mo Lalovaea i le nuu, ala i Alamagoto, le toe faataina o auala i Vaivaseuta, le toe faataina o le auala i Magiagi i le nuu, le toe faataina o auala i Vailima agai i Alaoa, le toe faataina o le auala i Vaoala faapea ma le tele o nai auala felavesai i totonu i lou Itumalo.

Lau Afioga i le Fofoga Fetalai ma le mamalu o le Palemene, o lo o maitauina pea e lenei Itumalo le siisii pea i luga i tausaga taitasi o le tau o le soifuaga. E ioe se manatu i le mafuaaga o le siitia o le tau i fafo atu o Samoa. E manatu lenei Itumalo, atonu o le fesoasoani i lenei faafitauli o le siitia lea o le aoga o le tatou tala, ia talafeagai ma le tupe po o le tala Niu Sila. O le tupe a Toga ma Fiti e fai lava sina malosii tele. Lau Afioga i le Fofoga Fetalai ma le mamalu o le Palemene, o le a tele se tupe i lima o le Atunuu pe a toe siitia i luga le aoga o le tala. E faavae se manatu o lenei Itumalo ona e tau leai se tatou oloa e auina atu i fafo ae o tupe a tagata tafafao mai o lo o faapea ona lualuga lo tatou faamoemoe i ai. I se faaitaiga faigofie; o le paelo suauu i le taimi nei i fafo, e USD\$60, a faatau i tupe Samoa e SAT\$156. Lau Afioga i le Fofoga Fetalai ma le mamalu o le Palemene, o se manatu lena o lenei Itumalo e foia ai le agai pea i luga o le tau o le soifuaga.

Lau Afioga i le Fofoga Fetalai ma le mamalu o le Fono, i le Lipoti a le Faletupe Tutotonu o le 2004 o lo o manino ai le siitia pea o tupe mai tagata tafafao maimoa i tausaga taitasi: \$116.9milionia i le 2000, \$135milionia i le 2001, \$137.6milionia i le 2002, \$144.6milionia i le 2003 ma le \$165.0milionia i le 2004. Lau Afioga i le Fofoga Fetalai, e maitauina pea e lenei Itumalo le anoano o fesoasoani o lo o maua mai i Niu Sila ma Ausetalia. Peitai, o le fesoasoani sili lava o lo o faia e Niu Sila i lalo o le tatou faiga faaleuo o le tatala mai lea o le faitotoa po o le quota system i tausaga taitasi mo o tatou tagata e galulue ma nonofo i Niu Sila. Ona pau le talosaga, ia tau faafaigofie ona maua galuega ma le sponsor. E tatalo atu ai i lau Afioga i le Fofoga Fetalai, ina ia talosagaina ma le malosii le Malo o Ausetalia mo le tatalaina mai o avanoa e galulue ma nonofo ai o tatou tagata i totonu o Ausetalia i lalo o se quota system faaleuo e pei foi o Niu Sila.

E maitauina e lenei Itumalo le maoae pea o seleni o lo o faamomoli mai fafo i alo ma fanau i tausaga taitasi ma e sili atu i se isi lava alagatupe o lo o sau i totonu o le Atunuu. O le Lipoti a le Faletupe Tutotonu o le 2004 i tupe o lo o auina mai fafo: o le 2000 e \$130.4milionia, 2001 e \$153.8milionia, 2002 e \$175.5milionia, 2003 e \$184.4milionia, ma le 2004 e \$2,007.2milionia. Lau Afioga i le Fofoga Fetalai ma le mamalu o le Fono, o nei tupe e

faatupulaia pea ma ua tele ina manuia uma ai le Atunuu atoa aemaise ai lava nuu i tua i le siitia o le soifuaga. O lenei taimi ua tau le vaai se fale afolau i nuu i tua, ma ua toetiiti lava tofu le aiga ma le taavale afi, televise ma le pusaaisa atoa ma le tausiga faaletino, ua maua lava mea lelei i aso uma.

Lau Afioga i le Fofoga Fetalai, i le Tala Faatatau o le Tupe e pei ona tuuina mai o lo o faatuina mai ai le toe faaopoopo o le threshold tuusao o le au lafo lafoga taitasi mai le \$10,000 i le \$12,000, ma lafoga a kamupani ua pau i le 2% ma le siitaga o le VAGST i le 2¹/₂%. E fautuaina ma le malosi le Matagaluega mo le faamalosi o le aoina o le VAGST i pisinisi taitasi, ma atonu ua talafeagai i lenei taimi ona tagatagai le Malo i isi auunaga e le o aafia ai le VAGST.

Lau Afioga i le Fofoga Fetalai ma le mamalu o le Palemene, o so o se Atunuu lava o le lalolagi e faamemelo lava i lona laumua, po o le vaega autu ua faatauina e ogatotonu i ai mea uma. O se Atunuu e pei o le laumua o Tokyo i Iapani, Uosigitone i Amerika, Ueligitone i Niu Sila ma isi faapena foi le taulaga i Apia e pele ia i tatou uma ma e faapena foi i se lagona o lenei Itumalo. A silasila lau Afioga i le Fofoga Fetalai o lenei Itumalo, e 90% tupe o lo o maua mai ai a le Atunuu atoa e afua mai i pisinisi, kamupani, fefaatauaiga atoa foi ma tupe o lo o maua mai i tagata faigaluega, o lafoga, o fale faigaluega, fale talimalo, faaogaina o le eletise, aoga maualuga, falemai, telefoni ma Iunivesite aemaise ai o le taunuuga o e malga tafafao maimoa mai i le Atunuu. O tupe foi o lo o galueaiina e lenei Itumalo o lo o faapea ona faalagolago i ai le faasoa mo le Atunuu atoa. Afai o le a faaletonu le taulaga i le faaletonu o auala, falemai, moli, vai, fesootaiga, eletise, femalagaiga, fale ma le tele o isi itu tau auunaga, o lona uiga o le a le maua uma ia tupe o faamanuiaga.

Lau Afioga i le Fofoga Fetalai, ua tata nei loa ona faatuina se City Council po o se malosiaga o le latou lava matafaioi o le vaai o le taulaga i ona itu uma ma faia ni tulafono ma ni taiala maoti, atonu o lona le itu o le a vaai lelei ai le tatou taulaga aua lava le lelei o si o tatou Atunuu ma meatotino ma le sologa lelei o alamanuia aua le faagaioia o le Atunuu atoa i tulaga tau tupe.

Lau Afioga i le Fofoga Fetalai ma le mamalu o le Palemene, o le Tala Faatatau o le Tupe e pei ona tuuina mai 2006/2007 e maitauina ma le agaga fiafia e lenei Itumalo le Matagaluega o Leoleo i le siitia maualuga o le Tala o le Tupe ua faaluina mo le Matagaluega o Leoleo, Falepuipui ma Tinei Mu aua le faatinoina lelei o a latou tiute autu mo le tausaga o le filemu ina ia saogalemu Samoa. E tele ni itu taua o le a faapea ona tulai mai ai, e le gata o le a saogalemu Samoa ma le Atunuu atoa a o le a taofia ai solitulafono aemaise lava mai aafia o fualaa faasaina ma faiga fouvale mai fafo ma le puipui o meatotino.

Lau Afioga i le Fofoga Fetalai, e manatu lenei Itumalo o le a tele se faamanuiaga i totonu o le Atunuu i le oo mai o tagata tafafao maimoa i se Atunuu saogalemu ma o le a tele ai foi se tupe e masaa mai aemaise lava i lenei Itumalo. O le tatalo i lau Afioga i le Fofoga Fetalai, o le toe iloiloia lea o faamanuiaga o le Matagaluega ona e maitauina le maualalo pea o totogi amata ma alauni mo le Matagaluega, atoa ai ma le faaopoopoina o Leoleo i tausaga taitasi. E faafetaia foi le auunaga a Leoleo i lalo o le Fua a Malo Afaatasi, e le gata i le maua ai le tomai faa-Leoleo ma puipui a o le manuia foi faaleaiga.

Lau Afioga i le Fofoga Fetalai ma le mamalu o le Palemene, o so o se Atunuu lava o le lalolagi o le faafitauli lava ua tulai mai pea o le le lava lea o galuega mo latou ua iu mai i aoga ma Iunivesite. O lenei faafitauli o lo o aafia tele ai lenei Itumalo i le tele o le vaega o le taulaga o lo o feofeoai solo ai le au sue galuega i aso uma o le vaiaso. O le sao o lenei Itumalo mo le foia o lenei faafitauli, o le faaoga lea o tuusaunoaga i lalo o pisinisi ma tuuina atu ai le faaitiitia o lafoga a pisinisi uma ia latou e ausia le tapulaa o tagata faigaluega e mafai ona faaopoopoina i tausaga taitasi ma ia laugatasia ai so o se pisinisi, amata atu lava i le pisinisi e tasi le tagata faigaluega seia oo lava i le pisinisi e ova atu i le 100 tagata faigaluega po o le sili atu foi.

E tele ni itu taua ma faamanuiaga e maua e pisinisi; o le a pau lafoga ma le siitia foi o tupe maua mai le faaopoopoga o le afaigaluega. E tata foi i le Malo ona fai ni awards i tausaga taitasi ina ia saga faatosina ai pea pisinisi e faaifalua tagata faigaluega. I le 20 tausaga ua mavae e tusa ma le 550 pisinisi sa laiseneina i le Atunuu, o le tausaga 2005 na mavae atu nei pe tusa ma le 6,500 pisinisi ua laiseneina, ma ua faaopoopoina pea i tausaga taitasi. O nei fuafuaga sa faaogaina e Niu Sila i tausaga ua mavae ma faataitai loa e Singapore ma Melesia ma mautinoa le manuia ai. E mafai ona faapea, o ni avanoa faigaluega fou o le a maua mai ai i pisinisi e aafia lea i tuusaunoaga faapitoa o lafoga toe faafoi pe tusa ma le 2% po o le \$100 i le tausaga po o fea lava e laitiiti o ia faamaumauga. E tatalo atu i lau Afioga i le Fofoga Fetalai se i tagai ane i fautuaga aua lava le tau foia o le utiuti o galuega i totonu o le Atunuu.

Lau Afioga i le Fofoga Fetalai ma le mamalu o le Palemene, e lagolagoina malosi e lenei Itumalo o Vaimauga Sisifo le Tala Faatatau o le Tupe, e pei ona folasia nei. E momoli atu le faamalo i le tautua matavela a Ofisa Sili o Pulega ma Faalapotopotoga Tumaoti a le Malo.

Lau Susuga i le Tamaitai Failautusi ma le Ofisa o le Fono, faapea Komesina o Leoleo ma le Ofisa o Faasalalanga a le SBC, e faapea foi le EPC ma le Faalapotopotoga o Fesootaiga, faamalo le galulue.

Ia manuia le Fono.

Afioga FUIMAONO NAOIA TEI



Itumalo Faaalalafaga:

Falealili

Filifilia:

13 Aperila 2006

Faatauto:

20 Aperila 2006

Lauga Faataupou:

13 Iuni 2006

Faafetai atu i lau Afioga i le Fofoga Fetalai mo le avanoa o le sui usufono mo Falealii. Lau Afioga i le Fofoga Fetalai, ua uma ona tea Sa mo ula nai Matautusa, o lea sa alaseu ai Feagaimaalii aua lo la va tapuia ma lona Matai, aua o lea ua e tulia tapa ma tautau le tata o le taeao ua sola, ua fai ai lau Afioga ma sooupu i lo tatou va feagai ai ma lo tatou Tapaau i le Lagi. Ua faamalo fai o le faiva, tau ina ia togi pa tau i le ave i le faafofoga a Ieova ma liligi ane Lona mana e uluulumatafolauina lou finagalo ma faamoemoe o sui usufono mamalu uma o lenei Palemene aua le tatou alofaiva mo se manuia o Samoa. O le ufitia ai o Samoa i le Ao Taulia ua faia ai se tai o poutu o le tatou Malo ma le Atunuu, le Afioga i le Sui Usufono o le Fono a Sui Tofia, le Afioga i le Tupufia, le Afioga ia Hon Faumuina Anapapa. E le o se tunuma na momoe faatasi i se tofa i ina po o se manatu i inei ua mafua ai, a o le pule tu malele ma le maa togi faato a le Atua soifua aua o la Iopu, “O le alii na te aumai, o le alii foi na te toe aveese, ia faamanuina le suafa o le Alii.” Tau ina ia faamaise le Agaga o le Atua i o outou agaga faavavau ma o matou loto faanoanoa, ia faamafanafanaina foi e le Agaga o le Atua le tina loto faavavau ma le aiga loto faanoanoa ona o le amiga a le Atua i lana auuana.

Lau Afioga i le Fofoga Fetalai, ua ou tulai ma lou faaaloalo e faaleo se finagalo taumolimoli o lou Itumalo pele o Falealii, aua le Tala Faatauto o le Tupe o le Tausaga Faaletupe 2006/2007 e pei ona i lumamea nei o lau Afioga ma le mamalu o le Palemene.

Ae o le a ou le malaga loa ae se i muamua ona ou ufitia se i'a lautua ma faataatia i le taumua ma ou muai lalagi sugalu ma momoli muamua fetaga aua e faigata oe Samoa – o le papa e le tutumulivaiina, o le auma le lomilomia, o le atu seu le popose i le tapuaiga mamalu a Lana Afioga Mamalu, O le Ao o le Malo o Samoa, lau Susuga i le Malietoa, na ee i lou tala na atoa ma lou fala na folalalo ma lou nofoa vaevaeloloa na faalogo ma matamatononofo ia te oe Samoa. Le tapuaiga mamalu a outou Afioga i Sui Usufono o le Fono a Sui Tofia, lau Afioga i le Tuiatua Tupua Tamasese Efi, lau Afioga i le Tuiaana Tuimalealiifano Sualauvi Vaaletoa Eti II; afio le Afioga i le Faamasino Sili ma le Vaega o Faamasinoga; afio lau Afioga i le Palemia ma le mamalu o le nofo a Minisita o lau Kapeneta, afio lau Afioga i le Fofoga Fetalai faapea

lau Afioga i le Taitai o le Itu Agai, tainane sui usufono mamalu uma o lenei Palemene.

Ou te faatulou atu i paia aginunui tetele ma mamalu e agi laufofola i feoga ma tanugamutia o Samoa, mai le gagae na tuliloa i ai e le piilua le fili o aiga, seia paia le gagaifo na fata ai e Tagaloa le auli o Samoa; le afio o Aiga ma a latou Tama, o Tama foi ma o latou Aiga, o Aiga o Tupu, Aiga o Nofo, Aiga o Papa ma Aiga na Tafaifa. Tulouna le usoga a Tumua ma Pule, tulouna Ituau ma Alataua, le Vaa o Fonoti ma le Too o le Fua, Aiga i le Tai ma le Vaatau o Nafanua.

O le a le vaea foi le fala ooto i sau tautalaga i le Faigamalo a Samoa i Sasae, i le Afio o le Afioga i le Kovana Sili ma le Lutena Kovana ma le laua taupulega; afio le Afioga i le Faamasino Sili ma le Vaega o Faamasinoga; afio le Afioga i le Peresetene o le Senate ma le Maota Mauuluga; afio le Afioga i le Fofoga Fetalai ma le Maota o Sui. O le paia mauuluga lava lea o Sua ma le Vaifanua, Fofu ma Aitulagi, Saole ma Saleaumua ma upu i le Launiu na Saelua; afio le paia tele i le afio o Alii i le Laau na Amotasi, Susuga i le Faatui ma le Auvaa o Tootoo o le Faleula ma Tama a le Manuatele ae matua le tuu i le Auaigaluga Paia a le Atua i le nofo a fataloa o le Talalelei, i le soo faataamilo o Samoa ma le lalolagi o lo o faanono manu i le Atua aua Samoa ma ana Faigamalo. O paia na ma mamalu o Samoa ua taoto i fata ae ae i lumafale, ou te faatulou atu ai, tulou, tulouna lava.

Ae ou te le i ta le tavato pe sunui le lalauula i le ina ne i le aia faunuu i le talaga, ae o le a sunui tonu lau o le fo ma ou faapai malu atu i le tapuaiga a lou Itumalo pele o Falealii, le Itumalo na momoo e fia fai itumalo i ai Samoa atoa ua mafua ai le muagagana, “Ua ta fia Falealii fua.” Tulouna le mamalu o ao o Faalupega ma le nofo a Ekalesia i lo tatou Itumalo atoa; tulouna le salafa o ou itu tafaitoa ma ou sa vavaloloa; tulouna le malutupu ma le maluoo o le Itumalo; tulouna le autao ma le autolipopoto o faleupolu; tulouna a augafaapae ma saoo; tulouna faletua ma tausi, o aumaga ma ava aumaga e oo lava i tupulaga o alo ma fanau. O le paia tele lea aua le afio o Alaalagafa ma le la nofo a Tulafale ma le Tauaga Eeseese ia Falealii.

Susu lau Susuga Tuatagaloa o le Sao Fetalai, o oe o le too o le Savili ma le Ki o le Malo; afio lau Afioga Meleisea o le Saoaualuma; afio Leilua ma le Toafa o Tamatane; afio le Matua o Fanene ma le paia o Salevalasi, Susu lau Susuga i le Tuisamoa o le Tapaau Faasisina ma le paia i le Usoalii, faapea le mamalu ia te oe Lufilufi ma upu i le Taulauniu.

Susu oulua Suafa o Salea ma Salaititi, afio lau Afioga i le Matua Alaimoana ma le Aiga Sa Alaimoana ma le mamalu ia Falealii.

Susu oulua Suafa o Taito ma Ula, maluu mai le Tala o le Fale i lau Tofa Falaila, tainane le Lauti na laulelei ia Falealii.

Susu lau Susuga Pulotu o le Alo o Tuatagaloa; malii mai lau Tofa Talauaga o le Alii o Aiga, malii mai le Anofale ma ou manu ma upu ia te oe Falealii, afio Alo o Fanene, susu mai lo outou Usoalii, malii mai le aiga Sa Talo ma lau Tofa Talooemaagao ma le Uso na toto; malii mai le Matua ma Salelealii ma le Lauti na laulelei.

Susu le Susuga Patea o le Alaalatama; susu mai Taa o le Alo o Malietoa; susu mai Muliava o le Fofoga o le Vai; malii mai Maelopa ma Leavasa, na lele o le Fale o Ituau ma Alataua; malii mai Tuiloma ma Taituuga o Manu o le Tuasivi, e fagota i tai e lua, faapea upu ia Sapunaoa o le lotoifale o Manusamoa.

Susu mai lau Susuga Fuataufao o le Suafa Faalupea, alalatai lau tofa Maseafa ma Muliaga o e na matutua i le nuu ma le mamalu i le Lauti na laulelei; afio Tapusatele ma ou alo, afio mai Fonoti ma Sealaga o Alo o Leilua, afio mai lau Afioga Paitomaleifi o oe o le Aloalii. Susu lau Susuga Leota o le alo o Taulapapa, malii mai le mamalu o lo outou Toafa o le Aiga Talimalama, malii mai le Alo o Usoalii ma le Tama a Malaelua, malii mai upu i le Tuanuu ma le Nofo a Ala, afio le Taofia o Moetalalelei, faapea le mamalu ia te oe le Taufua.

Afio le paia i le Aiga Safenuuivao ma la latou Tama, susu mai Leasiolagi o le Saoa, afio mai Sefuiva o le Matua Alii, afio mai Tupua ma le Aumaga, malii mai lau Tofa i le Igoamatua Tofuaiifoia ma Sa Taeleava.

Afio lau Afioga i le aloalii Muagututia, susu mai Tufugafale ma Seugalii, afio mai lau Afioga i le Gafatasi Fuimaono, malii mai le Faletolu ma le Lauti na laulelei, afio lau Afioga i le matua Alaalatoa, afio mai le Alo o Samalaeulu, malii mai Gaopoa o le Tulafale a le Tuitua, malii mai oe le Tapunuu Faatili, malii mai le mamalu ia Sa Faatili ma le Faleono.

O le lavelave ma le filifili lena o le vaosa o Sa ma Faigata o oe lou Itumalo pele o Falealii. Ou te tulai i lenei taeao i totonu o le Palemene o Samoa ma lou loto maualalo, ona ua ou iloa oe lou Itumalo, ua malama i ulugalua Samoa i o outou tapa faalupea, e te tago fenunuti namu sasala aua e te sisila faafoafoa i olataga. Fai mai le talatuu faa-Tuamasaga, na noga le moetagi ae moenoa ma togiola Samoa ina ua fatitu ia Lutua le aso o le Malietoa. Ioe Falealii e, o lenei ua ou tofuola e pei o le igoa o le vaitaele i Malua, aua ua fatitu ou paia ma ou mamalu ona o lau puleto ma lau faaeaea i lou nei tagata. O lenei ua ou seei i se tasi o ou nofoa i le Palemene, ona o lou aao tusi ia te au i le faiga palota a Samoa na se i mavae atu nei. Ua faafetai i lau faaeaea ma lau faaaloalo, aua o au nei ua na o se auaua faatauvaa ae ua e tusi i le Too, ua e toe tusi foi i le Ata, ua e faatietie au i le maa salafa. O le maa faasalafa foi lea sa outou faamatietie ai lou Tama ua faailagi le folauga i tausaga e tele ua mavae, o lea foi ua e topule ma ua e faaeaea ai ia te au. O upu ea i le malie o ai ia? Se ua malie le pule i Manā, ua malie le la o Toiva, ua malie sua o Vaasele i la outou pule ua to to tetele, o lea ua ou sapaia

faatua eleele, faafetai faafetai tele le faaaloalo. E pei o le upu e fai i alo e toatolu o le Tuimanua, aumai lau faaaloalo Falealii, o le a ou le folasia i le ala pe faasautia i fafo, ae o le a teu i le va o ou mata e fai ai au upu ma au tala. Aumai lau faaaloalo Falealii e teu i le va o lou ulu ma lou fatu, e fai i ai au upu ma ou manatu. Falealii e, ou te le faia ni folafolaga, ae na ona ou faapea atu, ou te tuuina atu lou ola ma lou malosi atoatoa e faatino ai ou tiute ma lau tautua ia te oe e tusa ai ma le tofi ua ou umia nei, ae ou te manaomia la outou tatala ina ia avefa ai au ma meafaigaluega e faaoga e le Atua aua lo tatou Itumalo ma Samoa. Ae tapuai maia ma le manuia i ou Fale epa ma ou Fale toa, o ou Punefu ma Siliaga, o ou Tupua Sa ma ou Laoai Sa, ae se i ou liliu ane e momoli se tatou sao i le Tala Faatatau o le Tupe e pei ona folasia nei i luma o le Palemene. Ia manuia tele lau tapuaiga.

Lau Afioga i le Fofoga Fetalai, e ao ona momoli atu lau faamalo i lau Afioga i le Palemia ma la outou Vaega Faaupufai ua outou toe tulai mai i le faafoeina o le sa o Samoa i lenei lima tausaga; ua faamalo le tauivi, ua faamalo le finafinuu, faafetai i lo outou agaga saili malo o le fetalaiaga i le Lefauseu ma Ulumu, ua se togi le seu lagatila ua faapulou le tualima, ua faamalo le fai o le faiva. A o tatou alo atu mo le Faiga Palota ua se i o le faimea e ui ina sa eseese lagona ma manatu faaalua, ae tasi lava le faafitiga o aleaga i o outou finagalo ma o matou faamoemoe, ia manuia Samoa ma ona tagata. Ua moni ai le upu – “E fisi laau a tama a o le uso.” O lea ua tali mai le Atunuu e ala i lana filifiliga, sagai ane laia o ai o le tai, alo i o outou faiva manaia aua le Atunuu, ia maua la outou tofa mai le Atua e faatautai ai le sa o Samoa. Ia manuia tele la outou faatamasoaliiaga, aua se manuia alu i luma o Samoa mo a taeao ma e lua.

Lau Afioga i le Fofoga Fetalai, se i momoli atu nai manaoga o lou Itumalo ia ma oo sina upu i le Tala Faatatau o le Tupe ua faataatia nei i lumamea. E muamua ona avatu le faafetai i lau Afioga i le Minisita o Tupe, o lea ua tilotilo atu lou nei sui usufono ua i ai le faataatiaga o le Tala o le Tupe e \$1.5miliona mo le aula laupapa i Salani o lenei Itumalo. Ua faamalo i lau Afioga, faafetai le vaai mamao. Ou te talitonu tasi lea mea sa oo i ai le tautalaga a sui usufono ua mavae atu, ia a o lea ua vaai atu o le a lata ona faatino. Pau lava le tatalo atu i lau Afioga, ia vave ma faatino loa ne i te i ua uma atu lenei Paeaga e le i tino mai.

Lau Afioga i le Minisita mo Galuega, Felauaiga ma Atinae Eseese e ala atu i le Afioga i le Fofoga Fetalai, faafetai tele mo auala laupapa ua maea e pei o le auala i Malaemalu ia aemaise foi le auala lea e i i i Poutasi ua matagofie lava. Ua toetiiti lava ona uma le auala i Poutasi ia a o la ua faaoga atu lava. Pau lava le talosaga i lau Afioga e manaia pe ana faalaulelei atoa atu loa ma auala o Falealii. I le taimi lenei i le tilotilo i le auala la e i ai, ia vaeatu le faafofoga a le Atunuu, e fai lava si taupatupatu, o sa o si o matou Itumalo, ia e le o ni auala lelei tele, o

taavale e le lelei tele o matou taavale. Ia ae afai e molemole ia auala ia e umi lava ona faaoga mai e le mamalu o le Atunuu nai auala na i nai taavale aua le femalagaai i lea itu ma lea itu. Ia ae faataatia atu i tafatafa i lau Afioga, e a pe a toe fua i ai ma toe lalaga uma i luga le la auala aua ou te talitonu e fiu e tanutanu e sau lava le timu ma toe suati i luga, ia ae manaia tele auala i o i le itu i Aleipata e manaia pe ana sosoo mai ai lava faapena auala o si o matou Itumalo. Tasi lea Itumalo e tele lava le tamaoiga o lo o i ai e lau mai fua o faatoaga ia ma avatu agai i fafo ia ae silasila ifo i ai lau Afioga i le Minisita, na ona faataatia atu i ou autafa.


Lau Afioga i le Minisita o le isi tulaga, o faleaoga nei o nai o matou Itumalo. E i ai nai faleaoga o la e taatia i le taimi nei o la lava e tau saosao nai tupe a nai teoaiina ma nai olomatutua. E a la pe a fai se fua pe maua mai sina 30 pasene e fesoasoani ai i nai faleaoga ia aua alo ma fanau o le Itumalo aua le agai i luma o le tatou Atunuu.

O le isi tulaga faafetai atu mo le falemai. O lea ua tilotilo atu i i e i ai le polokeki lea mo le falemai lea i Poutasi. Ia o le taimi nei e le i faatinoina ou te iloa o le a i ai se taimi ona faatino lea. Pau lava le talosaga i lau Afioga i le Minisita mo le Soifua Maloloina, ia e a pe a avatu i ai nai fomai e o i tua i o aua o le taimi lenei o lea ua gasolo mai lo matou Itumalo agai i i i Safata e faaoga ona o la e le i tulai le falemai e pei ona taatia mai i totonu o le Tala o le Tupe. Ia ae talosaga atu lava i le Afioga i le Minisita, ia a maea faamolemole ia alofa ane i ni nai fomai mo lo matou Itumalo.

Ona oo mai lea o se faamatalaga i le GST. Ia lau Afioga i le Palemia, ou te talitonu tasi lea alatupe e fesoasoani tele mo le atiaaina o le tatou Atunuu, aemaise foi o o matou manaoga o lo o lau atu i ina. E leai se upu tele agai i lea itu, pau lava e vaai ma le alofa i le mamalu o lo tatou Atunuu aua o i latou tonu ia o lea o le a afaina i le tulaga lea. E moni e pei e taugofie le vaai i le 2.5% ia ae a fuafua i ai, e fai lava si taugata. E lelei lava mo tatou nei e faigaluega ma maua nai tupe ae a fua i nai tagata la e i tua, e le o i ai ni tagata faigaluega e le o i ai se mea e maua ai se alatupe, ia ona vaai lava lea ma le alofa i ai. Mo le agai i luma, talosia ia ae gata ai i i lea siitaga.

Ia e pei ona pau lea o se manatu o lenei Itumalo, ou te talitonu o lea e i ai nai isi taimi mulimuli ane e toe maua ai nisi manatu. Ia manuia tele lava lau Afioga i le Fofoga Fetalai aemaise foi le mamalu o le Palemene. Soifua.

Tofa GALUVAO VILIAMU



Itumalo Faaalalafaga:

Gagaemauga Nu.3

Filifilia:

13 Aperila 2006

Faatauto:

20 Aperila 2006

Lauga Faataupou:

14 Iuni 2006

Ia faafetai atu i lau Afioga i le Fofoga Fetalai o le Maota mo le avanoa. Sa i ai lava se manatu sa ou fia lauga nanei i le taimi o le afiafi, ona e mafua lea manatu ona o lo matou Itumalo i Savaii o lo o i faatoaga i le taimi nei ma o lona uiga, e leai ni laau e faalogologo mai ai. Ae peitai, ia ne i te i ua faapea ua faitauina au e lo matou Itumalo po o fea o tafao ai le sui usufono lea na tuli mai i i le Maota, ia o lea o le a taumafai atu se sao o le sui usufono.

Ia ee ia i vaatapu ma lagatapu le paia maualuga o Tiafau nei, le Maota o le Faautugatagi o lo o teu ai manufou ma manupopo o Samoa ma lona Malo Tutoatasi, sa asaina mai e tuua ma matua ua Sagamaiapouli ma ua tofafa mai tiasa. Ia ia viia le Atua poto e toatasi ona o galuega lelei sa latou fitaituga ai, o lenei ua tatou oaoa ai i faleseu ma saa ai i maaomalie.

Ou te muai faatalofa atu i lau Afioga i le Fofoga Fetalai o le Maota Fono o le Palemene o Samoa, malo le soifua maua ma le lagi e mama. E faapea foi ona faatalofa atu i lau Afioga i le Palemia ma a outou Afioga i Minisita o le Kapeneta o lenei foi Paeaiga, malo le soifua ma le lagi e mama. Ou te ofo alofa atu foi i lau Afioga i le Taitai o le Itu Agai, malo le faatoatoa ma le soifua manuia. E faapea foi ona ou faatalofa atu i ou uso a sui usufono uma o alii ma tamaitai, o lupe sa vaoeseese a ua fuifui faatasi o Itumalo Faa-Sui Usufono o Samoa Aoa.

E ao ai lava ona tatou faafetaia ai pea le alofa laveai o lo tatou Tapaau i le lagi ona o Lana pule faasoifua ua tatou fesilafai ai i Tiafau nei i le magafetau o le soifua, e pei o le upu ia Leutogi Tupaita. Ia o lenei taeao manino ma le taeao totoa, ou te faatalofa atu i le faafogafoga tapuai mai a Lana Afioga Mamalu O le Ao o le Malo o le Malo Tutoatasi o Samoa, le Susuga i le Malietoa e ee i lona tala na atoa i lona nofoa vaevaeloloa, ma lona fala na folaloea, e faalogo i ai Samoa. Tainane foi le tapuaiga a Sui Usufono o le Fono a Sui Tofia le Afioga i le Tuiatua, le Afioga i le Tuiavana ma le Afioga i le Tupufia lea ua tuua le malo, ona o le finagalo o le Atua, aua o le mua e le fuatia, o le ta e le agaia, o le tao e velo i le maninoa i lo outou soifua ma so matou ola, lea ua peia ai nei le tualuga o Manua ma ua oia ai le vao o i Fagalele. O la Tavita, "Ua mliliu Toa ua maumau ai aupega o le taua." Tau ia ina ia mafuli a puou le tuua o le malo i le Afioga i le Faumuina; ia pau se toa ia toe tulai mai se isi toa. Ia i ai pea le agaga faamafanafana

o le Atua i le Tina ma le fanau faanoanoa, aemaise foi i lenei Paeaiga Lona XIV a le Palemene o Samoa ma lona Faigamalo.

O le Afioga i le Faamasino Sili ma le mamalu o le Ofisa o Faamasinoga, le tapuaiga i Tupu ma Ee i le aufueloloa ma tulatoa o Samoa; o le paia lava lea i le Usoga a Pule ma Tumua, Ituau ma Alataua, Aiga i le Tai ma le Vaa o Fonoti. Le Aufaigaluega paia a le Atua i Ekalesia eseese i totonu o si o tatou Atunuu, o lo o faafalelemalu i afioaga ma alaalfaga aua se manuia o Samoa i lana Faigamalo mo a taeao ma e luā, ina ia soifua manuia ma ola fiafia ona tagatanuu.

E le faagaloina foi o tatou uso i le Motu i sasae ma lana Faigamalo i ona tulaga faalupelupeina. O le paia lava lea ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Faatui o le Motu, le Laau na Amotasi ma upu ia te ia le Manuatele. Ee maia i o outou seetaga malu ae o le a taumafai se sao o le sui usufono mo Gagaemauga Nu.3.

Ia o le a ou le toe faloina le afaloloa a Tupuivao nai Apolima ma ou toe asaina le filifili o le Vaosa ae o le a faaagafua ai lou tulaga ma magalo ai se leo o la outou auauna, o le ua iu i ai la outou faiga filifiliga e ala i le Faiga Palota o le Atunuu Aoa e pei ona faatinoina i le aso 31 o Mati i le tausaga e 2006.

E muamua ona ou taia le pula ma ou vaisausauina paia o sa ma faiga o lo tatou Itumalo e pele i le agaga, le Itumalo Faa-Sui Usufono o Gagaemauga Nu.3, mai Fanuatanu e afio ai Suisala o le Matua, le paia i Matautu ma Mutiatele e afio ai Lilo, afio ai Lemaveve. O le paia lava lea ia Leatifai ma Letinolefai, le paia o malo amata e susu ai Paletaoga o le Alo o le Lilomaiava. Alaalatai ai le paia o le Tofa o le Saletuna ma le Vainalelepa. O paia o Tulaga e susu ai Pese ma Mautele, alaalatai ai le mamalu ia Sa Aula, le paia o malae e afio ai le Maoputasi o le Tama faasausau o le Faleiva, le paia i le tupua i Falefagamalo e alaalatai ai le paia o le Nofo a Usoalii i le Faleiva ma Matautu. Ia o le paia o Siliga e afio ai Maiava, o le paia o Falefaamaoi e susu ai Mataia, e alaalatai ai Mauigoa o le aitu tagata ma le mamalu ia Satoalepai.

E le faagaloina foi i le agaga le Aufaigaluega paia a le Atua o lo o talafaaauto i si o tatou Itumalo, aua le tauasuina o le ipuvai o le ola. O outou paia faale-Atunuu, o ouotu paia faale-Malo, faale-Ekalesia, o le a le oo i ai se leo a la outou auauna. E talitonu le taofi, pe oo i ai se le o pe leai, e le toesea ai se iota pe toe faaopopo; o paia mai lava i le vavau e oo i le faavavau.

Ia malo le soifua maua ma le lagi e mama, ia i le Atua potu pea Lona viiga nei ma seia oo i le faavavau. Ou te talitonu, sa lutia i puava lo tatou Itumalo e ala i le Faiga Palota, i le sailia lea o se tasi o Tama e tauavea le nofoa o lo tatou Itumalo i lenei foi Paeaiga. O lenei ua tatou mapu ai i Fagalele ma ua tasi ai nei le faafitiga o Aleaga i le sailiga o le tofa mamao ma le faautautaga loloto i tamalii

ma failauga, o faletua ma tausii, o saoa ma tamaitai, le malosii o lo Itumalo aemaise o alo ma fanau ua aulia le 21 tausaga ma ua iu ai ia te au le tausinioga, o le a avea ai se leo o le tatou Itumalo mo le Faigamalo ma ona upufai i enei foi lima tausaga. E manatua ai i le loto le pese na pepese ai le nuu o le Atua a o faaunuua ai i Papelonia i le taimi o le tafeaga, “Ierusalema e, afai e galo oe ia te au, ia galo lava i lou lima taumatau, afai ou te le manatua oe, ia pipii ae lou laulaufaiva i lou gutu.” Ua faapena se lagona o le auauna i lenei ituaso, lou nuu pele i le agaga o Avao, vaeane le tapuaiga a lou Itumalo, le eleele na liliu ai le Tusi Paia i le Gagana Samoa ua lauiloa ai oe i le Tala Faasolopito o le EFKS i le lalolagi, aemaise lava E na lagolagoina au e fai ma sui tauva. Afai e galo outou ia te au, ia galo lava i lou lima taumatau, afai ou te le manatua outou, ia pipii ae lou nei laulaufaiva.

Ia avea ia o lenei avanoa ou te momoli atu ai lau faamalo ma lau faafetai i lou uso le Tama sa ia tauaveina le nofoa o lenei Itumalo, lau Afioga Hon Leota Lu II, malo galue, faafetai tauivi. Ua malie mata i vaai i nisi o galuega lelei na e finauina mo le manuia o si o tatou Itumalo. E i ai nisi o auala galue ua maea, o nisi o taligalu, o telefoni o lo o galueaiina nei, aemaise le auala laupapa i Safai, masalo e amata i le masina fou galuega faatino. Ia o le vaitaumafa o lo o ua amata nei ona faagaioiina ma fuafuaina i lo tatou Itumalo. Ia aumaia laia o lou faatuatuaga i le auauna e mafai ai ona maua se malosii, o se manatu e faaauai ai nisi galuega o totoe aua lava le tautuaina o si o tatou Itumalo i lenei foi lima tausaga. O upu a Saulo ia Tavita, “E te faia lava e oe mea silisili ma e manumalo ai.”

Lou Itumalo pele, e manuia lava faiva o le a feagai ai ma la outou auauna ona o la outou tapuaiga. E leai ni au folafolaga, ae o le a ou taumafai i le mea e gata ai lou malosii e faatino ai nisi o mea e fia faaleleia, aua le soifua manuia o tagata o lo tatou Itumalo e pele i le agaga. Ia faamoemoe atu i la outou tatalo o le a maua ai se malosii lilo o la outou auauna, e le gata i le tino ia a o le mafaufau.

Lau Afioga i le Minisita o Tupe, e avatu lau faamalo i lau Afioga aemaise le mamalu o le aufaigaluega a le Matagaluega o Tupe mo le galuega maeaea i le tapenaina o le Tala o le Tupe 2006/2007; ae i ai le taofi o le a le oo i ai se leo o le sui usufono, ae o le a oo i ai i se taimi o i luma. Ae avea ia lenei taimi e momoli ai nai manaoga i mea e fia faaleleia o lenei Itumalo.

Lau Afioga i le Minisita mo Faatoaga ma Faigafaiva, Faleoloa o Faatoaga e molimauina e lenei Itumalo le tele o le popo, ava, talo ua maitauina ua leai ni maketi e ave i ai; ae a pe a silasila lo outou mamalu e sui ni products e liliu i ai le popo i se isi atinae e mafai ona maua mai ai ni tupe ona o le taimi lenei ua le talafeagai le tigaina o le faagaioia o le popo ma tupe maua. O le ava; e faataatia atu i ou tafatafa; ae a pe a fai loa ni o tatou fale gaosi fualaa ma le tau ave i Siamani. O le talo, pe i ai ni nai fale gaosimea e toe sui ai aua o le taimi ou te iloa ua

Saunoaga Faataupou a Sui Usufono 1961-2011

faigata ona toe avatu le tatou talo i Niu Sila ona o le tele o le mau restrictions o lo o aumai e le Malo o Niu Sila i le faamamaina lea o talo. Pe le mafai ona auina atu i nisi products e mafai ai ona faigofie ona taulia ma maua ai ni tupe maua a tagata o le Atunuu aemaise o lou Itumalo.

E faapea foi i le esi, e talosagaina foi po o afea e toe faataunuaina ai se isi uta povi po o manupapalagi vaeane le mamalu o le Maota Fono nei, ona e maitauina i le matou Itumalo o lo o manaomia ni manupapalagi e faaleleia ai le atinae, aemaise le matou pitonuu lea i Avao i le atinae manupapalagi o lo o faia ai e fesoasoani tele i faalavelave faafuasei po o a ni mea o lo o tutupu e feosoani ai i aiga.

Ona ou oo mai ai lea i lau Afioga i le Minisita mo Aoga, Taaloga ma Aganuu. E maitauina o lea ua toetiiti faauma le galuega o lo o faia i le Polytech, e momoli atu ai le faafetai i le Afioga i le Palemia ma le Faigamalo i le magafagafa ma le faatuina o nei aoga, e le gata i Le Papaigalagala, Polytechnic, Iunivesite Faafofai ma Alafua. Ona ou manatua ai lea o le atunuu lea o Singapore, e tai tutusa lava le tele o Singapore ma Samoa i le tele o Atunuu nei ae pei lona eseese masalo o Singapore po o ua 5miliona a o tatou ailoga ua atoa se miliona. E tutusa foi tatou ma Singapore e le maua ni resources tai pei o ni mineral resources po o a lava – pau le agaga na i ai i Taitai o lea Malo, e ao ona latou faia ma taumafai e atiae le latou human resource po o le atinae o o latou tagata ma siisii i luga le malamalama po o le level o le aoaoina o ona tagata. Aua e peiseai o le itu lea e faafaigofie ona faatosina mai ai kamupani tetele e faaoga a latou tupe i totonu o le Atunuu. E pei o le agaga lea e avatu ai – i aoga nei ua faatuina i totonu ina ia taumafai e siisii i luga le level o tagata, e faigofie ai foi i tagata faipisinisi ona gasolo mai e faaoga o tatou tagata i lo le omai ma aumai tagata faigaluega mai fafo e faia galuega.

O le isi mea o le Iunivesite a Singapore e tai lima tausaga ma upgrade po o le sefulu tausaga ma upgrade le degree. A faapea na maua nei lou BA, o le isi lima tausaga e te toe alu atu ma lau BA lena ua le aoga tusa e continuous le process, e le faapea o le a maua le faailoga i le taimi nei ona gata ai lea. O le uiga o le faamatalaga, o le tatou Iunivesite o lo o i ai nei o le Polytechnic ma Le Papaigalagala, e tatau lava ona i ai se tulaga e upgrade ai faailoga ina ia fetau ma le alualu i luma o le soifuaga o lo o i ai nei.

Ona oo mai ai lea o se faamatalaga e pei ona agiga i nisi o sui usufono e faapea ona o le tau mamao i le Itu Asau. E momoli lau faafetai i le Malo ona o le magafagafa ma e ou e talitonu, o lea ua amata ona oo mai faamanuiaga i le Motu i Savaii, o lea ua faaleleia le uafu i Salelologa, ou te talitonu foi o loo i ai fuafuaga o le a oo i ai foi Asau i lea tulaga i se taimi o i luma ona ua amata galuega i lea uafu i Asau aua afai ae tuta vaa po o container ships ia i nei i le centre ua faaititia foi le tau o mea taumafa ma so o se oloa aua o lea o le a leai se tau e avatu ai oloa i nei i Apia ua

tutusa ai lava tau i Apia ma le tau i Asau ma Salelologa. O le mea lea lou Itumalo e, aua tou te atuavale i le tau o le soifuaga masalo e le o toe mamao ona oo atu lea o le faamanuiaga ia tatou. Auā o aso o ou aoga, ta te sau i i nei i Apia e taumafai le aoga e pei e ula lava tamaiti i nei i Apia ia ta ita ma faapea o le mamao o le mea ta te sau ai aua e tolu itula e tietie ai i le pasi, tolu itula e alu ai i le vaa, tolu itula – e alu le aso atoa faatoa oo i le fale. Peitai afai ae taunuu lea fuafuaga a le Malo, ona faatoa faataunuaina ai loa lea o le mau a le HRPP, “E tutusa lava mea e fai i Apia nei ma mea e fai i Asau po o Salelologa.”

Ona oo mai ai lea i lau Afioga i le Minisita mo le Soifua Maloloina. e talosagaina lau Afioga faamolemole i le matou Falemai i Fagamalo ia aua le toe aveesea fofai ma mea o lo o faia ai nei togafitiga i le falemai i Fagamalo. O lo o lelei lava le tulaga o lo o faagasolo ai galuega o lo o faafeagai ma alii ma tamaitai fofai faapea le mamalu o le Itumalo e lagolagosua, o a uma mea e mananao i ai o lo o taumafai lava le komiti a tina i le faamaeaina.

Ona ou oo mai ai lea i le Afioga i le Minisita mo Aoga, Taaloga ma Aganuu; ou te tau manatua o le matou Itumalo i le pitonuu o Avao sa lavea i malae ia e taua o malae faava o Malo ae peitai ane e oo mai lava i le tiami nei, e le i faia ai lava se taaloga faava o Malo. E talosagaina lau Afioga ina ia tilotilo ane i ai po o le a se fuafuaga o i ai ona ua uma ona fua le fanua lea, ou te talitonu e faigofie lava ona fai se fuafuaga i lea tulaga ona ua uma ona fua faaletulafono.

Ona ou oo mai ai lea i le Afioga i le Minisita mo Fesoataiga ma Faamatalaga Tekonolosi; ou te talitonu o lo o ua faataatia nei le laina po o le landline i mea tau telefoni i le matou Itumalo, ae ou te talitonu e pei lava e le o agai i uta i le auala lea e alu i Vaipouli ae o le auala lea e tolu aoga o lo o i ai, o Laumoli Primary School, o le Itu o Tane Secondary School ma Vaipouli. Ua leva ona mananao nai aoga nei i laina aua le faaogaina o le internet ma computers aua o nei foi aso ua alualu i luma le aoaoina o alo ma fanau o si o matou nei Itumalo.

O nai moomooga na o lenei Itumalo e tuutuu atu i o outou tafatafa e liuliu i ai la outou tofa faatupu ma la outou faautautaga. Ia faamanuia le Atua i so o se galuega ole a feagai ai ma le tatou Itumalo i lenei lima tausaga. Ia mama le lagi i le Aiga Sa Peseta ma le Maopu, ni fue lafo ma ni tootoo gauia i Faleupolu tofia o le Itumalo, manuteleina le tapuaiga i nofo a faafeaiga mai Fanuatanu seia paia Punale.

Ona ua maea lou taimi faatulagaina ou te manatu ai e leai se tautai e atoa ni atu i liu o si ona vaa. O lea ou te faamalulu atu ai ma ou avatu malu i puega, o le a se pati ua sala ona o le naunau lava o le sui usufono i le avanoa ua maua, e tatalo atu ai o Laloifi lava lenei e natia ai se faaletonu. Ia emo le uila lalelei i lau Afioga i l Fofoga Fetalai, ia mama le mata o le masina i lau Afioga i le Palemia ma lau Kapeneta faapea foi ma le Taitai o le Itu

Agai ma lena Itu o le Maota, ni laumea nuti togi a savili i le paia o le Palemene o Samoa, ae ola la outou auauna i le alofa ma le agalelei o le Atua.

Soifua.

Afioga Hon GATOLOAIFAANA AMATAGA ALESANA GIDLOW



Itumalo Faaalalafaga:

Faasaleleaga Nu.1

Filifilia:

13 Aperila 2006

Faatauto:

20 Aperila 2006

Lauga Faataupou:

19 Iuni 2006

Lau Afioga i le Fofoga Fetalai, e momoli atu le agaga faafetai mo lena avanoa. E pei foi ona faafofoga lo tatou Maota, o au lea o le a ou tamua i le Kapeneta i le afio o le Afioga i le Palemia. Ou te lagona foi, e alagataua ona o au e le gata ina ou taupou mai i le Palemene ae ou te taupou foi i totonu i le Aiga Kapeneta, ai o le mea lea o le a faamuamua atu ai se tala a le sui usufono mo Faasaleleaga Nu.1. E muamua lava ona ou fia talosagaina se avanoa se i avatu ai se lagona i le Itumalo aemaise foi le faafogafogaaga ma le tapuaiga a Samoa.

Ua maea ona fuatia i ulupaga e pei o le faiva i malae ma tapuia e lau Afioga i le Fofoga Fetalai le Lagisa aua lo tatou Tapaau i le Lagi i le taeao nei. Ia tau ina ia mautu i vaiavea ma le lauti le putea e pei o le upu i vaifanua o le vi moto, aua o lo o ua sala a mulifata ma taoto fata, ua tasi le faafitiga o aleaga, ua matua le tuu i le Malo o le Atua ua ala ai ona tatou fesilafai soifua. Aua e ui i se tofa loloto na faafua ae tofa faatietie i le tau ma faasega tulauniu i le puleto ma le puletasi a le Tapaau i le lagi.

Ona ou faatulou atu lea i lau Afioga i le Fofoga o le Maota, aemaise foi sa ma faiga o le Maota nei, i le afio o lau Afioga i le Fofoga Fetalai, afio le Afioga i le Palemia, le Aiga Kapeneta faapea Minisita Lagolago. Liliu le vai o Sina i lena foi Itu o le tatou Maota i le afio o lau Afioga i le Taitai o le Itu Agai e e agaia le Malo aemaise le mamalu o alii ma tamaitai o le tatou Palemene i lena foi Itu o le tatou Maota.

E le faagaloina foi le tapuaiga a Lana Afioga Mamalu O le Ao o le Malo o Samoa, faapea le paia i Sui Usufono o le Fono a Sui Tofia, afio lau Afioga i le Faamasino Sili o le Faamasinoga Mauuluga faapea le Peresetene o le Faamasinoga o Fanua ma Suafa tainane le nofo o too i Faamasino o Faamasinoga eseese.

Ae le gata i lea, o Faauluuluga o Ofisa, o atunuu ma Faalapotopotoga mai fafo o lo o i ai i Samoa nei.

E manatua foi le lagolago faifaipea a Faauluuluga o Matagaluega faapea Faalapotopotoga Tumaoti a le Malo, tainane le aufaigaluega o lo o faia pea le faiva o le tautua.

E manatua le tatalo ma le faanonomanu a le Aufaigaluega paia i fatafaitaulaga e fia i Samoa, o sulii ma Feoi o le Tala lelei o lo o faatunapaulia e le gata i Samoa nei ae so o se tafa o le lalolagi ona o le Atua ma Lona finagalo. E mauuluga pea le manatu, e mamao mala fou mai ma folau i lagimama le Sa o Samoa ona o la outou tatalo.

Ae ou te tu nei i malae o manu ma faautuutu i salefu aua le tumoe faalele na sau taalili i le vaofilifili, aua le paia mauuluga o Samoa i le afio o ona lumafatutoto ma papa tuloto, tainane le alalatai o ponaoo ma le au fueloloa, o le au utao ma le au popoto, o faleupolu tofia, aua o paia ma mamalu ua taoto fata ae lumafale mai i le oneone le utufia ma le faleniua seia paia le lualoto o alii ma le fale tapaau. O paia lava lea aua Aiga ma a latou Tama, o Tama foi ma o latou Aiga, o Aiga o Nofo, Aiga o Tupu, Aiga na Tafaiifa, o Aiga foi na Taitaitoa ma Tafaitoto, o le usoga a Pule ma Tumua i lo oulua va tootoo ma le va fetalai, tainane Ituaui ma Alataua, Aiga i le Tai ma le Vaa o Fonoti. A o se seu tapuai mai a o tatou uso, vaeatu Sa o le Motu i Sasae aua Sua ma le Vaifanua, Fofu ma Aitulagi, Ituaui ma Alataua, Saole ma Saleaamua ma le Launiu na Saelua, faapea Maopu, le paia o le Motusa i le Laui na Amotasi, faapea Faatuiolemotu, Tootoo o le Faleula ma upu ia te oe le Manuatele. O paia ia ma Sa; e ui ina sausaufialele le manu nai Atufiu, ae fougata foi le tofu a Aloaloolela aua o le maota e tulutulu i tao, ua soo ona taiao, e le toe tau tapuvaelaaina pe fia utuvaitofo i ai se tasi. Ona ou faatulou atu ai lea i paia ma le mamalu mauuluga lea – tulou, tulou, tulouna lava.

Faafetai tele lau Afioga i le Fofoga Fetalai aua o lea ua maua le avanoa e molimoli atu ai se agaga faafetai aua le tapuaiga a lou Itumalo. Fai mai le upu o le pese a Iva, “Le lalolagi e ua gatete o le Liona o le Faasalele, Samoa e ia faatafatafa, o le a tagifano i le ala. Samoa e o le manu e filemu, na o ona mata e pau, seiloga e ita, Samoa e, e matauita.” Ae tautino foi upu ale pese a Faasalele, “Faasaleleaga, Faasaleleaga, o lau ulafala. O oe lava e mai le amataga, seia oo i le gataaga.”

E tautino lagona suemalo i upu lotonuu ma loto Itumalo o lo o mulimuli mai i nei pese mo au, ae o tua atu, e i ai le luitau tele ona o lo o faamalumu mai le tofotofoina o lou malosii, e tauave lau faaloalo ma lau faaeaea. Ua lagona i le loto le mafanafana o lou alofa ma lou faitama. Sa ou talosagaina se pa lausaaga ina ia avea ai lou tagata ma au auauna e molimoli mai lou finagalo i le Maota o Samoa. O lea ua e topule, ua e saa faaoti le uto a le faimea ma ua e to mai mo au le pa faaloto, o le pogai lea o le faatauea o le matila ma le ofeloa. Ia o le a tautino ia le solo a le tamaitai, ou te faapea atu ai ma le agaga faagaetia – faafetai, faafetai tele lava i le paia ia Tia ma Luamanuvae, Sua ma Tinousi faapea le malelega a le Malietoa, lau

Saunoaga Faataupou a Sui Usufono 1961-2011

Fetalaiga i le Tuua, le mamalu i le Falefia ma le Falesalafai, le Lologapule ma le Faitoaga, le lave i manino ma le lave i aava ma oe Salelologa. Le paia aua Sua ma le aumaga, Tusani ma le Aiga Sa Tusani faapea foi le taofia ma le Taumaopu, Saveama ma Leitualasa ma le mamalu ia te oe Sasilafaiga.

Le paia o le Aiga Salevalasi faapea Tofilau, lau Fetalaiga Leauanae ma le nofo a Ituaiga ia te oe Sasulu. Le paia i Alo o le Tagaloa, Aitutagata ma le Fofoga Fetalaiga faapea le mamalu ia Safune ma Taulauniu. Le paia i Alo o le Tagaloa, o le paia lava lea i Tamaitai faapea Taito ma le Usoalii ma lo latou Matua, tainane Alo Tamaalelagi ma le Toaigafo. Le paia i le Gafa ma le Usoalii o Malietoa ma le mamalu ia Safuamua ma le Nofo a Ituaiga faapea le Tapaaufanua ma le Faleono ma Salemuliaga. O ou paia ama mamalu na o lea ua ou tiu ai. O lau tatalo, ia alofagia e le Atua ina ia fesoasoani mai i lou vaivai, ia maua ai sou malosi e tauave ai ia pai ama mamalu e tusa o lau faaaloalo ma lau puleto. Ou te faatalaunu atu mo lau talosaga, aua e ae fua le faiva pe a leai le mana o lau tapuaiga.

Lau Afioga i le Fofoga Fetalaiga, e pei ona saunoa le Afioga i le Palemia i lenei taeao, ua matagofie foi le faamamaavega mai ma e ou te talitonu foi, i lenei lava vaiaso atoa, ua faalogologo ma le totoa i finagalo faaaliga ua aumai ia te au o lo o tu nei i le tofi o le Minisita mo le Soifua Maloloina. Ia, e fou le Minisita, ma ou te lagona foi o fautuaga ua tuuina mai e fesoasoani mai ai i lou faafeagai ai ma le tofi aemaise foi o le lagolago mai a le Afioga i le Palemia ma le mamalu o le Kapeneta.

Faafetai i lau Afioga i le Fofoga Fetalaiga, ua uma ona e molimoli laau i Fogaa aua foi le tatou faafeagai ai ma lo tatou Atua paia. Ua uma foi ona e faapae le taeao aua le paia mam le mamalu o le Palemene, o le a le oo foi i ai se leo, ae o le a faaauau pea lau folasaga e pei ona i ai i le vaiaso ua tuuina.

E pei foi ona famatalaina atu le saunoaga a le Afioga i le Palemia ua faamamaavega ai foi ma talatala atu tulaga o lo o i ai le Matagaluega ma nisi o fuafuaga. Ae pau o lea ona o lau tautalaga faataupou foi lenei o lo o faafogafoga mai si ou Itumalo i mea na tuuina mai e molimoli atu pea aua foi lo latou finagalo fia auauna ma le finagalo fia auai i fuafuaga a le Malo.

Lau Afioga i le Palemia e ala atu i le Fofoga Fetalaiga, e tuu atu ai pea i tafatafa se manaoga o Faasalelega Nu.1 aua fuafuaga a le Malo i lenei tausaga...

Faafetai i lau Afioga i le Fofoga Fetalaiga. E faamalulu atu foi i le Afioga i le Palemia ae pei lava ona silafia e fou mai foi i le Maota. I le naunautaiga lava lena ua avatu mo lou Itumalo.

Ae peitai o le a ou faaauau pea, e pei ona i ai le Matagaluega a le Soifua Maloloina ma fuafuaga ua faataatitia. O nisi o fuafuaga lau Afioga i le Fofoga Fetalaiga, e pei ona laga ma aumai ai foi se moomooga ma ni

popolega o Afioga i sui usufono mamalu o le Palemene. O lea ua i ai nai fuafuaga ua faataatitia e le Matagaluega o le Soifua Maloloina, ua i ai le vaevaega lea o le a faatinoina po o Iulai po o se aso lata mai lava ma le agaga ina ia mafai ai ona faaleleia le auaunaga aua le soifua maloloina. O le vaeluaina lea o le Matagaluega o le Soifua Maloloina latou te mataituina ma faatinoina Tulafono Faatonutonu aua le taitaiina o galuega faatino ma galuega ua faataatitia, e faapea foi ma le vaega e faapitoa lava mo le auaunaga o le tausiga o le soifua maloloina o tagata Samoa.

Ua i ai foi le tatou Aoga o le Oceania University of Medicine e faatinoina le tulaga lea o le aoina o alo ma fanau a Samoa aua le faafomai. O se taumafaiga lava lea a le malo aua le taumafaiga ina ia faaititia le tulaga o lo o tulai mai o le lava o a tatou fomai po o le agai atu foi i fafo o a tatou fomai.

O le isi tulaga o lo o fesiligia e nisi o sui usufono o le falemai lea i Tuasivi. Ua uma ona i ai feagaiga ua osia ma le JICA ma o latou lava o lo o gafa ma le faaleleia o mea o lo o faaletonu.

O le mobile unit; sa faatinoina lava i tausaga ua tuuina le auaunaga mo Savaii faapea Upolu. Ae talu ai ona sa i ai taimi na faaletonu ai le tatou mobile unit ae o lo o faataatitia fuafuaga ina ia toe amatalia ma toe faaauau pea lea auaunaga.

Avea ai foi lenei itula e avatu ai se talosaga aua o lo o taatia pea paaga a le Malo ma Itumalo taitasi aua le faaleleia o a tatou falemai o lo o i ai i totonu o Itumalo.

E manaomia foi le agaga fesoasoani ina ia faaleleia le tulaga o le tausiga o falemai, faapea foi le faaleleia o laueleele o lo o i ai i totonu a tatou falemai. E talosaga atu ai ina ia tatou galulue faatasi e faamatagofieina mea uma aua le soifua maloloina o tagatanuu o Samoa.

Lau Afioga i le Fofoga Fetalaiga, o nai mea na ua ou ootoo mai. Ua tele fautuaga ua tuuina mai mo le Matagaluega ma ua taliaina ma le faafetai ma le agaga foi ina ia fesoasoani mai pea le Atua e aumai le agavaa, aumai foi le tomiai ina ia mafai ai ona faatino finagalo e pei ona faaaliga. E le i fausia Roma i se aso e tasi, ma o le mea lea e tatalo atu ai ma le agaga vaivai masalo pe o le faaiuga o le tausaga ona toe agai mai lea o a outou faitioga ae o le a agai atu ina ia taumafai e faatino mea e pei ona finagalo i ai sui usufono mamalu.

O na pau lea lau Afioga...

Faafetai lava i lau Afioga i le Fofoga Fetalaiga. E faamalulu atu foi i le Afioga i le Taitai o le Itu Agai pe a faafoliga ou te le o amanaia fautuaga ma manaoga e pei ona saunoa i ai sui usufono mamalu. E pei ona ua uma ona ou talatalanoa atu, e leai se mea e le o tuua i lalo ma tusitusia ma o le a agai i ai le Matagaluega o le Soifua Maloloina aua e le mafai ona faatino i le vaiaso e tasi mea na aumai ai manaoga e ala i saunoaga e pei foi ona aumaia. A o nai mea ua uma ona oo i ai le talanoaga, o lea

Saunoaga Faataupou a Sui Usufono 1961-2011

na tau tolaulau atu, a o isi mea na totoe e leai e le o faatamala le faalogologo atu. O lea ua uma ona faamauiina i lalo ma o le a agai atu i ai galuega a le Matagaluega o le Soifua Maloloina i se aso oi luma.

E faafetai atu foi i lau Afioga i le sui usufono mamalu mo Falealupo mo upu faalaeiau. Lau Afioga i le Fofoga Fetalai, o lenei itula ua uma atu foi se taumafaiga po o se tali atu aua foi fuafuaga po o manaoga o sui usufono mamalu e pei ona aumaia.

E avatu ai foi malu i Puega pe afai ua sala se gagana i le taimi ua fano, e potu lava le tautai ae pisi le sami i le i'a e se i ama. E faamoemoe atu i le tofa faatamalii ma le agaga kerisiano e magalo ai lou tagata.

Ia alofagia e le Atua lau Afioga i le Fofoga Fetalai, ia foai auupega tataua aua le taitaiina o le Fono a Samoa. Ia alofagia foi e le Atua le Afioga i le Palemia ma le Aiga Kapeneta, aemaise foi le Afioga i le Taitai o le Itu Agai e agaia le malo aemaise sui usufono mamalu uma o le Palemene.

Ona faauma atu ai lea o se tala i lenei taeao, faafetai i lau Afioga i le Fofoga Fetalai.

Susuga LAAULI LEUATEA POLATAIVAO



Itumalo Faaalalafaga:

Gagai fomauga Nu.3

Filifilia:

13 Aperila 2006

Faatauto:

20 Aperila 2006

Lauga Faataupou:

13 Iuni 2006

Faafetai i lau Afioga i le Fofoga Fetalai ua maua se avanoa o lenei sui usufono ma o se avanoa foi lea mo lenei Itumalo e fai atu ai sa matou faamatalaga. E momoli atu foi le faafetai ma le faamalo i sui usufono mamalu uma o le Palemene na tulei i lenei taeao i o outou manatu faaalua ona ua matalupe ma matagofie tuleiga ma saunoaga. Ia, le paia maua o lo'u Itumalo, le paia i Aiga Tetele e lua o Samoa, o Aiga Sa Tupua ma Aiga Sa Malietoa, lau fetalai o lo i le Faletolu, le paia i Aiga o Mavaega, le mamalu i lau Fetalai Pao ma lou Sanaeseese, ae tainane le tapuaiga a Faafegaiga Taulagi i so'o se Fata Faitaulaga i totonu o lo tatou Itumalo. Ia lafo laia lo outou taula i malolo, tapuai mai o se taimi mulimuli ou oo atu, ae se'i fai so ta sao aua le upega a Samoa lea ua toe lalafa aua le faafogafogaaga a Samoa ma le mamalu o lenei Palemene.

Lau Afioga i le Fofoga Fetalai, lau Tofa Hon Tolofuaivalelei Falemoe Leiatuaalesa, ua e e' nei i le nofoa vaevaeloloa o le Malietoa ma e faalogo ia te oe le Palemene o Samoa. O le a muamua ona ou faapoi vagana i alofisa o tupu o Samoa na i le vavau, Mulinuu i Nuuasala aua ua faafotupule le ata o Talimalama, ua e'e Tupu foi le

poutū o le uluai asomua o le malama o le Maota Fono i Tiafau, o le Malae na utufia ai loifofoga o tupu o Samoa ina ia maua sona nofoaga. O le Malae Fono na lalafa ai, tulolo ai ma taape ai tofiga o manusisina o Aiga ma a latou Tama, o Tama ma o latou Aiga, Tumua ma Pule, Itua ma Alataua, Aiga i le Tai ma le Vaa o Fonoti. Ae a le alofisa na i le Taisamasama o le Tuimania na sooula ai le malelega a Ao e lua o Samoa, e tasi le Tupu e tapuai i ai na o le Atua.

O le upu a le Aiga Sa Malietoa ma le Aiga Sa Tupua – “Laauli, sau ina alu, sau ina alu e momoli lapalapa i malo. Faafetai ia Samoa ma lana tapuaiga aemaise lenei Palemene mamalu, ma o upu a lo'u Itumalo, sau e te alu e faaauau le tautua a lo tatou Itumalo i so'o se auala e manuia ai Samoa.” O le ala lea lau Afioga i le Fofoga Fetalai ua ou tulai atu ina ne'i meaane ua faatūtūgātā le tatou Maota i lenei taeao ae ua maua so matou avanoa.

Samoa lo'u atunuu pele, i le paia o Aiga, Aiga o Tupu, Aiga o Nofo, Aiga o Tumua, ae a ni sao o faga i le Tulatala, fotuai mai ai le Susuga i le Malietoa ua Ao i ai le Malo o Samoa, tulou. O paia ia aua Aiga ma a latou Tama, o Tama ma o latou Aiga, aemaise le tapuaiga ia Tutuila ma Manua. Taaololo laia ou paia aua o lea ua e Tupu i le Atua o lou Faavae. Ona ou manatua lea o le saafiafaga a le tausala o Papa. Talofa Malietoa, ua uma Ao ma l'u o Malo, ave le mutia e toto ae faatali i lagi se Ao o lou Malo.

Lau Susuga i le Malietoa, Lana Afioga Mamalu O le Ao o le Malo, Talofa ia te Oe le Tama o le Atunuu, malo le soifua, malo lou lagi e mama. O lau tautua afu mai le amataga, e le gafataulimaina i sa matou upu, ae tau ia o se mea e iloga ai la'u faafetai faa-sui usufono o le Palemene ma lo'u Itumalo. Faafetai mo galuega lelei uma mo Samoa, faafetai foi mo au faamanuia mo a'u i la ta feiloaiga a'o lomalomala le faiga filifiliga a le Atunuu. O la'u tatalo i le Atua i lou soifua manuia ia tumau; o lau Malelega foi lea ua ao i ai faalupega uma o le Atunuu i le aufai tatalo ua avea ai le Atua ma o ta Faavae.

Le paia maua o lo'u Auauna a le Atua i so'o se Fata Faitaulaga ma so'o se Ekalesia o lo'o nōnōmanū ma tatalo i le ao ma le po auā ni manuia mo Samoa atoa. O Feagaiga Taulagi ma Tamasā a lo tatou Atunuu, faafetai le tatalo, faafetai le tapuai. A'o le a avea ia lenei avanoa taua e momoli atu ai le faamaisega a lo'u Itumalo ma lo'u sui usufono i le tuua o le Malo e le Afioga i le Tupufia, le Sui Usufono o le Fono a Sui Tofia, Afioga Faumuina. E momoli atu faamaisega i le Masiofo Agatha, le nofo a alo, le aiga alii aemaise le Itumalo. O le paia aua le saofaiga a oulua Nofoasa, oulua Vaifale, le Falelima ma le Falevalu, Nofoa Faumuina o le Tupufia, ae tainane Faleata ma le Gafa.

Ou te faatulou foi i le afio o le Afioga i le Tuitua Tupua Tamasese Efi ma lau Masiofo, tainane le Tuiaana Tuimalealiifano Vaaletoa ma lau Masiofo. Ou te faatulou i lau Afioga i le Faamasino Sili, Afioga Patu Tiavaasue ma

Saunoaga Faataupou a Sui Usufono 1961-2011

lou faletua ma le mamalu o le Ofisa o Faamasinoga. Le paia maua luga ia te outou o Faauluuluga o Matagaluega, o tamalii ma failauga, faleupolu o tofiga, aemaise o faauluuluga o kamupani tumaoti.

Ou te faatulou foi i le ituvai o tina, faletua ma tausi, saoa ma tamaitai i ona tulaga faalupe uma. Samoa e, o oe o le ao mamala, o le ia iviivia e le soona autalaina, e leai se potopo o se vave na te toe suia ou ala ma ou sa tulou.

O Samoa o le Atunuu ua uma ona tofi mai le Atua; ua iloga Tama, ua iloga Aiga, o tamalii ma failauga, faleupolu o tofiga, faletua ma tausi, saoa ma tamaitai, tainane le au tautua ma le malosi o le nuu ma ua e silafia lelei, o oe o le Samoa auliuli lou tulaga ma lou faasinomaga i le tatou aganuu. Ua avea ai leni avanoa taua e momoli atu ai le faafetai ma le faamalo ia Samoa aoao e ala i le tofiaina o leni Paeaiaga ma leni Nofoaiga. Faafetai Samoa i le tofa mau, faafetai i le tofa tatala, faafetai le faatamalii, faafetai le faatupu. Afai sa sala uta, faafetai sa tonu tai. Faafetai i le Atua e le o tuua Samoa ia tama. Lalo maia laia o lou faatuatua ma e tapuai mai i le tapuai a le matua faitama ua maea ona e fofola le fala e ala i tupu ma fuesina loloa o Samoa. Talofa ua tofafa i peauasa moe i tofaga o tausala, o leni ua tatou sapi ma lavalava i lau tou faiva sa laulusasaa. E ui ina ua soua foi muliava ua totua too ae tepa i le ata i nisi o maa faafuagalu ae ua alaala i paga, o leni ua tatou aafu ma lavalava, ua tatou polo atu aleaga e ala i si a latou faiva sa laulusasaa.

Lau Afioga i le Fofoga Fetala faafetai mo lou valaauina. O manu na o le tatou Nofoaiga. As a Deputy Speaker, I will stand by you, serve you and the Parliament in any circumstances. Ae faamauiina le faafetai a leni Itumalo i Taitai uma o le tatou Atunuu ua tofafa mai tiasa sa latou asa le gasu o le taeao, le uluai Palemia o le tatou Atunuu le Afioga Fiame Mataafa Faumuina Mulinuu II, le Afioga Tupua Tamasese Lealofi IV, le Afioga i le Tuiatua Tupua Tamasese Efi, le Afioga i le Aloalii ia Vaai Kolone ma le Afioga ile Tootoalii Dr Tofilau Eti Alesana, se i oo mai i le Alo o le Malietoa lau Susuga Tuilaepa, ua faamalo le faiva; ua filifilia oe e le Atunuu e te faaauau le tatou galuega sa fau ao fau po. Malo toa, ua malo tau.

A fofola le fala o le Maota, lau Afioga i le Fofoga Fetala e 11 ia te au aiga o le Malietoa. O le ala lea o le faamalualuga o le paia o le Aiga Sa Tupua ma le Aiga Sa Malietoa ou te sau e faamaopoopo ma tuu atu o matou tauau i galuega lelei uma ua fai. Faafetai mo atinae uma sa fai mo lou Itumalo mai le amataga e oo mai i le taimi leni. E leai sa matou upu, na o se mea e iloga ai la matou faafetai.

Faafetai foi i le Afioga i le Sui Palemia i la lagolago malosi ma le totoa ma le galulue faatasi ma le paia maua luga i le tatou Kapeneta. Ae sili ai lau faafetai i lou Itumalo ona o le tofa autasi na limataitaiina ai le faiga filifiliga a Samoa i leni Paeaiaga. O le paia aua Tama a Punefu, Fatialofa ma Auelua, le Maopu Taulagi,

Malielegaoui ma le Faleatua ma le mamalu o le Itumalo. O ou moomooga na faalupe o naumati, e faapei ona naunau o le mutia i le sau, e faapena ona ou naunau e puipui tu ma aganuu. Ia Samoa ma le pule mamalu a alii ma faipule. O le feau lena na ou sau e aumai. O le malu o Samoa, o le pule mamalu a alii ma faipule ma le tatou aganuu. Ia taatia atu i le aai o finagalo i le tofa ma le uta i totonu o le tatou Maota Fono e sasaa i ai le fafao ma silasila mo le lumanai i le tauaveina o le tatou faamoemoe.

E momoli foi lau faafetai i lau Afioga i le Taitai o le Itu Agai. Faamalo le galue, faafetai le tauatai. O oe le isi fetu pupula o le Maota, o le toe ulutaia o le tatou Maota nei. E uma lava le soifua o lau uo o Polotaivao e naunau pea ia te oe ia o tatou toe galulue faatasi i le tauaveina o le tatou galuega, taumafaiga aua se lumanai manuia o le tatou Atunuu.

O lou talitonuga, ua uma taimi o faiga Vaega Faaupufai; o Samoa ua tasi ma o le iuga lena o faiga filifiliga a le Atunuu. O le tatou Faigamalo, silasila ane i le Maota nei. O ai o toe ese ai? Na amata i taimi o faiga Vaega Faaupufai ona o feeseeseaiga i le va o Tama a Aiga. A o le taimi leni, le paia e o le Maota Fono o Samoa, omaia tatou toe faufau le sa o Samoa. Tuu atu o matou lima, tuu mai o outou aao tatou galulue faatasi. O a uma atugaluga o lo o outou popole ai, e fai uma lava e le Afioga i le Palemia ma le Kapeneta o outou mana'o. E pei ona saunoa lau uo se tasi o sui usufono mo Vaimauga Sisifo, Tofa Sililoto Tolo, o lau Afioga o le isi supporter malosi a le HRPP, a ua pa lava. Lau Afioga i se tasi o sui usufono mo Safata Afioga Tuia Pua Fuatogi Letoa, le sui usufono mo Vaisigano Nu.2, le sui usufono mo Vaisigano Nu.1, ia na o nai ou manatu e fai vavale a o le tatou aiga leni, tatou omai e toe faufau le Atunuu. Ua uma taimi o faigata, ua tatou oo i tai malama ua tatou sapi i le Faleopunaoa talu galuega a o tatou matua ma o tatou tuua. O outou o lupe o le fuifui o manu o lo o outou pale mai i salafa, ou te le toe solia foi vasaga, faatai laia le fala, siligia le tai malama, aua ua le toe auvili a ua au tafeloa ne i toe toalia le sa o Samoa.

Lau Afioga i le Minisita o Tupe, faafetai i lau folasaga matagofie, lau Afioga Papalii Niko Lee Hang, ma e matua lagolagoina e lou sui usufono ma lou talitonuga i le faatuatua na tofia oe e le Afioga i le Palemia i le faasoasoin tatau o a tatou tupe. Hon Lee Hang, e le na ma se laina, o le isi lea ou itu taulagi o le Malo tele o Saina. Faafetai o lea ua faamagalalo le \$33miliona. Tautuana o lau galuega ia faamagalalo le isi \$400miliona. Tagi i lou Malo ua toatele tama ia ua i totonu o le Palemene e fesoasoani mai, o le tali lea mai le Atua, ia lelei le faafoega, lelei le faatulagaga, o lea ua amata. E pei ona saunoa nisi o sui usufono, a silasila mai o tatou atunuu alolofa mai ona faapena lea ona fai mai foi le fesoasoani mulimuli.

Saunoaga Faataupou a Sui Usufono 1961-2011

Le paia maualuaga i la outou Kapeneta, alo i o outou faiva a manaia; ia seu pea le manu ma outou tagai i le galu ina ia manuia lo outou alofaiva if eau ma tiute ma galuega o lenei Paeaiga aemaise le lagolagosua a Minisita Lagolago.

Faafetai faapitoa i Faauluuluga o Matagaluega ia te outou o tupu ma tamalii i lo outou feagai ai pea e lima ma vae i ai le paia maualuga i Minisita, e leai se iota o lo outou tautiga e maligi fua, ma o le fua tou te lulu tou te selesele. A ia outou alofagia mea o si ou Itumalo ia ua leva ona ou tolotolo atu ai ae le i avea au ma sui usufono. Le paia maualuga o le tatou Kapeneta, o si ou Itumalo e i ai pea nai faaletonu i le suavai taumafa ona e le faasoloatoa, e ta loa le 6:00 i le afiafi pe le paipa, e le lelei ai pea aso uma. E i ai nisi o taimi i mea tau maliu ma faalavelave e tautala atu ma le agaga maualalo ae faafetai ua maua le faamaoniga o lea ua i ai a tatou atinae ua faataatitia.

O lou malae taalo, ia e fa i le lima tama o le Gagaifomauga Nu.3 ua i lalo o le under 21, atonu a papale mai ona le tiga lea o outou finagalo i le tatou Manu Samoa.

Lau Afioga i le Minisita o le Soifua Maloloina, e foufou nei le fausia o le matou fale komiti na talosagaina e le Susuga i le matou Faafeagaiga o le matou nuu, galulue faatasi Faifeau ma le aufai upu aua le manuia o le nuu ma au nei. A maea le matou fale komiti, e talosaga atu pe mafai ona avatu se teine tausii mai ma sina fomai e fai ai check up a le matou nuu i masina taitasi pe faalua foi i le masina. O le ala laupapa i le va o Sasina ma Letui, e tele ina poloka ai asiasiga taua a le tatou Palemene pe a tetele timuga.

O a tatou faatoaga, ou te lagona o lena ua tele saunoaga matagofie e pei ona saunoa le Afioga i le sui usufono mo Aana Alofi Nu.3 ma e tatalo atu, e le o se mea tau ufiufia, sa o mai tama Saina muamua e fai faatoaga a le Atunuu sa manuia. E faapena foi tama mai Siamani na ala ai ona fausia le Uesetete lea, sa lelei. Ia, na pasi loa i lima o tama sese, lea e i ai le faaletonu lea e tau togafiti nei e le Afioga i le Minisita ia Faumuina ma le Afioga i le Minisita Lagolago.

O lou Itumalo, o le Itumalo e pito sili ona tele ona eleele; e 30,000 eka i le Atunuu. O la e taufai si a matou atinae, o lo o matou taumfai e toe toto le vaomatua e fesoasoani i le siosiomaga, ia ae leai se tupe. E tatalo atu ai ma le agaga faaaloalo, e pei ona afifio atu le Afioga i le Palemia ma le mamalu o le Kapeneta, toto uluai laau Samoa sa amata ai le atinae, toto pea a tatou laau ina ia mafai ona auina atu i fafo a ua leaga mai faatoaga, a o lo o i ai se isi mea tatou te tua i ai; a o lo o manaomia ni seleni aua le faaauauina. Faafetai o lo o faasolo atu pea atinae o toga kapisi. O le vaiaso nei sa ou asiasi atu, faafetai i lau Afioga i le Minisita, e fou lou tulai mai a ua e manatu atu i le matou Itu o Tane, faasolo pea e tau i Aopo ma Gagaifomauga ma Gagaemauga.

E tatalo atu ma le faaaloalo i le uafu i Asau, e tele sona taua aua le atiaaina o le tatou Atunuu i oloa e auina atu i fafo aemaise le tatou Turisi. Faafetai foi i le Afioga ia Toleafoa ua maua tala o le a oo atu i ai le faasoa a le tatou Malo.

Le paia maualuga i le tatou Palemene lau Afioga i le Fofoga Fetalai, ia o nai manatu na, ae se i ou liliu ane i le tapuaiga a si o tatou Itumalo. Lou Itumalo e, ua ou afe atu e momoli le faafetai ma le faamalo i le paia maualuga i la outu taupuaga i lenei aso. E muamua ona ou momoli le faafetai i tupu ma tamalii uma o le tatou Itumalo sa tauavea le nofoa mai le amataga seia oo i le Afioga Vagana Tamate sa ia tauavea le nofoa i le Paeaiga ua mavae nei. Faamalo galue, faafetai le tauatai ua faigofie ai lou taunuu mai i le faaauauina o tatou galuega. E le mafai foi ona faagaloina le Afioga ia Polataivao Fosi sa tauaveina le nofoa o lenei Itumalo i tausaga e tele, ma o lana faatonuga ma lona manaoga ua ou toe sau ai i Tiafau e faaauau le tautua mo lou Itumalo.

Le paia e i Aiga e lua, le Aiga Sa Tupua ma Aiga Sa Malietoa ma le mamalu i le Faletolu, le afifio o nofo a Faafeagaiga i lau Susuga Pinelo ma lou faletua, lau Susuga Panapa ma lou faletua, lau Susuga Efaraima ma lou faletua, lau Susuga Sopele ma lou faletua, lau Susuga Penaia ma lou faletua, lau Susuga Malo ma lou faletua. Faafetai le tatalo, faafetai le tapuai.

Le paia maualuga o le tatou nuu i le afio o lau Afioga i le Matua o Leasi Nanai, Leituala Misiuepa ma le paia o le Aiga Sa Leasi. Le afio o lau Afioga i le Sao Togoii Ki ma le paia o le Aiga Sa Togoii, le afio o lau afioga Vagana Tamate ma le paia o le aiga Sa Vagana, afio o lau afioga i Matuanalua Polataivao Povalu ma le paia o le aiga Sa Polataivao, le mamalu ma le paia maualuga o le Faletolu, paia ia Saitupua, Sa Lealiifano ma Saletolo i ona tulaga faalupe, paia aua oe Sa Tooa i faletua ma tausii, saoa ma tamaitai ma le loaloa o lo tatou nuu. Tainane lou nuu pele o Aopo; paia o le Aiga o Mavaega, lau fetalai Pao ma le Saeseese. Ou te manatua le upu a le tauatai i tiuga a tamalii, "se ua talanoa manu ae sisila atu, aua le seuga ua mataina." Sa Malietoa ma Sa Tupua, ua malo le fai o le faiva, le faletolu ua le faatulima, aua e fai o le ofeloa ma le matila. Ua to foi manu i le Atua e ala i le tapuaiga a le Afaigaluega paia a le Atua. O le Laauli a Aiga Sa Malietoa ma Aiga Sa Tupua ma le Faletolu na outou to ia te au, ina ia ou sau i Tiafau e faaauau le tautua malo. Ae ou te tatalo i le Atua, ia ave lou ola ia aoga, le Alii e i au feau, ave ou aso o totoe ou te tautua ai mo le manuia o le Malo o Samoa, aemaise oe lou Itumalo. Ua malie ai nei Le Papaigalagala, ua malie le faatolotologatama. Ua malie togafau gagana, ua malie le tosoga aulama, ua ou ava magalo i sualiu o lo outou vaa.

Lau Afioga i le Fofoga Fetalai a mavae pa fesopoai ona faatini lea o foe mo le ae, ae ou te faapoia vagana ina ne i ala lau gagana, i ou paia Samoa o oe o le aomamala. Le

Palemene o Samoa o nai au toe upu, ia o ta manatua o le Atua o lo ta Faavae, ma ua uma ona faamanuia le Atua ia Samoa. O Ia o le Ala, Upu Moni ma le Ola. Ma ia o tatou talitonu i le agaga o le alofa ma le faamaoni e faaauuina ai tiute ma tofiga uma ua tofia ai i tatou e le Atunuu. E pei ona saunoa le Afioga ia Moseniolo Mataeliga i le uluai aso o le tatou Paeaiga, “O tatou o mulumulu vae, o auuana a le Atunuu, ona le pine lea ona tatou taunuu i Kanana i le nuu ua folafolaina,” ae i le muagagana Faasamoa – “E fai o le fale a o le anoafale, o le tofa ma le faautautaga e malu ai Samoa.”

Ia manuia le faafofogaaga a Samoa i ona tulaga faalupe; ia manuia Auuana paia a le Atua i so o se fata faitaulaga. Ia soifua oe lou Itumalo. Samoa e o lau toe tatalo, ia outou talosia lenei Palemene na e filifilia.

Soifua ma ia manuia.

Afioga LAFATELE PATRICK LEIATAUALES



Itumalo Faaalalafaga:

Alataua Sisifo

Filifilia:

13 Aperila 2006

Faatauto:

20 Aperila 2006

Lauga Faataupou:

13 Iuni 2006

Lau Afioga i le Fofoga Fetalai ma le mamalu o le Maota, ou te tulai atu e folasia se lagona o lenei Itumalo o Alataua Sisifo e tusa ai ma le Tala Faatatau o le Tupe ua taoto nei i le Laulau a Fono.

O Samoa e matafanua i malaetele ma malae tafunai, le fale tau aitu ma le fale tau tagata, ae fiu o le fanua i Laloifi ma Falesau ma fale o mavaega. Taoto laia le Motu o Salaia; afai e matafanua i malaefonoa Samoa i Sisifo nei, ae muli i fanua i elele Sa o le Tonumaiepa, tausi o le Alataua i le Falemoo, o Samoa lena i lona aotelega.

Tulouna la le afio o Lana Afioga Mamalu O le Ao o le Malo o le Malo Tutoatasi o Samoa, lau Susuga i le Malietoa; tulouna le Fono o Sui Tofia lau Afioga le Tuiatua ma le Tuihana; tulouna lau Afioga i le Faamasino Sili ma le Ofisa o Faamasinoga. Tulouna Faauluuluga o Matagaluega eseese a le Malo ma Matagaluega Tumaoti; tulouna le malio lasi o Samoa i ona tulaga faalupea.

Tulouna la le fuefuesina o le Atua e ala i Feoi o le Talalelei i Fatafaitaulaga e fia ae se i ou afe ane a i fanua leaga e faigata o le Maota o le tagamanu a Samoa i Tiafau na faufautia ai o ta tuua i lana sailiga malo.

See ia i le matila ma le ofeloa lau Afioga i le Fofoga Fetalai, lau tofa Leulumoega o oe o le uluai Tumua i le tofiga a Malietoa a o alofaiva ma tu i le Toomatumua o le Sa o Samoa lau Afioga i le Palemia ma le mamalu o le

Kapeneta; e faapea foi le lagolagosua a le Taitai o le Itu Agai ma sui usufono mamalu o le Fono Aoa o Samoa.

Ou te le faasapilima foi i le mamalu o lou Itumalo o Alataua Sisifo ou te fia ofo alofa atu ma faatalofa atu i lau tapuaiga, ou te le tautalatalaina faalupega lavelave lo ta Itumalo. Tau ia ina ou sau i le va e pei o le faiva i malae aua le afio o Tapaau ma Aiga o Ao o Faalupega, lau fetalai Fofoga o le fofoga o papa ma Tamafaiga ma le mamalu o le Alataua. Afai foi o faalogologo mai si ou nuu o Tufutafoe; le paia o le Usalii ma a latou Tama, lau fetalai Momoemausu ma le Lauti na laulelei ma le mamalu o le Alataua. E faapitoaugafa sau faamatalaga i lou nuu pele o Neiafu; i le paia o le Aiga Samoeleoi o le Aiga na mua i malae, lea e faitau le Atunuu pau a lea o le Aiga sa mua i malae. Afai o faafofoga mai le Atunuu, mulina i Sa Malietoa ma Sa Tupua a o le Aiga lea na uma loa ona fau Atamu ma Eva, fau loa le Aiga Samoeleoi. Le paia ia laua Tamaigoa Taatiti ma Tuiaufai faapea le mamalu o le Alataua; o lea ua maea le faiga filifiliga a le Atunuu, ou te faafetai atu i uso a tauva sa matou faafeagai i le taufetuliga aua se suega o se tofi o le Itumalo. E le uma le fai aso o le Alii, tapuai mai, masalo o au nei ae o outou taeao.

Ou te fia faafetai atu foi i lo outou filifilia o au e molimolia so outou finagalo i upufai a le Malo; a o ai le tagata ua outou manatu ane ai? Aua e i ai le muagagana a le Atunuu i ou uso a tauva, “E ia au nei ae outou taeao”. Ia po fala laia lau tapuaiga lou Itumalo pele ae se i ou faaoololomaau i so ta lagona i atinae o lo o moomia e lo ta Itumalo.

Lau Afioga i le Fofoga Fetalai ma le mamalu o le Maota, e tasi lenei Itumalo o le a uma lava le lalolagi e le i sisina a se paipa. E talosaga atu i lau Afioga i le Fofoga Fetalai e ala atu i lau Afioga i le Minisita o Galuega, Felauaiga ma Atinae Eseese, e fai si leva o taumafai mai Tamā foi sa nofoia le Nofoa lenei, na tau asa mai i fita. O lenei o le a uma lava le lalolagi e le i oo atu a le vai i Alataua Sisifo. Lau Afioga i le Minisita, e valuvalusia aa o le fau. A silasila lau Afioga pe a faapea e taamilo atu sau asiasiga e agai atu i Tufutafoe ma Neiafutai, e matua leai a ni moli auala. E pei a o se moto tuufua, vaeatu le paia o le afiafi. E moomia moli auala mo le agai atu i Tufutafoe faapea foi si o matou nuu o Neiafu.

O le isi vaega e talosaga atu ai lau Afioga i le Minisita o le SamoaTel, pau lenei o le nuu a motusia le telefoni e atoa le masina. E le o lelei le tele o le service o telefoni i si o matou Itumalo, e talosaga atu ai e a pe a faasopolia le tele o fale e pei o le tele o isi Itumalo? Pau lava fale o le Itumalo lenei e i ai telefoni na o le fale o le faifeau ma fale komiti, e moomia le faasopolia o aiga ina ia mafai ona maua foi e latou le fesootaiga aua foi fanau o lo o nonofo i atunuu mamao.

Lau Afioga i le Minisita mo le Soifua Maloloina e auala atu i le Fofoga Fetalai, e moomia lava le fesoasoani i le

faaleleia o le falemai i Sataua. E pei ona silafia, pau lenei o le falemai a talosaga atu i taavale po o se ambulance e aumai ai gasegase i Apia nei, ae fai mai e sue a e le aiga ia le taavale e aumai ai. Ua lua maliu o lou Itumalo, na ou malaga lava au i Savaii ma aumai i i nei. E fia faaleleia lea vaega o le auaunaga aua foi si o matou Itumalo, e latalata atu i le falemai lea e i Sataua.

O le isi vaega e fia molimoli atu lau Afioga i le Fofoga Fetalai i le Minisita o Taaloga, e moomia se malae taalo o lenei nuu. A silasila lau Afioga ile Minisita, e lua alo ma fanau o Alatusa o tu maua ai lo tatou Atunuu i Samoa – o le tama lea o Anetelea Aiulupo ma Opeta Palepoi - ae a silasila i le malae e fai ai taaloga a si ou Itumalo e fai a i luga o le oneone. E moomia se malae lelei aua e tele tama ma fanau e talenia i Alataua Sisifo.

O le isi vaega o nisi o auala galue ua leva ona talosaga mai, na talosaga mai lava i le taimi o Aliimalemanu Sasa, faasolo mai ia Nonumalo Faiga, sau Tuaiiafai ae o lea foi ua ou talosaga atu. E lua auala galue e alu i uta, o ia auala galue masalo e silia i le 40 aiga o lo o i uta, e moomia le faaleleia o ia auala. E talosaga atu ai i lau Afioga i le Minisita o Galuega, Fealuaiga ma Atinae Eeseese.

O le isi vaega lea e fia talosaga atu ai o le uafu lea e i Asau. E moni lava matou te le nonofo i Asau ae fai si mamao o le mea matou te malaga atu ai, matou te o atu ai i Salelologa toe tuli le isi itula atoa. Ae a faapea ua fausia le tatou uafu lea, e matua 100% e faigofie mo matou sui usufono nei e nonofo i Asau, Aopo, Sasina. Atonu e i ai se taimi lagolago mai foi le sui usufono mo Gagaifomauga Nu.3 aua ma te Itumalo faatasi.

Masalo ona pau lea o nai atinae e fia molimoli atu i lau Afioga i le Fofoga Fetalai. E pei e faamamafa lava matou tautalaga i le vaipapa a lenei nuu. E le o po Malae i le faafofoga mai a lou Itumalo ua fai sina leva ona talosaga mai i le vai ae le o mafai ona faamalieina lou Itumalo se i vagana ai tane, ae ua le lava e lenei nuu inu tane. Lau Afioga i le Minisita o Galuega, Fealuaiga ma Atinae Eeseese, ia silasila totoa i ia vaega e pei ona tuualalo atu ma tatalo atu i lau Afioga e te fesoasoani mai i lenei Itumalo vaivai ma le faatauvaa.

Ona faatai lea o se matou leo i le tuua o le malo e le Afioga i le Tupufia. E avatu foi se matou faamaluluga i le Masiifo ma le nofoaalo, ia tau ia ia maua se nofoaga lelei o le Afioga i le Faumuina po o le Afioga i le Sui Usufono o le Fono a Sui Tofia i le lagi ma le ola e faavavau.

Ona faatai lea o so matou leo, ia sasaa feuu ma faaosofia mualuaga i le paia o lau tapuaiga Samoa i lona aotelega. Tu matila pea ia lau Afioga i le Palemia ma tafe toto ala o lau Kapeneta aua foi le tatou galuega fai i lenei lima tausaga.

Lau Afioga i le Taitai o le Itu Agai, malo le faatoatoa, o mai ia tatou galulue faatasi ma soosootauau aua le taumafaiga o le tatou Malo aua le tapuaiga a si o tatou Atunuu. O se upu foi ua sala i lau faafofoga i lau Afioga i

le Fofoga Fetalai, ia e poto lava le tautai ae le atoa atu i lona vaa. Afai foi e sala se gagana a le Aiga Samoeleoi, ia leaga o le Aiga na mua i malae na uma loa ona fau Atamu ma Eva fau loa.

Ia soifua ma ia manuia.

Tofa LEALAILEPULE RIMONI AIAFI



Itumalo Faaalaalafaga:

Faleata Sisifo

Filifilia:

13 Aperila 2006

Faatauto:

20 Aperila 2006

Lauga Faataupou:

13 Iuni 2006

Faafetai i lau Afioga i le Fofoga Fetalai e tusa ai o le avanoa, sa leai se manatu o le taimi lenei o Faleata Sisifo ae le afaina o Faleata e sauni lava i so o se taimi. E popole foi i lenei taimi ona ai ua fai malologa a le Itumalo ma tofafa ae le afaina, o nisi o faafofoga mai e oo taeo faapea; “Ua outou misia le lauga a le tamaloa”, ae afai foi e faaletonu ona faapea lea o nisi, “faafetai tou te le i faalogologo i ai”.

Lau Afioga i le Fofoga Fetalai, ae ou te le i faia se manatu e tusa o le Tala Faatatau Autu o Tupe, e muai ou faatulou i paia o Maota o Samoa i le afio o lau Afioga i le Palemia, afio lau Afioga i le Sui Palemia, paia o le Kapeneta, afio lau Afioga i le Fofoga Fetalai, afio foi lau Afioga i le Taitai o le Itu Agai, le paia i Minisita Lagolago, le paia i sui usufono mamalu o lau Kapeneta faapea foi le Vaega Tututoatasi.

O Samoa o le a le toe oo i ai sau faamatalaga, o paia lava o le vavau e oo lava i le faavavau, ua maea foi ona taoto lona agatonu, o lea ou te faatulou, tulou ai.

O le upu faafetai, e leai se isi upu e i luga atu o lea upu; o le upu sili lava lea i le gagana Samoa, o le faafetai. E le gata i le gagana Samoa a o totonu o le Tusi Paia, le lepela e toatasi lea na toe foi e faafetai i le Atua ina ua faamamaina o ia o lea na faamalolo ai e le Atua. Ou te muai faafetai i le Atua ona o lana faasinomaga ma ana tofiga ua mafai ai ona tatou potopoto i le Maota lenei o Samoa, o le vai tele e utuvai mai i ai le Atunuu; faafetai i Lana faasinomaga.

A o le i faia le Palota, sa tatalo le aufai tatalo, sa tatalo Itumalo, tatalo nuu ma aiga, filifili mai e le Atua ni Taitai e taitaia le Malo. Ou te talitonu o le finagalo lea o le Atua, afai ua filifilia tatou e le Atua ua na o le Atua foi na te toe aveeseina i tatou.

Lou Itumalo e, o lau faafetai i le afio o lo oulua toalua, Ale ma Ulu ma o oulua Aiga; lau Fetalaiiga Ulugia ma le Aiga Sa Ulugia ae pola puipui e Alo o Malietoa le Falefia o Alii, le lua toalua Toi ma Tulaga faapea Lealailepule,

Saunoaga Faataupou a Sui Usufono 1961-2011

susu o faafeagaiga i fata faitaulaga e fia i totonu o lo ta Itumalo ma outou faletua, faamalo faafetai i la outou tatalo.

Faafetai i lou Itumalo i lenei faaeaea maualuga i lo outou manatu mai i le tagata faatauva, ai ua outou vaai le talavou. E sao a outou e vae mama, e augofie e fai a outou feau ma finau i soo se mea tou te finagalo ai.

E fia avatu le agaga faafetai tele i lau Tofa Hon Ulu Vaomalo Ulu Kini le sa seei i le Nofoa, faamalo faafetai le fai o le faiva ma faaeaea i lo ta Itumalo i le tele o au galuega lelei sa fai ma faatino, faamalo faafetai, ia tau i le Atua lou afu sisina i lo ta Itumalo ma ou te talitonu e uma lau lauga i le po nei ua e alofa ia au – faamagalalo au.

Lau Afioga i le Palemia ma lau Kapeneta ma le paia i le Faigamalo, faamalo foi o le faiva i galuega e tele sa outou faia e le gata i le Malo aoao a o lou Itumalo o Faleata. O lea ua toe tusilima le Atunuu i lau Afioga ma le Faigamalo, o le tau i ia o galuega lelei, faamalo.

Lau Afioga i le Taitai o le Itu Agai ma lenei Itu, faamalo fai o le faiva. E le faigofie la outou galuega a o lou talitonuga o le malos i tatou e manuia ai ma tonu le Faigamalo i le tatou sailiga ina finau i mea e tatau ona finau ai, e faigofie foi ona faafoeina le Malo.

I le Vaega Tututoatasi, o se mea e i ai se toatasi po o se toalua, ua i ai ma le Atua ma aua tou te loto vaivai. O taua i onaponei e le faamoemoe i se toatele o se vaegaau, a o le totoa o le autau ma le lelei o meatau.

Ona ou faasolo lea i lou Itumalo i nai manaoga i mea sa ou tautala i ai i le taimi a o faia le faatosina, ni mea o le a finauina aua lou Itumalo. O lau lauga lenei lau Afioga i le Fofoga Fetalai, o le lauga mo le lima tausaga. E le faapea o le lauga o le lima tausaga ne i te i ua le toe sau pe a uma le faamasinoga, e leai; o mea o le a ou tautala i ai ile po nei, o mea o lo o fia faalelei mo le lima tausaga i le lumanai. O ni mea o le a faatino, faafetai i le Atua, faafetai i le Malo. O ni mea e le uma, ou te toe foi mai e faauma.

O le a ou amata atu i le afioaga o Vaiusu lau Afioga. E silafia foi e le mamalu o le Maota o le tele o le tuamaota o lenei afioaga ua fai ai atinae a le Malo, o mea taua e le teena e lenei Itumalo ma le afioaga, ae se i faamolemole tagai ane faamuamua tupulaga o lenei Itumalo ma le afioaga, i galuega fai ma pisinisi. Afai o se tau i talafeagai lea mo eleele ia galulue ai tupulaga a lenei Itumalo aemaise le afioaga o Vaiusu. O totonu foi o Vaiusu o lo o i ai le auala e oso sao mai e feagai tonu ma le malaetaalo mai i le aualatele a le Malo i tai. E talitonu o lea auala o le a faaoga tele i taimi o taaloga a le Pasefika.

Lau Afioga i le Minisita, faamolemole e ao lava ona toe faaleleia lea auala ma toe faalatele, faamoli auala aua le saogalemu o ē e feoi ai i lea vaitaimi aemaise foi le mamalu o le afioaga o lo o affio ai i lea vaega ona ua tele i uta le nuu o Vaiusu. E le gata i lea lau Afioga, o le tasi lenei o afioaga ua tele le meataulima o lo o sau ai, masalo

e ova i le 60% meataulima o lo o gaosia mai i totonu o Vaiusu. E tatau i le Malo ona i ai sina fasi eleele i totonu o le mea o lo o fai ai taaloga o le Pasefika e fai ai se fale tele e faaoga i ai alo ma fanau a lenei nuu aemaise le Malo e gaosi ai meataulima, ia oo atu i le taimi o taaloga a le Pasefika ua aoga e fai ai se flea maketi e faaoga i ai meataulima. E le gata i lea ae tatau foi ona fesoasoani i ai ma turisi e faaoga i ai tupulaga aua, mo lo outou silafia o le Itumalo lenei o Faleata Sisifo e tau leai ni tuamaota, e faamoemoe lava i galuega tupe maua e fesoasoani aua le tausiga o aiga. E aoga foi la ona seelua ai le Afioga i Minisita o Aoga, Taaloga & Aganuu aemaise le turisi e aoga tele se vaega faapea. A oo i taimi o taaloga ae fai faaentertainment centre; a uma taaloga omai tagata taumamafa ai i i ma sivasiva ai ausiva ma matamata ai i meataulima. Aemaise e fai ma mataaga a le au turisi mo le agai i luma.

Ae le gata i lea lau Afioga, o le Gataifale o lenei Itumalo e amata atu i Vaiusu seia paia Toamua ua tele ina tanu e pisinisi o lo o i ai nei. Ou te talitonu o le vaega o le siosiomaga o lo o nafa ma lenei vaega; masalo foi ua uma ona ave ni laisene i ai po o ni pemitā, ae ou te talitonu e tatau ona galulue faatasi ma alii ma faipule. E le faapea foi a tanu ou tuafale po o lumafale ona afaina ai lea na o oe, e afaina le siosiomaga o le Itumalo atoa. E amata atu i Vaiusu mo le tugane ma le tuitui seia oo lava i Puipaa ma Toamua i figota o le sami e le misi le afiafi le tou gasolo atu e faatau mai tauia. O lona uiga a faifai pea lea vaega, o le a tele se aafiaga o le siosiomaga i figota o le sami. E le gata i lea o otaota ia e lafoai i ai, po o fai se suesuega a le Siosiomaga i ia mea. E tatau ona i ai se sui o le Itumalo e tatau ona malamalama i le agai i luma o atinae o mea uma e fai i totonu o le Itumalo ona e aafia ai tagata o lo o nonofo ai. Se i tagai ane i lea vaega faamolemole.

Ona ou oo atu lea i Toamua ma Puipaa. Lau Afioga i le Minisita o Galuega, Felauaiga & Atinae Eseeese, o lea sa ou tau maua sa tau amata galuega i auala galue i le tausaga nei i le amataga. E faamolemole e faafesili atu po o afea e toe faaauau ai ia auala galue, ua fai si leva o taatitia mai nei auala galue i tausaga e tele e le o faatinoina ae ua tele le Itumalo i uta. O i foi o lo o galueaina aua fua o faaeleeleaga aua le tausiga o aiga ma le faatauina mai i le maketi; faamolemole se i tagai ane i auala galue o lenei afioaga o Toamua ma Puipaa.

Na ou faasolo i uta i Falelauniu, faafetai o lea ua amata galuega o le auala. Ua ofo le Itumalo ma le nuu o Falelauniu e le i atoa se masina o le sui usufono a ua fai le auala. E momoli atu ai le faafetai tele i lau Afioga i le Minisita a o lea ua toe taofi. E faapea mai le Matagaluega ua tender ae faamolemole e fia faaauau atu lea auala ona e tele aiga o lo o nonofo i lea vaega o le Atunuu i le tau savali mai i aoga a fanau. E fai si mamao tele o lea auala e le mafai foi e pasi ma taavale laiti ona o i ai ae pagatia le toatele o lenei vaega o le Atunuu po o lou Itumalo i le

Saunoaga Faataupou a Sui Usufono 1961-2011

savali i uta ma omai i tai. E le gata i fanua ia o fanua o le Samoa Land le tele o nei fanua. Pe le o i ai se fuafuaga tuutuu mamao i e o lo o alala i nei fanua i se fuafuaga i le faatauina po o se lisi tumau ona ua au tausaga ona nonofo ai nai tagata i uta nei ae le o mautinoa le lumanai mo latou. O nei tagata ou te masalo e le o toe iloa ni mea na omai ai, ae ia fesoasoani ane i ai faamolemole i lea foi vaega.

Lau Afioga, faasolo i uta i Tapatapao ma Laloanea; masalo ua ova ma le 60% po o le 70% o le maketi i Savalalo e le o po se lilo i lenei Maota le tele o fualaauaina ma fua o faaeleeleaga o lo o sau mai i i le vaimea lea ona o le lelei o le eleele. A o le auala, paga lea, e fai sina faaletonu. O lau Afioga i le Minisita, aemaise lau Afioga i le Minisita o Tupe o le ta Itumalo fai toalua lea. A ou tau atu i lau palota fai mai ua liliu ia te oe ou fai i ai, palota ia Niko leaga e mamao lou malo. Faamolemole, se i tagai ane i lea auala e faafaigofie mo le feoaiga a le aufaifaatoaga.

E le gata i lea lau Afioga i le Minisita o Eleele Faasaoaina. O le tele o fanua i Laloanea e le faaaogaina. Sa ou fesiligia le Matagaluega o le tali – o lo o noatia e lisi e tai sefululua, sefululima, sefulu tausaga. Lau Afioga po o i ai se aiaiga o ia fanua i se umi taatia ai e le gaioia ua tataua ona tuu mai i e o lo o fia galueaiina le vaomatua. Aemaise o lena ua i ina i lau Afioga le talosaga a le sui usufono ma nisi o lenei Itumalo e tuu mai nisi o nei fanua o lo o avanoa se i galulue ai, toe foi e fai faatoaga ma galueaiina le vaomatua faamolemole lau Afioga.

Ona ou oo mai lea i le nuu lenei o Vaitele Lau Afioga i le Fofoga Fetalai, sa ou fai i lou Itumalo i le taimi o le faatosina o Vaitele e tu i totonu o le ogatotonu o lou Itumalo. O i foi i Vaitele o lo o tele ai pisinisi ma atinae e fai a le Malo. Ou te talitonu, o i tonu e tataua ona fai ai le taulaga lona lua o Samoa, tu i totonu o Vaitele ona o mafuaaga ia lau Afioga. O lo o i ai se fanua o lo o ua avanoa e talafeagai mo lea fuafuaga. E le gata i lea, o le taimi o lolovai ma timuga tetele e pei ona silafia e leai se maketi, ua le sao mai le toatele i le taulaga nei o Apia. Ae aoga ona fai le taulaga e tua i ai le Malo. E le gata i lea lau Afioga, ou te talitonu ua faatumulia foi Apia nei ma ua le gafatia e le taulaga o Apia le tele o atinae ma pisinisi o lo o agai pea i luma, ae aoga ona faia se taulaga lona lua e fai fuafua aua le agai i luma aua ua tupu le Atunuu. E le gata i lea, o le vaiaai lea e i Vaitele, o lo o faatupulaia le fuainumera o ona tagata i aso fai pea ma aso uma ma o lo o tulalata foi e le gata i le malae vaalele, o le uafu. E le gata foi i lea o i ai se channel po o se alavaa talafeagai tonu lava ma gatai o Vaitele i le lumanai i le agai pea i luma o le Atunuu e ono fai ai foi se uafu i i aua le faafaigofieina o felauaiga o oloa ma tagata.

O le tasi itu, o Malo atiae o le mea lava lea e agai i ai. Ou te talitonu e tele atinae a le Malo i so o se itu ae ou te talitonu o le taimi talafeagai lea e faia ai se sub-centre faapea po o se taulaga lona lua po o se taulaga laititi mo

Samoa ia tu i totonu o Vaitele. E amata i sina maketi ia ma le maketi e faatauina ai fualaauaina, ma ua tataua foi ona i ai ma ni ofisa a le Malo. O lea ua ou faalogo o le a amatalia le galuega i fale a le NPF o i ai foi ni faletupe ia o lea faafaigofie le galuega mo lea vaega tonu pe afai ai lea tulaga. Ae le gata i lea lau Afioga i le Tamaitai Minisita mo le Soifua Maloloina, ia ua tataua foi ona i ai ma se sub-centre a le falemai i i lea itu tonu o le Atunuu ma se Ofisa o Leoleo.

E le o po se lilo o Vaitele lea ua fai ma se tasi o nofoaga e tele ai le solitulafono, e le tau natia lea tulaga. O le isi lea luitau ia te au ina ia faia ni atinae faatupulaia ia maua ni galuega a nai tagata. Aua e sosoo lava le nofonofo i le fale ma le fai o le solitulafono; a leai se mea e faia e faapena ona oo ni manatu e faia ni mea e le talafeagai. Ae a taumafai e faatupulaia ni galuega aua tupulaga lalovaoa, e talitonu e faigofie foi ona vaaia lea vaega tele aua ua amata nei fonotaga a le matou nuu e taumafai e faatupulaia ni galuega aua tupulaga lalovaoa. E talitonu e faigofie foi ona vaaia lea vaega tele e taumafai ia galulue faatasi aua le saogalemu ma le nonofo fealofani o tagata uma aemaise i latou uma o tupu ma tamalii o lo o alala i totonu o Vaitele ina ia nonofo faatasi, aua o nofoaga ia tatou te nonofo ai ma tatou uma lava; a ia tatou nonofo i se nofoaga toafilemu mo tatou ma a tatou fanau mo le lumanai.

Lau Afioga, a o ou i Vaitele lava i le Aoga. O le aoga o lo o i ai nei, e tasi le Primary School ua 900 tamaiti aoga. O le numera tapulaa talafeagai o le aoga lea na o le 750. Masalo o lo o malamalama le Afioga i le Faatonu Sili i le tuu vaevaena foi lea o tamaiti i le faiaoga i le ratio e 1 i le 30. O le taimi nei, ia o le 1 i le 40 po o le 1 i le 60 i nisi vasega o lo o i ai ona ua toatele ma faatupulaia pea le fuainumera e le gata i uta i le aoga i uta i Vaitele, ae o tai i le aoga e tasi i tai i Saina o lo o i ai uma Toamua, Saina ma Puipaa. O lona uiga lau Afioga i le Minisita o Aoga, Taaloga & Aganuu, ua tataua ona faia se isi aoga i Vaitele. O lo o i ai nei le fanua o lo o avanoa i le Samoa Land e 4 eka mo se fuafuaga e faapea. E talosagaina le Afioga i le Minisita mo lea fuafuaga tatou te galulue faatasi ai aua se faaleaoga mo tupulaga o Vaitele ma Faleata Sisifo o lo o faatupulia pea le fuainumera. E le o po se lilo o vaiaso uma ma masina uma e le misi lava le fale fou po o le aiga e masii mai e alala i totonu o Vaitele. E tasi le taua ia te au, ua faaopoopoina foi numera o le palota a Lealailepule i le isi 5 tausaga.

Lau Afioga i le Fofoga Fetalai, o le isi mea taua e ao ona fai mo le vaega lea o Samoa mo le Itumalo, o se fanuatanu. O le kuata eka lea e tele ina nonofo ai le Itumalo, e le lava, pe a faapea e faia ai ma tulaga faapea. E talitonu ua ou talanoa i tagata o lou Itumalo, o tatou o tagata Kerisiano, ma tatou agai i luma o tatou mafaufau, e tataua ona ave o tatou tagata, tino maliu se i tulou i se fanuatanu e tanu lelei ai i le agai i luma ae tuu o tatou eleele aua fanau e fai mai. O i ai se fuafuaga a le Samoa Land mo se fanuatanu i

Saunoaga Faataupou a Sui Usufono 1961-2011

Aleisa pe moni? Afai o lea, ou te lagona e tau latalata mai foi i Vaitele. Ae afai o i ai se fanua talafeagai, e aoga mo lea vaega. Ae i ai le fanua tele o lo o i ai lau Afioga i le Minisita ou te talitonu ua e oo i ai, o le omo tele lea sa lau mai ai le palapala i uta i Vaitelefou. O lenei omo, ua fai ma faatiga mata lau Afioga, i le tele ae leai se mea aoga o faia ai. Ua fai nei ma lapisi se i vaeatu le Maota, ua lafoai i ai lipisi. Lau Afioga i le Minisita, faamolemole se i tagai ane i lea vaega pe i ai se mea taua, e ono faaoga i ai lenei eleele. Ae ia te au lava ia i le talosaga, e tatau ona faamuamua se pa ia taofi mai ai le tele o le Itumalo i le lafoai o lapisi i lea vaega ona o lo o siomia e maota ma aiga, pe le aoga i se fanuatanu. A leai, tuu mai i le Pulega o Tagata Asiasi Maimoa Mai Fafu e fai ai sa latou fuafuaga, e fai ai se village foi lea Samoa e fai ai ni mataaga po o se mea faapena ina ia aoga lenei fanua tele lau Afioga.

E tasi lava le mataupu lea na laga e le sui usufono o Gagaifomauga Nu.1, i mea o auala ia i totonu o Vaitelefou. E leai e le o se tala aveane ai, e matua faamaoni i le sui usufono mo Gagaifomauga Nu.1, o le isi lea vaega ua matua pagatia ai. Manatua foi o Vaitele, e pei foi o lea na saunoa ma fetalai le... o setup faapea po o fuafuaga faapenei, o lo o fuafua lava pei o atunuu i fafo. Ou te talitonu, ua tatau ona i ai ni auala, ni sign auala po o ni faailoilo auala, ma se i faamama tafaala aua e le misi le masina ma lavevea ai taavale i i i le vaipaganoa lea ona o le tele o magaala e leai ni faailoilo foi lea po o se give way po o se tulaga faapena, toe uumi le vao o le tele o auala e faapena ona le iloa atu e le isi taavale isi taavale. Afai e i ai se faiga a le Malo lau Afioga i le Minisita ini vaegatupe foi lea e tuu mai i Pulenuu, po o le sui usufono e faamama ai, ou te talitonu e faigofie foi lea, ae fai se aufaigaluega a le sui usufono e faamama ai foi tafaala, e faaoga ai le tele o tupulaga e leai ni galuega, ma maua ai foi se tupe a le sui usufono.

Ona ou oo mai lea lau Afioga i le Palota. O le a le tele sou manatu i ai o lea ua saunoa le Afioga i le Palemia ma le Taitai o le Itu Agai, e sili le tuu i i i le Komiti lea e iloiloaina. Ae pau lava o lea, o lea ua oo i le 2,800 le fuainumera o lenei Itumalo. Ou te talitonu e oo atu i le isi 5 tausaga, ua faalua lea numera, pe afai e le avea uma e le sui usufono mo Gagaifomauga Nu.3 ma le tele o sui usufono o lo o alaala mai nei le tele o au palota.

Ona ou oo mai lea i le tatou Tala Faatatau Autu o le Tupe lau Afioga i le Minisita, faamalo faafetai. E le faigofie. Sa tatou i ai foi i ia vaega i aso o faigaluega i le Malo, e le se mea faigofie le tau sailia o tupe ma le faasoasoina i le o atu o Matagaluega i mea e finagalo ai, ae le mafai ona maua uma ona o le tau faasoaso o tupe. Ae o lau luitau i lau Afioga, tasi lava le mea ou te tautala i ai, o le VAGST.

Lau Afioga o le luitau mai le sui usufono mai Faleata Sisifo, ia uma le 5 tausaga, ua leai se VAGST i meataumafa. O le meaai, o aso uma aso uma e te faatauina

ai. E taitasi i le fia tausaga ona fai sou fale, pe faatau sau pusaaisa, po o sau TV. Ae o le meataumafa po o le meaai, o aso uma aso uma aso uma. Lau Afioga, o le luitau lena ua tuu atu. E tatau ona ave ese le VAGST ia tatou meataumafa uma lava. A sii ai lava i si mea, ou te talitonu e le toe faitio le tele o le Malo.

Ona ou oo mai lea i Faatoaga. Lau Afioga i le Minisita fou, faamalo mo lou tofiga, faafetai i lou tulai mai foi i lena tofiga fou. O le luitau mo oe ia oo atu i le isi 5 tausaga ua le toe fia taumafa se Samoa pe fia ai se isi i meaai mai fafo. E tagi lava le Samoa i ona lima atinae. Tagai lau Afioga, ua le toe i ai ni pa ia, tau leai ni pa moa, meatuaolo, ua tau le fafagaina e tagata, o ni pato. O mea ia e tatau ona ave i ai le faamuamua a lau Afioga. O le isi Atunuu o Aferika sa ou malaga i ai o Uganda, o lea Atunuu lau Afioga e i totonu o le ogatotonu o Aferika e le oo i ai ni vaa. E land transport le avatuga o mea. E import mea mai fafo. O lea Atunuu, e ai lava i meaai felesi i aso uma i tino o manufasi. Ou te talitonu, e faapena le mea e tatau ona i ai tatou i le isi 5 tausaga. I le alu i luga o le tau o le penisini ma le diesel, e le iloa pe oo atu i lea vaitaimi, ua tasi le vaa i le masina po o le tasi i le 2 masina. A o fea e tua i ai Samoa? E tagi ifo lava i ona lima i mea faapea i fua o faaeleeleaga, ina ia toe ave i ai le faamuamua. E tatau ona ofoina atu Vaitele e fai ma poloketi, pilot project, faamuamua e fai ai se pamoia, community, po o ni pato mea uma faapena, ina ia aua ne i toe tua tatou i meaai mai fafo. O le a avea foi lea ma fesoasoani tele i le Minisita o le Soifua Maloloina aua o lea ua ave le faamuamua a le Afioga i le Minisita i faamalositino. Ia e moni. Ae o lou talitonuga, o le faamalositino e lona lua, ae o le ai po o le taumafa o le mea lea e muamua ona tilotilo i ai, aua e leai se aoga o lou faamalositino i le afa itula po o le itula atoa, e te foi mai, e saofai i le falai mamoe lapoa, po o le falai moa. Lau Afioga i le Minisita, e tatau ona tagatagai i ai i lea vaega. E le gata i lea a o meaai ia mai fafo. O lau tala, o aso ia sa outou tausasami ma ou ai i mamoe lelei. Ia o le taimi lenei, o le tele o mamoe ua lau mai, ia te au lava ia ua matua tele le faaletonu. E tatau ona tilotilo i ai i taumamafa ai le Atunuu. O le mulipipi lava latou ia te au lava ia, ua tatau ona le toe aumaia. I lou talitonuga, o le mea e ai ai le sui usufono, e taumamafa ai le Itumalo ina ia maua le tino malosi. Ua outou tagatagai mai, ou te le lapoa. O le mea lea e tau o le tino lelei lau Afioga i le Fofoga Fetalai. Ae o le mea lea e ao ona luitau i lau Afioga i le Minisita, aemaise foi le Minisita o le Soifua Maloloina ina ia tagai i ai mo le agai i le lumanai.

Faapea o le a tuumalie le lauga, e te le fia faalogologo lau Afioga i le lauga a Faleata i Sisifo. Ia e le afaina, o le a ou usitaia lou finagalo.

O Taaloga: lau Afioga, e tatau ona ave le faamuamua foi i lea vaega. E tatau ona vaai ni a tatou tagata taaalo ma identify taaloga o lo o lelei ai tatou, ave faasikolasipi. Pe

10 pe 15 ni avanoa faasikolasipi i le tausaga, ou te talitonu o se investment lelei tele lea mo Samoa mo le agai i luma

I le Pulega o Tagata Tafafao Maimoa Mai Fafo, lau Afioga i le Minisita o Tagata Asiasi Maimoa Mai Fafo, tasi lea ivi tu o lo tatou Malo. Ou te talitonu, o le maketiina o Samoa i fafo, o le ki lea ma le tatala o Samoa. E le taugofie. Ae o le mea taulia lea, o le a le mea e ofa e Samoa e ese mai i isi Atunuu o le lalolagi lenei? E tele matafaga i Atunuu i fafo e tutusa ma inei; o sami. A i ai se mea e tatau ona tatou faataua i fafo e sili atu ai Samoa i lo isi Atunuu, i lou talitonuga o ona tagata ma tu ma agaifanua e tatau ona faamuamua, e omai ai tagata i inei e maimoa ia Samoa i ana tu ma ana aga aemaise tagata. Afai e taugata, e i ai le tai toafitu a tatou lea e taamilo i tausaga uma, o le a le mea e le faataamilo ma faaoga atu ai a uma na lakapi, o ifo e sisiva e promote Samoa e fesoasoani e fai mea e fai faatasi.

Faafetai foi i le Afioga i le Palemia ma le Afioga i se tasi o sui usufono mo Au Palota Taitoatasi Hon Joe Keil i le taumafaiga mai aemaise le Kapeneta i le poloketi o le malae vaalele, i le resort ma le malae tapolo. E ova i le 300 galuega ua maua ai i lea atinae tele aemaise le tele o tupe e sau mai fafo i lea atinae. E momoli atu ai le faamalo i le Malo i le vaai mamao i ia vaega uma.

Ia e i ai nisi o mea e fia tautala i ai lau Afioga, ae ou te talitonu e i ai foi isi avanoa mulimuli mai. E momoli atu ai le faamalo ma le faafetai e fia pai atu ai i lou Itumalo. Faafetai tele i lo outou amanaia. Ia tuu maia lo outou faatuatuaga i se taumafaiga o le a ou taumafai i le malosi atoa ma lou iloa, o le a ou taumafai i ai aua se ai mo lo tatou Malo mo le agai i luma. Ia o se upu ua sala, faamolemole faamagalalo le auauna. Ia manuia tele lau Afioga i le Fofoga Fetalai, i lena itu o le malu i lau Afioga i le Palemia ma le paia o lena Vaega, faapea foi le Afioga i le Sui Taitai ma lea foi Itu o le malu, aemaise nai sui usufono tutoatasi, i lo outou faatuatuaga foi ua tuuina mai e avea ai au ma Taitai o la tatou Vaega, e momoli atu lau faafetai tele i a te oulua.

Ia ma lou faaaloalo tele, manuia le Fono.

Soifua.

Tofa LEVAOPOLO TALATONU



Itumalo Faaalalafaga:

Gagaemauga Nu.2

Filifilia:

13 Aperila 2006

Faatauto:

20 Aperila 2006

Lauga Faataupou:

13 Iuni 2006

E faafetai atu i lau Afioga i le Fofoga Fetalai, e le o le taimi lenei sa tau fai atu ai se faamatalaga a Saleaula ae petai, o

la ou te tilotilo atu o genogeno mai ou uso a Pule, ia o le a muamua le toeaina.

Lau Afioga i le Fofoga Fetalai, ua ou tulai atu i le ava ma le faaaloalo tele e fai se sao o lenei Itumalo aua le amataina o lenei Paeaiga ma se manatu puupuu i le Tulafono Tau Faaofi o le Faatatauina o Tupe Faaopoopo (Nu.2) 2005/2006 ma le Tulafono Tau Faaofi o le Faatatauina o Tupe 2006/2007 e pei ona taatia nei i Paga.

Ae ou te le i taia le tavaimatoo ma ou sulua le tausuluga e pei o le upu i le Sao-Papa, e muamua ona ou tatā le liu nai le fotuga ma ou faapoipoi lili'a faatu i avanu e pei o le fetalai ia te oulua Suafa ia Lemalu ma Le Mamea ma lo la maota na toese. O ou paia apoapogata Samoa e amata mai Matasaua ma le mea e fiti ae ai le la seia paia Fili ma Puletuu na sesema ai manū o Malo. O paia sausaugata aua le faafofoga tapuai a lau Afioga Mamalu O le Ao o le Malo, lau Afioga i le Tapaau Faasisina lau Susuga i le Malietoa Tanumafili II ma lou fala folaloe ma lou nofoa vaeveloloe e faalogo ia te oe Samoa. O paia aua le afifio o Aiga o Tupu, Aiga o Nofo, Aiga o Papa ma Aiga o Tafai, o le afifio o Tama ma o latou Aiga, Aiga foi ma a latou Tama, le mamalu o le Usoga a Pule ma Tumua, Ituau ma Alataua, Aiga i le Tai ma le Vaa o Fonoti

E faapea foi le faafofoga tapuai mai a le paia ia Sua ma le Vaifanua, o Fofu ma Aitulagi, Saole ma Saleaumua ma le Launiu na Saelua, ae tainane le Faatui o le Motu ma Tootoo o le Faleula ma upu ia te oe le Manuatele.

E faafiti tauao paia aua feoi o le Tala Lelei ma Faafegaiga Taulagi o lo o faautomanu aua Samoa ma sona manuia mo a taeao ma e lua. Taoto paia faale-Atunuu ma paia faale-Talalelei, a ua gafoa nei le maota i le ataata o le titi lavatoa ina ua paia atoatoa nei Tiafau o le Malae o le Faautugatagi, aua le afio o lau Afioga i le Palemia ma lau Kapeneta, le afio o lau Afioga i le Faamasino Sili ma le Oifsa o Faamasinoga, tainane le afio o lau Afioga i le Fofoga Fetalai, le afio o lau Afioga i le Taitai o le Itu Agai ma le mamalu o sui usufono o le Palemene. O paia faale-Malo, taalolo ia. Ia, a o lenei taimi ia avea ia lenei avanoa faaauo e faapitoaugafa ai se leo o le auauna nei i si ou Itumalo pele o Gagaemauga Nu.2.

Ua tini pao nei le uto e pei o le faiva i Fogavai; ua topule le faiva o tama ina ua tiatia o faiva o manaia; ua sumu foi i le tini le la soliatia ina ua malu le ata tama a le Tautiaga. E le o se ua na faafuaveta pe na laga faatila, a o le ua lava na afuafua mai i Manua. E le o se futu foi na tafea, na tafea tupu fua, a o le tama lava a tu tula ma tu tula i Vaituutuu, ae avea ia mo lo outou paia ma le mamalu alofaaga o le laulai, ae se i taumafai se upu aua le faafofogaaga a si ou Itumalo.

Susu ia i papa le gae ma le fala le see paia o Aofaalupega ma tama faalagi o lo o faamota le malu o le Itumalo, aemaise lupe faalele ma taulaga soifua o le afioga

Saunoaga Faataupou a Sui Usufono 1961-2011

o lo o faapena ona faapunapaulia ma faafalefautali le tafafa o Samoa i fata faitaulaga e fia, taalolo ia.

Tulouna le pau o Pualoa ma Samauu o le tupua aua le afifio o Aliilua, Tautaiolefoe ma Tauiliili. Tulouna le Manumaunu o Taulogomai, Fatuatanu ma Asosaasaa o le laoaia aua le afifio o Maopu o Fepuleai ma Toiaivao. Tulouna le afifio o Sa Peseta, Seupule ma Vou. Malii mai oe Lepule ma lau Faatufugaga, o le Tufugapule ma le Tufugatoatamai. Alaalatai oe Saleaulalepule ae tainane Tootoo le vaialofi nai le po na tuutuu ifo mai le lagi tuasefulu. O ou mamalu sausaugata na, e siva taufai ai le matagi – tulou, tulouna lava.

Lou Itumalo e, afai o le a sau faafofoga i se fati a lau manu tulimafua, ou te faapea atu e potu lava le tauvao, ae le atoa le fuifui i lana potu. Ae tau lava o sina laolao mo au se i ou sulaina fala o le tamaitai ma laei le maosofia e pei o le upu o le gataifale. E le i taua fua le pua nai Aganoa e le manaia. E le i aau fua le tausala ina ua ulufia lona puagagana. E le i tafi fua Salevao ma taavavale ulupoo. E le i toto fua le tavaetoto, ae siva tumupuu. Peitai o au nei le tagata na tuua i le fa, a ua i ai le faamoemoe i lou loto. Ou te talitonu sa ae galu feai o le vasa taimane o faigata ma fita, a o tau fatufatu le tatou ala i malo.

Lou Itumalo e, ou te faafetai atu i le tofa ma le faautaga, o le tofa saili malo ma le faautaga e soo taamilo le lalolagi, lea ua le faaluaia. O lenei ua liutino le vaa na fauou faupo ma ua aveai ai au ma outou fofoga i le faalagamaea a Samoa i le Palemene i lenei Paeaiga. Auauna e a le Atua o lo o faauto manu i le Itumalo, e mana la outou tatalo. O lea ua saveioloolo le seuga ina ua ae le tufuga suiula i la outou mulila na titina. Lou Itumalo e, ou te le fagota i le sao ne i faifuini le Faasaleleaga, ae na ona ou toe fagua le tamaitai o Taumatega i lau pule, e ua malo ua afua ailau ua maua. Se ua malie le manu na e faamoe i le toa, ua malie le i'a na e faataa i le vasaloloa, ua malie le talo na e toto i le paeloa, ua malie foi le tolo na e fusia i le fusiloa. Sula laia uafi, sula ua teu, sula ua maua, sula ia ina sula lo outou pule ua toto tetele. Ua faafetai talosia; ua faafetai le faamanuia; ua malo le tapuai; ua malo le fai tatalo. Tatou ave laia i le Atua o Malo o le viiga aua o Ia e ona le tali faaaliali.

Tapaa ma Saleaula, o ou lagona ou te faaali, o ou manatu ou te tautala, o ou manao foi ou te matua tautua i lo outou finagalo. Peitai, e ui i so ta moomoo i se ula a toli e susui, e faigata e mua lo ta taimi. Ae tau lava o lenei, ou te faimeaa faalogo i lau tofa, ou te usitai faai'amatau i lau faautautaga.

Lau Afioga i le Fofoga Fetalai ma le mamalu o le Maota, ia o nisi ia o nai talosaga a lenei Itumalo atoa ai ma se manatu puupuu i le Tala Faatautu o le Tupe.

Lau Afioga i le Fofoga Fetalai, e momoli atu le agaga faafetai tele ma le faamalo mo le galuega matagofie e pei ona faasolosolo ai nei le faatania o si o matou auala i

Saleaula i Upolu nei. O lo matou talitonuga lau Afioga i le Fofoga Fetalai, o le a faamaea le galuega lea o lo matou auala pe a maea le Faiga Palota. Peitai matou te le o iloa tonu pe o le a se isi taimi lata mai e toe faamaea ai ae toetoe lava o se aga ia ona maea lea o si o matou auala ua lea tausaga o matou tatalo atu ai.

O le auala foi lenei, o lo o agai atu i se atinae o tagata tafafao maimoa i le pito i o, pito lava i atai ua fai si lea ona i ai i totonu o si o matou nuu i Salamumu. Ia o si nei lava atinae o lo o maua ai nai galuega a le toatele foi o tagata o si o matou nuu aua le tausiga o nai aiga. E pei lava ona ma talatalanoa foi ma si alii papalagi e ona le atinae, o le faaletonu lava o le matou auala nei, o le fili aupito sili lea o si ana pisinisi i le afe gata e taga tafafao e le gata i o tatou lava tagata a o ana lava tagata tafafao mai fafo.

O le isi foi itu, o le atinae lea o tagata tafafao maimoa e pei ona ou taua e fai sifi tagata faigaluega. A oo la i le po ua manava mai pe agai atu nai tagata faigaluega, e savavali lava i le pogisa; e fai o le faaletonu o le auala ia e leai ma ni moli auala foi ia e faamalalalama ai. Ia tasi lena vaaiga e matagofie ai se aai po o le agai atu i se mataaga pe a oo i le taimi o le po. Ia na o se fautuaga lava i lau Afioga i le Palemia ma le Faigamalo e ala atu i le Nofoa, aua ne i faasaina le talitonuga lea ua tatou faalogo ma outou faafofoga i ai i le Atunuu, e gata i i faiga o auala ona o lea ua maea faatosina o le palota. O isi foi ua faapea mai e le toe faia lo matou auala ona o lea ou te iinei i le Itu Agai lea. Ou te talitonu lava, ua uma foi faiga vaega faaupufai i lenei taimi o Faiga Palota, o lea ua toe tulai mai lau Afioga ma lena foi Itu o lenei Paeaiga, ia o lau Afioga lava o le Taitai po o le Tama foi o si o tatou Atunuu. E talitonu lava le agaga ua e le toe faaituau i se Itu ae ua tutusa uma sui usufono mamalu o le Palemene ma Vaega Faaupufai i lau silasila i so o se itu. E tatalo atu ai ma le agaga maualalo, faamoemole e le o toe tele lava se mea o toetoe o lo matou auala ona maea lea o lenei galuega matagofie. Ia atoa foi ma nai moli auala e tau faamalalalama ai le agai atu i tai i lo matou nuu, ona ua ou faalogo ua oo foi i tagata tafafao maimoa mai papalagi ua matafefefe foi latou i le pogisa.

O le isi itu lau Afioga i le Fofoga Fetalai, o le matou faleaoga lea i Upolu nei ona ua fai lava si faaletonu o le tulaga o lo o i ai nei. Matou te tatalo atu faamolemole e manaomia lava le toe faaleleia o lea itu. E le gata i le faleaoga lau Afioga, ae a fua atu foi i le numera o alo ma fanau o si o matou nuu, ua matua le talafeagai lava le toatele o tamaiti ma nai faiaoga toaititi o lo o galulue ai nei. O lena tou te silafia a lelei lava se faavae ona faapena foi lea ona mausali ma faigofie le agaigai atu o le olaga aoaoina o alo ma fanau i le lumanai.

O le mea lea e tatalo atu ai faamolemole lau Afioga i le Palemia e ala atu i le Nofoa, alofa maia tuu ane le matou

Saunoaga Faataupou a Sui Usufono 1961-2011

talosaga lea i la outou polokalame o faleaoga lea ua faagasolo nei.

Ona ou oo mai lea i lo matou nuu o Saleaula i Salafai; se e lagona le faanoanoa ona ua maua faamatalaga faapea sa logoina faatolu lo matou nuu i polokalame ua tea atu nei. Ia o le a oo ona o atu le faatina o lo matou auala galue peitai o lenei ua toe oo mai i lenei Paeaiga, e le i oo atu lava ma se galuega faapena. E ta te ofo lava i lau Afioga i le Minisita ma le Pulega pe aisea ua faamisi ai le faatina o lo matou auala. Aua o le mea ua tau fuafuā ai foi le loto, o masini na avatu i Salelologa pasi mai lo matou nuu, ia ae amata atu le faiga o auala i le alaafaga o lo o sosoo atu ai ma faasolo atu ai lava i le Itu o Tane atoa. Ia a i ai se mea tou te le malilie ai, musumusumu mai i le sui usufono mo Saleaula.

O lau tatalo i lau Afioga i le Minisita e ala atu i le Nofoa, faamolemole se i alofa mai ua fai lava sina leva ona tatalo atu si o matou nuu e faaleleia lo matou auala galue; atonu masalo foi o le misi le isi mea. E mafua ona ou augani atu i lo matou auala lea ona ua toatele ua nofoia le agai atu i uta; a o le toatele o matou ua leva ona sauniuni e fausia fale i o matou fanua, peitai e faigata ona o le faaletonu o le matou auala atoa ai ma le leai o se eletise. O le mea lea faamolemole aua le toe faamisia matou ae tuu ane la matou talosaga i le tou polokalame o lo o faasolo nei aua toe lava o Saleaula i lea faaitu atoa e le i faaleleia lenei auala e pei ona tatalo atu ai.

Ona ou oo mai lea i se isi itu taua lenei. E le uma lava le lagona o le fia faafetai pea mo le vaitaumafa e pei ona aeae ai nei si o matou nuu i Salafai. E momoli atu le faafetai tele i lau Afioga i le Palemia ma le Faigamalo – faamalo tauatai, faafetai i le silasila mamao atu i le talosaga a lenei nuu. Ae peitai tau lava o lenei se fesili e ala atu i le Nofoa i lau Afioga i le Minisita ina ia maua se faamalamalamaga. O le fesili, e i ai se mafuaaga ua mita ai vai o isi alaafaga ae le mita vai o isi alaafaga?

E mafua ona ou fesili ona o lo o i ai ni alaafaga o lo o saoloto i le suavai e aunoa ma se totogi i masina taitasi, ae o se faamatalaga sa ou mauaina fai mai e lala ona le mita a latou vai ona o a latou lava vai o lo o mauaina i totonu o a latou elelee. A fua atu la i le matou nuu, o lea e mita a matou vai a o le vai lea o lo o i totonu o le matou elelee e ui ina viliina ma faatinoina e le Malo lenei galuega lelei. Aua a faapea o le tualga moni lea o lo o faia e le Malo i nisi nuu, e tatau foi la ona silasila le Malo i le le toe mitaina o le matou foi vai ae faitalia matou ma totogi pili o le eletise o lo o faaola ai le pamuvai. A le o lona foi, ua lava le 50% o pili o le matou nuu e totogi. E pei lava ona tatalo atu i lau Afioga i le Minisita e ala atu i le Nofoa matou te manaomia lava se faamalamalamaga maniino i lea tulaga ona e pei e le o faamaoni le tulaga lea i le tatau ona maua tutusa uma e tagata taitoatasi le suavai i le totogi ma le lē totogia foi.

O le isi itu taua lava lea ou te fia tautala i ai, o lea sa taua i le Lipoti a le Matagaluega a le Suavai e i ai le mea e tau o le free water entitlement po o se aofaiga o le suavai faameaalofa e agavaa uma i ai aiga taitasi e aunoa ma se totogi. O le aofaiga lenei e tusa ai ma le lipoti, e tusa lea ma le 500 lita i le aso e tasi; atonu a ou fua atu pe o le 250 kalone po o le 5 kalone tutumu i le ituaiga foi lea o le 44 e faaaogaina e se aiga i le aso e tasi e aunoa ma se totogi. Afai o le tulaga lea o lona uiga e le tatau ona oo atu ni pili o vai a aiga i so o se itu o Samoa i le \$20 i le masina po o le i lalo ifo foi, ae vagana ai ua soona faamaimau le suavai e se aiga ona taugata lea.

O le fesili lona lua a Saleaula i le tulaga lea po o aveese mai la e le Matagaluega le totogiina o le aofaiga lea e pei ona ou taua e 500 lita i le aso mai le pili o le vai o tagata taitoatasi? Aua o pili o vai i lenei vaitaimi e fai taavaga ma pili o le eletise aua o le mita na o le alu lava o le vai amata loa ona taavale ae o le popolega, po o lea ua taavale atu ai lava ma le mita i le suavai faameaalofa lea e pei ona ou taua, pe o lea ua totogi atu foi e le Atunuu ma le 500 lita lea? Aua a ou fua atu i ai e uma ona gasese taumafa i le aso, faamalu tagata uma o le aiga e le taitai ona uma 5 kalone vai 44 lea. Afai o se aiga latou te sefe le vai, ou te talitonu lava e le tatau ona maua se pili o le vai i le masina; ae a le mea o lo o i ai nei? E leai ma se isi e le o maua sana pili o le suavai i masina taitasi. O le mea lea e tatalo atu ai i lau Afioga i le Minisita e ala atu i le Nofoa se i silasila ane lau Afioga i le tualga lea. Ae afai lava o faatino ma le faamaoni galuega a le Matagaluega, faamolemole faamanino lelei i luga o faamatalaga i pili o vai o lo o tufatufa mai aua le silafia e le mamalu o le Atunuu.

Ona oo mai lea o se faamatalaga puupuu i le VAGST. E faamalo atu i le Afioga i le Minisita ma le Matagaluega i la outou galuega maeaea e pei ona i ai lenei tapenapenaga matagaofie. Lau Afioga i le Fofoga Fetalai, i le faatulagaina mai o le siitaga o le VAGST lea ua tatou siisii atu nei i le 15% mai le 12.5% na i ai, e talitonu lou sui usufono ua leai lava se mea e toe mafai i lea tulaga; ae ese la se manatu o Saleaula i le tulaga lea ae o le a ou oo atu lava i ai i se taimi.

Lau Afioga i le Fofoga Fetalai, ua fai si ou le mautonu lelei i le mafuaaga o le siitaga foi lea o le lafoga, ae o lo o matua manino mai lava i le Tala Faatatau Autu o le Tupe, e pei ona saunoa i ai le Afioga i le Minisita, le maoae tele o le siitia o le tamaoiga o lo tatou Atunuu mo se taimi muamua i le tausaga na tea nei i le 2005, pe a faatusatusa atu i le tausaga i tua atu; a o lenei foi ua toe faaopoopo le isi 2.5% i le VAGST. E aoga tele le VAGST ae fuafua foi i le gasologa o le soifuaga ma le gafatiaina e tagata taitoatasi. Sa faita lava o le a fai sina koma laititi a le Atunuu aua o lea ua maoae se tulai mai o le osigataulaga e pei ona faia i nei mau tausaga ua tea, ae tatou tagi atu pea i le fesoasoani a atunuu i fafo mo le taimi nei. Ae ui i lea o

Saunoaga Faataupou a Sui Usufono 1961-2011

ina o lo o i ai le foe ae le tuua ai foi le faiva o le faufautua i lenei Itu o le Maota.

Lau Afioga i le Fofoga Fetalai, e moni o le VAGST o se auala vave lenei e faatino ai galuega a le Malo peitai, sa tatau lava ona toe silasila totoa le Malo i se isi itu nai lo le VAGST. O se manatu o Saleaula i le siitaga lea ua taunuu ai le upu o lo ta lima lava ua paia ai si o ta mata. E amata atu lava ia i tatou o lo o taitaia le Malo atoa ai ma le mamalu lautele o le Atunuu lo tatou faatamala tele. Ua oo foi la i le fuafuaina o galuega ma le faasoasoa ina i ai o tupe a le Malo atoa ai ma le faaogāina tatau e o tatou Taitai o le Atunuu ma e o lo o galulue i le faatinoina o galuega a le Malo ou te fai atu, o lo o tele lava le itu o lo o lape ai le faautaga. Ui i lea Samoa e, e mafua foi ona tapatapa le Malo i le VAGST po o le lafoga ona ua tatou faatamala e toe atiae le tele o atinae e pei ona masani mai ai. E pei o le mea sa i ai i aso ia sa tele a tatou oloa e avatu i fafo aemaise lava i fua o faatoaga ma nai oloa mai le gataifale ae peitai o lenei vaitaimi, ua na o le tatou tagi i taumafa ma isi oloa tatou te moomia e aumai i fafo ae ua tatou le galulue e ave foi ni a tatou oloa i fafo e toe faapaleni ai fefaatauaiga o oloa faatau mai ma le faatau atu. Afai tatou te le toe lalaga lea tulaga e pei ona ou taua, e uma lava lenei olaga o tatou faalagolago pea i lafoga e faatino ai o tatou manaoga i so o se itu aua e leai lava se isi auala vave e pei o le lafoga lenei.

A o le isi foi itu lau Afioga i le Fofoga Fetalai, e pei ona avatu se atugaluga, o i inei lava le faapogai muamua. Ou te matua tuuaia foi le Malo i le faatamala tele i le uunaia malosi o le Atunuu e galueaina le eleele ma le gataifale. Ua avea lo tatou naunau e vavevave le faatinoina o isi galuega tetele e pei ona i ai nei ma faaleleia pea foliga o si o tatou Atunuu ma mea ua galo ai ona toe seu silasila lau Afioga i le Palemia ma le Faigamalo i le mamalu lautele o o tatou tagata ma lo latou gafatiaina o le soifuuga ma le faatinoina o atinae o lo o faasolosolo nei. Aua o ai o lo o faatupea nei galuega? E le o le SDUP lenei, e le o le HRPP, ae o le mamalu lautele o le Atunuu. Ia na o se fautuaga i lau Afioga i le Palemia e ala atu i le Nofoa, aua tatou te naunau tele i le I'a ae maimau ai le upega a Samoa; ia seu foi le manu ae tagai i le galu.

O le mau o sau faamatalaga lau Afioga i le Fofoga Fetalai, a silasila i le aotelega o lipoti a Matagaluega o Faatoaga ma le Faigafaiva, o i ina lea e faavae ai se manatu. I le vaavaai atu i le Lipoti o Tupe maua a lo tatou Atunuu i fua o faaeleleaga atoa ai ma le gataifale, ua matua manino mai lava le faasolosolo atu lava ina vaivai ma oo ina le toe maua ai se tupe a le Malo i tulaga ia. E manino mai ai foi i le Lipoti lea, e le o lava se galuega faamalsoi pe faatosina a le Malo e toe faamalosi ai itu ia e lua o atinae masani a le Atunuu. O le uiga o se faamatalaga, ua le toe i ai ni polokalame foi ia sa masani ai e pei o ponesi o niu, o ava ma isi foi fua o faatoaga. Sa fai

foi tauvaga maumauga se i tulou, sa i ai faailoga sa saunia e le Malo – ua leai ni na mea.

O lona lua;...

Sa tatau foi i le Malo ona silasila totoa e tau faapau le tau o oloa ma isi mea o lo o faaoga e faifaatoaga ina ia tosina pea le mamalu o le Atunuu e galulue aua o le mea moni lava, ua tele tupe a le Malo e faaalu i auala galue ona faataatitia ai lea ae faamaepaepa i tai i nuu. Ae vagana ai Saleaula e le o faataina le matou auala ae malama ane le taeao ua i uta uma tagata e galulue.

E pei lava ona avatu se manatu e aoga tele le VAGST mo le taimi nei ona o mafuaaga e pei ona ou taua; ae pei ona ou fai atu e ese la se manatu o Saleaula i le siitaga o le VAGST. O se manatu vaivai e faapea, ana faapea foi la e tuu atu le VAGST i le 15% po le 16% ma faatulafonoina le le toe suia mo se taimi umi ua faatulafono pe lima, fitu i le valu tausaga, ona leai lava lea o se masalosologa e toe sii foi pe a toe oo atu i le isi lua po o i le tolu foi tausaga. O le faamausaliina ma le faatumauina o le lafoga e pei ona avatu ai se taofi i se taimi e faatulagaina, o i tonu lava o le a matua fuafua tatau ai e se Faigamalo e tulai mai e taitai le Atunuu le faaogāina ma le faaeteete o tupe a le Malo o ana polokalame faataatitia i lea tausaga ma lea tausaga e aunoa ma le soona fai. E mautinoa lava e tuu ai foi ma le mea lenei o le sasi loa o le faatatauga ma le faasoia a se Faigamalo tapa loa e sii le lafoga; ae galo ai ona silasila ane pe o talafeagai ma gafatia e le Atunuu i lea taimi ma lea taimi aua a oo foi ina pale mai se isi Faigamalo ae le i faatulafonoina lava se umi e faaoga ai le lafoga lea, o le mea lava e tasi aemaise lava pe a taumafai e tatope ni mea faafuasei e silafia e se Faigamalo e tulai mai le tosina ai le Atunuu i le Faiga Palota; ma ou te fai atu e silafia uma lava e so o se faiga Vaega Faaupufai tulaga faapea; a o le mea e tupu o le uma atu o Faiga Palota ae ua le paleni paketi mo le isi tausaga; ia e lua lava mea e tapa i ai se Faigamalo.

O le a faauma atu foi lau Afioga i le Fofoga Fetalai. Ona faauma atu lai lea o se manatu o Saleaula ona ua utiuti le taimi. O a ni motugaafa ma ni fatufatuga a lenei Itumalo, afai ua tuvale lupe i ni manatu ma ua le tau tamalii i lau faafofoga Samoa, tatou lafo i ulugalua ae sesema i iugalua ni manu aua Samoa mo a taeao.

Lau Afioga i le Fofoga Fetalai, ia manuia lou alofaiva aua le Sa o Samoa i lenei Paeauga; ia malu foi i faleulu le Afioga i le Palemia, le mamalu i le Kapeneta, ia osofia moegaluaga, mamana la outou tuualalo ma ia tu ma lelea foi la outou Nofoaiga. Tau ia ina tuitui manu mai lagi aua si ou Itumalo pele. Ia malu pea foi ona fala le see i ona feagaiga taulagi.

Ia i ai le manuia tele o le Atua i o outou pa ma o outou maota, i o outou afeafe ma o outou faitotoa. Ia faagaganaina foi e le Atua la outou auauna le tuā nei.

Ia soifua ma ia manuia Samoa.

Tofa MANULELEUA LALAGOFAATASI FALANIKO

**Itumalo Faaalalafaga:***Faleata Sasae***Filifilia:***13 Aperila 2006***Faatauto:***20 Aperila 2006***Lauga Faataupou:***13 Aperila 2006*

Faafetai mo le avanoa lau Afioga i le Fofoga Fetalai.

E fia faasilasila atu e lo'u sui usufono, o lea ua maitau atu e i ai tupe, ma e lava tupe. E avatu ai la se manatu, po o le a so outou finagalo aua e lua mea i le olaga lenei. O la e i ai i le Tusi Paia le upu, 'Those who sing, pray twice. E faalua ona tatalo faatoa maua lau pese e tasi'. Those who sing, pray twice. O le mea la e avatu ai se fautuaga aua fai mai o lea e lava tupe. Po o le a so outou finagalo? Vaai i fanau ma le lumanai i le education. Ou te manao ma e manatu le sui usufono lenei ia compulsory subjects nei e pei o le Maths, Science ma le Music. E manaomia ia lava tupe e faatino ai mea nei mo le lumanai.

O se manatu e avatu ai se fesoasoani mo le lumanai aua so o se mea tatou te faia i le olaga lenei, e i ai le mea tatou te taunuu i ai. Muamua, fai mea i lugā ae mulimuli fai mea i lalo nei. So o se mea tatou te faia, e tatau ona maua ai le auala lena. Soifua.

Tofa MOTUOPUAA UIFAGASA AISOLI

**Itumalo Faaalalafaga:***Vaisigano Nu.2***Filifilia:***13 Aperila 2006***Faatauto:***20 Aperila 2006***Lauga Faataupou:***13 Iuni 2006*

Lau Afioga i le Fofoga Fetalai ma le paia ma le mamalu o lenei Palemene, e muamua ona sula le alofa o le Atua, ave le viiga ma le faafetai i lana tausiga matagofie ia i tatou ua ala ai ona tatou faapenei i Tiafau nei i lenei afiafi. O lea tatou te momoli atu ai le viiga ma le faafetai i lo tatou Matai ona o Lona alofa ma Lona agalelei.

Lau Afioga i le Fofoga Fetalai faapea le afio o le Sui Fofoga Fetalai, Afioga i le Palemia, Sui Palemia, mamalu o le Kapeneta ma le mamalu o lenei Palemene, atonu e le o le taimi lenei na ou fuafua e fai atu ai sau tala i le Tala Faatatau o Tupe e pei ona faataoto i luma o le Maota nei ae ona ou te tilotilo atu e pei e leai lava se sui usufono tutoatasi e tulai atu i luga e fai se tala e uiga i le Tala

Faatatau o Tupe 2006/2007. Ia o lea na tauanau ai au nei e nai ou uso a sui usufono tututoatasi, tulai ia i luga lau Afioga i le Taitai e te amatamea.

Lau Afioga i le Fofoga Fetalai ma le mamalu o le Palemene, o lea ua uma ona sula le alofa o le Atua, a o lenei taimi ou te le toe sulaina paia o Samoa o lea ua uma ona pae ma selu, o lea na uma ona oo i ai Tootoo o lenei aso mai le taeao e oo mai i lenei afiafi.

O le a le toe oo i ai le leo o le sui usufono a o lenei afiafi lau Afioga i le Fofoga Fetalai, na ona ou faapai atu lava i lou Itumalo o Vaisigano Nu.2, le paia o si ou nuu o Fagasa ma Sataua, o paia lava lea aua Utuutu ma Faitau, Ufagalilo ma Luaipitofanua, afio oe Tagaloa le Alii o le Nu, upu ia te oulua Maninoa ma Aumua ma le mamalu ia te oe Fagasa. A ou pai ane foi i le Falelua ia Papa ma Vaivaimuli po o Sataua, afio oe Aigaomavaega Falefaotaua ma lau Fetalai Lealuga. O paia na o si ou Itumalo a o paia o Samoa o le a ou le oo i ai aua ua taoto a o se alaoo, ua na ona faalai a o se ia e iviivia.

Lau Afioga i le Fofoga Fetalai, e muamua ona ou fia faafetai atu foi i le sui usufono sa seei i le Paeaiga talu ai, le Afioga i le Valasi o le Fofoga o Aiga o Sataua. Faafetai, a o e faalogologo mai, ia sa tele foi lou sao i Upufai o le Malo i le Paeaiga talu ai. Sa e sua le aulapa tai ma le aulapa uta, malo le fai o le faiva. E moni lava upu e pei o le saunoaga a le sui usufono na uma atu nei, "O au nei a o oe taeao". Tapuai mai ia se i fai se ai o le ta Itumalo, pe ititi pe tele o le a taumafai lou sui usufono e avatu se faamatalaga e uiga i le Tala o le Tupe.

Ou te muamua ona faafetai i le Malo, aemaise o le Minisita o Tupe, ona o le tala maeaea o le Tala Faatatau o le Tupe 2006/2007. Ou te le toe saeua foi le gasu o lenei Tala Faatatau o le Tupe a ua uma ona taatia ua manaia foi le taatiaga, a i ai foi ni nai mea o le a faaletonu i lau tilotilo o le a oo i ai sau tautalaga. Ae faafetai o lea ua manino mai le Tala Faatatau o le Tupe, malo faafetai i lau Afioga i le Minisita o Tupe mo le tala maeaea o le Tala Faatatau o Tupe faapea le afaigaluega a le Matagaluga o Tupe.

Ou te maitauina o so o se sui usufono lava, aemaise i matou mai Salafai aua o o matou Itumalo nei e pei o Alataua Sisifo lea na uma atu nei le tautalaga a le sui usufono, e pei o Itumalo aupito sili lava nei e tu mamao ma Samoa, ai o le tu mamao ese lea sa tu mamao ai foi le vaai a le Malo i le taimi ua sola, ae faafetai o lea ou te tilotilo atu ua amata ona tuutuu mai le finagalo o le Malo aua le atiaeina o lo matou Itumalo.

Ou te faafetai atu ai i le Minisita o Galuega, Felauaiga ma Atinae Eseeese talu ai ona e tele foi atinae sa e taumafai i lou Itumalo. E moni lava e le i uma a o lea ua saunoa mai le Minisita o lo o seei nei o le a faauma e ia galuega sa le i uma ona fai i le Paeaiga talu ai. E pei ona ou fai atu i le taimi ua sola, o Itumalo i tua e i ai lou Itumalo o Vaisigano Nu.2, o moomooga lava o tagata i ni mea e manaomia i lo latou olaga i aso taitasi o le vai, eletise, auala galue,

Saunoaga Faataupou a Sui Usufono 1961-2011

aoaoga ma le soifua maloloina aemaise ai o a latou faatoaga e tua i ai i le tele o taimi.

Lau Afioga i le Minisita o Galuega, Felauaiga ma Atinae Eeseese, o le Itumalo lea o matou i le Itu i Asau o lea e fa Itumalo lea e i ai o Vaisigano Nu.1, Vaisigano Nu.2, Falealupo ma Alataua Sisifo o se Itumalo e aupito sili ona mativa i vai. O lea lava e faaigoa ai le isi nuu o lo matou Itumalo i le leai o ni vai e sala i vai – o Vaisala. O le Itumalo aupito matutu lava lea o Samoa. O lea lau Afioga i le Minisita o Galuega, Felauaiga ma Atinae Eeseese, na o le lua lava nuu o lo matou Itumalo e maua ai le vai – o vai e eli – na o Asau o lo o i ai le borehole ma lo matou nuu i Sataua po o Vaivaimuli. O le borehole i lo matou nuu o lo o feinu ai Fagasa ma Vaisala, ao si o matou nuu o Papa, e le oo i ai le paipa, a o le vai foi o lo matou nuu, masalo o lena ua e silafia, e sualua. O lea e tatalo atu ai i lau Afioga, e a pe a fuafua se faatanoa mo Papa ae eli atu i Sataua aua o lo o i ai le faatanoa, o lo o eli atu i lo matou nuu i tai o lo o feinu ai lo matou nuu o Fagasa ma Vaisala a ua uma ona ou talanoa i nisi o le Ofisa o le Suavai e mafai foi ona toe eli se isi borehole e fai ai se isi faatanoa atonu e feinu atu ai Papa, Falealupo, Neiafu ma Falelima. O lea e talosaga atu ai i lau Afioga – e le o le tausaga nei po o lea tausaga po o le isi tausaga atu i tua – a ia alofagia le talosaga atu a lo matou Itumalo. E pei ona fai atu i le taimi ua sola, o le vai o lo matou nuu o lo o eli mai i le manava o le eleele, e faasualua; ae a pea malie lau Afioga pe mafai ae faaafa pili o lo matou Itumalo? E pei lava o le Anavatau a le Malo, “O le mea e lelei mo Apia nei, e lelei foi mo Falealupo ma Sataua,” matou te fia feinu foi i se vai magalo. Afai ua le magalo o matou vai faaafa le pili faamolemole i lau Afioga i le Minisita.

O le vai taele o lo matou nuu; a oo i aso ua matua mugala ua leai se vai na o le pau lava lena o le vai e sua, e feinu ma taele lo matou nuu ma e feinu ma taele ai Papa, Falealupo ma Vaisala. Ioe; e a la pe a malie lau Afioga i le Minisita se i toe fai faalelei lo matou vai taele aua e i ai ma le vai inu? O le vai inu lea, e feinu atu ai lo matou Itumalo pe a oo ina tetele mugala. Pe le mafai ona talosaga le EU po o Iapani i sina fesoasoani se i faaleleia ai, aua a lelei le vai taele o lo matou nuu ua faaitiitia foi le popolega o nuu i tafatafa ane aua se vai inu ma se vai taele.

Ona oo atu ai lea o lau famatalaga i lau Afioga i le Minisita o Galuega i mea tau eletise; ou te faaluaina le manatu o le sui usufono mo Gagaifomauga Nu.1 i le mea lava lena o le eletise. E leai sau malaga ou te le alu ai i Savaii e le pe ai le eletise; e le faapea o le leaga o le afaigaluega. E leai, ua tatau foi ona fai se fuafuaga e toe faatele atu nisi masini e faaalu atu ai le eletise i o ma le pe soo. E fia talosagaina foi lau Afioga mo ni nai moli eletise i auala, aua o le tele o aiga o lo matou nuu ua tele ina o i uta. Ua le o toe nonofo i tai a ua fai le auala galue ma o

nonofo i uta i faatoaga ae pogisa lava le auala e omai ai e taele i tai ma toe foi atu i uta i o latou maota ma laoa.

Lau Afioga i le Minisita o Galuega, Felauaiga ma Atinae Tetele, e pei lava ona ou fai atu i le taimi ua sola e taua lava le vai, eletise ma auala galue. O le auala galue o lo matou nuu i le ala pefu e pei ona ou oo atu ai i lou Ofisa, faafetai o lena ua ataata mai o le a taumafai lo matou auala galue i lena tausaga. E i ai foi auala galue na faatinoina i le tausaga ua tea, e tatalo atu ia toe faapoopoina aua na o le tai 200mita le tele sa fai ae manaomia le toe faalautele atu ona e le i oo atu le auala galue i nisi o aiga e tatau ona oo atu ai le auala galue.

Lau Afioga i le Minisita o Galuega, Felauaiga ma Atinae Eeseese, e pei ona ou oo atu i lou Ofisa i se tasi aso, o le auala galue lea i Papa Sataua. Lau Afioga, na o le pau lava nei o nuu o Samoa na faaleagaina e le afa o Ofa ma Valelia, ua le o toe i ai se nuu. Ua o ese le nuu ma tai a ua o i uta ma nonofo ai ma fai lo latou nuu i uta ua faataamilomilo. E talosaga atu ai i lau Afioga i le Minisita, e a pe a aua le faia faa-auala galue ae fai o le auala o le nuu ona ua nonofo i uta ma fai le nuu fou i uta i Papa Sataua. O lea e tatalo atu ai atonu e le o lea tausaga a o se isi atu tausaga o i luma pe a talafeagai ma le Tala o le Tupe, lau Afioga ou te tatalo atu ai se i silasila i lea itu.

O lona fa o le taligalu o si o matou nuu i tai i Sataua; o le taligalu lea toe pau lava lena o le taligalu e le i faia talu mai ona faaleagaina e le afa o Heta. Lau Afioga i le Minisita, ua na ona soso atu ma le ava tele, malie lau Afioga ua toeitiiti lava toe oo mai se isi afa e le i faia lava lo matou taligalu lena. O le mea lea faamolemole lau Afioga i le Minisita se i e alofagia taligalu o lena nuu.

Lau Afioga i le Minisita o Aoga, Taaloga ma Aganuu, e pei lava ona saunoa atu le sui usufono mo Alataua Sisifo, e fia manaomia se malae taalo o lo matou nuu po o lo matou Itumalo. E pei ona ou talanoa atu ai i le tasi aso i lou Ofisa lau Afioga, o le mea e tatau ona tu ai le malae taalo ia faaoga le malae taalo o le aoga a lo matou nuu e lelei e tele, pau lava le mea o le toe tanu i palapala ma toto ai mutia. Ona o lo matou Itumalo nei e leai se malae taalo, a o le tele ia o tama o le Manu Samoa ma tama na taaalo i le Olopeleki ma nisi alo o Samoa e tupuga mai i o isi o matou Itumalo ma lo matou nuu. O lea e tatalo atu ai i lau Afioga i le Minisita mo Aoga, Taaloga ma Aganuu ia alofagia se malae taalo mo si o matou nuu.

Lau Afioga i le Minisita mo le Soifua Maloloina, sa ou manatu o le a ou tautala mulimuli i le Soifua Maloloina ae se i faamuamua atu le manaoga o lo matou Itumalo, e pei ona fofoga atu e le sui usufono mo Alataua Sisifo. Ona o au e fai ma ou faigaluega i le falemai o lo matou Itumalo, e ui ina ua tuli au e le Malo i le matou strike, a o la lava ou te faigaluega ai. Ou te alu ou te faigaluega fua, o lea la ou te malamalama lelei i mea o tutupu ma le tele o faafitauli o lo o i ai, e fai o le falemai i Motootua a o falemai i nuu i tua e i ai lo matou Itumalo. E faanoanoa tele ona o le tele

Saunoaga Faataupou a Sui Usufono 1961-2011

o taimi e leai ni vilaaau po o ni fualaaui aua gasegase. A omai suega fualaaui ma vilaaui ou te tusi mai i Tuasivi ae o atu fai mai e leai, ua leai ni vilaaui, e le o se faafitauli la laititi, o le matua faafitauli tele lava. Se i alofa lau Afioga i le Minisita se i tilotilo ane i lea itu, aua e lua lava falemai tetele o Salafai ia. O Sataua foi e i ai le potu e i ai uma mea tipitipi ae ua le toe faaogaina ona o le tasi lena falemai autu sa i ai, ua le toe faaogaina. O lea la e talosaga atu ai i lau Afioga i le Minisita se i vaavaai ane i o matou falemai ia e tu mamao ina ia lava vilaaui.

O lo o manaomia foi e lo matou falemai se ambulance e pei ona saunoa ai le sui usufono mo Alataua Sisifo. E tele mai tigaina e fia aumai i Tuasivi pe aumai e tuli mai le vaa po o le vaalele, ia ae e tau tuli atu lava le ambulance i Tuasivi, e umi le taimi o alu atu, umi le taimi o toe sau ai. Lau Afioga i le Minisita, alofa ane i se ambulance ona e manaomia lava e le falemai i Sataua ma Fomalalo foi. E aoga le ambulance e tu i Sataua e aumai faatasi ai ma gasegase o Fomalalo e latalata ane uma i le uafu pe aumai foi i Tuasivi ma Apia i le vaalele.

O lea ou te tilotilo atu nei i le Tala Faatatau o le Tupe, e tusa lava e \$40miliona le tupe lea o le a faaalu i le National Health Service. O lea ua ou tilotilo atu i le Tala Faatatau o le Tupe ona o lea ua i ai fuafuaga a le Malo o le a tuueseese le Ministry of Health ma le National Health Service. Faafetai i le Malo ona o le vaai mamao i lea itu, o le mea lena ua leva ona tatau ona fai – o le tuueseese o le Ministry of Health ma galuega faafalemai. Ou te tilotilo atu la i ai e \$40miliona lea o le a faaalu e le Malo i le National Health Service, ma ou te faafetai atu ai ona ua ae se tofa i le Malo aua o le fesili mai soo ia o tagata ia te au, “O le a ea le mea e leaga soo ai lena Ofisa o le Soifua Maloloina”? Ia, atonu o le vaifofo lea ua amata ai, ua tatau ona tuueseese le Ofisa o le Soifua Maloloina ma i latou e faatinoina galuega faafomai ma galuega faafalemai.

Lau Afioga i le Minisita, ona o au e malamalama tele i faafitauli i falemai, e oo mai lava i le aso nei o lea ou te malamalama pea ma ou te talatalanoa pea i alii ma tamaitai fomai faapea teine tausimai, po o a mai le falemai? Ia, e le o lelei. O le latou tala, “Its gone from bad to worse”. O le tala lena, it’s gone from bad to worse, a o lea ua ou vaai atu o lea o le a aveese le National Hospital ma le Ministry of Health. Ua ou tilotilo atu foi o lea ua amata ona sue se isi e fai ma CEO po o le General Manager o le National Health Service. E fautua atu ai i lau Afioga i le Minisita, e manaia tele le tuueseese lea ua i ai, ae ia e alofagia ia tofi tagata tatau e tauaveina. O le mea lea e tupu nei i le falemai, e le o talafeagai tofiga, o le mea lea e ala ai ona faapea le falemai. O le falemai po o le Ofisa o le Soifua Maloloina, o lena tou te silafia, ona pau lena o le Matagaluega a le Malo ua fia Komisi Suesue e fai i ai. O lea foi faatoa uma atu i le tausaga lea le Komisi Suesue.

Lau Afioga i le Minisita, se i e tilotilo i findings a le Commission of Inquiry, po o le a le mea e ala ai ona

faapea umi lena falemai ma lena Ofisa o le Soifua Maloloina? E manaia le \$40miliona o le vaegatupe lea o le a ave i le National Health Service, sue mai la... ua ou vaai i tagata ia ua uma ona faasalalau mai i le nusipepa o le a filifilia. O lau fautuaga leaga e tele lou iloa, ona pau lau fautuaga – toe advertise le position. O lau fautuaga lena ia te oe, ou te le faapea atu ou te taufaaleaga aua e manaia le vaifofo lea, ae ou te tilotilo atu, ia talofa e, e manaia tele le fuafuaga a le Malo. O le vaifofo lea e pei ona ou fai atu, ae ia alofagia, se toe sue mai nisi. O lau fautuaga – ou te alofa ia te oe leaga o oe o le sui usufono fou e pei lava o lou sui usufono, a o oe foi o le sui usufono fou a o lena ua e Minisita. Ua e Minisita nei, ua tele le avega e te tauaveina, e le i lava foi sou tomai ma sou iloa o le Soifua Maloloina. Na ona fautua atu, ia toe tilotilo totoa i ai aua e \$40miliona le tupe lea, o lea o le a toe avatu nei.

Na o sina... e le i taitai lava uma au tala i le Soifua Maloloina ae leaga o lea ua toe lua ou minute.

Lau Afioga i le Minisita...

Faafetai i lau Afioga i le Fofoga Fetalai, sa faapea lava au o le afa itula o se mea tele a o lea o le mea laititi lava. Faafetai mo le avanoa e toe fai atu ai sina tala leaga o lea e le i taitai lau tautalaga.

Lau Afioga i le Minisita mo Fesootaiga ma Faamatalaga Tekonolosi, ia alofagia e pei ona ou talosaga atu ai i lau Afioga i lina telefoni i lo matou nuu o Papa, ona ua tele le fia faaoga o computer a tamaiti aoga, ae leai ni lina foi ia e mafai ona faaoga ai computers.

O lou popolega i lau lauga faataupou lena i lena po, leaga e le o faalogologo mai lou Itumalo, e gogolo le 2AP lena e fai atu ai. Ou te masalo na o tagata o lou Itumalo i Apia lea e faalogologo i ai, a o lo matou Itumalo, na o le FM lava e manino ai. Faamolemole lau Afioga i le Minisita ia alofagia se i tagai ane po o lelei le SBC po o le 2AP, e pei ona taua ai i ia aso, aua lo matou Itumalo.

E tele lava mea ia ou te fia tautala i ai, ae ou te vaai atu ua uma lou taimi. Lau Afioga i le Fofoga Fetalai faapea le mamalu o lena Palemene, faafetai mo le avanoa ua tuu mai e avatu ai se faamatalaga aua le Tala Faatatau o le Tupe.

Ia tau ina alofa le Atua, ia manuia pea lau Afioga i le Fofoga Fetalai i le faafoega o le Palemene aua Samoa ma lona lumanai. Ia manuia lau Afioga i le Palemia ma lau Kapeneta ma le mamalu tele o lena Palemene. O outou mama na, ia manuia le Fonotaga. Faafetai.

Saunoaga Faataupou a Sui Usufono 1961-2011

Afioga MUAGUTUTIA SIAOSI S. MEREDITH



Itumalo Faaalalafaga:

Aleipata Itupa i Lalo

Filifilia:

11 Oketopa 2006

Faatauto:

13 Novema 2006

Lauga Faataupou:

16 Novema 2006

Faafetai i lau Afioga i le Fofoga Fetalai mo le avanoa ua tuuina mai e momoli atu ai se sao o lenei Itumalo o Aleipata Itupa i Lalo. Ou te manatu, ua uma ona asia le mamao ma uto latalata e ala i le viiga ma le faafetai i le Atua i lenei taeao fou. Le Atua faafetai.

E muamua ona ou fia pai atu i le paia ma le mamalu o le aofia i lenei taeao, aua le tapuaiga i le Afioga i le Ao Mamalu o le Malo o Samoa. Ou te fia faatulou i le tapuaiga a Sui o le Fono o Sui Tofia, faapea lau Afioga i le Palemia ma lau Kapeneta, sui usufono mamalu uma o le Maota Fono o Samoa, faapea Ulu o Matagaluega a le Malo, Ulu o Kamupani ma o latou ofisa mamalu.

Ou te fia faatulou atu foi i Aiga ma Tama, po o Tama foi ma o latou Aiga, le mamalu ia Tumua ma Pule, Ituau ma Alataua, Aiga i le Tai ma le Vaa o Fonoti, aemaise le tapuaiga i Auauna paia a le Atua o lo o latou tapuaia faiva o Samoa aua se manuia o Samoa ma ona tagata. Ona ou faapea lea, taalolo ia paia o Samoa e le gafataulimaina e le sui usufono mo Aleipata Itupa i Lalo, ae avea ia lenei avanoa ou te pai atu ai ma lou faaaloalo i le tapuaiga a si ou Itumalo o Aleipata Itupa i Lalo mai Tiavea e oo atu i Satitua. Tulouna ia le paia o le Tuiatua Faanofonofu ma le mamalu ia te oe Saleaumua. O le tala moni, e solo le pa ae le mafai ona solo tia o le vavau i o outou paia ma mamalu. O paia lava mai le vavau seia oo lava i le faavavau. E le mafai e lau gagana ona sui pe toe faaopoopoina o paia lava e tumau, e tumau lava.

Ou te manatu ua taialalo le ia a le tautai i le tofa ma le faautaga na saili e le paia o le Itumalo, ia sailia se tautai e agavaa, e alofa ma tautua faamaoni i le Itumalo. A lea. Ua outou filifilia lou tagata faatauvaa e fai ma auauna e vae ma lima aua se manuia o le Itumalo mo lenei lima tausaga.

Ou te faafetai atu foi i le paia o le Itumalo i e sa lagolagoina au ua ou pale ai ma ou nofoia le nofoa o le Itumalo. O le upu moni, e leai se faiva e asa ma se maumau, ae tapuai maia ma tui malofie ou te malosi ai.

Lau Afioga i le Fofoga Fetalai, o le mea sa sau ai lou Itumalo sa tele lava ni galuega manaomia ae sa itiiti lava pe leai foi sona faatinoina. O le mea moni, ua luasefulu tausaga o maua pea Aleipata Itupa i Lalo i le nofo ma le ua falolo, se i tulou. O lo o i ai la ni galuega o lo o moomia o le a ou ootoo atu faapea.

Tasi; ua sili atu i le luasefulu tausaga e le o toe vaaia se galuega o fai i le uafu i Aleipata. Faafetai i le Malo ona e peiseai ua ae se tofa ma se faautaga loloto o le a toe faatino lea galuega i se taimi e le o toe mamao.

Lua; o vaipaipa. O lo o oge vai pea lo matou Itumalo, o lo o vaaia lava nisi o alaafaga o lo o tau lau mai pea vai i pakete, se i tulou.

Tolu; eletise. E tele nisi o le matou Itumalo e le i oo atu lava i ai le eletise, ma o lo o mumu pea i moli karasini.

O le vaega mulimuli; o auala. O lo o manaomia lava se faaleleiga o le auala i Tiaveatai ua le sao i ai ni pasi i le taimi nei. Ia, o le a faagata ai i se leo, tau ina ia manuia fuafuaga uma o le Fonotaga i lenei aso. Ia lagi e mama lau Afioga i le Fofoga Fetalai faapea sui usufono mamalu o le Palemene ae ou ola i le alofa o le Atua. Soifua.

Susuga MULIPOLA OLIVA



Itumalo Faaalalafaga:

Aiga i le Tai

Filifilia:

13 Aperila 2006

Faatauto:

20 Aperila 2006

Lauga Faataupou:

13 Iuni 2006

Ou te faafetai atu i lau Afioga i le Fofoga Fetalai ona o lenei avanoa faaauro ua maua e le sui usufono mo Aiga i le Tai e tuuina atu ai foi ni motugamanatu e avea ma o matou sao ia Manuvao aua le Tala Faatatau Autu o Tupe mo le tausaga faaletupe 2006/2007 atoa ai foi ma se vaega laitiiti o le Tala Faatatau o Tupe Faaopoopo (Nu.2) 2005/2006/

Ae ou te le i asaina le vaofilifili ma ou utufia le vai lea na momoo i ai le Tuiatua i Maauga ma Nuausala, ae muamua ona ou faatulou aua paia o Samoa.

Ou te faatulou i le afio o Lana Afioga Mamalu O le Ao o le Malo o le Malo Tutoatasi o Samoa, lau Afioga i le Tapaau Faasisina, lau Susuga Malietoa Tanumafili II, e te ee pea i lou nofoa vaevaeloloa, i lou fala na folaloa, i lou talana atoa, e faafofoga ia te oe Samoa. Tulouna foi le afio i Sui Usufono o le Fono a Sui Tofia, lau Afioga Tuiatua Tupua Tamasese Efi ma lau Masiofo, tainane foi le afio o lau Afioga Tuiaana Tuimalealiifano Sualauvi Vaaletoa Eti ma lau Masiofo.

Ou te faatulou foi i le afio o lau Afioga i le Palemia, lau Susuga Tuilaepa Sailele Malielegaoi, o lau Susuga o le Alo o le Malietoa. Ou te faatulou foi i le afio o Minisita o le Kapeneta, o i laotu ua avea ma vaetootoo e tauaveina le pulega malo a Samoa i lenei Paeaiiga Lona XIV a le Palemene o Samoa, e pei ona tofia i ai i tatou i lenei vaiata.

Ou te faatulou foi i le afio i lau Afioga i le Fofoga Fetalai, e faapea foi le afio i le Afioga i le Taitai o le Itu

Saunoaga Faataupou a Sui Usufono 1961-2011

Agai, tainane sui usufono mamalu uma o le Fono Aoao Faitulafono o le Palemene o Samoa.

Ou te faatulou atu foi i le afio o lau Afioga i le Faamasino Sili ma Alii o le Faamasinoga, tainane le Matagaluega o Pulega o Faamasinoga a lo tatou Atunuu.

Ou te faatulou atu foi aua Faauluuluga o Matagaluega a le Malo, Kamupani, Pisinisi, ma i latou uma ua tuasivi i ai le tamaoaiga o lo tatou nei Atunuu.

Ou te fia faatulou foi aua le mamalu o le Usoga a Tumua ma Pule, Itua ma Alataua, Aiga i le Tai ma le Vaatau o Nafanua, tainane foi le Aufaigaluega Paia a le Atua o e o lo o faafalelemalu i afioaga ma alaalfaga o le Atunuu aua le nonoina o ni manu mo Samoa mo nei ma i e lua, ae tainane foi alo ma fanau a le Atunuu o tupulaga lalova o le faamoemoega lea o Samoa mo le lumanai.

E le faagaloina foi Amerika Samoa i lau tapuaiga; i le afio o lau Afioga i le Kovana Sili, afio le Kovana Lutena, faapea foi le pulega malo i Sasae. O le paia lava lea i le motu o le afi mutasi ma lou faleu na totototo, o lou faleu na tauaitu ma lou faaleu na tautagata, tulou, tulouna lava.

Lau Afioga i le Fofoga Fetalai, e ao lava ona ou afea lou Itumalo pele o Aiga i le Tai. Aiga i le Tai, i le paia o lo outou Toafa o Alii, o le uluai pou o malo le Susuga tutasi ia Samoa, faamalo faafetai. O le paia lava lea i lo oulua toalua Leiataualesa ma Leiataualetaua, o le mamalu lea aua Futi o le Moa na faagatau, Sa Mutimuti, Sa Leiataua ma Manono, o le paia foi i lo la toalua o Taupau ma Mulipola, Luatutu ma le Alo o le Malietoa, Auapaau o oe o le moa na vinimua, ma le falefa o Salua. O le paia lava lea i le Toafa o Alii ma le toalua o Tulafale ma le nofo a ituaiga ia te oe le Fale Manono.

Ou te faapai atu foi aua le tapuaiga i le paia o le Susu o Aiga o Usoalii, susu Alo o le Malietoa, susu Fuaolefau ma le Pouli ma le mamalu ia te oe Ati ma Lautolo. Le paia foi aua le susu o Sau ma le Aiga Sa Sau, ia le mamalu ia te oe le Tuua faapea le mamalu ia Sauma. O paia na o le Aiga i le Tai. Lou Itumalo, o se taimi ona ou oo atu lea, ae ao ona momoli so tatou sao aua le Tala Faatatau Autu o le Tupe e pei ona faataatia nei.

Lau Afioga i le Fofoga Fetalai, a o le i tuuina atu se sao ma se talosaga a lenei Itumalo, e muamua ona ou momoli atu le faamalo i le Afioga i le Palemia ma le Kapeneta ona o lo outou tofia e faafoe le Sa o Samoa. O lo matou tiute o le tuitui malofie; o le matou tiute o le fagufagu ma faufautua; o nisi foi taimi o matou tiute o le faitio; e faatupu manatu aua lava se manuia o Samoa mo le lumanai.

Lau Afioga i le Fofoga Fetalai, ou te faamalo foi i le tofia o lau Afioga Hon Tolofuaivalelei Falemoe Leiataualesa; ua mamalu lou Nofoa, ai ona o le mamalu o lou faaii, o se tasi o pou o le Itumalo o Aiga i le Tai. Ou te muamua ona tuuina atu le talosaga a le Itumalo o Aiga i le Tai i nisi o mea o atinae ma manaoga o lou Itumalo ma mea e fia faaleleia i totonu o le Itumalo. O lona lua, o le taumafai

atu lea o so matou sao aua le lavalaoa o Samoa i le atiaaina o le tatou Atunuu.

Lau Afioga i le Fofoga Fetalai, e auala atu i le Nofoa le talosaga i lau Afioga i le Palemia e faapea lau Faigamalo, ua maua nei le tofia o se Komisi Suesue latou te iloiloia le tulaga o le fetuutuunaiga o Itumalo faafaipule o Samoa ma isi lava o teuteuga ma vaega e aafia ai le tulaga o le fetuutuunaiga o tuaoi faatatauina o Itumalo mavae o le Atunuu, e faapea foi Itumalo faafaipule. Lau Afioga i le Fofoga Fetalai, o le talosaga muamua a Aiga i le Tai lau Afioga i le Palemia, e manaomia so matou sui usufono faaopoopo mo Aiga i le Tai. Na pau lenei o le Itumalo e pei ona silafia e fa motu aina o le atu Samoa: o Upolu, Savaii, Manono, ma Apolima. O le tolu o na matou aina o Tumua nei, o Manono ma Apolima o lo o aafia i tuaoi faatatauina o Aiga i le Tai, mai le fa o motu aina o Samoa, e tolu motu o lo o pulea e le Itumalo lenei lau Afioga i le Fofoga Fetalai. O lona uiga, o ni tuaoi tetele ia.

O le isi vaega e lagolagoia ai lea mau; a tagai i le lola poalota o le Faiga Palota na se i mavae atu nei i le aso 31 Mati, o lo o tulai mai ai le lola palota a Aiga i le Tai i le 2,754 le aofai o i latou na faamauina. Ma e mafai ai ona faaaogaina masini computer ua le mafai ai ona toe saofaga le omai o isi mamoe gaioi atu mamoe a lenei Itumalo lau Afioga i le Fofoga Fetalai, aua ua mafai ai ona toe foi mai tamalii – o tupu ma tamalii – o lenei Itumalo faapea foi nisi ua aulia le 21 tausaga e palota ai lava ma faia le latou filifiliga mo le Itumalo lenei. Mai le 2,754, e 800+ palota ia Mulipola Oliva; silasila i ai? E taua, e mafai ai ona fai le amiotonu ma le faaiuga i le filifiliga saoloto a le tagata soifua e ala i lana palota pe afai e palota moni i totonu o le Itumalo na tofia e le Atua e ola ma soifua ai.

O le isi vaega lau Afioga i le Fofoga Fetalai, o le tasi lenei o taeao faitaulia o Samoa, o le taeao nai Mataniu Feagaimaleata; lua loa i le taeao nai Manono, le taeao nai Faleu ma Utuagiagi, le taeao na toai taunuu i ai le Ekalesia Metotisi, o se tasi o Ekalesia o lo o faalagolago i ai lo tatou Atunuu i le ola faaleagaga.

O le isi vaega, ia silafia foi lau Afioga i le Fofoga Fetalai, e atoa lelei le 100 tausaga o tu le Malo i Manono. Na o le lua lava vaega o Samoa na tu ai le Malo, na o le Malo na tu i Manono, ia ma le Malo lea ua tu nei. Silasila la i le taua tele o le Itumalo lenei? O lona uiga, a na le alolofa e ua fai i lagi le tuligasia a le aiga Sa Tagaloa i lo latou soifua ma le ola i lena taimi, ia e le mafai ona tatou faapenei ma tatou aea e le manuia ua saunia e lo tatou Tapaau Sili i le Lagi e pei ona tatou i ai i lenei taimi.

Lau Afioga i le Fofoga Fetalai, a o le mea mulimuli lau Afioga i le Palemia, o le Feagaiga lenei a Tumua ma Pule. E le o se Feagaiga tamaitai, o le Feagaiga a alii o Tolufale o le tama, ae ala ona taulagi e isi faleupolu o le tamaitai o le lotoleaga, aua foi o lea e mau ia te au le tootoo umi e au i le vavaloloa ma Samoa aoao, ia toe tofi au o le Feagaiga,

Saunoaga Faataupou a Sui Usufono 1961-2011

po o gafea ea ma afea e to ai se matupalapala i se tofi faaopoopo mo le Aiga i le Tai?

Lau Afioga i le Fofoga Fetalai, ona ou oo mai lea i le Matagaluega o Punaoa Faalenatura ma le Siosiomaga. Lau Afioga i le Minisita, e lua Minisita o Eleele, ua faasuafaina oe i le suafa matua o le aiga sa Taupau, o lenei ua talosaga atu Mulipola – lau Afioga Faumuina po o lau Susuga foi, e tauala atu i le Nofoa, ia ni eleele faaopoopo mo lo tatou Itumalo o Aiga i le Tai. Ia silasila lelei, o le Itumalo lenei ua matua pulepule lava lau Afioga i le Fofoga Fetalai; a e agai atu i le taavale agai i tua, e muamua e tau i Paepaeala i Mulifanua, ona sosoo Mulifanua i Fuailoolo, sosoo Lalovi, e toe tau foi i Satuimalufilufi, sosoo ma Apolimauta, e toe tau foi ia Satuimalufilufi, faatoa e oo i Manono. E faatolu ona maua Satuimalufilufi i totonu o le Itumalo lenei, o lona uiga, ua fetineiai lenei Itumalo faatasi ai ma le afioaga o Satuimalufilufi e faasino i le Itumalo mamalu o Aana Alofi Nu.3 ma ua manaomia ai se faataatiaga lelei mo le saogalemu o le nonofo ai o lenei Itumalo.

O lo o i ai foi eleele o le Esetete Tausi e pei ona talosaga mai ai le afioaga o Mulifanua i eleele o lo o i ai i Olomanu ma eleele o lo o i ai i Tausani. Lau Afioga i le Fofoga Fetalai, e tauala atu i le Nofoa le talosaga a le Itumalo; pe le mafai ona tuu mai ia eleele e galulue ai le Itumalo o Aiga i le Tai? O lo o i ai foi se fanua lisi o lo o nofoia nei e le afioaga o Lalovi i Mulifanua, o lea eleele lau Afioga i le Fofoga Fetalai o lo o i ai lea i le tuaoi o Lalovi ma Mulifanua. Faamolemole lau Afioga i le Minisita, ua loaloa tausaga o nofo lisi ai pea le afioaga lenei; pe le o le taimi tonu ea lenei e to mai ai se matupalapala mo lenei afioaga, o se tasi o afioaga o lenei Itumalo?

Lau Afioga i le tamaitai Minisita o le Soifua Maloloina, e momoli atu le faafetai ona o lou tofia. Ou te faatalosagaina ma le agaga faaloalo, le toe fausia ma le faaleleia o le falemai o lo o i ai nei i Manonotai. Ia silafia lau Afioga i le Fofoga Fetalai faapea foi le Afioga i le Minisita o le Soifua Maloloina, o gasegase o lo o i ai nei i lo matou motu i Manono, o lo o tele ina tau ave mai i vaa foi nei aemaise lava i tulaga o le po ua leva le po, o se tulaga faigata tele. Ma e pei ona ou maitauina i nisi o gasegase talu ai nei, o Susuga i Faafeagaiga, aua o i latou nei o lo o i ai o latou sa, o lo o i uta i Manonouta o lo o tele ina auina mai gasegase ma tuuina mai i le maota gasegase. O le talosaga; faamolemole pe mafai ona toe silasila ane le Matagaluega mo le toe faaleleia ma le fausia o le falemai i Manonotai mo lenei faamoemoe? O le taimi nei o lo o i ai se falemai o lo o faagaioia e le Komiti a Tina a le afioaga o Faleu ma Lepuia i Manonotai; pe le mafai ona amata loa ona faagasolo atu i ai ni fomai i Mulifanua, o le ala lava e tasi le talosaga a lenei Itumalo. E pei ona maitauina i le Tala Faatatau Autu o le Tupe, o lo o faamaoti mai ai nisi o galuega e faatinoina ma o le a faatino auauai mo le faaleleia o falemai foi nei e aofia ai

Leulumoega, o lona uiga, e fuafua lea mo le paia ma le mamalu o le Atunuu o lo o alaala ma papaao i le faaitu i sisifo o le motu nei i Upolu. O le ala lea o le talosaga, ina ia vave faatino foi lea vaega ia aemaise se i silasila ane le Pulega ona o le tulaga o le aoina o le tupe e \$20 mo gasegase nei o lo o tausavali mai i si ou Itumalo lau Afioga i le Fofoga Fetalai.

O le Minisita mo Galuega, Fealauaiga ma Atinae Eseeese, ou te faatalosagaina le vaega muamua, o auala. Ua talosaga mai le motu o Manono, pe mafai ona fausia sina auala foi nei taamilo i le motu, ia, pe mafai foi ona avatu ni nai taavale e tasi pe lua e feoi ai. O le taimi e fai ai fonotaga a le nuu, e pei o lo o faaaogaina lava ia vaa foi nei o alia e femalagaai ai tama matutua ma tina matutua o le afioaga, ae talosagaina – ia e mafai lava foi ona fausia se auala – ia ae lau i ai ni taavale a matou lava ia se i tulou, matou te faaaogaina mo femalagaiga pe a talafeagai. O le alatele o le Malo mai Mulifanua seia paia Manonouta, na fausia i le tausaga e 1988 e oo mai lava i le taimi nei, e le i toe faia i ai se isi galeuga faalelei.

O auala galue; auala i Faleuuta, Apolimauta, i Lalovi ma Mulifanua, faafetai mo auala galue e lua ua maea ona faatana i Saluauta ma Lepuia i uta. Ia, e ui lava ona e pei na i ai le faamoemoe o nei auala, ia e tau titina ai ma au i le Faiga Palota aua ne i ou sau, ia a o lea lava ua ou sau. Ma o le talosaga faamolemole pe mafai ona silasila ane i nai isi auala galue o lo o totoe o lenei Itumalo?

O le uafu i Manonouta lau Afioga i le Fofoga Fetalai e tauala atu i le Nofoa, o le talosaga mo le toe faalolotoina ma faaleleia atili, ma e talosagaina foi se uafu mo le pitonuu o Lepuiaitai ma Apai i Manonotai, aua pau lenei o le Itumalo o lo o manaomia ia lea ituaiga o atinae o uafu e faafaigofie ai le femalagaai.

O lo o maitauina i le Tala Faatatau o le Tupe se vaegatupe e \$10,707,845 o lo o ua tuuina atu nei i le Faalapotopotoga o le Malosiaga Faaletise. Lau Afioga i le Fofoga Fetalai, ou te faafetai atu i le Faalapotopotoga, ona o lea ua maua o lo o i ai se ½ miliona tala pe \$500,000 ua faatatauina mo le fausia ma le faia o le atinae o le eletise mo le motu o Apolimatai; faafetai atu ona o se tofa ua ae ia ma o se tali foi lea i talosaga a nisi o sui usufono ua loa tausaga o talosagaina ina ia mafai ai ona ola mo le 24 itula le eletise mo Manonotai.

E na ona ou fesiligia lau Afioga i le Minisita mo Fesootaiga ma Faamatalaga Tekonolosi, ona o le pou o lo o fausia nei i le motu o Manono a le SamoaTel. A faapea o le pou lea o le a mafai ai ona ola telefoni i lenei faaitu o le Atunuu i le faiga fou e pei ona maua o le a i ai nei ma le tomai o le a i ai nei, ia o le a leai se talosaga aua o lea ua faatino, ae a faapea e leai, ia e momoli atu le talosaga ona ua manaomia telefoni mo Saluauta ma Lepuiaitua e pei ona sa le i oo i ai le laina telefoni i le atinae na faatinoina i le 1996.

Saunoaga Faataupou a Sui Usufono 1961-2011

O Faigafaiva lau Afioga i le Fofoga Fetalai; e talosagaina le Afioga i le Minisita e faapea foi le Malo; pe le mafai ona faatuina se faiga e faaune atu ai ia tupe i se faiga faapitoa mo le Itumalo lenei o Aiga i le Tai. E pei ona silafia o le Itumalo lenei, e faamoemoe lona tamaoaiga i faiva o le tai. Pe le mafai ona faatuina ai se vaegatupe faapitoa foi lenei, ia pe fai i se faiga foi lea o soft term loans, e pei ona faia e le tatou Atunuu mai le Faalapotopotoga foi lea e vaivai le tamaoaiga, ia pe mafai ona fai se faiga faapena ina ia mafai ai e tamalii o lenei Itumalo ona faatauina ni vaafagota? O le taimi nei ua faale agai tele i le mea foi nei o paopao, ae pei o lea ua agai i le sailia o vaafagota, o alia, mo le faatioina ai o ia atinae.

Lau Afioga i le Fofoga Fetalai, o se sao o lenei Itumalo mo le lautele o le tamaoaiga o lo tatou Atunuu. Pe a ou vaai i le faatulagaina mai o le Tala Faatatau o le Tupe lenei, o le siitaga o le lafoga o le VAGST mai le 12.5% i le 15% o le a faamamaluina ai i le aso 1 o le masina o Oketopa o le tausaga nei. Ou te fia fesiligia ai le Malo; pe o le a se pasene talafeagai o fuafua ia le Malo e tataua ona faatulagaina ai le GST? Aua a ou faitau i le lauga a le Afioga i le Minisita o Tupe lau Afioga i le Fofoga Fetalai, e foliga mai ai o le laasaga muamua lenei o ni laasaga se tele o le a faatinoina mo le siisii ae o le VAGST ina ia gafatiataulima ai e le Malo o Samoa ona faatino ana galuega ma lona atinae pe a fuafua atu i le tausaga e 2010, pe a sao au, lea o le a see mai ai Samoa mai le lisi foi lenei o LDC po o le Least Developed Countries.

Lau Afioga i le Fofoga Fetalai, o lea e maitauina e foliga mai o le a agai pea i luma le GST, e 17% ia pe sili atu foi se vaega i se taimi oi luma, e pei o le vaega tonu lena o lo o fia malamalama i ai ia le sui usufono lenei ma lenei Itumalo. O le siitia o le GST mo le faamoemoega o le atiaeina o le Atunuu, e mauta talia e le Itumalo lenei. Peitai ane, o loo maitauina foi i le Tala Faatatau o le Tupe ia nisi o vaegatupe e foliga mai o le a matele i le totogiina o nisi o aitalafu, e pei ona maitauina i lalo o tupe faaalu ma tupe e totogiina atu e le Ofisa o le Tupe – le Treasury – o lo o faataatia mai se vaegatupe e tusa ma le \$3,450,000 o le a totogiina atu i le Kamupani Vaalele a le Polenisia. E pei ona taua mai i le Lipoti a le Komiti o Tupe Maua ma Tupe Totogi, o lo o faamanino mai ai i lenei Lipoti, o le vaegatupe e \$3.5miliona o le aofaiga lea o le tupe o le a totogiina atu e le Malo o Samoa mo le nonogatupe e \$18miliona Niu Sila a le Kamupani Vaalele o le Polenisia sa i ai, ma faatauina mai ai ia totoga faaleoleo po o spare parts mo tatou vaalele e pei ona sa i ai. O le maitau la o lou sui usufono, a faapea o le aiaiga o i ai nei e sefululima tausaga o le a totogiina atu ai le vaegatupe e \$3,450,000 ona tulai mai lea o se aofaiga o le a totogiina e lo tatou Atunuu i totonu o le sefululima tausaga, \$51,750,000.

Lau Afioga i le Fofoga Fetalai, ina ua ou taumafai foi lea e faaliliu le vaegatupe e \$18miliona Niu Sila i le

faaogaina ai le \$2 i le \$1 Niu Sila e tasi mo le tupe foi lenei e faatauina mai ai le tala Niu Sila, o lona uiga e tataua ona i ai i se mea o le \$36miliona le vaegatupe mo le aitalafu lenei. Peitai ane, a faapea e \$51,750,000 le vaegatupe o le a faaalu i le Polenisia i lana aitalafu lenei e tasi, ona tulai mai lea o se eseese i se vaime a o le \$15,750,000, o le tului lea, ia pe tusa o le 43.75% le tului po o le interest i luga o ni nonogatupe e \$18miliona Niu Sila e pei ona tuuina mai. O lo o maitauina foi e lou sui usufono, o lo o i ai nisi o aitalafu a le Polenisia e pei e \$10miliona i le NPF, ia ma nisi o aitalafu e le o maua i le taimi nei, ma ua foliga mai ai e ono oo atu lava pe latalata atu i le \$100miliona se aitalafu a le Kamupani Vaalele lenei o le a totogiina mai le tamaoaiga o lo tatou Atunuu i ana tupe maua. Ma o se popolega lena o lenei Itumalo lau Afioga i le Fofoga Fetalai, ona o le siitia o le lafoga o le VAGST mai le 12.5% i le 15% o se faamamafa avega foi lea i lo tatou Atunuu. E pei lava ona ou fai atu, e ui lava ona o se faamamafa avega ae mo le faamoemoega tasi o le atinae o le Atunuu, e lagolagoina e le Itumalo lenei. Peitai ane, o lo o maitauina o lo o i ai foi ma isi o vaega nei, ona o le le lelei o le puleaina o kamupani a le Atunuu i tausaga ua mavae ua tulai mai ai nei faafitauli.

I le tulaga lava o le maualuga o le tau o le soifuuga lau Afioga i le Fofoga Fetalai, ou te talosagaina ai le Malo aemaise le Matagaluega o lo o feagai tonu ma le vaega lea o le Price Control Board ia po o le Komiti foi lenei latou te vaavaaia ia le tau o oloa. Ua maitauina e lou sui usufono, le tulaga o le soona tasi o le tau o le soifuuga le fuafua tataua e pei ona maua mai. O le tau foi lenei po o le mark up a le oloa sisiaota, e 12.5% e mafai ona fetuutuunai ai lana tau. O le tau o le oloa laitiiti po o le retailer, e 20% ia ma lalo ifo e mafai ona fetuutuunai ai lana tau e fua lava i le tulaga faatauvaga.

Lau Afioga i le Fofoga Fetalai, pe le mafai ona silasila le Malo, ina ia tuutuu mai i lalo le pasene mo Upolu nei lava, se i vagana ai le motu tele i Salafai ona o le tele o femalagaaiga ia ma tulaga e faaogaina ai ia vaa mo le lauina atu o oloa i Savaii. Ou te iloa ua talafeagai ai le 20% lea, ae mo Upolu nei, pe le mafai ona tuuina mai i lalo i le 15 pe 16% ina ia mafai ona fai ai le mark upu foi lea a le faioloa laitiiti. Lau Afioga i le Fofoga Fetalai, ua maitauina le matua leai o se pulega e mafai ai ona taofiofia le tau o oloa ona o le vaivai o le vaega lenei o le Price Control Board. O se faamatalaga ua maua e lou sui usufono, ia e foliga mai ona o le le lava o le aufaigaluega ma le le lava o le seleni e mafai ai ona faagaioi lea itu o le tatou Malo.

Lau Afioga i le Fofoga Fetalai, ona ou oo mai lea i le Matagaluega o le Soifua Maloloina. O le faafitauli o lo o i ai nei, e pei ona taua foi e se tasi o sui usufono ua mavae nei, ou te fia faafesiligia ai; pe le mafai ona faatino se faiga foi lenei o lea ua maua i le Tala Faatatau o le Tupe, a silasila foi i le Lipoti a le Komiti lenei o Tupe Maua ma

Tupe Totogi, o lo o tuuina mai ai i lalo le Matagaluega o le Loia Sili ia se faaititiga o se vaegatupe e tusa ma le \$14,000. O lenei vaegatupe e tai \$7,000 ua faaigoaina o le marketing allowance ia po o le risk allowance, na tau taofiofia ai latou mai le o ese atu i le Private Sector ia faapea foi le malaga i fafo. O lo o maitau, e foliga mai o lea ua maoti ma sa patino i le Ofisa o le Loia Sili se alauni faapitoa e taofiofia ai tomai faapitoa mai le o ese mai le ofisa o le Malo. Ae a faapefea fomai? Ae faapefea le tulaga i inisinia? Pe le mafai ona faatino e lagolagoina e lou sui usufono, ona o tomai faapitoa e aoga mo le atiaaina o le Malo, ae pe le mafai ona faasafua lea faiga, risk allowance ia po o le marketing allowance mo tomai faafomai ia faapea foi ma le tulaga i tomai faainisinia, o le Matagaluega o Galuega?

Lau Afioga i le Fofoga Fetalai, o le Pulega o Taulaga ma Uafu le Samoa Port Authority; ua ou maitauina foi, o lo o taumafai lo tatou Atunuu ina ia faatupulaia tagata tafafao maimoa mai fafo ina ia tele ai le tupe maua a lo tatou Malo, peitai, o lea ou te maitau atu, o lea e fai si taugata o le totogi e taula ai le Meli e tasi i le uafu o Samoa, le Samoa Port Authority, o se vaimea o le US\$100,000 e taula ai le Meli e tasi. Lau Afioga i le Fofoga Fetalai, o le lipoti ua maua e foliga mai e le i taitai oo Samoa i le tauvaga foi lenei o Meli. O lea e maua o nisi o Atunuu o le Pasefika e tele Meli o lo o afea ona o le taugofie o le tau o le faatatauina mo Meli nei. E i ai lau talosaga i le Afioga i le Minisita, pe le mafai ona toe silasila i ai ina ia tuutuu i lalo le tau o lo o taula ai o tatou vaa po o Meli ina ia tele ai Meli e mafai ona afea le tauaga i Apia ma saga faateleina ai le tamaoiga o le Atunuu.

Lau Afioga i le Fofoga Fetalai, ia...

Ona ua maea le taimi, ae leai se manatu o le sui usufono e faatautee i lau Afioga i le Fofoga Fetalai e tusa o le taimi ua faatulagaina mai. Talu ai o lenei taimi ou te toe faafetai atu ai i lou Itumalo o Aiga i le Tai, faafetai tele i la outou pule ua tototetele. O ai foi na manatu o le a outou sii le fale o Asomua i le malama o le mauga ua mafai ai ona outou faaeaea ia Mulipola e avea ma o outou fofoga taumomoli aua upufai o malo e tauala i le Nofoa o le Itumalo i le Palemene?

Lau Afioga i le Fofoga Fetalai, o manatu na o le Itumalo o Aiga i le Tai. Afai e i ai se aoga, ia o lena lo matou sao i atinae o le Atunuu i lenei tausaga faaletupe. Afai foi e le tau tamalii pe tau laulu i se faafofogaaga a lau Afioga faapea le Faigamalo o le tulaga lava lena, e pei ona ou fai atu o le tatou tiute fai tele o le fau faatasi o le tatou Malo.

Manuia tele lau Afioga faapea le Maota nei faapea le tapuaiga a lou Itumalo, soifua ma ia manuia.

Susuga PAPALII MEMEA SAMUELU PETAIA



Itumalo Faaalalafaga:

Faasaleleaga Nu.2

Filifilia:

5 Fepuari 2007

Faatauto:

12 Fepuari 2007

Lauga Faataupou:

16 Fepuari 2007

Faafetai lava i lau Afioga i le Fofoga Fetalai i lenei taeao e tusa o le talosaga molia e lau Afioga, e faafetaia ai ma viivii le alofa o le Atua ona ua toe afifio mai ma tala mai aao o le Maota nei o le Palemene i le Tauaofiaga o lana Fono Faitulafono.

E momoli atu foi le faafetai ona ua mafai ona aofia paia ma faafeagai mamalu o le Fonotaga nei i lenei taeao toafilemu ma le matagofie ona o le alofa o le Atua. E ui lava ina ufitia le Maota nei i le ao pogisa ona o le amiga a le Atua i se tasi o tama matua o lenei Maota, ae tatou te faafetaia pea le agalelei o le Atua ona ua amia le toatasi ae tuua le toatele o Afioga i sui usufono nei, aua le talanoaina o mataupu mo se lumanai manuia o Samoa mo a taeao.

A o le i agai se manatu i le Tulafono Tau Faaofi e pei ona taatia i le Maota ou te talosaga ma faanoi atu i lau Afioga i le Fofoga Fetalai pe mafai se avanoa se i avatu ai sau faamalo ma se faafetai i lou Itumalo aemaise o Samoa o lo o faafogafoga mai e tusa o lou valaaulia ma lou oo mai i le Maota Fono a Samoa.

Faafetai. Lau Afioga i le Fofoga Fetalai ma le mamalu o le Palemene i Afioga sui usufono o le Maota Fono o Samoa, ae faapea se lagona, o le a taoto faagalua e le fati o outou paia, sa ma faigata, o le a le oo i ai sa matou faamatalaga i lenei taeao ina ne i le gafatia e so matou leo ona paepae le puapua ma ona lala e pei o le fetalaiga i le motu o Salaia. Ou te faapea atu ai, ee maia i o outou seetaga malū ae se i ou liliu ane e faasee vala o lauga aua le tapuaiga a lou Itumalo o Faasaleleaga Nu.2 aemaise o Samoa aoao o lo o faafogafoga mai i lenei taeao na liugalua.

Ou te faatalofa ma ou faatulou atu i le faafogafoga mai o Lana Afioga Mamalu O le Ao o le Malo o Samoa, lau Susuga i le Tapaau Faasisina Malietoa Tanumafili II, o lau Afioga e faafofoga i ai Samoa. E te ee i lou tala na atoa, lou fala na fola loa ma lou nofoa vaevaeloloa. Ou te faatalofa atu foi ma ou faatulou atu i Sui Usufono o le Fono a Sui Tofia.

Ou te faatalofa ma ou faatulou atu i lau Afioga i le Palemia aemaise Afioga i Minisita o le Kapeneta. Ou te faatalofa atu foi i lau Afioga i le Fofoga Fetalai aemaise o le mamalu o sui usufono o le Maota.

Ou te faatalofa ma faatulou atu i lau Afioga i le Faamasino Sili aemaise o sui Faamasino Sili o le

Saunoaga Faataupou a Sui Usufono 1961-2011

Faamasinoga Maualuga. E faapena ona ou faatulou atu i lau Afioga i le Peresetene ma alii Faamasino o le Faamasinoga o Fanua ma Suafa aemaise o le Matagaluega o Faamasinoga.

Ou te faatulou atu foi i Taitai o Ekalesia aemaise o le aufaigaluega a le Atua o lo o tala faauto i Samoa nei aua le nōnōmanū ma le tapuaiga mo le manuia o Samoa a taeao. Ou te faatulou atu foi i Ofisa Sili Tau Pulega aemaise o le mamalu o le aufaigaluega a le Malo.

Ou te faatulou atu i Aiga ma latou Tama, Tama ma Aiga, Tumua ma Pule, Aiga i le Tai ma le Vaa o Fonoti.

Ou te faatulou atu foi i le tapuaiga a le motu i Sasae ia Tutuila ma Manua, o le a lava lea i le afio o le Kovana Sili aemaise o le Lutena Kovana, le Fofoga Fetalai aemaise o le Peresetene o Maota e lua. Talofa.

Ou te momoli le faafetai ma ou faatulou atu i le Faleagafulu, o le paia lava lea ia Sua ma Vaifanua, Fofu ma Aitulagi, Ituau ma Alataua, Saole ma Saleaamua ma le Launiu na Saelua aemaise o Faatuiolomoti ma Tootoo o le Faleula ma upu ia te oe le Manuatele. Noga laia o ou paia na Samoa, o ou paia faale-aganuu, paia faale-Ekalesia aemaise o paia faa-faigamalo.

A o leni itula, tapuai maia ae se i ou liliu ane i se upu aua lou Itumalo o Faasaleleaga Nu.2 o lo o tapuai i le amata mai Maauga ma Fuaifatu seia paia Mataniu Feagai ma le Ata. O le paia lava lea i le Matua ia Safotulafai i le Susu o le Sao lau Afioga Leilua ma le Toalima, alaatai le Aiga Sa Alaalatoa aemaise le Matua ia Alaalatoa, Susu Alo o Malietoa o Moananu ma Taulapapa, le mamalu ia te outou Maopu Tufuga aemaise o le na Aimalae Fauolo, le paia o lou Fuaifale na toese ma le Lauti na Laulelei ia Safotulafai. La oulua Fetalai o oulua na pule Tuilagi ma Namulaulu ma upu ia te oe Safotulafai.

I lou nuu pele Sapapalii, ou te faatulou atu ma faatalofa atu i le Susu o le Nofo, Susu o le Tooa o le Saonalua, le paia o le Aiga Sa Malietoa aemaise o le alaafaga o Usoalii. Ou te faatulou atu foi ia te oe le Matua ma le nofo a ituaiga ia Mago ma Luasiufanua ma upu ia te oe Sapapalii. E le gata i tupu ma ee o lou Itumalo.

Ou te fia momoli atu foi le faatalofa ma ou faatulou atu i le paia o le Aufaigaluega a le Atua o lo o tala faauto i lou Itumalo o Faasaleleaga Nu.2, i la outou galuega fai tatalo ma nōnōmanū i le tapuaiga o o matou faiva a o matou alofaiva. Faafetai tele le tapuai fai tatalo.

Avea leni taeao ou te faafetai atu ai ia te oe Safotulafai ia te oe le Matua, faafetai le faasoasoa, faafetai le pule faamatua. O lea ua maimoa Samoa ua to mai lau pule ma outou filifilia mai au e fai ma o outou sui usufono i leni Maota. O lea ua aliiseu ai nei le Maota e alaala ai Sa Malietoa ma Usoalii, o lea ua saa ai i maa o Malie Mataniu-Feagaimaleata. Faamalo Safotulafai le fai Faleupolu, faamalo le manatu mai ia Mago ma Luasiufanua aemaise Sapapalii. O la outou faaaloalo ua to

mai faafetai faamalo, faafetai le pule faamatua ua malie malieō.

Ona faauma atu ai lea o sau faamatalaga e faapea, Safotulafai ma Sapapalii, lafo maia la outou faatuatua. E tele folafolaga ua uma ona faataatia i luma o le Maota ma ou te le toe agai i ai ae o le a ou tulimataia fuafuaga alualu mamao a le Malo ma ave foi i ai sau tuualalo aua mea o lo o fia faaleleia o le Itumalo mo le Falemai ma le soifua maloloina, Matagaluega o Aoaga, alatetele ma faatoaga ae peitai ona pau lava lau folafolaga Safotulafai ma Sapapalii i leni taeao e mafai ona ou gagana atu ai ma ou faapea atu, ou te le vavevave i sou manatu i le Maota. Ou te saili i le faatofalaiga a le Itumalo, tatou mulumuluafue, aumai so outou finagalo ma avatu sou manatu e saili ai so tatou ai i totonu o le Maota. Tapuai maia o leni faatoa amata le galuega, ia tatalo i le Atua ina ia manuia fuafuaga a le Malo.

Ia manuia Faauluuluga a le Atunuu. Ia manuia le aufaigaluega a le Malo. Ia manuia leni Fono Faitulafono i le Afioga i le Fofoga Fetalai ma sui usufono mamalu o le Palemene.

Ia manuia Samoa aoao e amata mai mauga maualuluga seia oo i mauga iti. O leni itula ou te manatu e tatau ona momoli sau faafetai i le Maota Fono a Samoa.

Lau Afioga i le Fofoga Fetalai, lau Afioga i le Palemia, sui usufono mamalu o le Kapeneta aemaise o sui usufono o le Maota. Faafetai i lo outou sagisagi mai, faafetai i le talia lelei o la matou usugafono e ui lava ina tautuaupega lo matou taunuu mai ae faafetai. E lagona le mafanafana o le oo mai ma vaavaai foi e fesili lava Mulimai ia Muamai i Taulumaga o le Fono Aoao Faitulafono.

O la matou faafetai lena e le matafauloaina so matou leo a ia alofa mai le Atua ma ia manuia Taulumaga o le Fono i leni aso. Ia manuia le Atunuu o Samoa o lo o faafogafoga mai. Ia manuia le tatou Fonotaga ae matou ola i le alofa o le Atua.

O leni itula lau Afioga i le Fofoga Fetalai e faauma atu ai sa matou faamatalaga e faamau ai lo matou lagolagoina o leni Tulafono Tau Faaofi ua opea i luga o le Laulau a Fono. O le a le umi sa matou faamatalaga ae o le aotelega e talia le Tulafono Tau Faaofi e la matou usugafono.

Ona pau lava le mea lea ua ou tilotilo atu i ai ma ua ou lagona ai lou fiafia i le Vaega 7 Fuaiupu 38; Galuega Tauave a le Komiti o le Saogalemu i luga o auala.” E ui lava ina e le oo i ai se talanoaga mautu ae tau lava ina faamau atu, a faapea e taunuu le tofiaina o le Pulega o leni Komiti faafetai ona e lagona le agaga fiafia ona o le saogalemu i luga o alatetele o lo o tulimataia e lou sui usufono.

Lau Afioga i le Fofoga Fetalai, a o le i taitai ona ou oo mai i le Fonotaga leni a Samoa, o matou nei e feoi i Savaii tai faalua, faatolu i le vaiaso. E le gata ia i matou a o le mamalu o le Atunuu i tama ma tina ma fanau o lo o faimalaga pea e le gata i Salafai a o le mamalu o le Atunuu

o lo o alaala i le itu Sisifo. O le mea lea ou te maitauina e feoloolo lo ta fefe i luga o vaa ma vaalele a o lo ta popole i luga o auala ma taavale feoi, e fai sina saosaoa o pasi, loli ma tamai taavale e fai tuuga e le gata i le tutuu mai le uafu i Apia a o le foi atu foi i Apia agai le uafu, e popole lava ma fefe ina ne i te i ua tupu se faalavelave matuia ae faafetai e le iloga ona tulai mai ni faalavelave faapea.

A ou tomanatu i fuainumera o lo o tele lava manua o lo o lipotia mai i le faaitu lava lea i Sisifo, ae ou te lagona ma talitonu o le foia o ia faafitauli o lea ua maea ona saunoa i ai nisi o sui usufono e ala i le fuafuaina o ni polokalame lelei e le gata i avetaavale a o le vaavaaiga o taavale o lo o feoi po o talafeagai mai lea taimi i lea taimi. O le aoaina foi o tagata tietie uila a o tagata savavali aua e fai foi o taavale a o tagata savavali foi i le faigata ona pulea o latou loto. Ou te talitonu faafetai i lenei Tulafono Tau Faaofi ua aumai aua e tele ni auala e mafai ona foia ai nei faafitauli. Sa ou tomanatu i lou i ai i Fiti talu ai nei e manaia foi polokalame a lea atunuu e tauala atu i le Lottery ma mea faapena, e i ai a latou polokalame mo le saogalemu i luga o aualatetele e fai i aoga uma lava e le gata i lena a o alaafalaga taitasi.

E le faapea e fai ai ae na ona tau faamatala atu ona o lea e taua mai i le Tulafono Tau Faaofi e mafai foi ona tapa ni fesoasoani mai nisi Faalapotopotoga Tumaoti aua le taumafaiga o le puipuiga o le saogalemu i luga o aualatetele.

O se manatu lea i lenei itula e faapai atu ai a o tau fofou nisi manatu i nisi Tulafono o lo o faataatia nei. Faafetai mo le avanoa i lau Afioga i le Fofoga Fetalai, faafetai foi le faafogafoga i sui usufono mamalu o le Maota.

Ia manuia lenei aso o le Fonotaga ae ou ola i le alofa o le Atua. Soifua.

Afioga SALA FATA LISATI PINATI



Itumalo Faaalalafaga:

Gagaemauga Nu.1

Filifilia:

13 Aperila 2006

Faatauto:

20 Aperila 2006

Lauga Faataupou:

13 Iuni 2006

Faafetai i lau Afioga i le Fofoga Fetalai mo le avanoa ua tuuina mai e avatu ai se leo o lenei sui usufono mo Gagaemauga Nu.1 e molimoli atu ai ni manatu e tusa ai ma le Tala Faatatau Autu o le Tupe o lenei tausaga.

E muamua ona ou taia le tafaitoa ma ou faapoi i le vaiula ma taia foi le iu launiu ae se i ou faasee foi i muliava ma ou faalanu i vai o le nofoa aua o galu o le tai tutui ua peau ma talaloa. Aua o lele o lo o afio tapuai Lana Afioga Mamalu O le Ao o le Malo, le Susuga i le Tapaau

Faasisina le Susuga i le Malietoa e te afio i lou nofoa vaevelolooa ma lou fala folalooa e faalogo foi ia te oe Samoa. Tulouna le afio o Sui Usufono o le Fono a Sui Tofia i lau Afioga i le Tuiatua faapea lau Afioga i le Tuiaana. Afio foi lau Afioga i le Faamasino Sili ma le nofo a vaega o le Faamasinoga; afio lau Afioga i le Palemia faapea le Sui Palemia, afio le paia o le nofo a Minisita o le Kapeneta; afio lau Afioga i le Fofoga Fetalai o le Maota faapea le Afioga i Sui Fofoga Fetalai; afio sui usufono o le Palemene o Samoa. Tulouna le faafogafoga tapuai i le nofo a Ekalesia Kerisiano o lo o nonomanu aua se manuia o Samoa.

Afio lau Afioga i le Taitai o le Itu Agai, afio sui usufono mamalu Tutoatasi o le Maota o Samoa, afio le mamalu o le Ofisa o le Fono Aoao Faitulafono o le Maota, tulouna Faauluuluga o Matagaluega ma Faalapotopotoga Tumaoti a le Malo. Tulouna le mamalu o le aufaipisinisi ma sui o Malo mai fafo. E faapea foi ona ou ofo alofa atu i le fono mamalu a Tina ma Tamaitai o Samoa atoa ma le malosia o le Atunuu i alo ma fanau o lo o nafa ma galuega tetele aua Samoa aoao.

Tulouna le faafogafoga a le Faigamalo a Tutuila ma Manua, le afio o le Kovana ma le Sui Kovana aemaise lau Afioga i le Peresetene o le Senate, lau Afioga i le Fofoga Fetalai o le Malo ma le mamalu tele i sui usufono. O le paia lava lea ia Sua ma le Vaifanua, Fofu ma Aitulagi, Ituau ma Alataua, Saole ma le Launiu na saelua. O le nofo a Maopu, le paia i le Faleagafulu, le Motusa i le Laau na amotasi, Faatuiolemotu, Tootoo o le Faleula ma le Tama a le Manuatele.

Tulouna Sa ma Faiga o paia le popo ma le pa e le solo i Aiga ma latou Tama, Tama ma o latou Aiga, Aiga o Tupu, Aiga o Papa, o Feoi o le Tafaifa o Salamasina. Tulouna le usoga a Tumua ma Pule, Ituau ma Alataua, Aiga i le Tai ma le Vaa o Fonoti, Tulatoa ma le Aufuelolooa faapea Faleupolu o Tofiga a Malietoa Taulapapa lena e i le siu faitotoa i Lepea Faleata. O ou paia na Samoa mai Saua seia paia le Fafa o Saualii po o le lualoto o alii ma vai e suatoto ma le ana o Malo. Tau ia ina ou ufitia i le ututao aua le Maota e tulutulu i tao ua soo ona taiao aua o Samoa o le Atunuu tofi e le o se Atunuu taliola.

Ae avea ia lenei avanoa e molimoli atu ai sau faafetai i lou Itumalo. Afio lau Afioga Tuala ma lou Falesefulu; afio lau Afioga Sala ma lou Falevalu; susu Aiga o le Maopu o Tuala ma Sala, Fonoti o le Usoalii a le Maopu; afio Aualiiitia ma le toalua o Leusoalii ma e nofo a alo; afio Lauano o le Soomalo faapea Salimu ma Toleafoa; susu Alii Susu aua toe alofa aua Sauia ma Ugapo o le na fuaoa i le Faleupolu. Susu Muliagatele o le ao o le Faleupolu o sa Muliaga, afio Muagututia o le Tama Sa Tuala, alalatai Tevaga ma Vaifale faapea le mamalu ia Salemuliaga. Lou Itumalo e, faafetai i lo outou faaeaea o lea ua ou tu ai i le tofi o le Itumalo i lenei Paeaiga i le 5 tausaga. E momoli atu ai lau faafetai i le Afioga Tuala Tiresa faapea lou uso a

Saunoaga Faataupou a Sui Usufono 1961-2011

Suafa ia Sala Vaimili e tusa ai ma le faalagamaea sa tauva ai i le tofi i lenei lima tausaga ua ou manumalo ai. Malo le tauivi, malo le toa, faafetai i la outou tofa faatupu aua o lele ua ou sao ma ou tu manumalo ai i le tofi o lo tatou Itumalo a ua lagolagosua mai a oulou Afioga.

O le a taumafai atu lou nei sui usufono e molimoli atu nai motugaafa e tusa ai ma le Tala Faatatau o Tupe i lenei 5 tausaga. E muamua ona ou tautala i auala galue. O lenei Itumalo o se Itumalo tele, o lena ua silafia foi e le paia i a outou afioga aemaise le Atunuu aoao le faigata o lo o feagai ma i matou; e fai o Apia nei po o Upolu nei i Leauvaa, ae faapea foi ona faatasi ai ma Patamea, Samalaeulu, ma Mauga i Savaii.

O le faafitauli o lo o tulai mai pea i lenei afioaga, o auala. O lena ua silafia le tele o faamanuiaga ua fuafua e le Malo e auala lea i auala galue o lea ua uma ona faataatia ua faataina, ae paga lea, e moomia e lo matou Itumalo le ta faamolemole. O lea ou te talosaga atu ai i le Minisita o lo o feagai ma lea matafaioi, ua tausaga o taumafai pea lenei Itumalo i se auala e faafaigofie ai ona faatoa le vao. Silasila foi, o le faamuamua a le tatou Atunuu o le vaomatua, o faatoaga ia e tupu mai ai mea uma ma manuia a taeao a le tatou Faigamalo, e ala mai i faaeleelega aua le fofoga taumafa e faapea foi ona i ai le tautua i aiga atoa ma Ekalesia. O faamanuiaga eseese ia o lo o moomia e ala mai lea i le oo o taavale i le loloto o le vaomatua, ae faafaigata i lenei vaitaimi leaga o lo o faigata ona tau saili ni taavale aua e mumusu foi taavale e o pe a faaletonu ala. E avatu ai se fautuaga i lau Afioga i le Minisita, ia tautuana. Ou te talitonu e le o i ai se fuafuaga a le malo i lenei tausaga, ae pe a lea tausaga a sau, ne i mea ane ua galo au ae faamuamua ifo lou Itumalo faamolemole.

Ona oo mai lea o se faamatalga i apitagalu po o le gataifale po o taligalu foi. A silasila le mamalu o sui usufono aemaise le Faigamalo i lau Afioga i le Palemia ma le Kapeneta, ua tausaga ona faaletonu gataifale o lenei nuu o Leauvaa. Atonu e le silafia aua o lo o tele laau ma fale o lo o faapena ona punitia ai la lea faaletonu i la outou silasila, ae moomia se galuega alofa e tau puipui mai ai nai aiga o lo o faapena ona tau lalata i le sami, aua a oo i taimi o matagi malolosi e pei o Ofa ma Valelia, o le faafitauli na tulai mai, na tuua aiga ae sosola ese i nofoaga maualuluga. E faaleleia la le gataifale o lo matou nuu nei i Leauvaa. E le aafia ai Savaii aua o Savaii ia o la e nonofo i le vaomatua se i tulou.

O paipa; o lo o i ai le isi vaega o i matou nei i uta i Laumasa. O i sa faaaoga i aso ia a o ave le pusafai i fafo i taimi foi a o ave e Aiono ma Atoa le tele o Samoa i le talo ma le fai sa auina atu i fafo. O le auala lea o lo o faaaoga pea e nisi o le afioaga nei, paga lea e le o oo i ai se suavai. O le tele o le matou nuu ua faapena ona faaleleia le vaipaipa, ae o lo o i ai pea nisi e oo mai i le taimi nei o lo o tau amo le latou vai e saili mai i tuaoi aua le fofoga taumafa. Ia tautuana ma lau Afioga, faamolemole lau

Afioga i le Minisita o le Suavai o lo o feagai ma lea vaega se i silasila ifo i ai ae fai vave se galuega alofa i lea vaega o si o matou nuu, e toatele naua.

Ona oo mai lea i moli, ua taua e le Chief Executive Officer lea o le Faalapotopotoga o le Malosiaga Faa-Eletise, e moomia tusi talosaga ona faapea lea ona faaleleia moli i tafaala. Faafetai, e le i manino i ai matou nei i ia vaega ae ou te talitonu o le a faapea foi ona silasila totoa i ai le EPC aemaise le Susuga lea ia Walter aua o le mea moni lava, o le faafitauli ma le toatuga lea o lo o feagai ma le tele o afioaga aemaise lava nuu a uta, o le tele o tupulaga i nei aso e vaogata. E mafua mai lea i le tele o le home brew lea e fai po o le pulu atoa ai ma laau faasaina po o le marijuana lea e faigata ai a tatou alo ma fanau, e vaogata i taimi o le po. E moomia lava moli ia faafaigofie ai le feoai o e le maua ni o latou ala i taavale, ia e alofa ai. Masalo o le vaega e sili ona moomia le itu lea o le itupa o tamaitai. Aua foi a oo i le po, e le mafai ona feoai tina ma tamaitai se i vagana le itupa o tane, le itupa lea o tatou alii. O lea ou te talosaga atu ai ma le agaga vaivai, o le nuu nei masalo pe va i le 10 pou faatoa maua se moli. A ou oo atu i le taavale sa i ai i le tele o taimi sa ou tafao atu i tua, o lo o i ai afioga e toetiiti lava pou moli ma le moli, ae leai ni tagata. Faamolemole lau afioaga e silasila totoa ifo i lea vaega e moomia lau fesoasoia i tulaga ia.

O le tofi; ou te fia tautala i vaega ia e pei ona aumai e le Afioga i le sui usufono mo Vaisigano Nu.1, ona e talu ai o le Itumalo o se Itumalo tele. E faitau fiaselau le aofai o tagata; atonu ua ausia le 5,000 po o le 6,000 o tagata. O lenei vaega ou te tautala i ai ma lou faaloalo lava, e moomia e lo matou nuu le vaelua o tofi, ia maua se tofi mo Savaii ae faapea foi Upolu, aua a silasila i ai i Paeaiiga nei e masalo ua 6 Paeaiiga, a palota Savaii ma Upolu, e manumalo lava Upolu, ona o lenei le itu. Pei a o le tele o taimi a fai faigapalota, e aumai lava le faamuamua i Upolu. Aisea? Ia atonu leaga e faigata leaga o le matou nuu o lo o i ai le mau lea po o se mea e tapu. A afio se suafa i le tofi, e le mafai ona i ai se tulafale e tauva ma alii. Atonu o le faafaigata lea e tusa ai ma fuafuaga fai aua la faigapalota, o le faigata lea ona maua e Savaii se faamanuiaga e ala lea i le tofi aua a tuu ifo i upufai a le matou lava nuu, o lona uiga e oo mai lava le faavavau o Upolu lava e manumalo. O le upu tautino lea. Ae ua oo mai i lou taimi, ona ou manatu alofa lea i nai ou tagata la e i Savaii. E tausaga o faapea ona matou faatasi ma matou mafuta ua lava foi le mafutaga ma le matou masaniga ma i latou. Ua ae ai se manatu, pe le o le taimi ea lea e tau saili ai se avanoa, ave ai se tofi mo i latou o lo o faamuli mai i Savaii, i si ou nuu o Patamea, Samalaeulu ma Mauga.

Faafetai i le Afioga i le Palemia. Faafetai i le avanoa ua tuuina mai. Faafetai i le avanoa ua tuuina mai e lau Afioga i le Fofoga Fetalai. Masalo o le a faauma se upu a lou nei sui usufono. O le manu faaifo mai lagi le igoaipu a le tamaloa Salevalasi.

Ia manuia ma ia soifua lenei Palemene.

Tofa SOLAMALEMALO KENETI SIO



Itumalo Faaalalafaga:

Sagaga le Usoga

Filifilia:

13 Aperila 2006

Faatauto:

20 Aperila 2006

Lauga Faataupou:

14 Iuni 2006

Faafetai tele i lau Afioga i le Fofoga Fetalai mo le avanoa faaauuro ua tuuina mai. Ou te talitonu o le a ou faaaogaina tatau ni nai minute e fai ai se sao o Manuvao aua le Tala Faatatau o le Tupe ua folasia nei. Ou te maitau atu, e foliga mai o au ua mulia i ai sui usufono fou o le Maota. Ai ona o au o le Tama o le aualii ia na muamua, o le ala lea. I lau faaloglogo mai lava i le aso ananafi se ia paia lenei taeao, e le i toe i ai lava se vaipanoa o Samoa e le i oooo i ai saunoaga ma fetalaiaga. Afai tou fesili po o le a le mea ua ou fai atu ai o au o le Tama, ona fesili lea ia Leulumoega ma Lufilufi. O Tulimataala na maape ai tofiga o Samoa. O le ala lea ou te le toe taina ai i tua le tili pe ou te toe lotoia le lauti fatulalo i ou paia ma ou sa Samoa, aua e le mafai e se poto ona faapoopo pe toese le atoa lio o le masina i ou mamalu, aua o lea ua uma ona tosi lauti ma mamalu faatiti.

Ae ou te le i sasauina la le ofeloa aua o lele ua ala le mafuaalii, pe ou te toe lalafo foi foe o le savili aua o lele ua taoto le aupeau. E muamua lava ona ou faatulou i le paia o le Maota nei, i le afio o lau Afioga i le Fofoga Fetalai, le afio o lau Afioga i le Palemia ma le mamalu i le Kapeneta, tainane le afio o sui usufono o le Palemene nei faapea le Tamaitai o le Maota, aemaise le loaloa o le paia i le Faauluuluga o Matagaluga ma Faalapotopotoga Tumaoti a le Malo – tulou, tulouna lava. O le a faagafua ia le nofoaga ae magalo le leo ae se i ou liliu ane e faigata le tapuaiga a si ou Itumalo.

Ia, Sagaga le Falefa e, tulouna ia le afio i le paia i Aiga e Tolu. Tulouna oe Luatua o le Aitutagata ma lou Gautaala faapea le mamalu i le Faletolu; tainane foi le tapuaiga ia Faleula aua le afio o Toetaufanua ma alo o le Malietoa, le afio o Tapunuu, afio Maopu o le Tuiiana, le tagata fou, lau Fetalaiaga Laupa ma le mamalu i le Faletolu. Ou te faatalofa atu i lenei taeao. E sau se taimi ona ou oo atu lea i lo ta Itumalo e faigata lau faaaloalo lele ua ou saa ai nei i maa o malie.

O aso faapenei e fai ai tala a toeaia mai tuavasa; a sasi taga a le tautai ua sa le faiva; ae a le tuavao? Fai mai toeaia; a ilo le taga a le alii seu ua ae fua le seuga. O le ala lea o le a faapuupu ai se lagona o Sagaga le Falefa,

aua e lelei lava le puupu ae tutu'a, ae leaga le tuiumi ae faaausē.

E fia faamauina le faafetai tele a lenei Itumalo e ala atu i le Nofoa i lau Afioga i le Minisita o Tupe ma lou auvaa aua le tapenaina maeaea o le Tala Faatatau o le Tupe, e pei ona taatia nei. E manatu le Itumalo nei e le o se galuega faigofie a ua tapena faafafine toaga, faamalo le fai o le faiva. E talitonu le manatu o lenei Itumalo e matua lagolagoina le Tala Faatatau o le Tupe e pei ona faataatia nei.

Ou te manatu e tele naua ni manaoga o lenei Itumalo pe a fua i ai i le 5 tausaga ua mavae o Sagaga le Falefa. I le maitau a lou nei sui usufono, e le i taitai ona faatusalia galuega ua maea i le lima tausaga talu ai a isi Itumalo pe a faatusatusa i pasene o galuega fai i totonu o Sagaga le Falefa. E le na ma le laina ae ou te talitonu ua silafia lelei e le Maota nei le tulaga e pei ona i ai lena Paeaiaga ua mavae atu. E ui o lea, ia i ai ni nai motugaafa, e le tagisa foi Sagaga le Falefa, ua masani i le faaoololomaau e faatalitali po o le a se manuia o le a maua. O le a faapito augafa le leo ae se i ou agai aua ni nai mea o lo o manaomia, e le tele tele.

Lau Afioga i le Minisita o Faatoaga, o lea ou te talitonu o lea ua e tu i le foe, o oe o lau uo. O le Itumalo lenei o Sagaga le Falefa e ese foi ona eleele mai le tele o eleele o le tatou Malo nei o Samoa, e le ola lelei ai ni meatoto e tai pe i o le talo, o le matai ai a le Atunuu. O lau maitau, e pei e foliga mai o Sagaga le Falefa e matele i le fualaa aina ma le pinati, ia pau lava o le tofi mai le Atua. E ui o lea, e le o lelei ona faaaogaina e le lautele o tagata lona laueleele ona e le lava meafaigaluega. O le ala lea o le talosaga e tuu atu i ou autafa lau Afioga i le Minisita e ala atu i le Nofoa, i sou finagalo ae toe tagatagai ane. E a pe a tatou autai i le taimi lenei i le aumai o ni a tatou masini foi nei, e pei o palau ma suotosina, ina ia mafai ai ona galueaiina fanua faapenei e i ai lou Itumalo. Aua a toto nei le pinati lua masina se'i, toe toto i le isi 2 masina, e uma le 6 masina ua tatau ona fuli le eleele, a o le mea mautinoa e le mafai e o tatou aao, se i tulou le Maota nei, ona fuli le eleele. O le a le mea e le tofi ai Itumalo ma palau taitolu, ona tautai lava lea e le Itumalo ma vaai faalelei – faaoga i ai tofi pulenuu ina ia mautinoa e umi sona faaaogaina, ae o le mea moni o le a matua tele le aoga mo e lē o mafai ona lava le tamaoiaiga.

Ona ou oo mai ai lea i faigafaiva lau Afioga i le Minisita e tau ala atu i le Nofoa, o gatai o Sagaga le Falefa e amata mai Tufulele seia paia Faleula, e lotolotoi ai i totonu Leauvaa ma Sagaga le Usoga, o le tasi lea tamaoiaiga e le o matua lelei – o le upu faaperetania o le utilize- e le o lelei ona faatinoina ina ia matua mautinoa le aoga i tagata lautele. I Asia, e tele ina latou faia le faiva po o le faatoaga o le i'a – fish farming – ma ua mautinoa o se alagatupe tele e maua ai. O le a le mea e le faataitai ai lau Afioga i le Minisita lea tulaga i Samoa nei? O le tasi lea

atinae ou te matua mautinoa e tele sona aoga i le tamaoaiaga o Samoa, ma ou te ofo atu pe a faapea e malie i ai lau Afioga ou te amataina i lalo o lau fesoasoani.

Ona faasolo mai ai lea o manaoga o lou Itumalo i le Matagaluega o Galuega, Fealuaiga ma Atinae Eseeese. Lau Afioga i le Minisita ou te maitau atu e te le auai mai ae ui o lea, e faafetai tele i le Afioga i le Minisita i le 5 tausaga talu ai. E ui lava ina le faatinoina ae ou te talitonu o ana fuafuaga lea ua faapena ona faaauauina e le Minisita mo Galuega, Felauaiga ma Atinae Eseeese o lo o tulai mai nei. Faafetai tele atu o le la ua amatalia vai ma le suavai o lou Itumalo, o le tasi lea faafitauli aupito sili ona ogaoga i Saleimoa masalo o Aopo lea i Upolu, ua matua leaga faia lava le tulaga o le suavai ae faafetai o lea ua e topule ma agai atu le faamanuiaga aua lou Itumalo. O le ala lea o lou faalogologo atu i sui usufono uma ia na lauga o la e faatauanau a o au, o la ua fai, faafetai tele i lau Afioga i le Minisita.

O moli auala; e lelei feoloolo ae talosaga atu e manaomia le faaleleia tele lau Afioga i le Minisita.

O auala galue; e matua le lelei, e matua le lelei lava, o le upu moni. Ia, ou te le tio atu leaga e le i faatauanau le Itumalo nei a o le agaga moni e faaoololomaau, ia alofagia auala galue o lou Itumalo.

O taligalu lau Afioga i le Minisita – mai lava i Tufulele seia paia Levi – ua manaomia le fesoasoani ona ua tauau ina ati ati e le sami ona iu lea ina leai se eleele. Lau Afioga i le Minisita, ia alofagia taligalu o si ou Itumalo. E leai ni manaoga tele i Faleula ona o le tasi lenei nuu e le tagisa; e tiga lava ona tele mea e tataua ona faaleleia ae faaoololomaau lava toeaiina. Pau lava o lenei, o le auala lea i Fogaa o le auala e faaogaina tele e le Malo, ae a outou silasila i ai i le taimi lenei o le tasi lea o auala ua matua faaleagaina lava. Ae ou te manatu ona o lea ua lalata mai taimi o Taaloga a le Vasa Pasefika, o le ala lea o le talosagaina ia alofagia e lau Afioga i le Minisita ua matua manomia le faaleleia o lea auala aua ona pau lea o le access e oo i tua i Tuanaimato e agai uma atu i ai le Faleaana, Aiga ile Tai ma le itu i sisifo o le motu, e oso atu i Fogaa. Ona pau foi lea o le auala e omai ai ma uia e E o lo o nofoia le eleele i uta i Vaitele e agai i le malae vaalele pe agai atu ai foi i Salafai. O lona uiga o se faamatalaga vave – urgent – ina ia mautinoa ai le aoga ma le faaogaina lelei. Lau Afioga i le Minisita ou te talitonu o lena ua uma ona e polokalameina ae i ai le manatu o le a ave i ai lau faamuamua ona ua manaomia tele le faaleleia o lea tulaga.

Ona agai mai lea i le Matagaluega o Aoga, Taaloga ma Aganuu, o i ina tonu a lea e ma te vaavaalua ai ma le Afioga i le Minisita. Masalo o le a ou tuualalo atu ni mea o manaomia e si ou Itumalo e le tele naua. O le faafitauli o lo o tulai mai o le lē lava o faiaoga. O le aoga i Faleula e tele ina fono ma fai fonotaga a Pule Aoga. A alu la le Pule i lana fonotaga i le Aso Faraile, ia ona uma ai lava lea o le

ola o lena vasega o lo o ave e le Pule Aoga. Ae ou te talitonu o lo o faapena ona faasoasoina e le Matagaluega ina ia tofufufusia ae talosagaina ni nai faiaoga e faaatoatoa lelei ai galuega a le Itumalo.

E faasolo mai se faamatalaga ona fautuaina lea o le Afioga i le Minisita mo Leoleo, Falepuipui ma Tinei Mu. Ua i ai se manatu o lenei Itumalo talu ai o Tafaigata e i totonu o lenei Itumalo i ona nuu o Faiga Palota. O lau maitau, ua foliga mai ua le talafeagai le mea o lo o i ai nei le tatou falepuipui pe a fua i ai i le toatele o tagata ua nofoia eleele tau lalata ane. O le upu moni lava ua le asa se aso ma se gaio tulou le Maota nei i gauta o Vaiteleuta, faasolo mai ai i Nu, Lafi, sau ai i Vaipoto taunuu mai i Ae le ma Faleulauta. O lea ua mautinoa o pagota i taimi o lo o fai ai a latou galuega o lo o maua ai le taimi e osofai ai nai aiga tau lalata ane. Ou te talitonu ua le o toe saogalemu le mea o lo o i ai nei le tatou falepuipui. Ae a pe a tefa le tauala ae se i silasila ane lau Afioga ile Minisita pe i ai se mauga mamao po o se mea e matua le oo i ai se tagata ola, ave e fau ai se tatou falepuipui; e lelei lena le mamao e savali savali mai ai lava ona le au mai lea i le mea o lo o alaala ai tagata soifua ma tagata ola. O le tala atu, ua le sefe tuamaota ona o lea tulaga. Lau Afioga i le Fofoga Fetalai, ia o nai motugaafa ia. E pei ona ou fai atu, o Sagaga le Falefa e le tagisa.

Lau Afioga i le Minisita o le Faalapotopotoga o Eleele a Samoa, tasi lea mea o lo o fia faamauina e le Itumalo nei. A fua i ai i le Faiga Palota ua maea ua matua numi faasoloatoa le uto ma le maene; e fai o le lau a le sui usufono mo Faleata Sisifo, a o le lau a se tasi o sui usufono mo le Au Palota Taitoatasi, Hon Lee Hang Niko, a o tuamaota o Faleula. E ui o lea, o le tagata ma lana aiatatau. O le mea ua tupu e lau atu lava Vaitelefou pasi Saina, pasi Toamua ae oo atu i le tuamaota o Faleula, ia numi ai loa i ina ma le lipine. E talosagaina lau Afioga i le Minisita se i toe tagatagai ane po o talafeagai le faaigoaina o lea ogaeelele o Vaitelefou i gauta tonu o Faleula.

Faafetai i lau Afioga i le Fofoga Fetalai. O lo o i ai tulatoa o le nuu nei e mafai ona latou maitaua igoa o ia eleele, o Faleula, Ae le, Vaipoto, Nu, Lafi, Tafaigata, Falelauniu, tau loa i uta i Aleisa, ia ae ua faalava ai i totonu ma Vaitelefou. O le ala lea o le toe fagufagu atu i lau Afioga i le Minisita se i toe tagatagai ane po ua talafeagai lea tulaga.

O nai taaloga e pei ona folasia e se tasi o sui usufono, ia e faaluaaina le manatu. Tasi lea o alamanuia o si o tatou Atunuu pe a fua i ai i le tele o tama taaalo ua mafai ona o atu i fafo ma taaalo ai ma lafo mai tupe i Samoa. A tatou faia lelei le atinae lea, e tasi le tama taaalo o le aiga ua lava ma totee; ua matua lava lelei lena e lafo mai ai tupe e ola ai si ona aiga i Samoa nei. O lona uiga, o grass roots e le o lelei, o a tatou malae taalo e le o lelei ona faatinoina. Ou te maitauina le nuu lenei o Afega o le Itumalo i Sagaga le Usoga, pe tolu ea pe fa tama taaalo o la e taaalo i le Sevens

i le taimi lenei ae omai mai Afega. Ae a e silasila i le malae o Afega o lo o taaalo ai, e tu ai le tulaga fale, o le isi pito le ulu, o le isi itu o le ogapaipa, ia o le a faapefea ona lelei le taaalo a alo ma fanau? O le ala lea e toe valualusia ai aa o le fau se i silasila ane i ia tulaga i le faaleleia o tatou malae taalo.

Ia ona ou toe pai mai lava lea lau Afioga i le Fofoga Fetalai aua le tapuaiga a si ou Itumalo, faafetai tele Sagaga le Falefa. O lea ua ou tulai atu e fai ai au ma sui o le tatou Itumalo, faafetai i la outou tapuaiga. O le upu moni, I am the people's choice. E ui o lea e i ai le ao lea e pei e faalavelave mai ia te au, ia ae ou te talitonu e le o se isi o si ou tama na ia faafailele ia te au. O le mea lea, Patea a o e faafofoga mai, tuu maia si ou atalii e alu. O le ta Itumalo e na ona feuai a o tama a o le auso. O lena e te silafia o Sagaga le Falefa e toatolu matou ae tasi outou. E ui o lea ou te le faatauana le tofa o oe o le tamalii, alofa mai, tuu maia si ou atalii e alu. O le upu a le Tusi, "E tagi atu ea i se areto e te avea i ai se maa i si ou atalii?" Lau Afioga i le Fofoga Fetalai, ia o nai motugaafa na a Sagaga le Falefa. A fapea tou te le toe vaai ia te au, ia o lona uiga o lo o faauliulito lava le finagalo o si ou Tama. Ia manuia tele lau Afioga i le Fofoga Fetalai aemaise o lau Afioga i le Palemia faapea le Taitai o le Itu Agai aemaise o le mamalu o le Palemene o lo o sasao nei.

Ia manuia le Fono.

Tofa TAPUAI SEPULONA MOANANU



Itumalo Faaalalafaga:

Salega

Filifilia:

13 Aperila 2006

Faatauto:

20 Aperila 2006

Lauga Faataupou:

14 Iuni 2006

Faafetai atu i lau Afioga i le Fofoga Fetalai ona o le avanoa

ua maua e le sui usufono o lenei Itumalo se i molimoli se manatu aua lava le Tala Faatatau o Tupe o lo o taatia nei i lumamea. Ona o lea ua faagasolo lava foi lauga faataupou a sui usufono fou ia ou te vaai atu ua tele lava ina maea le tele o sui usufono fou.

O lenei taeao ou te manatu o lele ua taatia le ata o Taulelei, e pei ona mitiia e le Tamaitai o le Alataua. Ua atoa foi tupe o le taulafoga a tamaalii, ae ou te muai faatulou foi leaga o le fanua ma lona tapu a fanua. O lele ua paia Tiafau o le Malae o le Faautugatagi a Pule ma Tumua, o le Malae ua aofia ai le Fono i lau Afioga i le Fofoga Fetalai aemaise sui usufono mamalu o le Palemene, o lupe sa faia mai i le fuifui aua Samoa ma ana upufai. O lenei la taeao ua paia ma ua mamalu aua e paia lava le Atua e ou le taeao ma le aso, o Le sa tu i matagiolo,

o Le sa taitai folau i lo outou soifua ma lo tatou ola o lea ua tatou fesilafai ai i le lagi e mama ma le soifua laulelei i lenei taeao fou. O lea ua uma ona molia laau i Fogaa aua la tatou faapolo ma le faamua aua le Atua i lenei taeao, e faapena foi se lagoan o le Tootoo mo Salega. Ua lupepe nei la le taumanuula e pei o le upu i le Malietoa, ua tini pao le uto ma ua tu le faila aua le faamoemoe o le Maota i le faagasologa o ana Fonotaga. Ua toalii foi le igafo ma sao i alo le vaa o Sagalala, o le toa i le ava saa. Ua tuanai foi le asuasuvale, lele ua tatou feiloai i le maninoa i ao totoa ae le o ao gasolosolo ma ao lelea. Ia viia le Atua i lenei taeao.

Ua maitauina lava ua tapena faa-fafine toaga i le tele o Tootoo paia ma sa ma faigata o le Atunuu leaga o le fue e lavelave. Ae manatu lou sui usufono, mapu ia i lagituli vasa, le Tagalao ta fia malolo ae tate fefe foi i peau lalo, leaga o le lauga faataupou a Salega. Tulou le faafofoga mai o le Atunuu, o paia mai le Matasaua seia paia Siufanua o le Alataua, le paia o Aiga ma o latou Tama, Tama ma Aiga, le Usoga a Pule ma Tumua, Ituaa ma Alataua, Aiga i le Tai ma le Vaa o Fonoti.

O lele e faafofoga tapuai Sua ma le Vaifanua, Fofu ma Aitulagi, Ituaa ma Alataua, Saole ma Saleaamua ma le Launiu na Saelua. Tulou le Motusa aua le Laau na Amotasi, afifio Faatui, Tama o le Manuatele ma Tootoo o le fale, fai mai e tau aitu tau tagata. O paia faataotooto na o lou Atunuu Samoa.

Tulou foi le paia o le Malo, le Afio o Lana Afioga Mamalu O le Ao o le Malo, afifio Sui Usufono o le Fono a Sui Tofia ma a latou Masiofo.

Ia avea foi lenei taimi e fia molimoli atu ai le faamaisega ona ua le nofoia le nofoa o Tavita e se tasi o Sui Usufono o le Fono a Sui Tofia, ina ua tuua le malo e le Afioga i le Tupufia. Ia tatou tatalo faatasi i le Atua ia maua se nofoaga o lo o tatou Tama i le ola e faavavau.

O le paia o le Malo i le afio o lau Afioga i le Palemia, lau Afioga i le Fofoga Fetalai ma le Kapeneta ma sui usufono mamalu o le Fono, ae tainane le paia o Matagaluega taitasi a le Malo.

Tulou Feoi o le Talalelei o lo o nonomanu i le Atua aua se manuia o Samoa. Taitai o Lotu Kerisiano uma i totonu o le Atunuu faafetai, malo le tatalo, malo i lau tou tapuaiga. Ou te talitonu o lau tou galuega, lea ua outou tu i le va o tagata ma le Atua aua se manuia o Samoa.

Ia tulou faletua ma taus, saoa ma tamitai, tainane foi o aumaga. Ioe, o i latou ia na mafuli i ai le tatou Faiga Palota e ao ona ou pai i ai. E faatalofa atu i lenei taeao ia se i oo i a tatou fanau.

O lenei taeao ma le tulai atu, ou te fia pai foi i lou Itumalo, Malae e fia ma Iiili ma Tapapa, seia paia Fetoloai ma Vaimoliai, ou te faatalofa atu i lenei taeao. O paia o le afifio o Tupu o le Itumalo, paia o Aiga, tainane faleupolu o tofiga o lo o i ai Sa Leutogi Poe ma le paia o le Alataua, malo tapuai, malo i la outou tatalo. Faafetai i la

Saunoaga Faataupou a Sui Usufono 1961-2011

outou faaeaea, o lea ua mafua ai ona maua se leo o le Aiga Samoeleoi e fai ma outou sui i le faalagamaea a le Malo. Faafetai i Auauna a le Atua, o e sa tapuaia ma tatalo i le faamoemoe o le Faiga Palota, ia faamanuia le Atua i a outou galeuga. Faafetai foi Komiti a tina, Peresitene, o faletua ma tausī, saoa ma tamaitai, o aualuma, tainane le malosī o le Itumalo i aumaga – faafetai i la outou lagolago, faafetai i lau tou faaeaea, ia faamanuia le Atua.

E le faagaloina le Tama sa tu i le foe o lenei Itumalo i tausaga e tele, lou uso a suafa ia Leilua Manua – faafetai i lou faatoatoa i le tele o tausaga, sa e tu i le foe o le Itumalo. Malo le fai o le faiva, malo galue. Ia aumaia lau lagolago i lou uso a sui usufono o lo o tulai nei, aua se ai o lo ta Itumalo. Ou te tatalo atu, a i ai se mea e te silasila e le tau lelei i lau vaai, fautua mai. O le ta galuega e tauamo aua se ai o lo ta Itumalo, o le mea taua lea.

Faafetai foi i nai ou aiga. Ioe, e moni lava inei mea o Faiga Palota ae pei o le 99% lava e palota ai le tagata ia oe ona e te aiga i ai. Faafetai ona o lo outou lagolago i so o se mea, aemaise o nai au uo ma e masani ia sa matou faifaimea faatasi e tusa ai ma le faamoemoe.

E fia faafetaia foi le Malo ma Minisita o le Kapeneta o e sa sulu mai i ai i taimi o le taumafai e atiae le Itumalo ia ma tali atu i manaoga. Sa faaupu sese ma faauiga sese e nisi o tagata fai mai ua fai e le Malo lau campaign, ae ou te talitonu e tatau ona faafetai mai ia te au ona ua ola lou mafaufau, se i tulou, e talosagaina ni mea aua le manuia o tagata, aua o au o le mea moni, e tele ina ou tuatuaia i feau ma galuega i Tumua nei, ia a o lo o aoga lelei atinae na talosaga mo i latou o alaala ma papaaao i le Itumalo. O le mea lea, faafetai i le Malo ona o tulaga ia i le talia o talosaga. O nisi foi o taimi sa omai ma le paia o afioaga, ia o lea ua tali atu le Malo. O le mea moni, e le i fausia Roma i se aso se tasi; o lo o i ai pea talosaga e le i faaunuuna, ae o lo o taatia atu i ina, o i ina le pote ma le uta a le faimea e faasoasoa ma posiposi lelei ma faasafua le faasoa aua le manuia o o tatou tagata. E pau lava lea i lau maitau; o Salega ua fai si leva ona pei e lafoaia e le Malo i le tele o tausaga. O le mea foi lea a ou vaai i le anavatau – ia tutusa Apia i Tumua nei ma Savaii – e feoloolo lava nai mea ia o le a ou auauai atu, ae peitai ane, ia o lea ua ou matamata i le Tala Faatatau o le Tupe i lenei tausaga.

Lou Itumalo, o lau faauigana o le Tala o le Tupe e taunuu ai le upu a le Niu Sila ma lona aiga. Ona alu lea o le isi ona afafine ma lana lipoti; o le manaia ia o lana lipoti na alu atu ma ia. Alu atu loa faitau le toeaina, vaai atu le toeaina – outstanding, outstanding, outstanding – ia faliu atu loa ma le toeaina sasa loa ma lona afafine. Ia, ua sasa sasa lona alo, fai atu i ai le Tina; o le a le mea ua sasa ai le teine? Ia, se i vaai – na o le tutu i fafo, tutu i fafo, tutu i fafo. Ia, o leuiga lea o le tatou Budget i lau vaai; ou te faauigaina, e outstanding.

O le mea muamua, e tele le aoga mo le atinae o le Malo. O lea foi na lauga le Minisita o Tupe, e paleni le Tala o le Tupe; ia, e sao, pau lea o se Tala o le Tupe ua paleni. Ae a ou vaai mai i Savaii – e tutu i fafo Savaii, tutu i fafo, tutu i fafo – aua o atinae uma nei ua faamuamua, o Upolu lava. E \$37miliona mo le atinae o Upolu, lea ua fai i Upolu; \$15miliona mo Faletupe o Atinae, lea ua fai i Upolu, o lona uiga e tutu lava i Savaii tutu i fafo. Ae ui o lea, lou Itumalo o lea ua outou faafofoga mai, o le atinae a lo tatou Malo, o le mea tatou te mitamita faatasi ai. So o se mea lava e te alu i ai i nuu i fafo, e tasi lava le tau o oe; e le taua o se Savaii po o se Upolu – e taua oe o oe o le Samoa. O oe o le Samoa, tatou ositaulaga i lenei tausaga 2006/2007. Salega, o le tausaga fou o lea o le a avatu le isi vaega e fai ai a tatou malae taalo, o lea o le a avatu le isi vaega e fai ai a tatou auala galue, a o le tausaga nei, ia o lea o le a tatou alo e atinae le tatou taulaga aua latou e fai mai aua Taaloga o le Vasa Pasefika. O lea ua fai mai pe 5,000 le au taaalo lava ia, ae le iloa pe 20,000 le au tapuai o le a omai i le tatou Atunuu. O le mea lea ou te faafetai ai i le Malo, ia omai ua manaia ma matagofie ou laufanua Samoa, tatou te mitamita faatasi ai. Ou te fautuaina foi lou Itumalo, a omai i Tumua nei o lo o i ai isi mataaga matagofie ia ua fausia i Faleata, aua o le tele lava o isi e le o maua se avanoa e oso i ai i tua i i Faleata, se i maimoa i le manaia o le atinae o faia nei.

O le mea lea o la faauigaina o le Tala Faatatau o le Tupe; O se Tala Faatatau o le Tupe tatou te matamata i ai ia ma iloa o atinae ia, o lea ua ave i ai le faamuamua i lenei tausaga. E le iloa po o le tausaga o muamua, o le a faapea ona faasafua atu foi le manuia mo i matou i Savaii, aua o lea foi e tu le taulaga i Savaii, ia o se taimi ona amataina lea.

Ona ou oo mai lea i nai manaoga o si ou Itumalo, e le tele tele. O lea ua uma ona lagalaga foi e isi sui usufono tulaga o le eletise, ia e faapena se manatu o Salega. O lou talitonuga, o le atinae o le eletise o se mea e tatau ona ave i ai le faamuamua; o isi mea la e ua fai, e le tatau ona faia sa tatau ona faamuamua le eletise; ae ui o lea ia o polokalame faataatitia a le Malo. Ou te manatu e i ai le financial plan e mafai ona toe recover le tupe e faaalu i se power station, se i tulou, po o se nofoaga; e i ai le financial plan e toe recover i se isi sefulu tausaga, aua e totogi mai pili. E le pei o le auala galue aua a uma loa ona fola, ia o le tupe lava lena e lē toe maua. A o mea ia, a faaalu le tupe lea i le eletise, o se taimi i le lumanai e toe uma lava ona toe totogi mai tupe a le Malo e faaalu ai i lea faamoemoe.

Ou te faafetai i le faaleleia o le matou vaitaumafa, o se toatuga tele lea i si ou Itumalo i le tele o tausaga, ae faafetai tele ona ua tali le manaio lea. O lea ua oo mai i le taimi lenei, e 24 itula lea ua ola ai nei le paipa mo le vaitaumafa o Salega ae o le mea sa i ai, e na o le tasi le itula i le taeao ae lua i le afiafi. A o le taimi nei, ia faafeai i le Malo; ia viia le Atua i la outou galuega. O le aoga foi

o le vaitaumafa lea, lea ua faasafua e oo mai i Satuiatua. Ou te le taofia la leaga o atinae lelei e manuia ai tagata, leaga sa taofi e isi nuu ia i lalo mai a latou vai, ae ou te manao e faasafua mai le manuia lea aua isi tagata, aemaise le tautuaina o le falemai o le Itumalo. O le tasi lea mea taua ua ou manatu ai, ia se i oo mai le vai. Pau lava o lea, ua ou vaavaai foi lea ua te i ua fou le mita atu o le vai a matou i Salega; se i tuutuu atu pea ia aua o lea o le a recover mai e isi nuu ia i lalo o Satuiatua, Foyaluga, Foyalalo le tupe; ae a pe a faamalolo Salega i lea vaega? Ia na o se manatu e tuu atu.

O lo o i ai se galuea lelei sa faia aua le atinae o tupulaga, sa faia le matou malae taalo, ia faafetai tele. A o faafogafoga mai le Itumalo, ia ua i ai foi se manatu o le sui usufono, ia o le a faia se tatou Iuni Lakapi i se taimi lata mai aua foi le sailiga o nisi o sui mo le tatou Au Lakapi, aemaise foi o le atiaeina o tatou taimi. Aua e i ai isi taimi e pei ona taua e le isi sui usufono e nofo nofo lava leai se mea e fai, fai se solitulafono, ae a i ai nai mea ia e atinae ai ma faaleleia ai foi le atinae o tupulaga, ia o le a faapena ona alo atu i ai i se taimi o muamua. E tele foi tama Sagone ia o la e taaalo i le Olopeleki; e i ai foi le Kapeteni o le Olopeleki, le tama sa kapetenia le Olopeleki, ia e tau atu foi i Sagone. O le mea lea, e tele foi isi tama lelei e i ai, e faapena ona atinae ai le tulaga o taaloga.

O tulaga o telefoni; se i tagai ifo lau Afioga ua tele tele ona ou vili atu i Savaii, se i tulou, ia ae talanoa mai le mea foi lea talatalanoa mai. Na ita ai le isi fafine na vili i Niu Sila ae fai mai, “The number you call is...” Fai mai, “E leai e leai e le... ua na o le talanoa i masini le mea lea e fai i le tele o taimi.” Se i tagai ifo lau Afioga se i faaleleia le tulaga i le matou telefoni, pe fai foi se pou i o e faamanino tele ai le tulaga o fesootaiga faamolemole.

Ona ou oo mai lea i le Faigafaiva; faamolemole lau Afioga i le Minisita, pe mafai ona fai se pole fagota i gatai o matou, ona o lo matou gataifale, e manomia tele ai se tulaga lea, ina ia faatosina atu i ai pe faalalata atu i ai ia ia, faafaigofie fagotaga a le paia o el aufaifaiva o lo matou Itumalo.

O le tulaga o Faatoaga, o le matua lelei, o le eleele o Salega i so o se ituaiga faatoaga. Pau le mea lea ua ou vaai i ai, ua le lelei le lagaina ma le atiaeina, ae ou te talitonu lava o le maketi. O lea ua alu lava i le subsistence farming ua le o toe commercial ona o le tulaga lea ua ova le tele o talo ae ua vaai foi latou i le tulaga o le tupe maua. Ia se i toe silasila ifo i tatou ua vaai foi latou i le tulaga o le tupe maua. Ia se i toe silasila ifo i tatou maketi. O lo matou eleele foi e lelei e tele le ava, po o le a le tulaga ua oo i ai la taotu ava; se i toe silasila ifo i la tatou ava, ona e pe i lava o lea ua faamaonia mai fafo e sese tuuaiga ia sa faia i le ava, ae se i toe silasila ifo lau Afiogai le Minisita, pe le toe maua se maketi aua lea tulaga.

E talosaga atu lau Afioga i le Minisita mo Galuega, Felauaiga ma Atinae Eeseese, e i ai lava si auala lea e tasi

na saunoa i ai le Tama o le Atunuu ile aso na tatala ai le Vai i Fogasavaai e faatino loa. A ua lava sia atinae mo lenei tausaga faaletupe, aua pei e \$40,000 se tupe e alu ai faamolemole, ia faatino le auala lea i lenei tausaga faaletupe pe a tusa ai ma lo outou finagalo.

E faapea foi ona talosaga atu le auala galue o si o matou nuu o Faiaai, e lei oo i ai se auala galue faamolemole, i le faatino i le polokalame lea. E aoga tele auala nei mo le felauaiga o fua o faaeleleaga ma fua o faatoaga.

E i ai nai mea laiti ia ou te fia paia. Se o au ua matamata nei i le taaloga lea a le Manu Samoa lea na uma nei, ua lagona a lou faanoanoa ona o lea o le a oo mai le taimi o la tatou Ipu o le Lalolagi, a o faapea la tatou au. E moni e leai se tupe i totonu o le Tala Faatatau o le Tupe, ae o i o lea e taatia ai le mitamitaga o Samoa, le pride o le Atunuu. Se i toe silasila ifo se i vaavaai foi i pulega ma tulaga ia; po o le a le mea ua tulai mai ai nei faiga? E feoloolo pe a na faapea o le a faatoa tofia i latou ae o le mea na tofi mai a e le i faia le World Cup lea na uma nei, ae o lenei o le a oo atu, se i toe silasila ifo.

Faafetai mo le taofiga o le ata lea o le Da Vinci Code, ou te auai lou sui usufono e taofia. Aua a ou vaavaai i ai, si tamai cartoon lava na tusia i fafo e uiga ia Mohammed ae vevesi ai totonu o le lalolagi i atunuu Mosalemi. A ua tau aumai e nei tagata le tulaga e faapisipisia ai lou talitonuga ma lou faatuatuga ia Iesu Keriso, ou te talitonu ua talafeagai le taofiga o le ata lenei. E taumafai mai foi tagata faipisinisi ae tatou te seu le manu ae tagai i le galu, ia tatou vaai leaga o le tele o isi tauga kalate ma isi fasioti tagata lea e fai nei, e mafua mai ona o le matamata i le ata tifaga, e faigata ona faavasega le mea moni ma le mea o la e fau. O le mea lea, ia faafetai mo le taofiga o le ata lea.

O le tele o fualaau faasaina ma social problems lea e i ai, e leai sa tatou tali i ai. Sa ou fesiligia le Taitai Ofisa Leoleo, o le tele ia o ana avanoa foi ia mai lana Matagaluega, ae ou fai atu i ai – o i ai sau spiritual counselor? Ou te talitonu leaga o lea e vaai a tatou i le... ae o lou lava iloa i le mea o le tagata soifua, e tele ia o le tulaga o le ola faaleagaga e faaleleia ai le tagata. O le mea lea, e tatau ona toe vaavaai, toe tapue le ola faaleagaga, ina ia vave ai ona foia social problems. O le tele foi o nei tagata pei o lea e taua Vaitelefou ma isi nofoaga ia, ia leaga o au ou te nofo ai i ina i Vaitele. Ae o le urbanisation po o le o mai i totonu o le taulaga e nonofo ai, e mafua, e sailimalo i aoga, sailimalo i galuega, e fesoasoani atu i o i nuu. O le mea la lea tatou vaai se i toe foia o i le pito le la, pe tuu i ai ni galuega i tua i o, pe fai ni aoaoga lelei i tua i o ona le maua lea o le movement lea po o le fesootaiga lea o tagata lea e omai i totonu.

Ou te lagolagoina le VAGST i le tualga lea ua i ai nei. Ae mo le lumanai, e mafai ona faaeeseese mea. Ou te iloa e tele le galuega mo le ofisa. Ae pe mafai ona faaeese mea o meaai, ese mea tau taavale, ma mea faapena. O i iina e iloa ai, aua e gafatia ona faatau le taavale ona o le lava o le

faasoa. Ae o taumafa, pe mafai ona tumau ai i le 15%, ae siisiitia isi vaega o le VAGST. Ae mo le faamalamalamaina i lou Itumalo o le VAGST, atonu o lea o le a gasolo atu le sui usufono pe a maea Fonotaga, ona fai lea o a tatou fono masina, aumai a outou fesili, ma ou taumafai e faamalamalama atu i la outou faafofoga mai.

O la tatou Faiga Palota; e fia momoli lau faafetai i le aufaigaluega i lo ouotu gapatia i lau Afioga i le Komesina ma le latou aufaigaluega ona o le gapatia. O faiva lava o le Atunuu e leai lava se faiva e asa ma se maumau. E i ai faaletonu a o faaletonu na, e toe tapue ai le lumanai. O lau fautuaga i lau Afioga i le Komesina leaga e fou foi la tatou faiga palota ma le system lea na faaoga, malo fai o le faiva. Malo le galue malo le faatoatoa i ou tiute lea sa e feagai ai.

Ia ou te talitonu ua lelei le faafofogaaga a lo tatou Maota i lenei taeao. Ua lamalama faaiu foi se upu a le sui usufono mo Salega. Ae afai o i ai se lafoga a lenei sui usufono e le o tau lelei i la outou faafofoga, ia lafo ia i nuu e leai ni tagata. Ae avea lenei taimi, ou te valaaulia faaaloalo atu ai lau Afioga i le Fofoga Fetalai ma lo tatou Maota, i le umusaga o le fale o le matou Faifeau ma le matou Ekalesia Metotisi o lo o faia i Sagone i le aso 21 o Iuni, pe mafai ona tolopo ai la tatou Fono tatou o se i tai ni a outou faaaloaloga pe a tusa ai ma lo outou finagalo. O se galuega lelei ma le matagofie. O lea foi na ou tatalo i lou uso a Minisita mo Galuega, se i alofa ifo i se pou moli se i tai ai le uaea o le galuega. Ae lelei a o lea e le o auai mai i i, ai ua alu le toeaina e faatonu lea tulaga. Ae faafetai tele mo le avanoa.

Ia agalelei le Atua i lenei Paeaiga ia mamao ni lagilagia, ni tuataafale ia mauuluga le soifua ma le lagi e mama i paia o le Atunuu. Tatou tatalo ia i le Atua i toe sauniga o lo tatou Tama le Tupufia, ia i ai Lona agalelei ma lona alofa i le polokalameina o mea uma. Ia viia le Atua i lenei taeao.

Faafetai ma ia manuia.

Tofa TAUA FALAIMO



Itumalo Faaalaalafaga:

Palauli Sisifo

Filifilia:

13 Aperila 2006

Faatauto:

20 Aperila 2006

Lauga Faataupou:

13 Iuni 2006

Ia faafetai i lau Afioga mo le avanoa, e tulai atu foi i lenei vaega o le afiafi e momoli foi se sao o lenei Itumalo e tusa o le Tala o le Tupe ua faataoto nei i lumamea. Matou piiama atu ia i le faafetai e pei ona siitia mai i le taeao, faapea taulaga a aiga ma nuu o lo o faapea ona talosia mai

le tatou galuega fita o lo o feagai ma lenei afiafi. Ona o lea ua mafua ai ona tatou aeae i lenei itula i le fiafia ma le olioli ona o le agalelei o le Atua. O lea foi ua tatou siva i maaomalie ae ua oa i faleseu ina ua vaavaalua nei Pule ma Tumau ma le galuega a le Atua. Ua ae foi le faiva ua io le upega, ua tapena mea matutu i le fale. Lafo i le talitali o lo o ua e topule foi so tatou olo puni matagi, a o se tatou tau i le lagi, aua Samoa i le nonogamanu ma le faautugatagi i le Tapaau i le lagi. E talitonu le faamoemoe, e uma upu, uma gagana, e le lilo, e le lanu, aua foi e le ma faatusalia le agalelei o le Atua.

Lau Afioga i le Fofoga Fetalai ma le mamalu o sui usufono ua potopoto, a o le i faia se sao o lenei Itumalo agai i le Tala Faatatau Autu o le Tupe ua tauaaoina nei, ua ou manatuaina i le taimi lenei le tala a lou tuua na fai ia te au- “a e fia ai se i tulou le Maota, aua e te tago e faasoa pe lufilufi ni taumafa”. Ona ou fesili lea pe aisea? O le tali na aumai, aua foi o le tagata e faasoa e le tatau lava ona ai, se i tulou le Maota; e le tatau lava ona ai. Aisea? Aua foi a tele ni taumafa e i ai e ave le tele ae tuu foi le tele. E faapena foi se manatu i lenei afiafi e tusa o le Tala Faatatau Autu o le Tupe ua tauaaoina nei.

Lau Afioga i le Fofoga Fetalai, ua tele ina maea folasaga ma ua soo foi taiaio i le faatofalaiga e ala i finagalo ma manatu e pei ona ua faafofoga i ai lenei Maota. Ae ou te le i faia se tala, ou te muamua ona ou faatoulu i le paia mauuluga ma le mamalu tele o Pule ma Tumua, Ituau ma Alataua, Vaa o Fonoti ma Fofoga o le Fua, Aiga i le Tai ma le vaatau o Nafanua. Susu Sua ma le Vaifanua, o Fofu ma Aitulagi, Saole ma le Launiu na Saelua, ma upu ia Ituau. Susu Fofu ma Aitulagi ma le Afioga i le Maopu.

O le paia lava lea i le Faleagafulu. Afio le paia tele i le afio o alii i le Laau na Amotasi, susu Faatui ma le Auvaa o Tootoo ma upu i le Manuatele. E faapea foi le paia ma le mamalu o Samoa i ona Ao Tufaitoa ma ona tulaga faalupelupeina; ma le faasologa o Ao atoa ma le paia tele ma le mamalu mauuluga i... maa fatutoto ma ona papa tuloto, aemaise le paia o Aigaevalu ma o latou Tama, Tama foi ma o latou Aiga, Aiga o Tupu, Aiga o Papa, Aiga o Nofo, o le paia tele lava lea ma le mamalu mauuluga o le afio o le Tuiatua, Tuiana, Natoaitale ma le Tamasoalii. E faapea foi Aiga e fia o lo o tausii vaatele i Tupu o le Atunuu po o Aiga e lua o lo o faafailelea Tupu o le Atunuu; o le mamalu tele lea ma le paia mauuluga e leai se na te gafataulimaina aua ua taoto a o ni alaoo. A o le taua tele lea o Samoa atoa. Ia tau ia ina ufitia i le ao, aua le Maota tulutulu i tao, lele ua soo ona taiaio. O Samoa foi o le Atunuu tofi e le o se Atunuu taliola. Tulouna ia i se paolo tau tupu ma se gafa sili i lagi, o Tupu ma Tumua ma lo lua vaa tautai lua i matua na lua.

Ia faataalolo ia le paia tele i le laau ma ona lau, e leai se na te gafa faamatua o faiva i le mamalu ma le paia o Aiga ma e ou te le toe ta foi utumaau aua o paia ma le mamalu o Samoa e oo lava i le faavavau. Tulou, tulou, tulouna lava.

Saunoaga Faataupou a Sui Usufono 1961-2011

Lau Afioga i le Fofoga Fetalai, ou te avea lenei itula e fia momoli atu ai se sao o lenei Itumalo, e momoli atu foi moomooga ma ni faamoemoega o lo o faapea ona manaomia e lenei Itumalo. Lau Afioga i le Fofoga Fetalai, ia ua faatagisia i le ava ma le faaaloalo galuega o lo o faapea ona moomia i totonu o le Itumalo. E talosagaina ma le ava ma le faaaloalo i le Minisita e faasinotonu e ala i le Matagaluega o auala galue ma ala e faapea ona faaauauina. E maitauina ma le totoa, e 34 ini auala galue lea o lo o faamatala mai i totonu o le vaegatupe o lo o faapea ona faamatuu ma o auala o Savali. O lea ua ou maitauina ua faaitiitia, lea ua faaitiitia i le \$1,574,970. E talosagaina ma le faaaloalo le auala galue i Taga o lo o agai i le pupu, ia ma o lo o faapea foi ona i ai faletalimalo. O le a se finagalo ae faamatuu atu i luga o le Malo na te tausia ma faataina, aua o se tasi lea o alatupe o lo o faapea ona ave i ai le faamuamua a le Malo i tagata tafafao maimoa mai fafo ma o lo o fia malolo e matamata i le pupu. E le gata foi i lea o lo o i ai faga oneone, e faapea foi ona fia faatinoina ai nisi o pisinisi e pei ona faapea o lo o faagagalu i ai le Pulega o Tagata Asiasi Maimoa mai Fafo. E i ai foi auala galue o lo o i totonu o lenei Itumalo o lo o faapea ona moomia le fia faaleleia ma fia faataina ona e talitonu le faamoemoe, o ia auala uma e le itiiti ifo i le selau tagata o e o lo o nofoia, ma o lo o faapea ona fia puipui mai le pefu se i tulou, ona o lo o afifio ai ma alaala ai tina ma tama matutua, ia ma le tele foi o fanauiti o e o lo o taitai ma e o lo o fetolofi faapea ma e ua faitau aso ona vaeluaina lea o le tina ma lana tama. Ia o mea ia e fia puipui ai.

Ae po o le a se tofa ae aumaia lenei avanoa i si o matou Itumalo e faatino ai lea vaega, aua ua maitauina, ua tele ina maea auala mai Salelologa seia paia Gataivai ae le i oo atu lava i totonu o lenei Itumalo lea faamanuiaga. E a pe a tai 200 mita mai le auala e amata ai i lenei Tala Faatatau o le Tupe, ia aua na o le lima auala galue o lo o i ai a o lo o faapea ona tele se aofai o tagata o lo o afifio ma alaala ai, ma o lo o matua manaomia lava e lenei Itumalo le faaleleia.

O se tasi o vaega o lo o molimauina le faamatuu atu o konekarate i le faaleleia po o le moaina o vao i tafaala. E a pe a se i tuu maia le avanoa i le Itumalo latou te teuteuina ma faaauau le galuega a konekarate o lo o fai nei ina ia maua ai foi se tupe maua a lenei Itumalo ia pe sili atu foi, E manaia pe a faaauau e le Itumalo lea matafaioi aua o lea e maitauina e tai masina ma sainsi tupe o konekarate ia. A o auala galue, ia e tai ono masina ma maua le faamanuiaga. Ae moomia e lenei Itumalo ni galeuga e faapea ona maua ai se seleni e toomaga i ai i lenei foi vaitau o le taugata o le soifuga.

Lau Afioga i le Fofoga Fetalai, ou te fia tautala i le vaega lea o le Soifua Maloloina ao faafofoga mai le Afioga i le Minisita. E le o po se lilo e lua falemai o lo o i totonu o lenei Itumalo. E talosagaina ma le ava ma le faaaloalo sa

outou fesoasoani mo le fia faaleleia o le falemai i Taga, ma se fesoasoani mo se fale o le fomai i le falemai i Foaalalo. E talitonu foi o lea o lo o alaala mai sui usufono o le Itumalo o Salega, atonu o le a faafaigofie ai lea mataupu e ala i se talosaga ua tuuina atu. E manaomia foi pe mafai ona faatutotonu Foaalalo mo se fomai e tautuaina falemai ia e lua ia ma le falemai i Sataua. E talitonuina ma le agaga maua o le a faapea ona silasila lau Afioga i le Minisita o le Soifua Maloloina i lea vaega, ma o lo o fia faaleleia foi. Ua maitauina le utiuti o vailaau ma fualaau i le taimi nei ma e talosagaina ma le faaaloalo lea fesoasoani.

Lau Afioga i le Fofoga Fetalai, ou te fia tautala i le Matagaluega lea o Faatoaga. E talitonuina o le Itumalo nei e tamaoiga tele i le ava, o le koko, ia faapea ma le taamu. O le a se fuafuaga pe le toe faaauau le tapenaina o le galueaina pe fai foi se ponesi ina ia faapea ona toe faatupulaia ma faateleina faaeleleaga ia e pei ona taua aua ua tele le fia galulue a ua le liloa foi ma atonu o se tasi lea o mafuaaga ua le mafai ai ona naunau lenei Itumalo faapea foi le tatou Atunuu e faatele ia atinae.

Lau Afioga i le Fofoga Fetalai, e talosagaina foi ma le faaaloalo lau Afioga i le Minisita o Vaomatua ma Faigafaiva, o lo o manaomia se pole mo gataifale o lenei Itumalo. E maitauina ua leva foi aso e le o i ai se pole i lea vaega ae talitonu foi le faamoemoe, o se tasi lea o vaega o le Atunuu o lo o malosi mai ai faigafaiva i lenei taimi. E talosagaina foi ma le faaaloalo le ava e pei ona faapea ona i ai i gatai o lenei Itumalo ina ia faaleleia ma faalateleina ona ua faasolo lava ina puni le ava. E talosagaina i lenei taimi ina ia faapena ona tuutiitia ai se galuega fia faaleleia, faatasi ai ma moli o lo o i ai i le taimi nei. E talosagaina foi lau Afioga i le Minisita o Faigafaiva, ou te talitonu, atonu o la e ua faatino faailoilo, a o faailoilo ia e emoemo feaauuai, ae i ai le taimi e pepe faatasi ai faailoilo ia, ona le iloa lea e le vaa pe faapefea ona ofi mai i totonu pe a oo i le taimi o le sousou. Ia e ono afatia ma lamatia ai foi le soifua o le au tautai. Ua le itiiti ifo ma le lima tagata malilili i totonu o ava ia ona o faafitauli ia e pei ona talosagaina.

Lau Afioga i le Fofoga Fetalai, ou te fia tautala i le Matagaluega o Aoga. E fia momoli atu le talosaga i le ava ma le faaaloalo lau Afioga i le Minisita o Aoga ona o le faleaoga lea i Foaaluga ua matua leaga faia lava, se i tulou le Maota. Ou te talitonu foi a oo atu lau Afioga e te silasila i ai, o le faleaoga lea pito sili lava ona leaga i Samoa atoa. E talitonu foi o lou silasila i ai o le faamautuina foi lena o le mau a lenei sui usufono ona ua le o talafeagai ma tulaga i le tausia ma le puipuia o le soifua o e o lo o faatinoina galuega ma meatotino a le aoga faapea foi ma fanau.

Lau Afioga i le Fofoga Fetalai, e talosagaina foi faiaoga o aoga ia i Salailua ma Foaaluga ona ua maitauina o le tulaga o lo o i ai i le taimi nei e tasi le faiaoga ae 45 tamaiti i le potu. Na ona tuutuu atu po le a se tofa ma se moe i lau

Afioga, o lo o faapea ona moomia foi se fesoasoani i lea vaega. Lau Afioga i le Fofoga Fetalai, pe le mafai ona i ai se galuega e faapea ona fefaasolaai ai faiaoga i totonu o nuu ma afioaga. Ia atonu e taua foi lea ina ia faapea ona sui le faalogo ma le maitau a tamaiti aua e eseese lava le faiaoga ma lana kiliva i tamaiti ina ia faapena ona sui ai foi se latou faalogo pe faapea foi ona maua gofie ai latou pe pue gofie ai so latou manatu ina ia faapena ona maua le atamai ma vave le pue a le tamaitiiti pe afai e fefaasoaai faiaoga, aua e eseese lava metotia. O le talosaga lea ma le faaaloalo.

Ou te fia tautala lau Afioga i le Fofoga Fetalai i le vaega lea e pei ona i ai le saunoaga a le Afioga i le Minisita o Tupe, e talosagaina ma le faaaloalo, o lea ua maitauina ua sii le tau o le faguinu ma le vailima. E a pe a talosagaina ma le faaaloalo, sii pea na o le pia ae tumau pea le faguinu aua o le faguinu, pe a ma le 80% o le Atunuu o lo o faapea ona mafatia i le vaega lea o le siitaga o lo o i ai nei.

Lau Afioga i le Fofoga Fetalai, ou te fia tautala foi i le vaega o le VAGST e pei ona saunoa i ai le Afioga i le Minisita o Tupe, o lo o faapea mai ua leai se VAGST i le eletise ma le vai faapea aoga ma le tele o nisi oloa e pei o ia, fualau aina, fualau mata. E talitonu le faamoemoe, ia, o loo aafia le tau o lo o faatino ai faigafaiva i mea fagota i le VAGST, e faapea foi fualau aina, o lo o faapea ona aafia meafaigaluega i le VAGST, ae talosagaina ma le faaaloalo lau Afioga i le Fofoga Fetalai, e a pe a aveese le VAGST o le pili o telefoni o lo o faapea ona maitauina o lo o sau lava i pili o tatou telefoni le VAGST, ia a o lea e leai se VAGST o le eletise ma le vai.

Lau Afioga i le Fofoga Fetalai, ia ua maua i lenei itula ua faauma lou taimi. Ia avea ia lenei itula e faatalofa atu ai i lou Itumalo. O lea lava sa taumafai se sao o le Itumalo ona ou oo atu ai lea i lau tapuaiga. Lau Afioga i le Fofoga Fetalai, ou te fia tautala e momoli se faafetai i lou Itumalo ona o le puleto ma le faaeaea ua maua foi e lou nei tagata le avanoa e fai ai ma auauna aua lava se sao mo galuega faatino i totonu o le tatou Itumalo. Ia e talitonu le faamoemoe o lea ua ou pale i lou pale, o lau ula foi lea o le a ou asoaina ma lou titi lea o le a ou suluina ou te tautua ai ma auauna i lo ta Itumalo. Ia lafo maia, o le a le tuua ai le agaga o le finau ma le taumafai aua lava ni mea e fia faaleleia mo lo ta Itumalo.

Ia alofagia e le Atua lau Afioga i le Fofoga Fetalai, ia faapea ona foai le malosi i le tino faapea foi le mafaufau aua lava le faatinoga o le galuega fita o lo o feagai ma lau Afioga faapea le Afioga i le Palemia ma le faatinoina o ni talosaga ma se taumafai atu a lenei Itu foi aua le faaleleia o mea e fia fai i totonu o Itumalo taitasi. Ia manuia tele foi lenei Itu i le afio o lau Afioga i le Taitai o le Itu Agai ma le Sui Taitai faapea foi sui usufono o lenei Itu faapea foi uso nei o sui usufono tututoatasi.

Ia manuia lava le savaliga i lenei Paeaiga ae ola le auauna.

Tofa TOLUONO FETI



Itumalo Faaalaalafaga:

Palauli

Filifilia:

13 Aperila 2006

Faatauto:

20 Aperila 2006

Lauga Faataupou:

13 Iuni 2006

Faafetai i lau Afioga i le Fofoga Fetalai. O le mea sili o lea ua maea le saunoaga a lou uso lea ae o lea faatoa tulai atu le Taitai moni o la matou Vaega.

Ou te fia soso atu e avatu foi se mau ma se manatu o lenei Itumalo o Palauli lau Afioga i le Fofoga Fetalai, i le tatou taulafoga i le Fonotaga i lenei afiafi. Ae muamua ona ou faamalo atu i lau Afioga mo le tofia o oe e avea ma Taitai o le Palemene i lenei 5 tausaga o i luma i le 14 lenei o Paeaiga po o 44 foi tausaga o lo tatou Malo Tutoatasi; e faapea foi le Afioga i le Palemia ma le Kapeneta, i Minisita faamalo foi le tauatai i mea lelei, ua toe tulai mai le Faigamalo i lenei foi 5 tausaga.

E le faagaloina foi lea itu o le malae i lau Afioga i le Taitai o le Itu Agai ma la outou foi Vaega, faapea foi le Vaega nei ua matou mafuta. O le mamalu lava lea i lo tatou Maota Fono nei. E le faagaloina foi le tapuaiga i Lana Afioga Mamalu O le Ao o le Malo, le Susuga i le Malietoa. Ua faapea foi Sui Usufono o le Fono a Sui Tofia, i lau Afioga i le Tama-a-Aiga, e leai se failoto e pule pea le Silisiliese. Tau ina alofagia e le Atua ma faamaise i le faletua faapea foi le Maota Fono nei sa tatou auauna faatasi ma le Afioga i le Faumuina ua tuua nei le Malo.

O le paia lava lea ia Pule ma Tumua, Ituau ma Alataua, Aiga i le Tai ma le Vaa o Fonoti, tainane foi le tapuaiga i lena itu i Sasae i le Faigamalo a Tutuila ma Manua ua tatou faifaima faatasi; le Afioga i le Kovana ma lana aufono. O paia ia o Samoa ua faalupe. Ae peitai, o lenei itula ou te faatulou atu ou te taia le pula ma le vaiafei i lau faafofogaaga Samoa, ae se i ou agai tasi ane i lou Itumalo o lo o taputapu mai i fanua, e faaleo se matou mau aua le Fonotaga a Samoa ma le tapuaiga.

Samoa e, ou te faatulou atu i lo matou Itumalo ia Palauli e pei ona ou tulai mai i le tofi. E avatu le faamalo ma le faafetai i le Itumalo i lo outou filifilia o au e avea ma tofi o le Itumalo – faafetai faafetai lava. E ui ina loaloa taimi foi tatou te le i mafuta talu mai le Palota, e leai e toe oso ae pea le la. Ou te faafetai atu i lou Itumalo pele o Vaitoomuli faapea Vailoa ma Faala, o le mamalu lava lea ia Faasisina ma Sa Lilomaiava faapea foi le Levaleva ia Safaleletaua.

Ou te faafetai faapitoa i lou nuu o Vailoa sa faapito augafa la latou lagolago i lou aga atu i le Palota, o lea ua

Saunoaga Faataupou a Sui Usufono 1961-2011

ou tulai mai ae talosia le malosi ia maua pea aua le agai i luma o a tatou fuafuaga mo a taeao. O le paia i le Faasisina ma le Aloalii faapea foi le Fofoga o Sa Lilomaiava, o le mamalu lava lea i le Faleao, ia Saletoalua, Toluono ma le Aiga o le Falelima faapea foi se faautautaga i le Nofolii ma le Matua.

Tatou tepa ae i lea itu launiu i Faala, o la e alaala lava Alo o Lilomaiava faapea Sa Lauulu; o se tagai malamalama i le Aloalii faapea le Tausi Vaatele o le Sao Fetalai ia Lagaaia ma le Uso taua.

Tatou agai ane i Vaitoomuli o lo o alaala ai le Faasisina ia Niupulusu faapea foi le Alo o Lilomaiava. O le mamalu lea ia i laua o Tulafalealii ma le agai i luma o le tatou Itumalo, tuu mai lo outou faatuatuaga. Ou te manatu ua leai se mea e toe faanefu i o outou finagalo. E avatu foi le faamalo i faletua ma tausi, o saoa aemaise o auuuna a le Atua o lo o faafaletuluia i maota ona o le tauasuina o le vai o le ola aua le Itumalo ma Samoa mo a taeao.

Lou Itumalo e, ua le o po se lilo i le agai i luma o le tatou mataupu e pei ona i ai le tele o mea sa outou finagalo i ai; aumai so outou finagalo ae o le a se i ou alo ane e tuu atu i lumamea o lea e afio le Afioga i le Palemia faapea le mamalu o le Malo mo nei vaega tatou te faifaimea faatasi aua le agai i luma. E moni le Faigamalo o lo o i ai nei, faafetai le fai mea lelei ua tele mea lelei ua saunia mo lenei Itumalo, ae tele foi nai mea e faaleo atu pea e le i oo i ai le faasoa ae atonu o se taimi.

O le taimi nei e tele mea o lo o fia faailoa atu ia outou Afioga aua le agai i luma o a tatou galuega. Faafetai i mea ua faataunuu e i ai o matou taligalu ua uma ona faatino le isi vaega ae i ai pea le vaega e le i oo i ai le faasologa; e faamoemoe i lenei Paeaiga ma le isi 5 tausaga o lo o i luma o le a maua se avanoa e faatino ai lea faamoemoe. O le Itumalo lenei e faaleo atu pea, ona pau lenei o le Itumalo e loto mama ona o lo o i ai galuega tetele a le Malo ae le i tagisa i se tau, ona pau lava lea o le Itumalo. E le faapea ua matou tagiuu, leai e faailoa atu pea le finagalo o le Itumalo ua uma ona faiupu ma le Paeaiga talu ai o le a oo atu le faasoa i se taimi. E tele mea e le i oo i ai le faasoa a le Paeaiga talu ai ma o lo o nofo tapuai pea le Itumalo po o fea ua agai i ai lea faigaupu e pei ona i ai le finagalo o le Malo talu ai, ia alofa ma faataunuu. O lea la ua ou tulai mai nei i le tofi ua atili ai le augani mai o lo matou Itumalo se i alofa e faatino lea tulaga.

O le tulaga o lo o ou fia tautala i ai o le vai taumafa. Sa i ai a matou faigaupu i le vai taumafa ma e oo mai i le aso e le i iloga lava se tulaga o i ai, na ona faaila atu e le Afioga i le Palemia ma le Faigamalo o lo o i ai nei – ae po o fea o agai i ai lea tulaga i le vai taumafa ona o lea e le i i ai se tagisa o le Itumalo i le eleele o lo o taatia ai le paipa tele a le Faasaleleaga. O faigaupu foi talu ai ua maea ona matou feiloai soo ma le Faigamalo talu ai, ua logo mai o le a faataunuu mai Vailoa seia oo i Faala o lo o i ai le vai lea e sau ia matou ma le manatu o le a i ai se fuafuaga. Ona pau

le mea e faanoanoa ai ae logo atu pea, e i ai le tamai Pule laitiiti lea e i ai i Salelologa vaeane le mamalu o le Fono, e pei ua na suia le faigaupu e pei ona saunoa i ai le Paeaiga talu ai o le tatou Faigamalo; ua agai atu nei ina vevesi lo matou nuu ma se i alofa se i toe silasila ane lau Afioga o lo o tulai mai nei i le foe po o fea o agai i ai le vai taumafa mo Vailoa, Vaitoomuli ma Faala.

O lo o i ai foi ma le isi vaega o a matou faigaupu ma le Paeaiga talu ai mo le vai taumafa lea e agai i tua i le isi o matou pitonuu e va ma le fanua o Nelesoni e tuaoi ma Satupaitea. O la maotu tuuga tala sa fai ai e tai i ai le vai ae oo mai i le aso o lea ou te faamanatu ai i le Afioga i le Minisita o lo o tulai mai nei, ua uma foi ona fai a tatou faiga upu i lea tulaga i le matou paipa lea ua taoto mai nei.

E faapea foi ma le tanumia o le malae taalo o lo matou faleaoga e oo mai i le aso ua fai le isi vaega ae le i maea le isi galuega.

E faapea foi le tulaga o le ala agai i uta, ua tea i tai tane vai ae agai le ala i uta e ui i le mea sa agai mai ai le vai taumafa – o le faaleleiga o le auala e le i tagofia foi lenei tulaga. Na ona faaoololomaau atu i lau Afioga i le Minisita o lo o tulai mai nei e tataua ona ave sau tali i le Itumalo aua o lea ua ou tulai mai i le tofi sui usufono ina ia alofagia e fesoasoani e faataunuu ia tulaga aua a leai, o lona uiga o le a tagi i se tau i a o mea uma sa faia faafetai; e tele mea lelei sa faia e pei o taligalu ma ala galue. E ui lava foi o nai ala e le mamao tele atu i uta na o le tai 500, 600 a o le mea sili o le la ua i ai le auala galue. O nai mea o lo o manaomia e lou Itumalo i le taimi nei, alofa se i oo atu i ai le faasoa.

O le Falemai, lau Afioga i le Minisita mo le Soifua Maloloina, o lo o i ai le falemai i lo matou Itumalo i le pitonuu o Faala a ua le maua lelei po o le a le tulaga o i ai aua ua le o toe agai atu i ai se mai a e oo foi i le falemai ua faapeapea atu lava ua le toe faaogāina.

Ua faapea foi Satupaitea i le falemai sa i ai ma po o le a le tulaga ua i ai nei falemai aua sa manatu o le tulata ia o le fale lea agai i le malae vaalele, lelei le vai, lelei foi le tulata i le uafu i le mea e fesoatai ai Upolu ma Savaii, ae peitai ua le iloa aua ua taatia nei lea falemai. Ou te iloa e taugata le faataunuuina ona o la foi e i ai Tuasivi. Ia alofofa se i toe silasila ane lava i le fale lea pe le i ai se isi fesoasoani e toe agai atu i ai.

O le isi tulaga e pagatia ai matou i tua o mea nei o faatoaga, se i silasila ane lau Afioga i le Minisita o Faatoaga ona o le tele o le popo la e lalau i tua ia matou. O lo o sologa lelei i le Faigamalo ma le tauleleia o tatou i le tamaoiaiga ae ou te lagona o lo o i ai le faaletonu i tua ae tagi i lima mea uma i o tatou tagata i tua vaeane le Maota. E fai o montoga faapea le tautuaina o le nuu, alofa o le faifeau ma pili o tamaiti faaopoopo i ai ma le tau o le soifuaga.

O nai mea ia o lea e momoli mai e lou Itumalo pe le i atagia ae toe faaolaola a tatou mea ia e ave i fafo, aua o lea

ou te iloa e i ai tamaalii o le Atunuu o lea e ave container talo vaeane le Maota. Pe le i toe ono oo i se taimi e tatao ai lea itu ina ia maua ai se fesoasoani mo i latou i tua.

O le tulaga i le faleaoga, faafetai o lea ua maea lo matou faleaoga sa fesoasoani ai le Malo sa i lalo o galuega a le Faletupe o Atinae o le Lalolagi. Ua maea foi le tulaga lea sa faatinoina ma o lo o i Vailoa lea faleaoga; a o le agai i luma ou te iloa e moomia nisi fale e fesoasoani i le Itumalo. A o le mea lea o lo o pagatia ai tele au ona o lo matou vai lea se i aumai se tali lau Afioga. E le tagisa ae tuu atu i lau Afioga ona ua uma ona fai a matou faiga upu ma le Paeaiga talu ai i lalo o le faamalumaluga a le Malo a o lea e le i ai se tali mautu. O lea foi ua seu e le tamai Pule lea e i Salelologa lea tulaga ua uma ona saunoa i ai le Malo mo le agai i luma o le sologa lelei o atinae ma mea e fai. Ae mo nei ma a taeao ia alofagia ia i ai se mau e aumai mo le sologa lelei o le tatou nonofo ai ma le puipui i atinae a le Malo i totonu o lou nuu, aua o au o le sui usufono e tatao foi ona ou faaleo atu finagalo o le Itumalo o i ai nei mo le agai i luma.

Ona ou oo mai lea i le tulaga o atinae o le Gataifale. O lo matou pitonuu lea o Vaitoomuli o lo o tagi mai lava i so latou taligalu. Ua pagatia tele le gataifale o le pitonuu lea ona ua faaletonu mea e tua i ai. E alofa ai masalo po o le Minisita o Galuega, Felauaiga ma Atinae Eseeese po o le Minisita o Punaoa Faalenatura ma le Siosiomaga e faatao atu ai lea tulaga, ae alofa e fai ma silasila ane i ai pe i ai se fesoasoani mo Vaitoomuli mo le latou taligalu.

O le isi a matou atinae lea o lo o i ai, o i i le matou pitonuu lea o Faala lea o lo o talosaga mai pea e le o lelei le vai ma le eletise agai i tai i lo latou atinae i Aganoa. Ou te le i toe oo i ai talu ai nei a o le mau lava lea na aumai e le o lelei le vai ma le eletise i lo latou taumafaiga i Aganoa.

E faapena foi i nisi o auala galue e le i oo i ai le faasologa a le Malo, na ona tuu atu i tafatafa o lau Afioga i le Minisita mo le agai i luma ia alofa pe i ai se fesoasoani i le tulaga o lo o i ai lea manaoga i lou Itumalo.

O le tulaga i tagata tafafao maimoa mai pe maua sina fesoasoani i lo matou Itumalo. O le Tala o le Tupe o lo o sologa lelei le silasila atu i ai ma e lagolago foi i ai. Ona pau lava lea, ia o mea ia tau faatoaga e pei ona ou taua, e na o le \$11 miliona lea ou te vaai atu i ai ae sa faapea e i ai sina mea e tau amata ai ona agai tatou i le fesoasoani i le tagata lea e i tua i mea o faaeleelega aua e moni lava, o lea e lelei le tatou economy, ia a fua loa isi au mea i lau taga, ia o le mea la lea e le o maua e tatou i tua, aua e solo mai lava i a outou Afioga i sui usufono ma Minisita i aso uma. E le tau aoaia e Laupua Tamafaiga i lea tulaga ona o le vaivai o le tamaoiga i tua i mea tau seleni i le taga, ia a o la e i ai le mea e tua i ai i lenei vaitau o le taugata o le soifuaga, ae e lagolagoina le Tala o le Tupe. Pau lava lea ia o le 2.5% lea e pei foi ona saunoa le isi sui usufono talu ai. O Oketopa lea e amata mai ai ia po o le mea la e oo atu

foi i le tausaga fou tuutuu i luga. Mo le lausilafia mo le agai i luma o le tatou i ai i fuafuaga o le olaga ia ma le tagi mai a tagata, ae i ai se tali a le sui usufono e ave i ai.

Ona pau ia o nai mea ua manatu i ai lau Afioga ae faafetai i le avanoa ua maua e le sui usufono mo Palauli. Ia alofagia e le Atua ia maua pea lou taofi aua le faafoega o le tatou sa i le Palemene.

Ia manuia le Fono.

Afioga TUIA PUA FUATOOGI LETOA



Itumalo Faaalalafaga:

Safata

Filifilia:

13 Aperila 2006

Faatauto:

20 Aperila 2006

Lauga Faataupou:

13 Iuni 2006

Lau Afioga i le Fofoga Fetalai, e i ai tauafiafi o tamalii o Samoa; o tauafiafi o auafa tatala ma palopaloga ma matematega, o tauafiafi o le siligia o le siitaga. A pau la tauafiafi o le siligia o le siitaga ma le auafa tatala ma tagisia manu ole afiafi ona faapea ifo lea o Tama Sa ma Ilamutu o Aiga, “Se i faalogo atu ia po o se veavao po o se tagi a se manualii”.

Lau Afioga i le Fofoga Fetalai ma le paia o le Maota, o le pa o le faititili ma le tagi a le manualii ua pau ai tuauu ma fuamalu aua o lea ua faatausunui muniao i le paia o le Malae i Tiafau nei, o le Malae na faufau ai tia o Tupu ma Ee o le Atunuu. O le Malae o le Faautugatagi, o le Malae o le auafa tatala, o le Malae o le tauafiafi o tamalii, o le Malae o ee o tulatoa ma ponaoo o le Atunuu. O lele ua aofia i moli futiafu e tasi ma ua nofoia Auoloolo, ua aliitia Faleseu ina ua ee lau Afioga i le Fofoga Fetalai o le Maota i lou Nofoa; o lau Fetalai Leulumoega o oe o le Faleupolu tofia o le Faleupolu faalelea, o le Faleupolu tausii tupu, o le Faleupolu tausii aiga; ae a lou nofoia o le Nofoa? A, se ua tatao aua e te masani e faatautai le vaa o alii, e te masani e faatautai vaa o tupu. O lele e afio lau afioga i le soatau, lau Afioga i le Sui Fofoga Fetalai, o le Alo o le Malietoa o le paia i aiga e lua, o Aiga o tupu o le Atunuu, o le Aiga Sa Tupua ma le Aiga Sa Malietoa. Ae mamalu le aitu i le aoa i le afio o lau Afioga i le Palemia, lau Susuga i le Tuilaepa o le Alo o le Malietoa. A ou tautala foi i le mamalu o le Aiga Sa Fenunuiavao lau Afioga i le Naito; a ou tautala foi i le paia o le Aiga Sa Tuala, e leai o lau Susuga o le Aiono. Ae a le afio o le Laau na Fausia i lau Susuga i le Sui Palemia, le Tama tau Aana? O lea ua paia oooo ai le aso ma ua malualii ai le tauafiafi o le Palemene ae tainane le faalepa o le fua i le afio o paia lasilasi o a outou afioga i Minisita, aemaise le afio ma le

papa-aao o paia faalupea o Afioga i Minisita Lagolago, o lea ua nopiai i le po lenei ma le tauafiafi.

A liliu foi le vai o Sinafutulua i lenei talaga, o lele e afo atu le Afioga i le Taitai, le Afioga i le Suafa, le Afioga Hon Le Mamae Ropati. Ua afio atu sui usufono Tutoatasi, afio atu sui usufono o lenei Itu o le latou Vaega Faaupufai; ae a lele e afio le Afioga i le Failautusi ma le paia lasilasi o le afaigaluega a le Maota Fono lenei. Ona ou faapea lea, tulou, tulouna ia.

Ou te faatulou atu le paia o lo tatou Itumalo; atonu e sau sema se taimi ona ou oo atu lea i ou paia ma ou maa salafalafa, a o lenei itula o le afiafi ou te faatulou atu i le tapuaiga mamamlu a Lana Afioga Mamalu O le Ao o le Malo, lau Susuga i le Malietoa o Le na malotau na ea ai le pologa o Samoa, lau Susuga i le Tapaau Faasisina e te faasisina ma e faasisila i manusina o le Atunuu, e tele e i lou Nofoa vaevaeloloa, e faalogo ma faafofoga ia te oe Samoa.

Ae o le vaa nofotolu i le paia o le Fono a Sui Tofia, le paia i le afio o a oulua Afioga i Tama a Aiga, le afio o lau Afioga i le Tuiatua lau Afioga Hon Tuiatua Tupua Tamasese Efi, le afio o lau Afioga i le Tuiatua lau Afioga Tuimalealiifano. A, ua papa ma ua lagia nei Vaitagutu ma Lepea, ae ua fa'ia le manu o le fuifui; talofa, talofa ua fai i lagi le tuligasia, ua se i se taualo lo outou Sa, le afio o lau Afioga i le Tupufia, lau Afioga i le Faumuina. Ua taufai tofe ou tafa. E faamaise atu ma faatulou atu i lau afioga i le Masiofo faapea le nofoaalo ma le paia i le aiga faanoanoa, tulou.

Ou te faatulou atu i le paia i lau Afioga i le Faamasino Sili, lau Afioga Patu Tiavaasue Falefatu Sapolu faapea le paia tele i Alii o le Faamasinoga. Ou te faatulou atu i lau Afioga i le Peresetene o le Faamasinoga o Fanua ma Suafa aemaise le afio o Alii Faamasino, Alii Faatonu ma Tamaitai Faatonu ma le Ofisa o Faamasinoga – tulou.

A apoopaa ma olioli faamalimali faleupolu o tofiga ma tauatiati le pouniu ma manatu i paia salafalafa ma paia sautuao o Samoa, i Aiga o Tupu, Aiga o Nofo, Aiga o Papa, Aiga o Mavaega ma Aiga na Tafaifa i le afio o Tama ma Aiga, o Aiga ma a latou Tama, o Pule ma Tumua, Ituau ma Alataua, Aiga i le Tai ma le Vaa o Fonoti, ae tainane le paia tele i o tatou uso o tuaoi i le Malo o Tutuila ma Manua i le afio o Faatui, afio le Maopu ma le Faleagafulu, le afio o le Laau na Amotasi, afio Faatui ma le Auvaa o Tootoo. E faapea foi le afio o lau Afioga i le Kovana Sili, lau Afioga i le Lutena Kovana ma lau Taupulega; afio Maota e lua, le afio o lau Afioga i le Peresetene ma le afio Senitoa ma le Maota o Senitoa ma le Maota o Senate; afio lau Afioga i le Fofoga Fetalai, faapea le afio o sui faipule o le maota o Sui ou te faatulou atu.

E faatulou atu i le Ofisa o Faamasinoga, le Afioga i le Faamasino Sili ma le Vaega o Faamasinoga. O la outou

tatofolu i outou paia ma mamalu i la outou Taupulega ma le Faigamalo i Tutuila ma Manua – tulou, e faatulou atu.

Ou te faatulou atu i le paia tele i le tapuaiga mamalu, le tapuaiga paia a Susuga i Faafeagaiga i Fata Faitaulaga e fia o le Atunuu o lo o faanonomanu ma fai tatalo aua se manuia o Samoa mo a taeao, tulou.

Ou te faatulou atu i faletua ma tausi, saoa ma sao tamaitai, le laumeataunuti ma le talutalufou o le Atunuu, tulou.

O paia sautuafafa na o Samoa i le afa e fili i le muiaa pe a tautau i le Matasaua i Malaetele i Faleula ma Tautagata seia paia Fili ma Puletuu na tauilo ai Malo. Ou te faatulou atu ma nuunuu atu, ae se i ou afea ia ma agai atu i lo tatou Itumalo, o le Itumalo e sili ona pele ia te au, o le Itumalo o le Aiga Malosi, le Itumalo na saili Malo aua aiga, i le afio o le paia i Aiga Sa Tunumafono, afio ai le Falefa o le Ulugatanifa, afio ai lau Afioga i le Faauluuluga o le Aiga Sa Tunumafono, Susu le Faasuaga, afio ai Tapaau na tausi e le Alataua, ae alaatai ma mamalu mai oe Taulauniu ma le Aitu Tagata, le Igoa Matua ma le Faletolu, le nofo a tula ia Safata ma upu i le Alataua e faatulou atu.

Ou te faatulou atu i le paia tele o lo tatou nuu i Saanapu; e faatulou atu i le paia o Latatuli e afio ai lau Afioga Anapu, afio ai le toalima o alii, afio ai le Maopu o le Tuiatua, ae alaatai ai Tuigaleava ma upu i le Faletolu ma le paia i aiga e lua.

Ou te faatulou atu i Siulepa; e afio ai Taoga ma Afemata, Seiuli ma le Maopu ma le Tamaaleuso, lau fetalaiga Falefulafula ma upu i le faletolu.

Ou te faatulou atu i le Lefagaalii; o le malae e afio ai Ama ma Afoa, le Usoalii ma Alo o Tunumafono, alaatai ai le Matua ia Saseve ma le Nofofanau ma upu ia te oe le faletolu, tulou.

Ou te faatulou atu i Nuusuatiulemanu na sunui ai lou alafale, e afio ai Matua Fetalai, e afio ai Tuilimu ma Laifata, e alaatai ai oe Tupai ma Tapaulefano, tulou.

Ou te faatulou atu i Togamau le logotonu o le avei, i le afio o lo outou aiga Sa Te'o, afio le Tama a le Fale ia Te'o ma Tuia, susu le Matua ma le afio o le Usoalii, o Safuiane ma Faleataisaalo ma le Gataiala, ou te faatulou atu.

Ou te faatulou atu i Fatipule o le malae e afio ai le Aiga Sa Tunu mafono, alaatai ai Taulauniu ma Aitu Tagata ma le mamalu i le Alataua.

Ou te faatulou atu Logogalu ma Moemanogi, e leai o le malae e afio ai lau afioga i le Faauluuluga; susu ai Faasuaga ma le aiga, susu Suafa, alaatai ai Taulauniu ma Aitu Tagata ma le mamalu ia te oe le Alataua.

Ou te faatulou atu i Tafitoalalemanu, e afio ai Tama a le Falelua ma le pitolua o le Aiga Sa Tunumafono, afio ai Mataia ma Teo, susu ai le Matua ma e na alaala i maota, ae alaatai ai le mamalu tele ia te oe Tupalata ma Fagalesau ma upu ia te oe le Alataua.

Ou te faatulou atu i le malae i Niualama, lea e afio ai lau afioga Leota e afio ai Toalepaialii ma Mulitalo, susu ai oe le Tiatele, afio ai Usoalii, alaalatai lau Fetalaiga Manuaautualasi ae mamalu ai oe le Taulauniu, ma upu i le Alataua.

Safata, o paia tautau na i aso loloa o lo tatou Itumalo. Tulou, o ou paia, opo i ou papa e le gaeeee, i ou papa see, i ou papa nofo, ma ou papa le laga. Tulouna lau tapuaiga le Aiga Sa Tunumafono ae tapuai maia i maota, tula ma malae se i agai se faamatalaga ae momoli so tatou sao ia Manuvao, momoli so tatou ai, ae lafo so tatou maa ma faatu se aso i le auau, o lea ua taatia i le aso aua le Tala o le Tupe a lo tatou Malo.

Lau Afioga i le Palemia, e tapa fua i lou suafa, o oe o le tautai o le matapalapala, o oe o le tautai o le tai fanae – ua malo le fai o le faiva, ua malo tautua, ua malo tauatai. Lau Afioga i le Minisita o Tupe ma le Matagaluega o Tupe, faamalo le faigaluega maeaea, faamalo le alofa i le Atunuu, faamalo le lava tapena e tusa ai o le Tala o le Tupe ua fofola i luma o le Palemene i le aso. Matou te le toe sagolegole, ma e le toe sagolegole le Itumalo lenei o Safata, na ona matou momoli atu le faafetai ma matou soso atu; o le a se tulaga, o le a foi se manatu o lenei Itumalo aua le faaleleia o ona fanuatapu ma ona tapueleele ma ona tapuafanua, matua atu i ina. Afai foi matou te tomua pe matou te faatea lau Afioga i le Palemia ae sumu so matou tea, ae a i ina? Ae i ai foi le taimi e ponati ai so matou faatea, finagalo malie, aua e Tinā Tamā i iina, i lau Afioga ma le afio i Minisita.

Ona ou faapea lea i le Matagaluega, o lau uo pele, o le Minisita mo Fesootaiga ma Faamatalaga Tekonolosi, aua o lou suafa e amata ai Safata e alii muamua i ai le nuu muamua o Safata, e faai i ai Niualama le nuu mulimuli o Safata. Lau Afioga i le Minisita, ia alofagia telefoni o lou Itumalo. Faafetai i galuega maeaea, faafetai o lea ua oo atu i Sanapu, Sataoa ma Lotofaga. Lau Afioga i le Minisita mo Fesootaiga ma Faamatalaga Tekonolosi, o lou suafa e iu ai Safata; toe ono nuu o Niusuatia e tau i Mulivai; se i alofagia ia lo matou Itumalo.

Lau Afioga i le Minisita mo Punaoa Faalenatura ma le Siosiomaga, ia o oe o le uo faapelepele. O le tagi a le pumate, se alofagia afai e alo lou sa i gatai o Tafitoalalemanu, ua ta le lava pisia i le sami. Ou te nofo i le vai sami ou te nofo i le vai vasa, se alofagia le apitagalu; alofagia le apitagalu a si o matou nuu o Tafitoala.

Lau Afioga i le Minisita mo le Soifua Maloloina, e ua ta matau ina ua faataooto le Tala o le Tupe le falemai i Safotu, Aleipata ma Poutasi, ona ou manatua lea o le tala ia Tina ma Lau, ina ua alu le tuligasia. Fai mai ua alu le tuligasia ma afisi le la tama – o le suafa o le tama o Tinilau – ae ina ua maua le tuligasia, fai mai lea o le tamaloa, - “I lo outou Luafau o Tini ma Lau, faaopopo i ai ma Olo, ona maua ai lea o le igoa o le tama o Tinilauolo.” Afai o Safotu, Poutasi ma Lalomanu, alofagia Safata. E le alo lau

silasila e tu auala le falemai a o le faamaoni ia o le paia i komiti o le Itumalo e leoleo le falemai tuai ae leai se fomai.

Lau Afioga i le Minisita mo le Soifua Maloloina, o le Aiga Malosi o le Aiga saili malo, ua matou fia piama ma fesoasoani atu i lau galuega. Ua uma ona matou tapena le falemai i Saanapu; ua uma ona fai mea uma e fai ai galuega a le fomai. O le tagi a lenei Itumalo, se alofagia se fomai, ma ua uma foi ona matou savalia le fomai, e faamama avega i lau Afioga, o le Afioga i le alii Fomai ia Lealiifano. E pau le matou tagisa; e a pe a 80 pasene oe 20 pasene matou? Na o se lua aso o le vaiaso, e afio atu se i tagofia le faatafa o le Itumalo. O le augani lena i lau Afioga i le Minisita mo le Soifua Maloloina.

Lau Afioga i le Minisita mo Pulega o Tagata Asiasi Maimoa Mai Fafo, afai e te fia aloalo i se malu o aloalo, ona e afio lea i gatai o Vaiee, Fusi ma Fausaga, e i ai le peninsula e sili atu lona matafaga nai lo i matafaga i Hawaii, le matafaga o lo o momoo i ai le aufaipisinisi i fafo e fia faatupe aua tulaga o malo mai fafo. Aua ou te manatu, o le tasi lenei faamuamua a le Afioga i le Palemia – o atinae tetele faapenei. O le tagi a lou tagata i lau Afioga i le Minisita mo Galuega, Felauaiga ma Atinae Eeseese, lau Afioga i le Minisita mo Pulega o Tagata Asiasi Maimoa Mai Fafo ma lau Afioga i le Palemia, na o se auala lava ma se vai e tatou te amatamea ai, aua a faapea tatou te amata i ina, e puna faimeaa oe, ae fua a taeao.

Lau Afioga i le Minisita mo Aoga, se alofagia lo matou Itumalo i faiaoga. Pau lava lea o le tulaga e aoi atu ai, e le o lava faiaoga. Le uso a Minisita i lau Afioga i le Minisita mo Galuega, Felauaiga ma Atinae Eeseese, e tele atinae i fua o faatoaga o lo o faapea ona auina mai i Safata e faatauina i le maketi. I lau suesuega i le maketi po o ai le Itumalo e sili le toatele o le aufaifaatoaga e faatau talo i le maketi, o Safata. A o le fetagisi a le aufaifaatoaga, ua le lava faatau parts o taavale, o le auala sili lea ona faaletonu pe a e afio i ai i le amata atu i Leulumoega se i paia Safata. Ua ou tagi atu ai i lau Afioga, o le aualatele o le Malo, e afio ai le faiaoga, e afio ai le tamaitiiti aoga o le alii ofisa, o le faifeau ma tagata matutua ma le mamalu lautele o le Atunuu i le amata atu i Leulumoega seia paia Safata. Ou te talitonu e le o toe aoga ona salani, e sili atu ma taua pe afai e matua suatia ma faafou le auala. I lou tulai mai lau Afioga i le Minisita matou te augani atu i lena auala e taua tele mo tagata tafafao maimoa mai fafo i mataaga i Matareva ia ma mataaga i le Parataiso, i Saanapu ma Sataoa, e faasolo atu ai i Tafitoala. E tele mataaga o lo o i ai ae faaletonu le tatou auala.

O le Faamasinoga o Fanua ma Suafa i lau Afioga i le Minisita, na ona faafesili pe i ai se code of ethics o alii Faatonu o le Faamasinoga o Fanua ma Suafa, ona o le atugaluga o le faamoemoe i le aofia o alii Faatonu o le Faamasinoga o Fanua ma Suafa i Faiga Palota ma faiga faatosina? Pe o se tulaga talafeagai ea e tusa ai ma tulaga o

faatosina o Faiga Palota, aua ou te talitonu lou tagata lau Afioga i le Minisita, o le Faamasinoga e tumaoti? Ia na ona ou tuu atu i ou tafatafa.

O ni manaoga faivavale na lou Itumalo; o ana faatoaga o lo otulaga lelei lau Afioga i le Minisita, pau le matou aioiga se i alofagia, alofagia le maketi i fafo. Ia alofagia lo matou augani atu, pe faatauva pe fai e le Malo, ae ia lava mo le auina atu o fua o faatoaga ma faaeleeleaga o lenei Itumalo, ua matua fau ma soloi i Safata.

Ona ou faapea lea, faafetai i lau Afioga i le Fofoga Fetalai, faamalo tapule, faamalo faatoatoa.

Faafetai i lau Afioga i le Palemia, faafetai i lau Afioga i le Sui Palemia ma le afio o Minisita o le Kapeneta, i le faafoeina o le Sa o lo tatou Malo. Lau Afioga i le Palemia, o oe o le tautai matapalapala, e leai se ogasami o Samoa e te le i alofaiva ai, o mama na.

Ae ou te faafetai atu i lou Itumalo i lau pule to ma lau pule faaaloalo, ou te le sula se fala a o se ie, ou te faamalo i le faga i puna ma ou faaatu i le faga i foa, ou te lalau i papa ma lalau faamalo i le faga i paau; aisea? Aua ua ea lou tagata, ua e faatupu ma faatamalii, ua e faafaleupolu, ua to lau puleto ma lau pule malo, ua ou seei i le nofoa o lo ta Itumalo, aumai lau faatuatua ia te au aua le taumafaiga o upufai o Malo.

Lou nuu e o Saanapu, o le tala e fai i poula pe a tetele, “A, ua le ole lea.” Faafetai le faaaloalo, faamalo le faaeaea. Lou nuu e o Sataoa, a faalele pepe le lamutu ma taimi sa o le Atunuu ma faalealea measina, ona faapea foi lea o le Atunuu, “Sao faalalelei.” Sataoa, sao faalalelei, faafetai alofa. Lou nuu e o Lotofaga, o le upu i le faatamasoaliiga o el gataifale, “Atu e atu e; ua atu e lou tagata, aua o lou toala na ou fanau ai, i lau puleto ma lau pule faaaloalo,” faafetai Lotofaga. Niusuatialemanu, o le tala a le tamaitai o Tilafaiga ma Taema ina ua taunuu i Poloa fai mai, “E itiiti le alamea.” E laititi le alamea ae ua ena le vasa, talu ai lau pulepule tetele Niusuatia, ua e faatietie ai au i le maa salafa, lea ua ou seei ai i le nofoa o lo ta Itumalo.

Lou nuu e o Vaiee, nuu ma le malae i Togamau, ua ta usu le pese a le faipese ma ou lagi leotele, “Ua lalelei oe, ua lalelei oe Vaiee.” O le pese a le Atunuu, “Ua tasi lava oe, ua tasi lava oe.” Lou nuu o Fusi, o le suafa o lou malae ua e fatu pule, lea ua e fatu pule fatu to, ua to lau pule i lou tagata; faafetai tasi faavae, faafetai i lou silasila i lo tatou nonofo ai, malo alofa. Lou nuu e o Fausaga, o le igoa o ou malae o Logogalu ma Moemanogi, ae ua logolelei le galu; e ui ina moe faasau le tama, ae ua manogi le sasala i lau faaaloalo, faafetai faatupu, faafetai faatamalii. Lou nuu e o Tafitoala, o le sa e faalele le tele o lau alaga, ua ou faia le alaga a le tamaitai po o le Tupu Tamaitai o Seepa, “Ua itiiti mea na ou faalogo i ai i mea ua ou vaai i ai.” Faafetai le alofa, faafetai i lau pule.


Lou nuu e o Mulivai; a, lau Afioga Leota, ua malo pule ua malo afua ua maua. Faafetai faatupu, faafetai fatamalii

i lo tatou nuu i Mulivai. E le lava le gagana, lou Itumalo e faafoi atu ai se upu ae o se motugaafa a o se motuga faamatalaga e tali ai lo outou agalelei, aua ou te le i oo atu i o outou maota ma o outou laoa. Ou te le i oo atu i o outou tufua ma o outou malae tatou te silasaga, e leai se papapalamalo e leai se tupe ma se auro na ou fofola i ou malae. Talofa, a o lea ua to lau pule ua e faatietie, faafetai, faafetai Safata.

I lenei afiafi lau Afioga i le Fofoga Fetalai, lau Afioga i le Palemia ma le paia o le Kapeneta ma le mamalu o le Maota ua sasao nei; o le tala a le tamaloa mai Safata, “Ia oso moegaluaga ia oso pea le ia o le fau ma ia maua pea le tofa loloto ma le auafa tatala i lau Afioga i le Fofoga Fetalai.” E pei ona ou fai atu ua alagatatau le filifiliga aua e te tausi Tupu e te tausi aiga, ua e masani e faasino, ua e masani e tusilima, ua e masani e atiati le pouniu, ua e masani e toa i ai le na. Ia alofagia e le Atua lau Afioga i le Palemia; le Sui Palemia, ia mamao pea le tofa aua lo tatou Malo ma ona upufai. Afioga i Minisita o le Kapeneta, ia manuia ma ia fitifiti ala, Afioga i Minisita Lagolago aua ne i lape lau foe. Liliu le vai o Sinafatulua i lau Afioga i le Taitai o le Itu Agai, ia alofagia e le Atua lou soifua. Ia maua se tofa aua le agaia o le Malo faapea foi le afio atu o afioga i sui usufono tutoatasi ma lo matou nofonono atu, matou ai ai i ou faiva ma matou faapea atu, ia manuia.

Ia manuia lau Afioga i le Fofoga Fetalai ma le paia o le Maota, soifua ma ia manuia.

Tofa TUILOA ANITELEA



Itumalo Faaalalafaga:

Gagaifomauga Nu.1

Filifilia:

13 Aperila 2006

Faatauto:

20 Aperila 2006

Lauga Faataupou:

13 Iuni 2006

O lou igoa atoa o Tuiloa Anitelea o le Minisita Lagolago mo Tina ma Tamaitai, Taitaifono foi i Pulenuu i Savaii.

O paia o Samoa i Manua seia paia Falealupo, o paia ma sa ma faiga, o mamalu foi ma taeao, o le a le oo i ai se leo o Safotu. Ae faafetai i le Atua i le avanoa ua tuuina mai e lau Afioga i le Fofoga Fetalai e fai ai se sao o lenei Itumalo aua le faafogafogaaga a Samoa.

Lau Afioga i le Fofoga Fetalai, se i ou oo ane lava i lo matou nuu i lana tapuaiga. Le paia o le Afaigaluega paia a le Atua faapea le paia i Sao e fa ma Aiga Sa Umalau, le Ati Pouniu ma le Faasau ma le fetalaiga ia Lavea le alii o le itu, Timu ma Uuga.

Ona ou oo mai lea i si ou nuu o Manase i le afio o Taito ma ona alo, e faapea foi le fetalaiga i le Tauasa. Malo fai tatalo, Faafetai i lo outou saili malo ua tuuina mai ai au i le

Saunoaga Faataupou a Sui Usufono 1961-2011

Maota o Samoa e fai ma auauna aua Samoa mo lona lumanai. Ia tapuai ia ma le manuia, tui mai le mulipapaga ae se i alo ane la outou auauna aua se sao mo lo tatou Itumalo ma lana tapuaiga.

Lau Afioga i le Fofoga Fetalai, e muamua ona ou faafetai i le Minisita ma le Malo, i lo matou falemai ua loa aso o tau aue i tulaga e masani ai le naunau. Peitai ia o lea ua tali mai le Malo, faafetai i lau Afioga i le Palemia ma le Kapeneta, aemaise foi le Tamaitai Minisita mo le Soifua Maloloina ua tulai mai nei, e momoli le faafetai tele; ia viia le Atua i le faaaaupegaina o le tofa ma le faautautaga aua Samoa mo lona lumanai.

Ona ou oo mai ai lea i lo matou Itumalo. O le Tala Faatatau o le Tupe ua folasia nei i Malae, faafetai i lau Afioga i le Minisita o Tupe ma le aufaigaluega mo le lufilufiina o lenei Tala Autu o le Tupe mo le 2006/2007, viia le Atua i la outou galuega. Ia tau ia ina ia to ifo manu aua lo outou faiva alofi aao mo le tautuaina o Samoa nei ma a taeao.

Lau Afioga i le Fofoga Fetalai, ou te manatu tasi lenei Tala Faatatau Autu o le Tupe ua maua ai tagata tafafao maimoa mai, o se tupe maua lea a lo tatou Atunuu mo ana atinae. E tasi lava le mata o le afi po o le volcano o lo o tu i Salafai i tua ane o tuamaota o lo matou Itumalo. Pau lava le mea matou te talosaga atu i lau Afioga i le Minisita mo Galuega, Felauaiga ma Atinae Eeseese, ia alofagia auala e lua o lo o tau i ai i lea mata o le afi. E tele tagata tafafao maimoa mai tele foi tagatanuu o Samoa o lo o aumau i fafo atu, aemaise Hawaii ma nuu e i ai mata o le afi e fia tulituliloa ma camp i le mea lea. E talosaga atu ai i lau Afioga i le Minisita mo Galuega, Felauaiga ma Atinae Eeseese.

Lua: e i ai le isi o matou auala e fesootai ma le auala lea, e le o naunau atu nei ina ia ta mo galuega e masani a lenei nuu i auala vaapiapi ae peitai, o le agaga maualuga mo le tauleleia o le Atunuu mo le va i fafo ma ana paaga. O le agaga lona matou te naunau ai ina ia faaleleia ma tulimatai ia vaega o le atinae a le Atunuu aua e maua mai a tupe mo nei ma a taeao aua le lumanai o Samoa. E talosaga atu, e i ai foi le isi mataaga o le matou nuu e taua o le Toluaiava; le ava lea o lo o taumamafa ai le Atunuu i lona alii taeao, le ava na motumotu mai Salafai na maua ai ava o Upolu lea ua alii taeao ai le paia o le tatou Atunuu. O lo o i ai la mea a Maligi sa i ai, sa i ai le auala sa fausia e Maligi. E talosaga atu i lau Afioga i le Minisita o Galuega, e tasi lava le D8 ma le loli e tasi maua lona auala e toe susue ai le auala lea e tau i le mea na i ai Maligi i aso ia i le 1946 na le 1944. Ou te talosagaina lea auala.

O le isi vaega o le talosaga; o le auala lea e faaoga e le Malo i gauta o Manase o lo o i ai pou a le SBC ma le Telecom ma tulaga faapena ae paga, e tigaina taulelea o le matou nuu e faaliliu mai taavale ma tulei mai i tai aua e maseese le auala; ae ua loa tausaga o galulue lenei Itumalo e apo ma sapai le Atunuu ma le Malo i ana

Faigamalo. Ou te talosaga atu ai mo le faaleleia o se auala lelei mo lona foi mataaga a le matou nuu; ua fefefe foi i mea o galuafi ma galulolo ia e tau soo mai. E i ai la le talosaga i lau Afioga i le Minisita o Galuega, Felauaiga ma Atinae Eeseese mo se auala e toe lalaga ai le auala o Maligi ina ia tau i lea mataaga o le Toluaiava. Ia tatou naunau i ia fuafuaga a le Atunuu o Samoa leaga o i ina na taumamafa ava ai le atunuu mo neionapo; ou te talosaga atu ai i lau Afioga i le Minisita o Galuega.

O lona tolu, ua tolu asiagiaga i le matou malae. I le Nofoaiga talu ai na lua asiagiaga na ma feiloai ai ma le Tofa Hon Ulu Vaomalo Ulu Kini, ua lalo ulu ma niu, ua lau ese maa ae leai se malae o faia. E talosaga atu ai i lau Afioga i le Minisita o Aoga, Taaloga ma Aganuu, ia alofagia le malae. O le nuu lenei, o le nuu a o taaloga; o le lakapi, o le voli, o le sumo, o a uma mea uma e i totonu o le nuu lenei ma le fusu. O au foi le isi tagata sa fusu na tautaua ai ma Rambuka. O le agaga lona ou te talosaga atu ai i le malae lea e tu ai se matou faletaalo ina ia aoga mo tupulaga fai ae o lenei Itumalo.

Ona ou oo mai lea i le matou vai ua taua o le Vaisafee; o le vai lona ua fano ai Toga i le taimi a o pologa Samoa i le taimi o Tuna ma Fata. Ana leai le vai lona o Vaisafe'e e aoga mo turisi i le taimi lenei a pe le paipa o lona uiga o Vaisafee e taele ai turisi ae o le naunautaiga, o tagata tafafao mai fafo. O le mea la lona matou te tatalo atu ai i lau Afioga i le Minisita e fitoitonu ma ia fuafuaga, e lafo atu i lumamea i le Maota o Samoa tatou te lufilufia ia fuafuaga ua matou talosaga atu ai.

O le mea lea e tu ai le pou i luga a le Malo, ou te iloa o le tasi lona foai a lenei Itumalo i le Malo ma o le tautua foi lona a lenei Itumalo ae petai ua loa aso o la e tutu ai pou. E manaomia foi la e i matou ina ia fai ai se malae tapolo e faatatau, o lalo beach fales, o luga le malae tapolo a o fale i autafa o le Toluaiava. E talosaga atu mo lea faamoemoega o le Itumalo nei ma a taeao aua le lumanai manuia o le Atunuu.

Ona ou oo mai ai lea i le eletise i Salafai. E tolu pe i le po ae tasi le pe i le ao. O meatotino a nuu ma aiga ua aafia TV, aafia pusaaisa. E mafua, ou te le faaleagaina le aufaigaluega ma le Pulega, ae ou te fautua atu ae a pe a fai se afi e tusa lona kilo uati i se 1000 kilo uati e control ai le motu tele ia Salafai. Amuia iinei, amuia Upolu nei e pe vaega, ae o Salafai e asa loa le control atu i i Salelologa, e pe atoa lava le motu tele i Salafai. E melt uma mea uma i totonu o pusaaisa; o le uiga lona tou te le o silafia atu le mea o lo o tupu nei i Salafai. O kamupani, o le aufaipisinisi, e melt pusamamoe vaeatu le faafofoga a le Atunuu. O lona uiga lona o le talosaga atu ai, ae a pe a tuu ifo se isi tupe o le Tala o le afi, se generator tele. E moni e tetele afi la e i Salelologa ae na o le tai 30 i le 40 kilo uati, ae fai se afi e ova ma le 1000 kilo uati e support ina le big island of Savaii. O Savaii foi ua tele ai le turisi, e fefefe foi turisi ia, a pe le afi ua tagoto uma meai vaeatu

le faafofoga a Samoa. O le agaga lena e talosaga atu ai i lau Afioga i le Minisita e fitoitonu ma le matafaioi lenei.

Ou te fia oo foi i le mea lea o lo o tupu nei i le tatou Atunuu. O le Faiga Palota ma ona sui faatutu. Ua femeiai ou manatu ma lou mafaufau i le mea lea ua tupu nei. O le mea muamua, ae a pe a toe teuteu le Tulafono; taga le faatosina ina ia aai ai tagata o le Atunuu i e o le a o i tofi; a ua gau a gau, tu mai tu, ae faasino mai lava e le Atua le tagata e sau e nofo i le fale lenei, pe miliona pe a ae pau lava le mea o le me i a o lea mea fai le faamasinoga. E fautua atu i le Ofisa o Faamasinoga, e fuafua gata tele lenei mea o le faatosina, faatosina i le taimi puupuu lea e laga mai tagata o le Atunuu ia i tatou, avatu i ai sia mea ae a tatou le tutu a ona ua pau a.

O le isi mataupu ou te fia oo i ai o le Resitala. O le Resitala e matautia, o le aiatatau a le Malo ia faamauiina, ae faanoanoa le mafaufau i le pulega lea e pulea ai nuu o le mapo na o Samoa i ana upufai ma le puipuiga aua a fika i i ai, e asa loa le faiva o le Malo tapa i nuu mo se fesoasoani a le malu o le Malo. Ae o le mea lea e tupu nei, e sau a le isi totogi ana tupe ae le fai nuu; e le faia ni monotaga i le nuu. Na ona uma lava ona resitala sau loa nofonofu i Apia ma faalavelave ai i taimi o palota. A oo la i taimi o le palota ae malo e te le iloa la po o le a le mea e maua i le sui lea leaga foi e le iloa tautua, e le silafia tautua? O le agaga lena, liuliu ane le faamoemoe mo ia fuafuaga a le Atunuu aua o le aganuu a Samoa e mapo a le Atunuu o Samoa ma lana aganuu. Afai e fai pulega a le aganuu o le puipuiga o le Atunuu; ae o le mea lea e tupu nei leaga e fai mai o le aiatatau ua uma ona resitala ae sau nofonofu i Upolu nei ona tu ai lea.

Lona lua; tilotilo i le Tulafono o lo o faapea mai e tolu tausaga e nofo ai i Samoa. O lau fesili; ia o au foi na ou laititi mai a faatoa ou sau i le tausaga nei e fai au mea o le palota, ou te le i oo mai lava i Upolu nei talu ona ou ola. E talu lava ona ou ola faatoa ou oo mai lea i Upolu i le taimi na sue ai ni au tama e support ina au i le palota. O le mea la ua tupu, a faapea la o le matai mai Niu Sila e sau nofo i le aiga o lana avā vaeatu le faafofogaaga a le Maota ma le paia o le Atunuu, uma le tolu tausaga o nofonofu a i le aiga o lona toalua ae matai mai Safotu, e oso a i i i le palota ma nofo ai a i le aiga o lana ava. E pei o le uiga lena se i liuliu ane lea mataupu na o ni fautuaga, aua o le tolu tausaga lea o lo o faapea mai le Tulafono; tolu tausaga i Samoa ae leai se faapea e tolu tausaga i pulega a le nuu ma afioaga. E tasi lena anava o le tatou atunuu po o fea le aiatatau o fai, po o fea le aiatatau o nuu e puipuia ai le aganuu aua le Atunuu. O le agaga moni lena o lenei sui usufono e le faatonuina pe aoaia, ae le feagai foi le Matapia ma le Manaia ae na ona faufautua atu se i toe liuliu ane ia vaega o le Tulafono.

O lona lua; o aso o le sailiga tagata o le palota ua ou vaai o Siusega, o le aai fou lea i Vaitele ma Vaialele. Ou te le iloa i se taimi nei aua faatoa ou oo mai a lea i ia nuu; ou te

le iloa po o fea e give way a o fea e stop. A o magaala ua ova magaala, ona give way lea o le aega a tu atu le taavale e leai ni taofi e toe solomuli, ae a pe a give way le aega e alu i luga ma alu i lalo ae stop autafa. O le uiga na o mea e pei e foliga na o ni mea e na ona vevele foi lea ae le faia. O le isi mea e saili gata mai Savaii ma tua mea e i ai aiga, ae o magaala ia e le iloa po o fea e sue i ai tagata. Ae a pe a fai ni road codes foi nei e faasino ai ala? A ua leai ni igoa e faaigoa ai, faaigoa ia Atamu ma Eva ma le apu ma mea uma faapena; ae faasino ai lea magaala ma lea magaala e afifio mai tagata ma matamata ma silasila pei o la atunuu. O la atunuu e tasi a le poloka o ta faalogo atu o Henderson, ia o ta tilotilo atu o Hamilton. E faapea le talitonuga o le mea lea e i ai tatou, ae o tatou na o mulugaveve a ona taatitia ai lea e pei o ni lapisi. Afai ua le faia ni faasinoala ma fai le mea e iloa ai e tagata, aua a omai Savaii e le iloa po o fea le mea e sue i ai aiga. Ia ona o atu lea o taavale ua fa magaala tau fai tutu loa tagata ua le iloa po o ai le taavale e alu a o ai le taavale e nofo. O uiga na o fautuaga mo le Atunuu; o faamoemoeaga la o le tatou Fonotaga, o se motugaafa; o se lipoiina o le faivaalofiaa lau Afioga i le Palemia, e faapea foi le Kapeneta ia ma i matou nei ua taua o Minisita Lagolago. Ia tatou lalagaloina Minisita, a i ai foi ni mea matou te talosaga atu ai ia outou Afioga, ia talosaga mai foi ia te au i ni mea tau tamaitai ma teine aua o au lea ou te Minisita Lagolago mo Tina ma Tamaitai. A faapea e i ai ni mea tou te mananao ai, tau mai ia te au ou saina uma. E leai se mea o le a popole ai i lena mea; le tatou Atunuu atoa a i ai se mea e manao ai la e ou te nofo i Savaii, na o le saina lava o le pepa ok. So o se ituaiga fafine ma so o se ituaiga teine tau mai ia te au. O a mea e mananao ai Itumalo taitasi se i tulou, na ona tau mai lava ia te au.

E faamalie atu i le faafofoga a tina ma tamaitai e faapea foi le lalagaina o le measina o le toga a Samoa, ia ona o upu tuusasao lava ia o le Malo e tuusasao aua e le iloa e le tamaitai le tamaitai e le iloa foi e le tina le tina. Ae ou te tau atu tamaitai ma tina o le Atuanuu ma augafaapae ia o le talitonuga lena. Faamagalalo mai se leo o le sui usufono mai Safotu.

O lagona la o lenei aso, o a ni mea tatou te lufilufiina mo lenei lima tausaga alofa mai le Agaga Paia. Ia fesoasoani le Agaga Paia i lau Afioga i le Palemia; ia fesoasoani le Agaga Paia i lau tofa faatupu aua le lufilufiina ma le lufilufi aaina o fuafuaga lelei mo le Atunuu o Samoa. E faapea foi ia outou Afioga i Minisita – ia alofagia e le Atua lo outou faiva alofi aao o le mapo lena o le Atunuu, o le mapo foi lena o Samoa ae tulimatai i le La e tasi o le Atua mo Samoa, o Samoa foi mo le Atua. O o tatou moomooga ia lafo lo outou finagalo ma le tofa liuliu ma le faautautaga oo i le Maota o Samoa aua le faafogafoga a Samoa aua ana upufai.

A i ai se leo ua laa vale i la outou faafogafogaaga Samoa aemaise o le Maota nei, ia lafo ia i nuu e le o i ai ni tagata,

ae aumai lo outou finagalo ma avatu lo matou faamoemoe, tuu i le Agaga Paia e lafoai i le Agaga Paia o le fesoasoani sili lea, na Afio Iesu Keriso i le lagi ae avea i tatou ia tasi ia te Ia.

Lau Afioga i le Fofoga Fetalai ma le paia o le Maota, ia fesoasoani le Atua o oe o le Tamā faafoe. Lau Afioga i le Fofoga Fetalai ia tu mai i le lagi ma afio mai le lagi le musumusuga o le taitaiga o le Maota o Samoa aua Samoa ma lana faafogafogaaga. Ia maua le lagi e mama ma lou lagi soifua aua le faatonuina ma le laveaiina o finagalo ma manatu aua le faafogafogaaga a Samoa. Ia lagi e mama lau Afioga i le Palemia faapea lau Kapeneta, lagi e mama lau Afioga i le Taitai o le Itu Agai, lagi e mama Sui Usufono o le Fono a Sui Tofia ma lena itu o le malu; lagi e mama le paia i sui usufono Tutoatasi. Ia maua la outou tofa mai le Atua e faafoe ai le Atunuu ia tumau le la e tasi o le fealofani sili lea.

Ia manuia le Palemene faafetai.

Afioga Hon VAAI PAPU VAILUPE



Itumalo Faalalafaga:

Vaisigano Nu.1

Filifilia:

13 Aperila 2006

Faatauto:

20 Aperila 2006

Lauga Faataupou:

16 Iuni 2006

Faafetai tele mo le avanoa i lenei taeao i lau Afioga i le

Fofoga Fetalai, ma e afaatasia ai se lagona i le faafetai ma le viiga sa e molia i lenei taeao ua tatou maua ai foi lenei aso fou i le lagi e mama ma le soifua maua.

Ou te faatulou atu ai i le paia o le Maota, o paia foi o le Atunuu, paia faa-Ekalesia. O ou paia Samoa o lo o faafogoga mai o le a ou le oo i ai aua e talitonu o paia ua taoto ae o se alaoo. E pei foi o le aso ananafi, sa tatou molimauina ai le taoto ai o le Sa o le Afioga i le Tupufia i totonu o le Maota nei e afaatasi atu ai i ona toe sauniga e faatofa atu ai i lana auauna. E faafetai atu ai i le Aiga Sa Faamuina, aemaise foi le Masiofo ia Akata ma le Aigaalii aua foi faaaloaloga sa maau i ai i le aso ananafi. Tau ia ina ia manuia le folauga ma le faigamalaga a le Afioga i le Tupufia ma ia pau foi se Toa ae toe tulai mai se Toa i lea Itumalo.

O le taimi lenei lau Afioga i le Fofoga Fetalai, o le a ou oo atu ai loa i le Tala Faatatau o le Tupe ae muamua ona ou faapai atu i lou Itumalo. E muamua ona momoli le faafetai i lou Itumalo aua le Faiga Palota i lenei tausaga i le sailia o se sui usufono e avea ma o outou sui i le Maota Fono nei i Tiafau. E avatu ai le faafetai tele aemaise Auauna paia a le Atua i totonu o si o matou afioaga, i le Susuga i le Toeaina Kirisi Tuia Isaako ma le faletua ia

Ianeta aemaise le nofo a alo. E faapea foi le Susuga ia Pepa Taavao ma le faletua ia Ailini aua lava le nofo taputapu mai a o alofaiva lo tatou Itumalo i le sailiga tofi. E le gata foi i lea o le Susuga i le Sea ma le faletua, Aiga ma Salafai faapea foi le Susuga i le Faipule ma le faletua, ia aemaise le Susuga i le Epikopo ma le faletua, aemaise ai o le afioaga o Aiga ma Salafai. E le malo uma ni sa, e le mua uma foi ni vaa, ae faafetai atu ai i e sa lagolago mai ia te au, o ou aiga, o lou nuu, o latou uma sa lagolago mai, ia faafetai aua le sailiga o se sui usufono i totonu o lo tatou Itumalo.

E avatu ai foi lau faafetai ma le faamalo i sui sa matou tauva i le Afioga ia Masoe faapea le Afioga Lealiifano. Ia taputapu mai, tatalo mai, aumai lua faamanuiaga ma le tou faamanuiaga, aua o le tatou galuega e talitonu o le galuega e fai faatasi aua se manuia o lo ta Itumalo aemaise lo tatou Atunuu ma lona Malo tau atiae.

Lau Afioga i le Fofoga Fetalai, e muamua lava ona ou faafetai atu i lenei taeao i lau Afioga i le Minisita mo Galuega, Felauaiga ma Atinae Eeseese. O lo matou nuu sa faailoga lona 100 tausaga i le Aso Lulu o le vaiaso nei, e atoa i ai le Seneturi lea talu ona faavae se lotu i totonu o lo matou nuu o Auala ma Vaisala. O lea e faafetai atu ai i lau Afioga i le Minisita mo Galuega, Felauaiga ma Atinae Eeseese, e tusa ma le tali lelei mai ma ua e faataunuuina ai se talosaga na tuu atu i lau Afioga i moli auala i totonu o lo matou nuu o Vaisala faapea foi ma Auala. Ua toatele tama fanau na malaga mai fafo a lenei nuu ma ua maofa foi i latou ina ua oo mai faapea ailoga o le tulaga lea ua i ai ia si o matou afioaga ona o moli auala ua mumu uma, vagana ai lava e le i atoatoa lelei.

A o le mea sili ma faafetai ai ua malamalama; ua tau malamalama nisi vaega sa pogisa. Ia ma o le tulaga lena e foi atu foi i latou, ma ua faafetaia. Sa fesiligia; o ai le Minisita lea sa...? Ia o le Afioga i le Minisita mo Galuega, Felauaiga ma Atinae Eeseese. po o le Afioga foi ia Aliimalemanu i Neiafu.

Lau Afioga, o le taeao nei lava ia sa talosaga mai ai foi Aiga ma Salafai ona e i ai foi lo latou faamoemoe i le Aso Lulu o le vaiaso o lumanai nei, o le umusaga foi o le latou foi malumalu. O le talosaga la i lau Afioga e tuu atu i lenei itula, o ni moli auala foi ona o lo o lavea foi latou i le pogisa pe a oo i po. O lea la ua ou talosaga atu ai ma le agaga maualalo i lau Afioga i le Minisita pe e te alofagia ona sa tau mai ia te au fai mai, na o ni nai moli lava se luasefulu mo le latou auala faapea ma magaala ia o lo o nofoia e le afioaga e alaala ai tagata.

O le talosaga lena ua avatu e taatia atu i ou luma, po o le a lou finagalo, a o se faamoemoe o lo o i ai, Aiga ma Salafai, ia le umusaga o le latou malumalu i le Aso Lulu ma le Aso Tofi, ma ua logo mai ai foi au e valaauina faaaloalo lau Afioga i le Minisita mo Galuega, Felauaiga ma Atinae Eeseese faapea lau Afioga i le Palemia.

Saunoaga Faataupou a Sui Usufono 1961-2011

Ae ou te le i laa ese ma moli auala lau Afioga, e pei lava ona ou fai atu, ua manaia lava ia tulaga ua i ai moli auala. Pau lava lea o le mea toetiiti lava; toe tai valu lava nai moli mo Auala faapea ma Vaisala. O lo o i ai ia auala galue o lo o nofoia foi e tagata, a o le tulaga lena o lo o i ai le pogisa, ia ma o lo o i ai nai moli o i ai ae le o ola. O lea e talosaga atu ai ma le agaga maualalo i lau Afioga i le Minisita ona o moli.

O le manaia o le matou sauniga i le ao ae pau lea o si pona laitiiti lava e pei ona ou talanoa atu ai i lau Afioga, o le pe o le paoa. E pei foi ona taua e nisi o sui usufono mai Salafai ia lea vaega, ma e faatolu ona taofia la matou sauniga ona o le faaletonu o le paoa. O lea e talosaga atu ai i lau Afioga, a manaomia se...aue e pei lava e tataua ona manaomia se isi afi tele e avatu i o i lo matou Itumalo e lavea ai le Itu Asau atoa, ma o lea e ofo atu ai eleele ma fanua o lenei alaafaga e faatu ai se afi tele aua lea foi vaega o Salafai. E pei lava foi ona molimauina e le Afioga i le Tootoalii, o le motto lava lea a le toeaina - Afai e lelei i Apia nei e tofu le poumoli ma le moli, e faapena foi i Falealupo le lelei o le i ai o le poumoli ma le moli. O le agaga lea e talosaga atu ai i tulaga o mea tau eletise, ona o le faaletonu pea o le alu faaletonu ma pe.

E i ai foi ona o le tulaga e i ai mo nai atinae foi i lea vai Itumalo mo tagata tafafao maimoa mai fafo; tasi lea vaega e faaletonu ai lava ia atinae ae o se atinae foi o lo o taumafai lo tatou Malo ina ia faatuputupulaia ma ia avea o se poutu malosi i totonu o lo tatou Atunuu aua le atinae o lo tatou Malo.

Ona ou oo mai lea i le mataupu o auala galue lau Afioga i le Minisita mo Galuega, Felauaiga ma Atinae Eeseese, ua maea ona faataina le auala galue i Auala.

O lea auala galue sa faataina ae le i tulai mai lau Afioga i le tofiga o le Minisita mo Galuega, Felauaiga ma Atinae Eeseese. E tasi lava le tulaga o lo o talitali mai i ai, e pei foi ona ta feiloai ai, po o le a le aso e fuafua ai lau Afioga ma le Matagaluega, e tatala aloaia ai le auala? E tasi lava le isi auala i le va i i i Auala, o le auala lea e alu i le faleaoga ona e manaomia lau Afioga le fia faataina o le auala lea. E taua lea tulaga ona o le fanua aoga. E le gata i lea, o lo o i ai se auala i ina i totonu o le aai i gauta o le malae o lo o afifio ai le toatele o le nuu. E le umi pe na o se 4 kilomita ma e manaomia foi le faata ona o le tulaga lava lea o le soifua maloloina i le pefu. O lea e talosaga atu ai e tusa ma auala i i i Auala.

O Vaisala, o lena ua taatia atu le talosaga mo auala galue e lua, ae i ai la le auala galue e tasi o lo o misi ai. E talitonu foi lau Afioga, o le auala galue lea e aupito i taua ona o le auala galue lea e le gata o lo o nofoia e tagata ia ae o lo o feooloo foi ia fua o faatoaga o lo o auina atu i fafo e maua ai tupe mai fafo e ala lea i le koko ma le ava.

E le gata foi i lea, o lafu manupapalagi aua e tasi lena auala lau Afioga i le Minisita, o le a se aso e finagalo i ai e

fia silasila i ai lau Afioga e faaopoopo atu le isi auala galue lena.

I totonu o le afioaga o Asau, ia o lo o i ai se auala o lo o tumu ai ma toatele le afioaga o lo o alaala ai, e manaomia foi le fia faataina e pei o le auala galue lea a le afioaga lea i i Asau i Matavai. Lau Afioga i le Minisita, ua maea ona folafolaina e le Afioga i le Minisita talu ai, o galuega ia o lo o fuafuaina mo le tausaga nei. Na ona toe faamanatu atu i lau Afioga ina ne i te i ua sili loa lau faasoa, ae galo ai auala galue o lenei Itumalo.

Ona ou oo mai lea lau Afioga i Taligalu. O lo o i ai le taligalu i Vaisala masalo o le $\frac{1}{3}$ po o le $\frac{1}{2}$ ua maea ona faatinoina. O le saunoaga a le Afioga i le Minisita sa i ai talu ai, o le isi vaega lea e totoe o le a faamaeae i le tausaga nei. Ia o le faamanatu atu lea i lau Afioga i le Minisita taligalu o le afioaga o Vaisala. Mo le silafia e lau Afioga ma le mamalu i le Palemia ma le Kapeneta, ua lamatia ona faleaoga. E le gata i le faleaoga, a o falesa ma isi foi aiga o lo o i ai, ma a fausia le taligalu, ona talitonu lea o le lagona e matua tele lava lona faasaoina pe a tutupu mai nisi galu tetele i le lumanai. O le taligalu e fia fausia i le afioaga foi o Auala lau Afioga i le Minisita, ma i i afioaga o Aiga ma Salafai i Asau. O taligalu ia e talosaga atu ai i lau Afioga ina ia silasila ane i ai ma tuu ane i ou tafatafa aua fuafuaga a lau Afioga ma le Matagaluega ma le Malo.

O le tulaga i Vai, o le Itumalo lenei atonu ua faaalua e nisi o sui usufono, o se tasi lenei tulaga e mafatia ma o lo o mafatia ai le itu Asau atoa, o vai taumafa. O vai o lo o i ai nei, o lo o faaoga pamu. O le talosaga e avatu i lau Afioga aua o le taimi o lo o kiina ai le vai i totonu o lo matou nuu, o le 7 i le taeao i le 10 i le taeao ona pe ai lea faatoa toe ola mai i le 5 i le afiafi i le 7 i le afiafi. O lo o faapena lava la ona taumafai e posiposi ma fuafua le suavai.

E i ai la aso, e pei ona ou taua le aso lea; e manatu pe leai se auala e fai ai ina ia ola i le aso atoa le pamu aua le manaomia o le suavai ina ua toatele atu tagata. E le tau tolaulauina atu le manaomia o le suavai. Faafetai o lo o lelei lava le tulaga i le vai ae silafia foi, o vai ia e faaoga ma maua e matou mai lalo o le eleele, e le mafai ona taumafalia. E faaogaina e fai ai tagamea faapena foi, tulou, o fale le taua. A o vai e taumafa, ia o lena e silafia e faapale vaitimu e faatali i ona tane. O aiga uma foi la, e taumafai lava ia tofu aiga uma ma le tai 2 tai 3 tane aua vai taumafa.

Ona ou oo mai lea i tulaga o tane, atonu o lo o i ai fesoasoani e avatu o lo o maua i le JICA ma le EU ai le tulaga lea o tane vai. E talosaga atu ai la i lau Afioga, aemaise lava i Itumalo e pei ona ou taua, o le vai taumafa, e le mafai ona taumafalia vai ia o lo o maua mai i le system talu ai e mai. E mai vai e le mafai ona taumafalia, vagana la vai ia e faatali i tane mai luga o fale, o vai na o lo o taumafa ai lo matou afioaga. O nuu la nei e tolu e moomia lava tane, pe faamata e le mafai e le tou

Saunoaga Faataupou a Sui Usufono 1961-2011

Matagaluega ona silasila ane i ai pe o le a se fesoasoani mo le faatinoga ma faatupe ai tane i se mea e alu tasi i ai pe sau tasi i ai po o se reservoir foi lea e mafai ona sau ai le vai lea e taumamafa ai.

Lau Afioga i le Fofoga Fetalai, o le a ou oo atu i le Minisita mo Faatoaga. Lau Afioga i le Minisita mo Faatoaga, e i ai a le talitonuga o lenei Itumalo ma lenei sui usufono, po o le a lava le tulaga o lo o i ai le tatou Atunuu, ou te talitonu ia tatou toe foi i le tatou laueleele mo le agai i luma. O le tulaga foi i le vaavaai atu i lenei vaitau, ua le o lava taumafaiga a le Matagaluega e foia ai faamai eseese ua oo mai ua afaina ai meatoto e pei o le ava. Atonu o lea ua manuia mai taumafaiga i le mea na taofia ai la tatou ava a o le mea lea ua maitauina, ua i ai foi le faamai o ava. Ua lelei mai nei le tulaga ua i ai le ava ua toe taliaina, ae ua i ai foi le tulaga lena ua faavaivaia ai loto o le aufaifaatoaga o ava ma le au totoava. Atonu lava o i ai afioaga o la lava e saogalemu ae o afioaga e pei o lo matou Itumalo, ua i ai le tulaga lena e pei ua sasama uma lau ua pei se lega. O le tulaga lena e talosaga atu ai i le Matagaluega ina ia tagai totoa po o le a se fesoasoani atu a le Matagaluega e foia ai ia faafitauli. Atonu e sao lava i se itu faapea o faamai ae ui i lea, e tatau lava ona tatou vaavaai ma silasila le Matagaluega i auala e foia ai ia faamai e oo mai i fua o lo tatou laueleele aua o lo tatou tamaoiga moni lea. E malosi se agaga aua e tumau lava ma e pei lava o se lagona na ou faaali atu, lau Afioga i le Minisita mo Faatoaga, se i alofa silasila ane i le tagi mai a le aufaifaatoaga o le toatele po o le majority o lo tatou Atunuu o le aufaifaatoaga, ina ia silasila ane i ai e le gata i lea o ni maketi aua fua o laueleele, o a latou faaeleeleaga o lo o taumafai i ai aua lava le atiaeina o lo tatou Atunuu.

Lau Afioga i le Minisita mo le Soifua Maloloina, a soifua maloloina tagata o le Atunuu, ou te talitonu o le lelei foi lea. E i ai se manatu, o le soifua maloloina o se tasi tagata soifua, e amata mai lava i lona tuputupu ae seia oo ina matua. E mafua la se lagona ona o lenei vaitaimi ma lenei vaitau ua tele faamai eseese aemaise lava le faamai lea o le suka ma le toto maualuga. O lea lava e pei e sao, e ui lava o ita e le o se fomai ae faalogologo atu i le pogai ma le mafuaaga, o le taumafa lava e mafua ai. O le suka o le ai measuamalie, ae se i tagai ia la i nei aso i tupulaga ma tamaiti laiti ua tau le feinu i ni vai auli, o le vai suamalie lava.

E le gata i lea, ae o mea lololo o lo o aumai nei i fafo. Ae a pe a tagai i ai lau Afioga aua o i tonu lava e i ai le soifua maloloina, i mea e tausi ai le tagata ma mea e taumafalia mai lava i le tuputupu mai i lona laitiiti se i oo lava i lona matua? Ae a malosi la, lelei le mea e taumafa ai, e toaga ai foi. Atonu o le isi tulaga lena e mafua ai i tatou nei e oo loa i se tulaga foi lea po o le 50 tausaga, po o le 60 ua tau le mafai loa ona gaoioi, tulou, ua maua i le mai lea o le faapaipaie.

Ona ou oo mai lea lau Afioga i le Minisita mo Tupe. Faafetai tele lava mo lenei Tala Faatatau o le Tupe, ma e le taitai lava le Tala Faatatau o le Tupe ua tuu mai ma fuafuaga o lo o i ai, malo le faasoaso, malo le posiposi lelei. E to lou pulou i lau Afioga i le Minisita pe a uma le Paeaiga lenei ua oo i se piliona lau Tala Faatatau o le Tupe. E talitonu o le atiaeina lava lea o lo tatou Atunuu, e le faigofie ae malo faafetai. Faafetai foi mo le tulaga i le siitaga o totogi, o le tasi lena vaega tele o la tatou Tala Faatatau o le Tupe. E to lou pulou, tulou, i le Tribunal lea; aisea? Faafetai ua siitia ai totogi o le aufaigaluega a le Malo aemaise le tatou Maota nei aua e le na ma se laina, atonu lava o aiga, o nuu, e tua mai lava i le aufaigaluega. E le gata foi i lea o o tatou Itumalo. Ia tailo i ai i tou Itumalo, ae o se mea faapena, o taeao, afiafi, o le a se... ae o lea faafetai ua tau lava le mea e faasoai.

Ona pau lava lea o le mea, o si eseese laitiiti lava o totogi. E talitonu foi e oo foi i lau Afioga i le Fofoga Fetalai e pei e le o gatusa lelei le totogi o lo o i ai lau Afioga ma le tulaga o le Maota Fono nei, e tatau ona siisii i luga laitiiti. E faapena foi ma i matou nei e le oni Failautusi Faa-Palemene. Pau lava lena o si faitio laitiiti ona o tulaga lea i totogi e fai si eseese ma e moni lava, a na i ai foi ni nai alauni e feololo. Ua taunuu lava le upu, e sili lava le i ai nai lo o le leai.

Ona oo mai lea lau Afioga i le \$150,000 lea e taua nei e aumai i Vaega Faaupufai. E talitonu o le vaega tonu lava lenei e tatau ona ave uma i ai le \$150,000. E leai se mea o le a tau manatu ai le HRPP ona ua matua malosi lava, e le manaomia la ni tupe e toe faamalosi ai.

E faapea foi i i le SDUP, ae aumaia lena tupe se i faavae lelei atu ai le matou Vaega nei a le Au Tututoatasi, ona fetai lea. A faapea foi e leai, ia vaelua tutusa ia na o le SDUP ma le HRPP ae maimoa le au tututoatasi.

Ia a le o lena foi, ia tufa tutusa loa ma vaevae loa aumai le tai \$3,000 a le sui usufono ia ona manaia lea.

Ona ua uma lou taimi, e tele nisi mea ae talitonu lava e maua pea avanoa i le Afioga i le Palemia ma le Malo aemaise mea e manaomia i totonu o Itumalo. E le gata foi i lea, o a ni manatu ma ni lagona aua le tau atiaeina o si o tatou Atunuu, e faapena atu se manatu.

O le lafo na ou faatuina o lena ua faafofoga mai i ai le tatou Itumalo. O matai foi o lo o lagolagoina e nisi o sui usufono, aemaise lava le Afioga i le Palemia o lo o lagolago malosi ma ou te fai atu i lau Afioga i le Alo o Malietoa - a talia le lafo lenei a lenei Itumalo, ou te talitonu lava e le toe palotaina lou tofi e lou Itumalo. Po o le a le finagalo o le Alii i lou soifua, e le toe palotaina le tofi o lou Itumalo. E faapena foi i le tofi o le Palemia i lau Afioga pe a talia le manao o le Itumalo lenei. E le gata foi i lea, o lea foi ua faafofoga i isi Itumalo i o latou foi finagalo, o lou ai lea le Palemia, o lou pine faamau lea. Po o le a lava le Komisi o lo o i ai nei, ae talitonu lava e leai o lau Afioga lava o lo o i ai le ki ma le tatala ma le mamalu

o le Kapeneta ma lena Itu aua o le 2/3 o lo o i ina o le tatou Maota.

E faauma atu ai la se manatu i lenei itula, ia manuia lava lau Afioga i le Fofoga Fetalai. Ou te talitonu lava e pei ona ou fai atu, ua tataua lava ona sii i luga le totogi o lau Afioga, ua le talafeagai le tulaga o le Fofoga Fetalai ma le totogi lea e i ai pe a fuafua atu i isi vaega ia.

Ia manuia lava lau Afioga i le Fofoga Fetalai, ia manuia le Maota.

Afioga VAEOLENOFOAFIA TAPASU



Itumalo Faaalalafaga:

Aana Alofi Nu.3

Filifilia:

13 Aperila 2006

Faatauto:

20 Aperila 2006

Lauga Faataupou:

13 Iuni 2006

Faafetai i lau Afioga i le Fofoga Fetalai, ia o le pona lava lea o le au fou na o mai e le lauga ae o lea ua te'i ua lauga. O lea ua uma ona saunoa ma ua uma ona paelago ma folafola tulouna o fetalaiiga ma saunoaga i lenei taeao ma e le toe oo foi i ai se faamatalaga. Ae lou Itumalo, Aana Alofi Nu.3, e faapelepele toe faigata ia te au. Le paia i Aiga ma le Maopu o le Tuiaana, o oe le Falefitu, le paia ia te oe Talimatasi, le Tamaitai ma le Faleaana; afio le Saoalii, Vailli le Laau na Fausia ae tainane le Saoalii Saipaia ma Saipaia, Lilomaiava le Tapaau, le upega malie ma la outou tofa ma upu ia te oe Satuimalufilufi, tapuai maia ae se i fai se sao o Aana Alofi Nu.3

E faamuamua atu manaoga o lo matou Itumalo. E momoli atu le faafetai tele i le Malo ona o le auala galue ua uma ona faamaeaina i Vailuutai ma aula e lua ua uma ona faia i Fasitootai ae vagana ai le auala e tasi o lo o tuaoi ma Leulumoega, o lo o manaomia se faaleleia atoatoa ma le auala i le ala faalava i Satuimalufilufi sa fai i ai se taumafaiga o lo o ua tau faamaea. Mo lo outou silafia a lelei auala ua tele ina uia e tagata ma ua moomia le saogalemu e talosaga ai i moli aua le saogalemu o tagata. Mo lo outou silafia foi a lelei auala, lelei moli ona avea lea ma mea ua sii ai nofoaga o tagata, ma o ina o le a puipui mai ai le mea lea o le omai i urban areas a o le a move within the rural areas so, e taua tele ona o le a lelei auala. E le gata i auala galue a ua avea ma vaega ua alaala ai foi ma nisi o le mamalu o lo matou Itumalo.

O le suavai; o lea ua maitau atu ua uma ona folasia e le Pulega o le Suavai ua uma ona i ai le tupe faataatia e \$65miliona e faaoo atu ai le suavai mai Fuluasou agai i Samatau ma o le a avea lea ma mea e faamanuia ai le manaoga o nuu a uta o Vailuutai, Faleatiu ma Satapuala.

Ou te fia paia foi le sui usufono mo Vaisigano Nu.1 lea e faapea e faalua sui usufono. Mo lo outou silafia a vaelua pe a faapea e oo se filifiliga o le a disadvantage le isi nuu o lo matou Itumalo; ae afai e fai faatasi o le a faapena ona ave avanoa taitasi ma avanoa tutusa i nuu uma e 5; ae a faapea e vaelua ina ia faapena ona talosaga atu ai i e o lo sailia lea tulaga ona e le gafatia e matou le vaeluaina o Aana Alofi Nu.3, ona o le a avea lea ma mea e disadvantage ai isi nuu e tolu. Mo lo outou silafia, o se taimi muamua lenei ua tulai mai ai se sui usufono mo Satuimalufilufi, o se nuu e auptio sili ona laiti lana au palota mai tausaga e 50 talu ona faavae lenei Maota ma le mea sa tofia ai Tama e omai i le taimi ua muamua.

Lau Afioga i le Fofoga Fetalai, ina ua pa le tamaoiga foi lea i Asia e taua o le tiger economy, sa suesue po o le a le mea ua ala ai ona mafua lea mea. Sa suesue ma mautinoa ai ona e faapea o le economy o Asia e faamoemoe i le mea e tau o capital exports. O lona uiga, e faamoemoe oloa e avatu i fafo i oloa e aumai i totonu. O le mea ua tupu ua tasi le tau o oloa e aumai i totonu ua afaina ai ma oloa e avatu i fafo, ma ua avea ai ma mea ua le mafai ai ona compete oloa nei ma isi oloa mai isi Atunuu. Ua alu alu suesuega ona faapea mai lea, o le tali – e faamoemoe lava tatou i o tatou eleele, lo tatou ea ma lo tatou sami. O le mafuaaga lena na ou alu ai ma le lipoti a le WSTEC ma le lipoti a le Ofisa o Faatoaga aua o ki ia o le tatou lumanai.

Ina ua ou tilotilo i le lipoti a le WSTEC o le tele ia o le tamaoiga le la e i ai ae fai lava sina faaletonu o le tupe maua. Na toe fesili lea, po o le a le mea na aumai ai muamua tagata mai Asia e omai e faatino galuega i totonu o Samoa i la vaitaimi? Lau Afioga i le Fofoga Fetalai, e tuu atu se manao ma se fesili ina ia toe uia ia tulaga, pe mafai ona toe aumai nisi mai Asia e faapena ona galulue i galuega o fanua o Samoa ina ia faapena ona toe manuia ai le tatou lumanai.

I le tulaga o le sami, o lo o taatia nei i le Malo o Amerika i totonu o le ogasami loloto ua fai ai faatoaga – deep sea fishing – ma e talitonu e mafai ona faia e le Malo o Samoa ma o le luitau o le muamua lea i Atunuu o le Pasefika ona fai ni faatoaga i totonu o le ogasami loloto. O totonu foi o Asia o lo o i ai le Atunuu o lo o faamanuia ai le faiga o faiga faiva e le o totonu o le ogasami loloto a o tafatafa ane. E ao ai i le Malo o Samoa ona tilotilo i tulaga ina ia tatou faamoemoe lava tatou i o tatou laueleele ma o tatou ogasami.

O le isi foi atinae ua oo mai i lenei vaitaimi o le talutalu fou o le itu tau taaloga. O le taimi muamua na o le taaalo; a o lenei vaitaimi ua fai ma mea ua maua ai ni galuega ma tulaga faapena. E talosaga atu ai i le mamalu e ala i lau Afioga i le Fofoga Fetalai, toe lava o lo matou nuu o Satuimalufilufi e le o i ai se malae lakapi ae moomia lea tulaga.

E ao foi i le mamalu, e ala atu i lau Afioga i le Fofoga Fetalai, ona toe silasila totoa i le tofiga o CEO po o Ofisa

Saunoaga Faataupou a Sui Usufono 1961-2011

Sili o Pulega o Matagaluega taitasi. E ao ai ona toe tilotilo totoa ma ia saili lelei nisi e agavaa tatau mo le faafoeina o a latou galuega aua mo lo outou silafia, o le mamalu lea e faamoemoe i ai a tatou tonu ma a tatou tala faapea a tatou fuafuaga e faamoemoe mai fautuaga a alii ma tamaitai nei.

I totonu o le Kamupani a le Telecom Samoa Cellular lau Afioga i le Fofoga Fetalai, ua moomia se isi gateway mo Samoa. Mo lo outou silafia na agi nei le afa a ua faatu i luga le gateway a ua pogisa atoa tatou, lea e manaomia ai se isi gateway mo fesoootaiga ma nuu mamao ma e tatau foi ona silasila le Malo o Samoa ia ave Samoa ma gateway o isi nuu o lo o latalata mai po o isi nuu o lo o i ai. O lona uiga, e dial mai latou iinei ma faapena ona alu ai i fafo; o le isi lona fuafuaga ma le isi lona revenue earner e le o silafia e tatou, atonu o i ai se fuafuaga a o lea e toe faamantu atu. O ni faafitauli laiti o lo o maua mai le tulaga tau telefoni e peiseai ua pau laitiiti le latou service delivery o lo o ave i ai le private operation; ae peiseai e le o faapena ona ogatasi ma galulue ma le auaifaluega. Mo lo outou silafia, ua te i lava ua tipi telefoni tala atu ananafi ae leai se warning ae sau ai le faaupuga ua tipi le telefoni ae aveese ai ma le tulaga o le public relation o le tulaga faapena.

O le tulaga i le Falemai, e toe uunaia le faamalosiā o le awareness programme i mea tau taumafa ma le tulaga i faamalositino i alaafalaga taitasi. E pei o lo matou Itumalo ia faapena ona faamautuina le tulaga tau aoaoga i ni vaitaimi ma mautinoa e tatau ona i ai se monitoring mechanism e iloa ai o lo o lelei ma fua mai lea fuafuaga.

O le Matagaluega o Faatoaga e pei ua uma ona logologo atu. O lea na saunoa nisi o le matou Komiti e faapea o se taimi o i luma sa mafai ona avatu ai ni masini e faatoa ai le fanua – a sua toga kapisi ona avatu lea o le masini a le Malo e fesoasoani e sua ai. Lau Afioga i le Minisita o Faatoaga pe mafai ona toe silasila ane i lea vaega ma taumafai e tufa fua atu ni fualaa e faaoga. Ia, e faapena foi ona fai ni aoaoga faavaitaimi i communities ma fai ai foi ma se monitoring system ia mautinoa ai o lo o aoga ma fua.

O le itu tau education scholarships; sa i ai se fonotaga e le i mamao tele atu sa tele ina pasia ai manaoga na tuuina mai e ē o lo o fia aoga ma fia sikolasipi, a o lo o maitau po o le a tonu le mea o lo o finagalo i ai tatou. O lea ua maitau atu ua toatele le mau Loia, toatele le mau Suetusi a o lea e fai atu o le ki ma le tatala o le lumanai o luma i le gataifale ma le tatou laueleele. E manaomia le mea e tau o le white-collar i mea faasaenitisi i le itu tau Ofisa o Faatoaga ma le Ofisa o Faigafaiva.

O le a toe foi mai i le itu tau taaloga. E momoli atu le faafetai tele i le Malo ona o lana fesoasoani tele i taaloga. Mo lo outou silafia o lo o i ai ma le faaupuga lea o sports tourism o lo o maua mai ai nisi seleni ona o taaloga e omai ai tagata tafafao mai e pipii faatasi ma atili maua ai tupe

maua. O le talitonuga o taaloga o le isi lea revenue generation machine, starting from next year.

O le itu tau tourism; ua uma ona tatou silafia ma o lo o faapena ona faataitai mai i o tatou Atunuu o lo o latalata mai o le isi lea atinae e tatau ona silasila i ai le Malo ina ia tuu i ai se vaega tupe lelei ina ia faaleleia lea tulaga.

I le Water Authority, ou te talitonu o le isi lea Matagaluega e aupito sili ona faigata ma taua aua o le mea aupito sili ona faaogā ma taua i le olaga o le tagata. Mo lo outou silafia a i ai lau telefoni, eletise, vai, ae a leai sau tupe e le tipia lava vai ae tipi uma mea na e lua. Ou te talitonu e le aoga ona faatino lea galuega tusa pe leai se polofiti a ia faapena ona maua le service ia inu ma taumamafa uma tagata, ma e ou te talitonu o lo o i ai foi se tupe a le Malo o lo o fesoasoani ai e talosaga ai – a fai se \$4milionā e tuu i ai i tausaga uma e faapena ona faatino ma faataunuu le faamoemoe.

O se tala agai i le Tala o le Tupe e avatu le faafetai tele ona o lea e maitau atu o le matua healthy, strong tele lelei le Tala o le Tupe. O lea ua silafia e \$37milionā lea ua ave i taaloga faatasi ai ma le \$70milionā o le tupe faapoopo i lenei tausaga.

Lau Afioga i le Fofoga Fetalai, ina ua fesiligia le Malo o Iapani po o le a le mea e ala ai ona omai pea o latou tagata e faatino la latou galuega i Samoa ma isi Atunuu o le Pasefika ae fai mai le tala - muamua, mo le aumai o le fesoasoani; o lona lua o le isi lea auala e inject ai le tupe a le Malo i totonu o le Private Sector. O lona uiga a ave se \$1milionā i le Kamupani lea e uma ane le tausaga ua fanau mai lona \$1milionā ma o le tala la e avatu ai i le tupe o lo o faaalū i taaloga, o lo o inject agai i totonu o le tatou private sector ma e uma lenei tausaga ma le isi tausaga o faapena ona toe fanau mai lea tupe tele.

O le tala faataitai, e lua tamaloloa sa o e taumafai e fai se loan mai se faletupe; o le isi tamaloa e na o le teu lava ana tupe a o le isi tamaloa na o le loan lava ma totogi ana aitalafu. Oo atu i le faletupe tilotilo atu le pule o le faletupe, e leai se record a le alii lea na o le teu lava o ana tupe. A o le alii lea e aitalafu ma totogi ana tupe o lo o i ai lana record. O lona uiga, na ave le loan i le tagata lea e fai ana aitalafu aua e iloa totogi ana aitalafu, ma nei te i ua faasea mai nisi faapea ua tele se aitalafu a le tatou Malo, ua ala ona tele ona e lelei ma o la e iloa totogi ana tupe.

O le VAGST, e sili pe a ou taua faapea is a Christian form of tax. O le form of tax is a fair and honest way of tax. A foi o le tax lea seiloga e te alu e faatau faatoa tax oe. A avatu a la lau tupe ave teu e le tax, vagana lava ua e faatau ona lafo lea o lau lafoga. Ae lou Itumalo aua le popole tatou; o le tax lea o lo o faamoemoe i ai, o lo o tele le faatau, tele le tupe, ia ma kamupani, e leai se mea o le a afaina ai fua tatou.

O le tala a se tasi alii lauiloa pe tautaua fai mai o le VAGST o le investment lea mo tatou alo ma fanau i luma, ma e fesoasoani foi i le control ina o le deficit. O lona

uiga a tatou falelei nei, leai se GST leai se tax, ia o ai o le a faatumua, o ai o le a faia le va lea o le a fai nei? Ou te manatu ai a i toeaiaa foi ia i le taeao ia ou te sau ai, na o sina tamai pu lava o le palapala faatumu, na o sina tamai pu lava o le palapala faatumu. Aua ua pu nei le palapala ae tuu, oo i le vaiaso lea sau ua faapea le pu, o ai o le a faatumua? Ia o le ala lena o le tala.

I le 1992, o lo o maitau atu o le Malo o Thailand ua aveese uma tax, ua pau lava le mea lea e tupu na o le VAT, na o le Value Added Tax. O lona uiga, it's a fair and honest form of tax. I le tausaga na uma atu nei na fai foi sutesuga a Peretania i totonu o feafaatauaiga ma fai ma le upu, Value Added, o lona uiga mo salary, reasonable tax, increase dividends in shareholdings in companies shares. O lona faataitaiga, o lea ua 15% le tatou VAGST; ia a faapea e i ai lau stock e \$100,000, e tei lava ua faaopoopo le \$15,000 i le \$100,000. E 115,000 lau stock. O lona uiga a alu atu nei le tagata e faatau i le faleoloa e \$100,000 maua le \$115,000. O lea e fai mai le Afioga i le Minisita o Tupe, e faalua masina faatoa avatu lau... o lona uiga e \$15,000 lea e te uua i le 2 masina e mafai ona e alu toe faatau ai isi mea? O lona uiga o lea ua add, avatu le avanoa ia oe e te faaogaina ai le tupe lea, a uma le 2 masina ona ave lea o le tupe a le Afioga i le Minisita o Tupe.

Ma o le isi foi itu o le lelei o le VAGST, fai mai e control ai purchases. O lona uiga o lea ua ou iloa nei e tax au pe a ou faatau, ou nofo loa ua ou le faatau, a? A control ai purchases, ua control foi la e le Malo le aumaia o oloa i totonu. Ua faaitiitia ai foi la ma tatou tupe e alu e aumai ai oloa i totonu.

Lau Afioga i le Fofoga Fetalai ma le mamalu o le Maota, ona pau lena o se mea ua tuu atu i lenei taeao.

Ma le faaaloalo lava.

Afioga VUI TUPE IOANE



Itumalo Faaalalafaga:

Faasaleleaga Nu.4

Filifilia:

11 Oketopa 2006

Faatauto:

13 Novema 2006

Lauga Faataupou:

16 Ianuari 2007

Faafetai i lau Afioga i le Fofoga Fetalai mo le avanoa ua tuuina mai e fai ai se upu a lenei usugafono.

O lea ua tea i lagi le tatou faapolo ma le faasagi i le Atua e ala i le taulaga osi e lau Afioga i le Fofoga Fetalai i lenei taeao. Ae o lenei itula ua sausu falele le manu nai Utufiu ma ua fia gagana foi Faitolo aua se upu a lenei usugafono aua ua aliitia le Maota i lenei taeao. Ua paia ai la Tiafau nei o le malae o le faautugatagi a Samoa, o lea ua potopoto

le ava sa ua atoa foi faga i Laua, o lupe foi sa vaoeseese a o lenei ua fuifui faatasi. Ua afio lau Afioga i le Fofoga Fetalai, ua afio foi lau Afioga i le Palemia, lau Susuga Tuilaepa Lufesoliai Sailele Malielegaoi. Afifio a outou Afioga i tamaitai ma alii Minisita o le Kapeneta, afifio foi sui usufono mamalu uma o le Palemene ma le paia o lenei Maota.

Ae ou te le i asaina le gasu o le taeao, ou te muamua ona ou toto le niu o le tuaoi ma ou toto le taamu teevao aua le faafogafoga ma le tapuaiga a Samoa aua e faigata o le i'a e iviiviva. Tulouna le tapuaiga a Lana Afioga Mamalu O Le Ao o le Malo Tutoatasi o Samoa, lau Susuga i le Tapaau Faasisina, lau Susuga Malietoa Tanumafili II, e te ee i lou nofoa vaevaeloloa ma lou fala na folaloa ma lou tala na atoa e faafogofoga ia te Oe Samoa. Tulouna le tapuaiga a Sui Usufono o le Fono a Sui Tofia, a lua Afioga i Tama a Aiga, lau Afioga i le Tuiatua Tupua Tamasese Efi ma lau Masiifo, lau Afioga i le Tuiaana Tuimalealiifano Vaaletoa Sualauvi II ma lau Masiifo.

Tulouna foi le afio o lau Afioga i le Faamasino, le Peresetene, tamaitai ma alii Faamasino ma le mamalu o le Faamasinoga. E le faagaloina foi le mamalu i Faaluuluga o Matagaluega, Faalapotopotoga a le Malo faapea le aufaipisinisi, aemaise o Malo mai fafo.

Ou te faatulou atu foi i paia faaleaganuu aua le tapuaiga a Samoa, le paia i Tama ma o latou Aiga, o Aiga foi ma latou Tama, ae tainane le Usoga a Tumua ma Pule, Ituu ma Alataua, Aiga i le Tai ma le Vaa o Fonoti.

E le faagaloina foi le tapuaiga i le Motu i Sasae, i le afio o lau Afioga i le Kovana Sili ma le Lutena Kovana, le Fofoga Fetalai ma sui mamalu o Maota e lua. Le paia lava lea aua Sua ma le Vaifanua, Fofu ma Aitulagi, Ituu ma Alataua, Saole ma Saleaamua ma le Launiu na Saelua. Le afio o le Laau na Amotasi, Faatuiolomotu, Tootoo o le Faleula ma upu ia te oe le Manuatele.

Ou te faatulou atu foi i Taitai o Ekalesia Kerisiano uma i Samoa aemaise le Aufaigaluega Paia a le Atua i so o se fata faitaulaga o lo o faafalelemalu i nuu ma afioaga aua le upu folafola o le faaolataga mo Samoa ma ona tagata. Lepa ia la i le Foe ae mapu i le Too e pei o le fetalaiga i le Tautai o le Namo, aua o lea ua tepa i ula tagai i ula le aso, a o le a faapito augafa ia se faamatalaga i lou Itumalo o Faasaleleaga Nu.4, e faatalofa atu ai i lou nuu i Lano, aua le afio o le Aiga Satuala o le Aiga Faalagilagi, afio lo outou falefa o alo o Vui, lau Afioga Umamalu, lau Afioga Seinamolava, lau Afioga Tafilipepe, lau Afioga Nafouaina.

Lau Susuga Iiga o oe o le Maopu, afifio alo o Vaafusuaga ma lau Susuga Sua, alaalatai foi oe le Matua Fetalai lau Tofa Malaelulu, alaalatai oe le Aimalae ma le Nofoaluma, faapea le mamalu o Salemuliga.

E faatalofa atu foi i le afioaga i Asaga, i le afio o le Tauso ia Matafeo, alaalatai lau Fetalaiiga Leatuavao ma Salepatu. E faatalofa atu foi i lou nuu i Puapua, aua le afio o le paia o le Aiga Satuala ma le Maopu o Falenaoti,

Saunoaga Faataupou a Sui Usufono 1961-2011

alaalatai le mamalu i le nofo a ituai i le Pule a Sealiimalietoa ma le mamalu ia te oe Salemuliaiga.

Liliu le vai o le tamaitai, ou te faatalofa atu i le Aufaigaluega Paia a le Atua o lo o faapaulia ma faafale le-malu i le afioaga o Satuala. Faafetai mo a outou talosaga, o lenei ua maua le malosi ma ua maua ai foi se upu a le ta usugafono ona o lau tatalo i aso faipea. E le faagaloina le tapuaiga ma la outou tuualalo faletua ma tausī, saoa ma tamaitai, aemaise le malosi o le nuu le aumaga a Muagututia.

Avea foi lenei avanoa e momoli atu ai le faafetai i lau Susuga i le Toeaina, lau Afioga i le Taitaifono ma le Ekalesia i Magiagi, i le mea o lo o afio ai Usoalii ma Gafa, aemaise o aiga o alo o Malietoa, alaatai ai Sataga ma Fuata mo la outou tapuaiga le leoa. Faamalo tatalo, faamalo taupati, aemaise o le tapuaiga faifaiepa.

Ou te talitonu o lea ua tuanaī le atuava ma le atuvasa, o fesouaiga sa faafeagai ai lo tatou Itumalo ma ana faiga palota tele i le la tausaga, sa tatou saili i se tofa a o se faautaga, ina ia faia mai se lupe i le fuifui, peitai ane, talu ai ua saili i le foga o le Malo le sulufaiga o aiatatau, ua ala ai ona seu vaega ma tautuauega so tatou sao ia Manuvao ma iu ai ina toe faia le ta filifiliga e ala i le faiga palota laititi ia Oketopa. O lenei la ua tini pao le uto ma ua atoa ai tino o le tama ina ua afe le tofa ma le faautaga e aveā au e fai ma sui o le ta Itumalo i le faalagamaea a le Palemene o Samoa.

Ou te avatu ai le faafetai ma le faamalo ina ua iu ma le manuia la outou filifiliga, o la outou pule lea, o le a ou sapaia faatuaelele, aua e le i manatu o le a outou sii le fale o Asomua i le mauga, a o lea ua outou faatietie lou nei tagata i luga o le maasalafa. E leitioa upu o le Tusi, “Aua na fai Oe ma fesoasoani ia te au, ou te olioli foi i le paolo o ou apaau, ua pipii atu lava lou loto ia te Oe, o lou aao taumataua ua tofiaina ai au.” E talitonu lava le agaga e leai ni manuia o ia te au, aua le faaeaea lea, ae tatou te faalagolago pea i le Atua foai manuia ina ia sisila pea Lona alofa tunoa ia te outou lou Itumalo.

E momoli faapitoa augafa foi se leo ma se faafetai le lava ia i latou uma o e sa lagolago mai ia te au e ala i lo latou finagalo faaalua i le faiga palota. Faafetai i lo outou tuuina mai o le talitonuga i si ou tagata faatauvaa, aua e talitonu le lagona, o le toatele e le i maua se taimi e feiloai ai, ae faafetai i la outou talitonuga ua le ese lea ma le fetalaiga a lo tatou Alii, “Amuia i latou e le vaai mai ae talitonu.” O la outou faaalalo lea o le a ou paleina mo lenei lima tausaga.

E faafetai faapitoa foi i lau Susuga Sua Rimoni i lau lagolago. E ui ina eseese a ta Vaega Faaupufai, ae talitonu le lagona sa e silasila ia tasi lo ta faanaunauga i le tausiga o le nuu ina ia tumau le toafilemu ae saili se manuia lautele ae le na o le tagata e toatasi.

Ou te fia avatu foi le faafetai i tamalii sa matou tauva, lau Afioga Vui Seinamolava Sale, lau Afioga Peseta Vaifou

Tevaga ma lau Afioga Vui Viti. E le faigofie le sailimalo aua e le i fausia Roma i se aso e tasi. Faafetai i lo outou malolo faatamalii, ua leai se mea e gase i lo tatou Itumalo, aua ua mafua mai ona o lo outou finagalo folasia i luma i o tatou nuu taitasi. Faafetai mo le lagolago ua aumai, e manaomia lava lo tatou galulue faatasi aua se manuia o lo tatou Itumalo. A o le tatalo ia manatua pea, ia aua ne i aveā faiga palota ma mea e manunu ai le toau i pulega a alii ma faipule aua o aiatatau lava ia a tagata e faatino e tusa ai ma le Faavae o Samoa.

E faapea foi ona aveā lenei avanoa taua e molimoli atu ai le faafetai ma le faamalo i le sa seei i le Nofoa o lenei Itumalo i lau tofa i le Nofoluma, lau Fetalai Hon Mulitalo Sealiimalietoa Siafausa. Faafetai mo lou sao taua i si o tatou Itumalo. E le tauilo foi tama a tausala aua ua iloa ala o i'a i le mau galuega eseese sa e faia mo lo ta Itumalo i le tele o tausaga. Faafetai mo lau auaunaga le faalogologo tiga, e te tautua i le ao atoa foi ma le po, e le gata i ou tiute faasui usufono o le Itumalo ae o galuega faale Malo sa tulai mai ai lau Tofa i tulaga faa-Minisita. Malo faaeaea, malo le tauivi i mea lelei. Ae talofa e i lou titi ua le tau ma lou pale ua le soo ona o le faaiuga a le Faamasinoga. E talitonu lou manatu, o le muta o nisi o galuega o le amataga foi lea o nisi mau galuega lelei e moomia ai lau faautautaga e pei ona e faaalua i taimi na aveā ai oe ma sui usufono o lo tatou Itumalo. Faafetai mo faamanuiaua aua aumai ou te faaauuina ai galuega mo lo tatou Itumalo. Ia alofagia e le Atua lau tofa ina ia faatumauiua pea lou agaga galue, ia maua foi e oe le loto faamagalo ina ia tatou fai ai pea le finagalo o le Atua ae aua lava o tatou loto. Ia faamanuia le Atua i lau Tofa ma le tausī aemaise le aiga alii.

Lou Itumalo e, o lenei taimi ua ou manatua ai le folauga a Tupu o le Atunuu. Ona faapea lea o se leo, fatalele maia ae ou fatafola ae se i taumafai se sao o lo tatou Itumalo. Lau Afioga i le Fofoga Fetalai, e fia tuuina atu nai talosaga a lenei Itumalo pe afai e afea e le silasila a le Malo.

O Taligalu: Lau Afioga i le Minisita mo Galuega, Felauaiga ma Atinae Eseese, se i e silasila ane i taligalu o lenei Itumalo e amata atu i Lano seia paia Puapua. Ua i ai vaega o matafaga o lenei Itumalo ua maea ona fai ai taligalu, peitai e i ai le pitonuu i Lano o Vaovai o lo o mafatia pea i le sami pe a oo ina sua o'oo'o le tai aemaise foi o alia tetele o lo o i ai pe a malosi timuga. E tele ina tafua le oneone i le sami ma vave ai ona aia fanua o aiga o lo o alaala i lea vaega.

E faapena foi se vaega o Puapua o lo o mafatia pea ma ua tauau lava ina oo mai le sami i maota ma laoa o nisi o aiga ona o le malosi o le tai. O manumanuga ina ne i aafia ai se soifua ma faaleagaina ai meatotino ae o mea e mafai ona foia.

O le Faletalimalo i Puapua: e le o po se lilo ua silafia e lau Afioga i le Palemia ma le Afioga i le Minisita mo Galuega o le Paeaiga talu ai le naunautaiga o lo o i ai lenei

nuu o Puapua i se atinae taua. Ou te talitonu o lenei eleele ua maea ona faamatuu atu e le nuu mo lea atinae, ae peitai, e le i ogatasi foi le futia ma le umele i lea taimi na ala ai ona faaletonu ma ua mafua ai ona le faataunuuna nisi o faamoemoega o e sa taumafai e faatino lea atinae i aso ua sola. O lea foi sa afifio atu lava le Malo ma silasila i ai i le aogā ma le taua tele o lenei atinae i totonu o lenei nuu, e le gata i lea a o se tautua foi lea mo le Itumalo atoa ai ma le maua ai o galuega a tagata ina ia maua atili ai le soifua faatasi o tagata o le Itumalo nai lo le toe tau saili mai o galuega i Apia nei. O lea e talosagaina ai le Malo mo se fesoasoani i nisi o faletalimalo tetele po o nisi foi mai fafo e fia fai paaga mo le fausiaina o ni faletalimalo i Savaii ina ia maua ai pea e lo matou motu galuega mo ona tagata aemaise o le sosolo atu o manuia o lo o selesele pea e Upolu.

O auala galue: faafetai mo galuega i auala galue e le i mamao atu nei ona valitaina mo Lano ma Asaga, peitai o lo o totoe ai Puapua e le i i ai lava se auala e agai i uta ua valitaina. E talosagaina ai se i silasila ane i le auala o lo o i ai se faleaoga tulagalua se i sosoo atu i uta i le mea o lo o i ai le pamu vai aua e faigofie ona solo atu i ai le nuu ona o lo o ua i ai le eletise ma le vai, ae toe o sina auala ia lelei e faafaigofie ai le feoaiga a lea pitonuu.

Lua, o lo o i ai ni pou telefoni – transmitters – i uta i Puapua o ni atinae a le Malo e tataua ona puipui i ai le nuu. Pe a tusa ai ma le finagalo o le Afioga i le Minisita mo Galuega, Felauaiga ma Atinae Eseeese ma le Afioga i le Minisita mo Fesootaiga ma Faamatalaga Tekonolosi, pe e le faigofie ona teu atu le auala galue lea e oso sao atu i Puapua nai lo le tau taamilo o le taavale i Patamea? O le a le pine ona aoga ai itu e lua mo le nuu ae faapena foi ona faigofie ai feoaiga i galuega i le faaleleia o ia pou i se taimi vave.

O auala laupapa: o lea ua maea nei ona fausia se auala sima i Lano e sopoia ai le alia tele agai i Sisifo i le Itu o Tane. O lea auala sima ou te talitonu e le talafeagai ma le vai o lo o i ai, ae peitai ane o lea ua maea ona fausia. Pau lava le talosaga lau Afioga i le Minisita, se i tagai ane ona o lo o feagai le nuu ma se faafitauli ona ua le mafai ona tafe sao le vai i le sami. O le mafuaaga ona ua poloka e le auala sima lea o lo o i lalo o le auala laupapa fou. I aso ua tea sa faaaoga lea vai e fai ma vai taele. Sa faaaoga foi e fagota ai le tele o le i'a, ae ua le toe maua nei ona o le mafuaaga lea. O i'a foi nei e masani ona feoi i uta ma tai e agai i le togatogo aua o i ina e tautuufua ai.

Sa faapea foi e i ai se lipoti a le Matagaluega o le Siosiomaga ina ia o faatasi ma tusi o tauofoga ina ia silasila totoa ai e le gata ia faatino galuega ma atinae a le Malo ae ao foi ona seu silasila i aafiaga o lea vai. O le molimau a nisi ua amata ona pepe i'a i totonu o le vai lea. O le isi auala sima, se i silasila foi i ai aua a oo ina tafe e poloka ai le feoi o Savaii mai le Itu i Sisifo e agai mai i Sasae aemaise lava le taimi e tuli mai ai le vaa usu.

O le malae taalo i Puapua: e talosagaina le Minisita mo Aoga, Taaloga ma Aganuu mo le faateleina o le malae o lo o i ai nei ina ia gafatia ai ni malae lelei se lua. O le sini autu o lea faamoemoe ia avea lenei malae ma malae taalo faava o Malo ina ia mafai ai ona faatinoina taaloga e pei o le lakapi, soka ma isi taaloga. O lea foi ua talosagaina le Iuni Lakapi a Samoa mo le faia o se taaloga o le Ipu a le Pasefika po o le Pacific Cup i lea malae mo le 2007.

O nai manaoga lautele mo si o matou motu. O le mea lelei mo Upolu e lelei foi mo Savaii. E momoli atu le faafetai i le Malo aemaise o le Afioga ia Toleafoa Elon Betham ma le Pulega o Uafu mo le uafu faava o Malo ua fausiaina nei i Salelologa. O lo o maitauina o lo o galulue pea le aufaigaluega mo le faaleleia o le uafu aua lenei auaunaga ma le tautua faifai pea mo le Atunuu. E faapea foi ona le faagaloina le faafetai i le Kamupani Vaa a Samoa i le taimi o le pisi i le Kerisimasi ma le Tausaga Fou, sa matauina ai le galulue punouai i le tautuaina o le mamalu o le atunuu faimalaga i motu e lua i Upolu ma Savaii. O le mea moni, ua iloa ai e le toatele o le aufaipisinisi ua silasila i Savaii ua amata ona agai i luma i tulaga faapisinisi, e faapea foi le toatele o Upolu faatoa toe maua lea o le avanoa e asiasi ai i aiga ma iu ai ina fai a latou saofai ma toe vave ai ona manatua o i latou lava o Savaii mao'io'i. O le tulaga siisii pea lea o le tulaga atinae o si o matou motu o Salafai, ua le gata la o le taulaga fou i Salelologa ae faapea le anoano o nisi o atinae ua mafai ona ausia ma fausia e lo tatou Malo. Ua tataua nei loa ona silasila ane le Malo mo le uunaia ma le faatuina o ni fale gaosimea i Savaii ina ia faaaoga lelei ai nei atinae taua, aemaise lava o se lala o le kamupani tele o le Yazaki Samoa ina ia fausia i Savaii, aua o le toatele o le aufaigaluega o lo o i ai e o mai i Savaii. O le a fesoasoani ai foi i faafitauli o le toatele o tagata e alaala i le taulaga ua avea ma ala e tutupu ai solitulafono e mafua mai le toatele o tagata ua aumau i Apia ae leai ni galuega. O le a fesoasoani tele foi i le maua ai o ni avanoa faigaluega mo i latou o lo o faamoemoe i ai le tausiga o aiga.

O le Matagaluega o Faatoaga ma Faigafaiva: e tuufesili pe o le a se tulaga ua silasila i ai le Malo i le popo, pe le tataua ona fai sina faatosina mo le aufai peepee ina ia fausia nisi fale i Savaii ina ia faaaogā i ai le popo a Savaii ina ia auina sao mai Savaii container peepee mo maketi i fafo. E fesiligia foi le tulaga o i ai le ava, o lea ua maua ua le faaaogāina lipoti a nisi o Atunuu i Europa sa tuuaia ai le ava i nisi o gasegase.

E fia tuuina atu foi se fesili i le tulaga ua oo i ai le naunautaiga ina ia aumai ma fausiaina le fale fasimanu i Tafaigata aua aano o manu fasi, aua o le tasi lena atinae o lo o uunaia pea i Savaii ina ia mafai ona auina mai atinae povi a Savaii i le Fale Pisupo o le Hellaby ma nisi o faletalimalo ma pisinisi o lo o latou aumaia aano o manu fasi mai fafo.

Saunoaga Faataupou a Sui Usufono 1961-2011

O le itu tau Aoga, ua tele nisi o aoga ua faakolisi e pei o aoga faaitumalo, ma o se laasaga lelei, peitai o lo o i ai le faafitauli o lo o faafeagai ma Asiasi Aoga ma faiaoga ona o le tau malaga mai i Upolu mo le faatinoina o mataupu ma le tele o fonotaga. O lea e talosagaina ai sina Resource Centre e faatu i Savaii aua lea faamoemoe ae ia faauluulu i se Assistant Chief Executive Officer ma lagolago i ai nisi o Asiasi Aoga ma nisi foi o faiaoga.

Falemai i Tuasivi: O lo o i ai gasegase o lo o tausavali mai i Upolu mo le siakiina o le tuina lea o le toto se i tulou, ona e le o atoatoa meafaigaluega i Tuasivi, a o ia meafaigaluega o lo o maitauina, e ese le meafaigaluega o lo o tui ai le toto i Motootua ese meafaigaluega o lo o faaoga i Savaii. O lea e talosagaina ai ona o le tele o tupe alu i le malaga mai i Upolu lea e oo lava i le \$200 e faaalu i le malaga e tasi, e aofia ai le taavale, pasese i le vaa ma le tausiga i Upolu nei. O nisi foi o gasegase o tamā ma tinā matutua ua faigata ona toe femalagaai. E manaomia foi ona toe faafou nisi vaega o le falemai ona ua tele ina faaleagaina ma tutulu.

O le Ofisa o Faamasinoga. E talosagaina sina fale lelei mo le faafoeina o taualumaga a le faamasinoga, aemaise o le Ofisa o le Matagaluega e feomai i nai potu o lo o i ai, aemaise o potu o lo o teu malu ai faila ma iuga o faamasinoga ina ia malu lelei mai faalavelave faalenatura po o mu.

O le Ofisa o Leoleo i Tuasivi. O taavale o lo o i ai pea le faafitauli i taavale ona o meafaigaluega e fesoasoani mo le faatinoina o galuega.

E tasi le taavale e le mafai ona fai ai le auunaga faaleoleo i le motu atoa mo le 24 itula, e le lava foi leoleo, o se faafitauli lea o lo o tulai mai pea i Savaii ma o lo o taumafai pea i ai le Matagaluega, ina ia faamalieina lea vaega, peitai, e ao ona silasila totoa pea i ai ona o lea ua amata ona solosolo atu o solitulafono o lo o taatele i Upolu e pei o le talepe fale i Savaii, ma o le a faatuputupulaia solitulafono e tutupu mai ona o suiga fou ua i ai nei Savaii.

O le Matagaluega o Leoleo ma Falepuipui sa tele se taimi o auauna ai, e ao ai lava ona tuuina atu nai motugaafa mo le silasila i ai o le Afioga i le Minisita ma le Matagaluega.

Kolisi o Leoleo: Ou te matua lagolagoina se finagalo ua ae i le Afioga i le Palemia mo le fausiaina o se Kolisi o Leoleo i Oloamanu i se taimi oi luma.

O le tasi lenei o fuafuaga ma o se miti o le toatele o Leoleo ina ia faia se kolisi aua le aotauina o le afaigaluega, ina ia lava tapena le Leoleo mo le faia o ona tiute. E talitonu la lou nei tagata, a le aoaoina a tatou leoleo i le tausaga o le tulafono, aemaise o le silafia vave o solitulafono e ono tutupu i le lumanai e le mafai ona maua e Samoa le atoaga o se saogalemu, aua o le aso ma le filiga, o le aso foi ma le mataigatila. E sau lava le aso ma ona mea e tutupu ai, ae ua lava tapena alii ma tamaitai leoleo, ina ia faatinoina tiute e tusa ma ala moni o le tulafono.

O le isi aogā tele o lenei kolisi, ina ia e le gata mo le Matagaluega, ae faapea foi ona faaogāina i nisi o Matagaluega a le Malo mo aoaoga ma a latou foi matafaioi, ia po o ni semina foi po o ni fonono e aofia uma ai le Matagaluega toatele.

Faafetai i lau Afioga i le Fofoga Fetalai, ia ona o lea ua saunoa lau Afioga ia o le a...

Faafetai lava i lau Afioga i le Fofoga Fetalai, ia o le a faapuupuu atu ia ma faauma atu ai le lauga a lenei itu.

O lea e faafetai ai le Afioga i le Minisita ma le Afioga i le Komesina mo le sauniaina o Oloamanu e faatu ai se kolisi i aso oi luma, ae faapea le nofoaga mo le toefuataiga o olaga o le fanau ua pau atu i le leaga, e pei ona tatala aloaia i le faaiuga o le tausaga na tea nei. E manaia le latou pese i lea aso, e faapea se tasi fuaiupu o le pese, “ua maua la matou ae le i maua lava outou”. Ou te le iloa la po o ai e faatatau i ai lea fuaiupu o le pese.

Falepuipui fou: Ina ia ogatasi ma fuafuaga faataatitia a le Matagaluega, o lea e ao lava ona toe silasila pe le ua tatau ona toe fausia se falepuipui fou e sui i le falepuipui o lo o i ai nei. O potu ua le talafeagai ma le toatele o i latou ua faafalepuipuiina, ae le o lelei foi mo le soifua maloloina o i latou o lo o nonofo ai.

Ona oo mai lea i Leoleo mo Malo Afaatasi. Ou te matua lagolagoina le faaauu pea o le tatou sao i Malo Afaatasi e ala i le galuega Faa-Leoleo. Ona o mafuaaga, o le tasi lenei o avanoa ua mafai ai ona fesootai lo tatou Atunuu ia ma le lalolagi lautele o lo o i ai. Ua tele ai ona silafia i nisi o atunuu si o tatou Atunuu o Samoa. Ua faafaigofie ai foi ona fetufaai ai malamalama faaleoleo ma isi atunuu aemaise o le maua mai ai foi o nisi o malamalamaaga e faaogā i inei. E le gata i lea, ua maua ai galuega tumau a nisi o leoleo ua mafua mai o le auunaga lenei e faia i totonu o Misiona nei. Ia a o le mea taua foi o le tupe o lo o maua e tele lava ina lafo mai i Samoa, ma ua siitia ai foi nisi o aiga o leoleo ma maua ai foi a latou foi meatotino e pei o fanua ma fale.

E talosagaina lava le toe silasila ane i taavale a le Matagaluega, o lea ua maua atu le ono o taavale i le Tala o le Tupe o le tausaga ua tea, peitai e manaomia lava nisi taavale lelei mo le faatinoina o galuega masani, aemaise o Taaloga o le Pasefika i Saute aua le leoleoina o games security o soifua o tagata taaalo uma o le a fai mai ma a latou meatotino e faalagolago lava i le lelei o le faatinoina o leoleo o a latou tiute, e le taitai ona gafatia e le ono fou lea lenei faamoemoe.

Puipuiga mai solitulafono faava o malo, ina ia foia vave solitulafono fou e faapea e pei ona maitauina i lenei vaitaimi, e talosagaina ai lava le Matagaluega ina ia ‘aua – ina ia faamalosi le vaaia o lo tatou gataifale aemaise o nofoaga i matafaga o lo o tele i ai i ai mataaga a tagata tafafao maimoa mai fafo, ona ua amata ona faaogāina e nisi mai fafo matafaga e faaulufale mai i ai fualaau ma vailaau faasaina i si o tatou Atunuu. Po o le faaogāina foi

Saunoaga Faataupou a Sui Usufono 1961-2011

o Samoa ma auala e toe faaulufafo atu ai mo atunuu taulalata mai o lo o malosia a latou puipuiga, e pei o Ausetalia ma Niu Sila.

Lou Itumalo e, e avatu malu i puega pe afai i la outou maitau mai, ua se i ama le 'ia a le tautai, pe ua le saa faoti foi le utu a le faimea. O le talitonuga a la outou auauna, o le upega a Pili e tautau ae fagota.

Afai ua le atoa mataupu o lo ta Itumalo i lau faafofoga mai, e i ai le muagagana a Samoa, "E tu manu ae le tu logologo," e lele a le manu ae iu lava ina tu, ae o le taulogologo, e le malolo. O le tuualalo ma le lagolago mai a le Malo, o le a faatinoina ai mea o lo o manaomia e lo ta Itumalo.

Lau Afioga i le Fofoga Fetalai, lau Afioga i le Palemia ma le Kapeneta, sui usufono mamalu o le Maota faapea le faafofogaaga a Samoa, o le a foi le leo o le sui usufono mo Faasaleleaga Nu. 4, lea o lo o avea ma fofoga o le paia o le Aiga Satuala ma Salemuliaga i le Maota Fono nei. Ou te faamalulu atu afai ua sala le pati pe le tautamalii se leo i lau faafofoga, ia malu ave i fale ma ia alofagia ia lafoaia i nuu le aina. Ia faamagalo le sui usufono, aua ou te talitonu o le faaiuga o se mea o le amataga lea o se isi foi laasaga fou, ina ia tulitulimatagau ai pea le ufi a le tamaitai, aua aso o i luma o lenei Paeaiga.

Ia aua ne i to le timu pe tafea le tauofe aua lau susuga i le Tapaau Faasisina, ni lagilagia ma ni aolealea aua Sui Usufono o le Fono a Sui Tofia, lagi e mama lau Afioga i le Palemia ma le Kapeneta. Ia alofagia pea e le Atua lo outou tulai i le foe o le tatou Malo, lagi e mama lau Afioga i le Fofoga Fetalai ma sui usufono mamalu uma o lenei Palemene.

Ia faapea foi si ou Itumalo, ia aua ne i Gauolosaa i le Aiga Satuala, ni tootoo faataalolo aua Salemuliaga. Ia manuia tele le tapuaiga a Samoa o lo o faafofoga mai ae ou ola i le alofa o le Atua. Soifua.